






Duquesne University:











ARNOLDI GEULINCX

OPERA PHILOSOPHICA.

VOLUMEN PRIMUM.

---

EX OFFICINA FBATRUM GIUNTA D'ALBANI.



ARNOLDI GEULINCX

ANTVERPIENSIS

OPERA PHILOSOPHICA.

RECOGNOVIT J. P. N. LAND.

SUMPTIBUS PROVIDERUNT SORTIS SPINOZANAE CURATORES.

VOLUMEN PRIMUM.



HAGAE COMITUM

APUD MARTINUM NIJHOFF.

MDCCCXCI.

~~199.492~~

~~G 395~~

~~v. 1~~

~~L~~

B3903

1891

vol 1



## L. S.

Arnoldi Geulincx, utriusque Belgii decoris, nomen et placita quaedam haud ignorant qui historiae philosophicae aliquam operam dederunt; scripta vero cuncta inspicere vix ullis contigit. Nec mirum, cum illi, patria profugo et praematura morte abrepto, amici quantum scimus non superfuerint praeter senem optimum Abrahamum Heydanum <sup>1</sup> et juvenes alumnos, quibus instituendis totum se dederat. Horum quia nemo cathedram publicam adeptus est <sup>2</sup>, exinde praeceptoris defuncti doctrina nonnisi extra scholas fautores habuit, eosque studio magis quam ingenio vel auctoritate insignes. Juventus quidem academica, teste Ruardo Andala <sup>3</sup>, fama viri impulsâ, ejus dictata vel excerpta sedulo describere pergebat, et arcana sapientiae magis reconditae in his quam in libris editis contineri sibi persuaferat; quo factum ut typographi ea quoque, licet admodum imperfecta, deinceps, tam ut erant Latina quam in vernaculum sermonem translata, prelo mandare incesperint. Interea nescio quid religioni receptae contrarii in iis inventum est, et sensim negligi coeperunt, quippe quae nec theologi amplius, nec Spinozae sectatores, nec physicae novae Neutonianae praecones hominibus commendarent. Restant nunc paucissima singulorum libellorum exempla, quorum corpus integrum nusquam in bibliothecis exhibetur.

<sup>1</sup> De hoc nobilissimo theologiae professore novissimus scripsit J. A. Cramer in dissertatione inaugurali c. t. *Abraham Heidanus en zijn Cartesisme* (Utrecht 1889).

<sup>2</sup> Etenim Joannem Swartenhengst, qui ab anno 1672 disputationibus philosophicis praesidebat, post triennium quippe novarum rerum patronum ab universitate nostra relegarunt.

<sup>3</sup> In *Examine Ethicae clar. Geulingii* (Franequerae 1716), p. 24.

pen. Beekhaad H. Coebengh-6.25.54

Attamen Germanici praesertim investigatores, quorum industriam nihil etsi oblivione fere contritum latere solet, jamdudum nos edocuerunt, fuisse Geulingium non merum Cartesianum philosophum, sed suum, Spinozae, quocum nullum quidem commercium habuisse videtur, plus uno nomine vicinum habendum. Quamobrem deinde a quibusdam ipsius popularibus diligentissime conquisita sunt quae ejus fata parum cognita et labores illustrarent, item confirmatum est, in quibusdam locis rarissimi illi codices hodie afferrentur. Ex hisce studiis excreverunt utilissimi libri virorum doctissimorum G. Monchamp sacerdotis et V. Vander Haeghen <sup>1</sup>. Et ego, postquam per complures annos illius scripta praecipua collegeram et documenta universitatis nostrae perquisiveram, vitae relationem quantum ejus fieri poterat absolvi <sup>2</sup> et, cum jam omnia necessaria in promptu essent, operum editionem quam accuratissimam parare inchoavi. Animum addebant cum Metaphysicae Latinae donum, quod bibliotheca nostra publica acceptum refert viro doctissimo I. Bywater universitatis Oxoniensis socio, tum exemplum scholarum omnium quas apud nos habuit philosophus, liber nescio cujus jussu olim nitide exaratus et nuper eidem thesauro emptionis jure additus. Denique, quia graviores erant sumptus faciendi quam quos prudentes librarii sibi fusciperent, consilium illud cui Spinozam emendatius editum debemus, et huic similis naturae operi providere decrevit. Itaque jam eo pervenietur ut, quid sibi proposuerit Geulincx noster, quid nimis brevi vitae spatio perfecit, aequo judicio perpendere liceat.

---

<sup>1</sup> *Histoire du Cartésianisme en Belgique*, par l'abbé Georges Monchamp (Bruxelles et St. Trond, 1886). — *Geulincx, Étude sur sa vie, sa philosophie et ses ouvrages*, par Victor Vander Haeghen (Gand 1886). Hujus auctoris descriptiones bibliographicas quamvis eximias non erat opus hic iterum exhibere.

<sup>2</sup> *Arnold Geulincx te Leiden (1658—1669)*; Verslagen en Meded. der Kon. Akademie van Wetenschappen, 3de Reeks, Deel III (Amst. 1886). — *Arnold Geulincx und die Gesamtausgabe seiner Werke*; Archiv f. Gesch. d. Philos. Band IV, Heft 1 (Berlin 1890). — Hujus commentationis versio Anglica exstat in diario c. t. Mind, vol. XVI, n<sup>o</sup>. 62 (London 1891).



Dolendum profecto, quod hominis chirographa, excepto nomine ter subscripto quod in tabula depinxi, atque etiam epistolae ad eum datae prorsus perierunt, et solos tenemus tres quatuorve parvos libros quos ipse typis exprimi curavit, cetera omnia ab auditorum calamis originem trahunt. Illos ut erant describere satis erat, sublatis mendis manifestis, et punctis ita repositis ut sermonis contextus hujus aetatis hominibus promptius pateret; haec eodem fere modo tractanda erant quo veterum auctorum verba membranis eruimus. Nonnunquam ea quae primitus ore tradita erant, repetitionibus ut fit referta, aliquantulum contrahere visum est, ne lectoribus taedium moverent. Ceterum curavi ne quid dictum notitia dignum omitteretur, neve doctori cui (ut ait h. vol. p. 168) res verbis potiores videbantur, Latinitas obtruderetur ab ipsius usu aliena.

In disponenda scriptorum serie temporum ordinem secutus essem siquidem, ut apud Kantium fere aut Leibnizium, illustranda fuisset auctoris sententia pedetentim adulta. At materiae quae in hisce paginis exponuntur, pene omnes Lovanii paratae et intra paucos annos in lucem proditae, eandem ubique mentis conditionem referunt. Quamobrem malui, initio facto ab iis dissertatiunculis quas ille diligenter recognitas animi declarandi causa universae reip. literariae obtulisse videtur, deinceps tractatus logicos dare, quas excepturi sunt metaphysici, physici, ethici, eodem rerum ordine qui in Oratione I (pag. 42 sq.) commendatur, additis disputationibus quas alumni Lugduno-batavi auspice magistro defenderunt. Agmen claudent annotationes majores ad Cartesii Principia.

Ad Orationem illam et Quaestiones q. d. quodlibeticas verba adscripsi quibus editio princeps a retractata distinguitur. Annotationes historicas addere nolui, utpote operis molem nimis aucturas. Tantum obiter haec moneo. Quaestionum XXVII et XXV argumenta petita sunt e libellis duobus Hollandicis,

quorum exempla sunt in bibliotheca regia Hagana <sup>1</sup>. Res Georgicae in Quaest. XXVI narratae unde manaverint frustra quaesivi <sup>2</sup>. Goeterus ille, cui et Quaest. XXVIII et appendix XXV debetur, nomen habuit Anthonis Goeteeris, ejusque diarium anno 1619 editum in bibliotheca nostra academica praesto est.

Judicia quae de Quaestionibus et de Logica restituta olim tulit J. N. Paquot <sup>3</sup> quam parum acuta sint, facilius intelligetur quo quis ingenium seculi XVII et artis logicae rationem et historiam accuratius perceperit. Nec sane negligendum id quod Ritterus et Kuelbius animadverterunt, doctorem academicum, rei scholasticae quae tunc erat pondere impeditum, complura sapienti lectori supplenda relinquere coactum fuisse quae, ut in fine Orationis I innuitur, ab ipso dicta et frustra fuissent et minus tuta.

Supereſt ut menda typographica recenseam fero in plagulis detecta.

Pag. 8 vf. 6 legendum: suo Marte — vf. 14 *add.* [hujus ed. pag. 41] — P. 11 vf. 4 D. 16 M. DEC. — vf. 7 Seductores — P. 13 vf. 23 primum, — P. 21 vf. 1 feminae — P. 32 vf. 18 *claramque* — in marg. vf. 3 cementatis — P. 34 in marg. vf. 3 Sic — P. 35 vf. 1 *parentheſis* — P. 41 in marg. vf. 8 magnâ ſcientiâ, — P. 58 vf. 17 ſententiae — P. 69 vf. 13 frequentiores — P. 70 vf. 6 arrisiones,

<sup>1</sup> Cf. Catalogus van de Pamſletten-verzameling beruſtende in de Kon. Bibl., bewerkt door Dr. W. P. C. Knuttel, n<sup>o</sup>. 5647 et 2325. Hujus narratiunculae verſio Anglica exſtat Oxonii in theſauro Aſhmoleano (cf. Encyclop. Britann. IXth ed. vol. XXI p. 96 a in fine). Ubi noſter d. 1 m. Maji habet, illic tamen 2 m. Junii, et apud Adamum Olearium peregrinatorem 6 m. Julii legitur.

<sup>2</sup> Breviter ea memorat Petrus de la Valle (*Della condizione di Abbâs rè di Perſia*, in Venetia 1628, p. 91 ſq.), ubi dicit ſe jam amplius de iſſdem egiſſe in literis anno ſuperiore ad papam Urbanum VIII datis h. t. *Informatione della Georgia*, item in neſcio quo *Raconto delle regione ſottepoſte al moderno imperio di Perſia*. Vereor autem an haec viderit philoſophus noſter, imprimis ideo quod pro Catharinae nomine Keteuân, pro Tamaras Teimuraz l. l. habetur. Minus etiâ juvat A. de Gouvea (*Relation des grandes guerres et victoires obtenues par le roy de Perſe, etc.* Rouen 1647).

<sup>3</sup> *Mémoires pour ſervir à l'hiſt. litt. des Pays-Bas, etc.* t. XIII (Louvain 1768) p. 71.



— in marg. vf. 2 *suaviter fopuntur* — P. 71 vf. 1 *fi* — vf. 2 *tamen* — vf. 14 *respondeant* — P. 81 in marg. vf. 2 *Augustinus*: — P. 83 in marg. vf. 5 *Dominicani* — vf. 6 *Senensis* — P. 91 vf. 25 *et obtufam* — P. 93 vf. 16 *forenfi* — P. 95 vf. 5 *luxuriet* — P. 97 vf. 13 *thefaurum* — P. 101 vf. 18 *apud* — P. 102 vf. 9 *fit* — P. 103 in marg. vf. 2 *immenfam* — P. 105 vf. 13 *ferme* — P. 106 vf. 6 *fi*, *Mufarum* — vf. 12 *leges* — P. 107 vf. 28 *cerdones*, — P. 108 vf. 19 *ceras* [*leg. feras*] — P. 111 vf. 28 *liberius* — P. 115 in marg. vf. 2 *pronuntiavit* — P. 126 vf. 3 *fcite* — P. 130 vf. 18 *angulo* — P. 137 vf. 7 *Gubernatore* — in marg. vf. 4 *incendiis* — P. 139 vf. 17 *Chriftianam* — P. 155 vf. 17 *tractatûs*, — P. 157 vf. 20 *exaruit* — vf. 23 *Graece* — P. 158 vf. 7 *Chriftus* — P. 191 vf. 9 *perpetuo* et — P. 209 vf. 10 *truncus*, *et* — P. 278 vf. 28 *falfum*. C. C. B. L.

D. Lugd. Batav. m. Aprili a 1891.

J. P. N. LAND.





SUMMAE RERUM AD  
VITAM ARNOLDI GEULINCX  
PERTINENTIIUM.

---

Anno 1623 d. 25 m. Jan. Joannes Geulincx, civitatis Antverpiensis tabellarius literis Bruxellas portandis, uxorem ducit Mariam Strickers (alias Strickaert, Stricker, Strick, Stricx, Strix) in ecclesia B. M. Virginis.

A. 1624 d. 31 m. Jan. baptizatur filius Arnoldus in ecclesia Sti. Jacobi, sponforibus Arnoldo Strix et Gertrudi Woff.

Annis 1626, 1629, 1633, 1638 reliqui eorundem liberi Caecilia, Joannes, Aegidius, Josephus, in ecclesia B. M. V.

[Joannes anno 1647 Jacobi Jordaens pictoris alumnus factus, anno 1658 modo in collegium S. Lucae ascitus obiit relictâ viduâ.]

Annis 1637 et 1638 duas domus comparant parentes, mox in unam conjungendas.

A. 1640 Arnoldus Lovanii in paedagogium Lili recipitur, ubi in philosophia praeceptorem habet Guilielmum Philippi, Cartesianae doctrinae studiosissimum.

[De rebus universitatis cf. Valerius Andreas in Fastis Academicis Studii generalis Lovaniensis, Lov. a. 1650 editis.]

A. 1643 d. 19 m. Nov. gradum licentiae in artibus adeptus inter candidatos 159 ordine secundus, theologiae alumnis ascribitur.

A. 1646 m. Dec. petit ut admittatur ad concilium facultatis artium titulo professoris philosophiae [secundarii] in paedagogio Lili; admittitur falvis salvandis praestatque juramentum.

[Primiarum in paedagogio cathedrarum alteram tenere pergit Guil. Philippi ad a. 1650.]

A. 1649 d. 20 m. Nov. pater domum Antverpiensem Henrico fratri ejusque uxori vendit; d. 10 m. Dec. munere civico solutus, cum uxore Lovanium petit apud filium professorem habitaturus.

A. 1652 Arnoldus professor primarius creatur; m. Sept. nominatur inter examinatores pro gradu bacalarii, et a paedagogii regente quaestionum q. d. quodlibeticarum praefes designatur.

d. 16 m. Dec. habet *Orationem primam*, quaestiones illas auspicaturus.

[Disputatiunculas subsequentes ab alumnis recitandas ipse composuit.]

A. 1650 primum editae QUAESTIONES QUODLIBETICAE, Antverpiae, apud viduam Joannis Cnobbari.

A. 1654 m. Aug. inter universitatis decanos quinto loco recensetur A. G., theologiae licentiatius.

[Nimirum duae facultates erant juris canonici et civilis.]

A. 1657 d. 18 m. Jan. provifus de praebenda canonicali in basilica Aquisgranensi, non admittitur, quod probare non potuit legitimitatem parentum.

d. 17 m. Sept. inter tentatores licentiandorum nominatur.

A. 1658 d. 23 m. Jan. „DD. Lilienses dixerunt esse certum negotium „concernens paedagogium Lili, de quo cuperent informare facultatem [artium]; sed cum hoc non conveniens fit illud omnibus „indicare, petiverunt dari deputatos, quibus illud ipsum possent „communicare. Designati fuere D.D. Renfon, Beux, Scaille, Marcellis, qui tres priores absente ultimo plene informati fuerunt de „causa D. Arnoldi Geulincx, quondam professoris in Lilio, cur „nimirum et quare de unanimi consensu regentis et aliorum professorum ejusdem paedagogii fuerit a professoratu depositus, visis „etiam et lectis informationibus contra ipsum captis a Magnifico „Domino [rectore]; qui judicarunt DD. Lilienses non tantum potuisse „sed omnino debuisse ad dictam depositionem procedere.”

d. 24 m. Jan. „indicta et fervata est deputatio extraordinaria „in majori numero, in qua Magn. Dom. Rector legi curavit libellum „supplicem sibi ex parte D. Arn. Geulincx porrectum, quo exponit „quod a concilio Brabantiae d. 15 hujus obtinuerit litteras manu- „tenentiae in professoratu philosophiae quem habuit in paedagogio „Lilienfi, hic quoque lectas et Do. Damman successori suo in „eodem professoratu insinuat; quodque dictis litteris et insinua-



„tione non obstantibus, praefatus D. Damman ac alii uti ait „turbatores non desistant, quin immo et manum in ipsum exponentem injicere sine ratione, fundamento, aut aequitatis praetextu; „quare petebat injungi dicto Damman et suis, ut tenori dictarum „litterarum manutenentiae se conforment, interdicens interim „quibuscunque, ne quid in personam dicti Geulincx attentent donec „finito iudicio aliud statuatur. Ex deliberationibus dominorum „deputatorum conclusum est, quoad dictum libellum supplicem, „illum esse communicandum dicto domino Damman uti parti, ut „infra octiduum ab insinuatione ad contenta ejusdem deliberet. „Et quoad dictas litteras manutenentiae, praedictum Damman „eidem interim posse respondere et contra easdem rescribere.”

d. 11 m. Febr. in locum D. Geulincx a facultate proexaminator suffectus est.

[Anno 1630 d. 30 m. Sept. statuerat Consilium Brabantiae, nuperas Guilielmi Philippi ecclesiae Brugenfis canonici nuptias non esse impedituras quominus docendi munere fungi pergeret; at similem indulgentiam philosophiae professoribus in posterum recusatum iri. Itaque ad annum 1650 ille cathedram sine molestia occupavit, deinde per annos quindecim medicinam docuit. Quamobrem suspicari licet, veritos esse collegas, ne idem illud quod praeceptori prospere successerat jam tentaret alumnus, quippe cui virginem matri cognatam (imo fortasse filiam avunculi qui Arnoldi baptismo sponfor interfuerat) eodem anno 1658 nondum praeterlapso nupuisse compertum sit. Ceterum nihil vel inhoneste vel invitis legibus facti ei ab inimicis unquam palam exprobratum est.]

Eodem anno 1658 d. 7 m. Maji in Album Studioforum Academiae Lugdunobatavae honoris causa refertur „Arnoldus Geulincs Antverpianus, 33 annorum, Philosophiae quondam Professor primarius „Lovanii,” habitans in vico cui nomen de Garenmarkt, ubi suam gerere dicitur rem familiarem.

d. 6 m. Sept. examinandum se offert facultati medicae.

d. 17 m. ejusdem habita disputatione de Febribus Medicinae Doctor creatur.

d. 22 m. Nov. in albo civitatis sponsali commemoratur uxorem ducturus Sufannam Strickers e pago Wiert [Weert in provincia hodierna Antverpiensi], quae et ipsa in vico modo dicto domicilium

habet. Testes sunt Sebastianus van den Bos puellae fororis maritus et Sufannae mater Anna Lamberts.

d. 8 m. Dec. nuptiae celebrantur.

[De tempore quo, duce sine dubio Abrahamo Heydano, ecclesiae reformatae nomen dedit, non constat; attamen album illud non continet nisi eorum nomina, qui religione a se dissentientibus matrimonium spondebant. Heydano deinde, theologiae professore Cartesianae doctrinae amantissimo, et opibus et apud Curatores auctoritate multum valente, usus est patrono liberalissimo et constantissimo.]

A. 1659 d. 16 m. Martii a Senatu ei permittitur ut in philosophia collegia [privata] habeat.

d. 8 m. Aug. legitur in collegio Curatorum et Consulium libellus, quo rogat ut sibi liceat disputationibus palam habendis praefidere; id quod, auditis professoribus Golio, Bornio, de Raei, d. 8 m. Nov. ad tempus ei conceditur, attamen ea lege, ut intra fines philosophiae Aristotelicae permaneat, neu quidquam juris sibi vindicet academici sive officii sive stipendii impetrandi.

A. 1660 d. 7 m. Aug. Curatores adit, ut de argumentis aliquibus philosophicis palam et gratis dicere finatur. Consultis Golio, Heereboordio [in sola re physica Cartesiano], Hornio, de Raei, d. 8 m. Nov. cum hoc negatur, tum rescinditur id quod anno ante concessum erat.

A. 1661 d. 6 m. Mart. decretum per pedellum nostro significatur.

d. 17 m. Junii diem supremum obit Adrianus Heereboord, logices, ethices et politices prof. ord.

A. 1662 d. 1 m. Aug. Curatoribus dedicatur LOGICA SUIS FUNDAMENTIS RESTITUTA, quae prodit Lugduni Batavorum apud Henricum Verbieft.

d. 21 m. Aug. libelli auctor florenis septuaginta donatur. Simul ei deferitur Lectoris Logices officium, et annua 300 florenorum constituuntur.

d. 14 m. Oct. lectiones logicas auspicatur habita *Oratione secunda*.

A. 1663 d. 11 et 12 m. Jul. habentur disputationes physicae: Ifagoges partes I et II.

d. 31 m. Aug. Curatoribus dedicat METHODUM INVENIENDI ARGUMENTA, quae editur Lugd. Bat. apud Isaacum de Wael, cujusque ergo d. 4 m. Sept. sexaginta floreni ei attribuuntur.



d. 20 m. Oct. disputatio physica: Ifagoges pars III.

A. 1664 d. 26 m. Apr. disp. ethica: de Virtute et primis ejus proprietatibus.

d. 10 m. Maji disp. philosophica, continens Responſionem ad objectiones.

d. 18 m. Oct. augentur annua ad 500 florenos.

d. 26 m. Nov. disp. physica: Ifagoges pars IV.

d. 3 m. Dec. disp. physica: Hypotheses physicae.

d. 20 m. Dec. disp. philosophica de Conario sensus.

A. 1665 d. 4 m. Jan. Nicolao Staefvenisse dedicat SATURNALIUM s. QUAEſTIONUM QUODLIBETICARUM editionem secundam recognitam et auctam, quae prodit Lugduni Batavorum ex officina Henrici Verbieft.

d. 27 m. Jul. dedicat Curatoribus TRACTATUM ETHICUM PRIMUM, qui proſtat Lugduni Batavorum apud Philippum de Cro-y.

d. 28 m. Aug. triginta floreni tractatus auctori assignantur. Eodem die Professoris Extraordinarii titulo ornatus, in Collegii Ordinum Hollandiae subregentis domum vacantem migrare jubetur.

d. 9 m. Nov. acceptum honorem capeſſit dicta *Oratione tertia*.

A. 1666 d. 3 m. Apr. et d. 3 m. Jul. disputationes metaphysicae: Ifagoges partes I et II.

m. Oct. disputationes physicae duae de Respiratione.

A. 1667 d. 8 m. Febr. Ethices docendae veniam impetrat, auctis annuis ad florenos 700.

d. 14 m. Apr. Curatoribus dedicat tractatus ethici primi versionem Belgicam: *Van de Hooft-deuchden. De eerste Tucht-verhandeling. Door Arnout Geulincx, Antwerpenaer, Professor van de Philosophie in de Universiteyt van Leyden. Tot Leyden, Ghedruct voor den Autheur, By Philips de Cro-Y, A°. 1667.*

A. 1668 d. 14 et 28 m. Jan., d. 29 m. Febr., d. 14 m. Mart., m. Apr., d. 5 m. Maji, d. 13 m. Jun. disputationes ethicae de Finibus Bonorum et Malorum I—VII.

d. 23 m. Jun. disp. logica de Dialectica.

d. 10 et 24 m. Nov. disp. ethicae de Finibus VIII et IX.

[d. 30 m. Nov. Gothofredus Spinaeus subregens in Collegium Ordinum introducitur.]

d. 22 m. Dec. disp. physica de Mundo.

A. 1669 m. Jan. disp. physica de Ventis I.

m. Mart. disp. metaphysica: Ifagoges pars III.

d. 13 m. Apr. disp. physica de Aquarum circa terram pericyclofi.

d. 4 m. Maji disp. physica de Ventis II.

d. 1 m. Junii [Georgio Hornio, collegii oratorii publici praefide, jam anno ante mente capto] nostro mandatur a Curatoribus, ut collegia oratoria habeat et studioforum in ea arte exercitia moderetur.

m. Junio disp. physica de incendio Aetnae.

Eodem anno nomine editionis tertiae iterum prodeunt exemplaria editionis fecundae SATURNALIUM, Lugduni Batavorum ex officina Salomonis Wagenaer.

d. 8 m. Nov. ultimae professori assignantur pecuniae mercedis trimestris nomine debitae.

d. 20 m. Nov. ab Abrahamo Heydano in lectionum academicarum exordio verba faciente lugetur una cum multis aliis peste abreptus „D. Geulincx, ille quidem ingenio felix et eloquio difertus, ut „nisi paupertas, illa quidem bonae mentis mater, sed magnum, ne „emergant qui cum illa conflictantur, impedimentum, — obstitisset, „inter excellentes hujus seculi Philosophos et Oratores nomen et „decus tueri potuerit.”

d. 27 m. Nov. viduae Sufannae Stryckers id petenti attribuunt Curatores annuos centum florenos bis solvendos, quibus illa familiam sustentet. [Nummi tamen in rationibus accuratissime habitis non referuntur.]

A. 1670 d. 6 m. Jan. „judicavit Senatus ex dignitate Academiae „esse quod D. Rector suppeditet sumptus necessarios in funus viduae „D. Arnoldi Geulincx Professoris extraordinarii, repetendos a DD. „Curatoribus, vel ex bonis defunctae jure praelationis.” [Soluti sunt, testibus Rationibus Academicis, floreni fere 64, neque unquam a Senatu recuperati. Porro nihil repertum est.]

Generis insigne quo libri titulum ornāvimus repetitum est e Quaestionum editione Antverpiensi, omiſſis tamen striis transversis, quibus factum est ut et Paquot et (qui hunc unum viderat) Rietſap nostras uncinum non argenteum sed coeruleum significari retulerint. Similes enim illic apparent et in lunulis, atque ita quidem ut harum uni eadem lege rubrum colorem tribuere oporteret, siquidem minus perito opifici potius quam mori dudum recepto crederemus.



## POST AUCTORIS MORTEM HAEC SCRIPTA EDITA SUNT :

Anno 1675 *ETHICA* integra, Lugduni Batavorum apud Adrianum Severini. [Curavit Philaretus, i. e. Cornelius Bontekoe Alcmariensis Med. Dr., qui m. Sept. 1665 primum in Albo Studioforum inscriptus, annis quoque 1674 et 1676 ibi commemoratur. Obiit Francofurti ad Viadrum d. 3 m. Jan. a. 1685.]

*METHODUS* (ed. 2.) apud eundem, ad quam adjecit Philaretus *Objectiones adversus Ethicam* una cum responsionibus suis.

A. 1683 *ETHICA* (integra ed. 2.) Lugduni Batavorum apud Johannem de Vivié.

A. 1688 *PHYSICA VERA*, post Corn. Bontekoe *Metaphysicam*, Lugd. Bat. apud Johannem de Vivié et Fredericum Haaring.

*COMPENDIUM PHYSICAE* illustratum a Casparo Langenhert, editionis plenioris modo memoratae ignaro, Franequerae ex officina Leonardi Strick.

(A. 1689 *LOGICA*, teste Georgio in *Allgem. Europ. Bücher-Lexicon*, Lips. 1742, qui ipse, aut cujus auctor, editionem anni 1698 in mente habuisse videtur.)

(A. 1690 *Ethicae versio belgica*, teste Paquot — *Mémoires* t. XIII, Louvain 1768, — h. t.: *de Zedenkonst van A. G.*)

*ANNOTATA PRAECURRENTIA* ad R. Cartesii Principia, Dordraci ex off. Theodori Goris.

A. 1691 *ANNOTATA MAJORA* in Principia Philosophiae Renati des Cartes, ibid. Additae sunt Disputationes nostro praefide habitae et Orationes II et III.

*ETHICA* (integra ed. 3), Amstelaedami apud Janffonio-Waefbergios.

*METAPHYSICA* vera et ad mentem peripateticam, Amstelaedami apud Joannem Wolters.

A. 1696 *COLLEGIUM ORATORIUM*, Amstelaedami apud Janffonio-Waefbergios.

*ETHICA* (integra ed. 4), ibid. Accedit Chreia philosophica e Coll. Orat. defumpta; item Cornelii Bontekoe Tractatus ethico-physicus de Passionibus.

*Metaphysicae et Physicae versio Belgica: Geest- en Wereldkunde*

van Arnold Geulings, te Dordrecht by Dirk Goris 1696, interprete Antonio de Reus Gorcomienſi [qui d. 24 m. Apr. a. 1668 aetate 23 annorum inter Juris ſtudioſos Lugdunobatavos nomen dederat].

*Chreiae Philoſophicae* et Tractatus de Paſſionibus, quae Ethicae in ed. 4 ſubjuncta erant, *verſio Belgica, te Dordrecht, Dirk Goris.*

A. 1697 *Ethicae verſio Belgica* (editione ſecunda?): *Ethica of Zedenkonſt, . . . vertaalt . . . door Ant. de Reus. Te Dordrecht, By Dirk Goris.*

A. 1698 LOGICA, Amſtelaedami apud Johannem Wolters. Exſcribitur editio anno 1662 facta, quae tamen in hac nullibi memoratur.

A. 1709 ETHICA (integra ed. 5.), Amſtelodami apud Janſſonio-Waefbergios. Exſcribitur editio anni 1696.

## CODEx MANUSCRIPTUS BIBLIOTHECAE UNIVERSITATIS LUGDUNOBATAVAE.

ARNOLDI GEULINCX ANTVERPIENSIS, IN ILLUSTRi ACAD.  
LUGD. BATT. PHILOSOPH. PROFESS. COLLEGIA.

- I. Collegium in Principia Philoſophiae Cartefii. Fol. 1—146.
  - a. Annotationes praecurrentes. Fol. 1—60.
  - b. Annotationes latiores ſ. reſumptae. Fol. 63—146.
- II. Collegium Metaphyſicum. Fol. 147—220.
  - a. Pars 1. Metaphyſica vera. Fol. 147—185.
  - b. Pars 2. Metaphyſica Peripateticorum. Fol. 187—220.
- III. Collegium Phyſicum. Fol. 221—327.
  - a. Phyſica ad mentem Peripateticorum. Fol. 221—241.
  - b. Altera Phyſica ad mentem Peripateticorum. Fol. 242—277.
  - c. Phyſica vera. Fol. 278—327.
- IV. Collegium Logicum. Fol. 328—360.
  - a. Paradigmata diſputationum. Fol. 328—333.
  - b. Ad Logicam fuam. Fol. 334—360.

V. Collegium Oratorium. Fol. 361—462.

*a.* Exercitium Oratorium. Fol. 362—413.

*b.* Schemata et Phrafiologiae. Fol. 416—462.

VI. Collegium Ethicum. Fol. 464—579.

*a.* Ad Tractatum suum Ethicum primum. Fol. 464—537.

*b.* Tractatus fecundus, tertius, quartus, quintus, sextus. Fol.  
538—579.

VII. Collegium Medicum. Medicina contracta. Fol. 581—599.

VIII. Tractatus de Officio disputantium. Fol. 600—604.

---



## CONTINENTUR HOC VOLUME

Praefatio Editoris.

Summae rerum ad Vitam Arnoldi Geulincx pertinentium.

Reliquiae scripturae Arnoldi Geulincx.

Appendix bibliographica.

- P. 1— 8 EPISTOLA dedicatoria et PRAEFATIO ad Saturnalium editionem Lugdunobatavam pertinentes.
- P. 9— 66 ORATIO I cum paraphrasibus et commentariis.
- P. 67—147 QUAESTIONES QUODLIBETICAE.
- P. 149—164 ORATIO II.
- P. 165—454 LOGICA fundamentis suis restituta.
- P. 455—506 Dictata ad Logicam hucusque inedita.
-

EPISTOLA DEDICATORIA

ET

PRAEFATIO

AD

SATURNALIUM

EDITIONEM LUGDUNOBATAVAM  
PERTINENTES.





---

## EPISTOLA DEDICATORIA.

*Nobili et Amplissimo Viro Domino D. NICOLAO STAEFVENISSE,  
Civitatis Vlissinganae Senatori et Syndico; ab Illustr. et Praepot.  
D. D. Ordinibus Zelandiae ad Comitia Ordinum Generalium  
Delegato.*

---

*Nobilis et Amplissime Vir,*

**V**iros Principes et Magistratum gerentes literis operam navare, et tetricis ac difficilibus Reipublicae negotiis otium illud honestum et blandum interponere, magna semper laus fuit; utinam hodie non tam rara foret! Nam quotusquisque jam ex isto numero veteres illos Reipublicae Romanae proceres et heroës aemulatur? qui, quantum eis ab officiis et publico munere superabat temporis, tantum in pulcherrimas doctissimasque commentationes impendebant; quarum etiamnum partem aliquam (nam injuriâ temporis intercidere potiora) magno cum fructu et voluptate terimus. Capit interim nos admiratio non mediocris, cum perpendimus, id in hac Musarum palaestrâ praestitisse viros, domi militiaeque, mari atque terrâ occupatos, quod ab umbratico quocunque, sedentario, et jugiter chartis impallescere literatore sperare non auderes. Te intuens haec dico, Nobilis et Amplissime Vir, qui succisivas et subsecundarias horas perire non pateris, nec a luxu vel desidîâ mentis avocamenta petis, sed quod otium a curâ publicâ et re familiari datur, id omne confers in haec studia doctrinae. Testes mihi fuerunt, praeter

alia monumenta, Versus, in quos incidi, Latine a te et venustissime compositi; tales fundis occasione datâ, facilis ex temporalibus Poëta. Jam, quas tibi dotes iniecit Natura, cultum eae, succum, et robur accipiunt a literis et eruditione tuâ. Incredibilis illa tua morum suavitas, comitas, benignitas (quas coram expertus sum); a fastu et fastidio quam longissime remota gravitas, candor; ad haec judicii vis, acrimonia, maturitas; nulla harum virtutum in te mediocris, omnes sunt summae. Tum eae quas postremum recensui, hac aetate tuâ, quae annum quadragesimum nondum attingit, magis spectabiles sunt et rarae; sed nempe hic fructus Historiae, cujus es assiduus et diligentissimus Lector; illa juvenes et viros prudentiâ cum senibus aequat. Itaque gratulor Patriae et Reipublicae Belgarum, etiam in hisce fluctibus et tempestate gratulor, quod cum caeteris peritissimis naucleis te etiam gubernaculis suis admoverit, et jam nunc admoverit, cum Virtus et Viri requiruntur. Silentibus ventis et pacato mari vel remex ad clavum sedeat, et innoxius sedeat, imo teneat aliquamdiu cursum rectum. Nunc turbines imminet, inclinationes temporum, et bellorum procellae:

*Nunc animis opus est, omni nunc arte ministrâ.*

Hic Animus, haec Ars, gemina sunt familiae tuae insignia. Ex qua nuper, ut antiqua silentio praeteream, affulsit decus illud Patriae, Pater tuus, D. Cornelius Staefvenisse, Illustr. et Praepot. Ordinum Zelandiae Consiliarius et Syndicus, vir in gravissimis Reipublicae negotiis exercitatus, et extraordinariis ad moderatores exterarum gentium, nominatim ad Reginam Sueciae, item ad Brandenburgiae Principem legationibus defunctus; jam a tribus circiter lustris praematurâ morte, cum ageret annum aetatis quinquagesimum secundum, mortalibus ereptus, magno Reipublicae et bonorum omnium luctu. Cujus ut virtutum, ita et divini symboli haeres es; symbolus autem ejus erat:

*Animum rege*; quo velut compendio vir optimus, et in omnibus vitae partibus moderatus, omnes suas virtutes complexus est. Itaque ad exemplum ejus te componis, *Animum regis*; hoc tibi gentilitium est; et *Ratione regis* eum; novisti enim, cupiditatum et affectuum lupatis aut calcaribus non regi animum, sed frangi vel efferari. Proinde jam alterum symbolum accipe, quem Romanus Sapiens (id dicere volui, *Vates*) tibi inculcat: *Multos reges*; nam sic inquit: *Multos reges, si Ratio te rexerit*. Hisce tuis, et illustrium parentum suorum, vestigiis insistit etiam generosissimus et summae spei adolescens D. Cornelius de Jonghe, Toparcha in Osterlant, s'Heer-Janslant, etc. filius sororis tuae, jam plus tres annos discipulus et victor meus, suo merito mihi longe carissimus. Igitur applaudo clare:

*Fortes creantur fortibus et bonis.*

Et simul libellum hunc, quem primâ editione nemini inscripseram, hac alterâ tibi, Vir Nobilis et Amplissime, cui multis ille nominibus debetur, volens et lubens inscribo, atque Libellum ipsum, toto suo succo et sanguine, meae erga te perennis observantiae monimentum esse jubeo. Vale. Dabam Lugduni Batavor.  
iv. Januarii MDCLXV.



---

# LECTOR

## BENEVOLE.

**E**n Oratiunculas aliquot, quas juvenis et pene adolescens Lovanii, ubi Philosophiae Professore agebam, ab hinc annos tredecim lusi, dixi, edidi. Et lusi, inquam: videor enim hîc interdum Poëta, videor entheo spiritu instinctus, anhelare subinde verius quam perorare. Hoc tunc juvabat, hoc fors tunc et aetas ferebat. Legeram mihi genus aliquod dicendi arduum, abruptum, et (quod vitio mihi vertebant adversarii mei) Afrum, quod velut e Pythiâ quadam specu per intervalla detonaret, et tamen plus in sinum recondere (quod acutos tunc et perspicaces censere memini) quam fronte mitteret. Solito me stylo et modulatione vocis abdicaveram; nec meorum, sed eorum etiam quae ab aliis hauseram, conabar oblivisci. Eos tantum modos orationis, et velut metricas leges, quas ipse mihi dixeram, tenax et animosus observabam. Itaque nihil ab aliis mutuabar, ne a me ipso quidem; quidquid depromebam, erat ex penu illâ quam mihi recens comparaveram. De aliorum judiciis non laborabam; qui si boni essent, boni consulturos, quae bono dixissem animo; si mali, alte contemnendos mihi et despiciendos arbitrabar. Hunc ego, qui dictas Declamationes animat, spiritum et ardorem evirare nondum aut sufflaminare constitui; vivat ibi, et gliscat ibi. Castigavi tamen eum, ne me conniventem patrem, et prolibus meis justo plus indulgentem dicas; crudiora digessi, austeriora mitigavi, quae luxuriare videbantur recidi; ad extremum

etiam, nullâ aliâ causâ, solum pro meo jure hinc inde quaedam addidi, dempsi, mutavi; sed totum id modice feci, aut etiam intra modum.

Nisi quod forte primum Actum hujus fabulae (Orationem, quam in auspiciis dixi) studiose magis et accurate reconcinnavi. Et erat operae pretium. Cum enim perversa Scholarum Dogmata (a quibus hodie tantum in Ecclesiis et Republicâ turpitudinis et turbarum) non e Philosophiâ (a qua equidem nihil nisi beneficum et salutare), sed e perversè Philosophantium affectibus (quos ibi Geniorum nominibus insignivi) scaturire videamus; promptum jam et expeditum erit unicuique, sive veterum, sive recentium Philosophemata pervolventi, permixtos cum iis errores certis et indubitatis criteriis deprehendere, et delirantes a Rationis lira sententias suis quasque Geniis, a quibus dimanant, assignare; atque adeo iis ipsis Geniis *Cave canem* inurere. Genii enim tres, aut potius quatuor (*Pantomimus, Mango, Dogmatistes, et Gerro*), quos nostra illa exagitat et infectatur Oratio, illi fere sunt qui Equum Trojanum infarciunt, quem jam diu fatalem et inauspicatum intra Scholam aspeximus.

Insuper hac secundâ editione Libello meo lucernam geminam accendi, Paraphrasim et Commentationem. Sed has in limine tantum habeo; nam quid opus erat faculas illas omnibus locis interponere, et ubique lychnuchos ex fornice suspendere? Si recte putas, non fuisset hoc aliud quam oleum et operam perdere. Non prodest, inquam, ea res, sed obest; perstringit oculorum aciem, obtundit et confundit. Tu igitur fume tibi, quem dixi, ardentem in vestibulo dimyxum, ut videas ubi pedem ponas, et gressum dirigens eâ luce, penetra jam securus in adyta Libelli. Sicut enim generosos et itineribus aptos ac assuetos equos tantisper quidem fraeno ducimus, calcar etiam interdum addimus, donec viam illam, quam conficere decrevimus, insistant; quam simul atque insisterunt, illi alacres et

sponte properant, nec deflectunt, sed institutum iter, si non aliud iussi fuerint, perpetuo et rectâ prosequuntur; sic etiam prudens et cordatus Lector satis habet per primas aliquot Librorum paginas Annotationibus dirigi, Commentario sensum et mentem Auctorum edoceri; caetera quid sibi velint, inter legendum suo Marte conjicit et assequitur.

Tandem ad calcem Orationem subjeci, quam dixi Lugduni Batavorum a duobus plus annis, cum in illâ Academiâ publicas in Logicam Lectiones auspicarer. Si hac Oratione perlectâ, argumentum ejus apud animum tuum mature perpendas, agnosces postremam hanc Orationem primae illius Orationis esse supplementum. Gerro enim e judicio, quod primâ illâ Tragoediâ perhibetur, clanculum elapsus (ut videre potes hoc libello pag. 156), hîc accipitur et vapulat; sed alio schemate, et aliter personatus vapulat. Nam Gerrae ejus non ut Gerrae jam, sed ut Sentinae (et quid sunt aliud?) Hippocrenem Philosophicam inquinantes spectantur. Hae ibidem Sentinae quatuor deteguntur, *Prologus*, *Prognosis*, *Rhapsodia*, et *Anomalia*; et ades o Hercules, o foetoris et nausae patientissimus Hercules (verus Amor Sapientiae), Augiae illud stabulum ut repurges.

---



# ORATIO I

EX EDITIONE LUGDUNOBATAVA ANNI 1665, QUACUM  
COMPARATUR EA QUAE ANNO 1653 ANTVERPIAE PRODIIT.



---

ORATIO I,  
DICTA IN AUSPICIO  
QUAESTIONUM QUODLIBETICARUM,  
LOVANI, D. 14 M. DEC. A. 1652,  
POST ANNOS DUODECIM  
LUGDUNI BATAVORUM RETRACTATA.

---

*Continet actionem in Seductores Genios: Pantomimum praecipue, Mangonem, et Dogmatistam, qui omnes ad Philosophiae tribunal citantur, fraudis, seductionis, et stellionatus rei aguntur.*

Quam tetris errorum fumis involuta Mentis Humanae fax  
Est! quam spissis difficultatum fustibus subjicitur! Obruta,  
suffocata, (quid multa?) extincta; non restat nisi tremula, quae  
fungum ellychnii pererrat, scintilla <sup>1</sup>. Ludibrium quoddam fumus,  
quamdiu hic fumus; scopus quidam fumus, in quem collineant <sup>2</sup>  
innumerabiles imposturae. Haeremus, cespitamus; inter salebras  
et vepres, inter confragosa caligamus <sup>3</sup> sine duce; hoc deteriore  
conditione, quod nihilominus, et avidi ad pergendum et creduli,  
unius vicem ducis, varios amplectamur seductores <sup>4</sup>. Sensus  
nostros non fugillo; circumscriptores illi quidem, sed

---

<sup>1</sup> *Ed. Pr.*: Quam densis errorum tenebris involuta mortalium mens est! quam  
tortis difficultatum nodis irretita! immersa carni, confusa, sopita et extincta pro-  
pemodum est illa lucula. <sup>2</sup> Scopus, in quem collimant. <sup>3</sup> inter f. et v. caecu-  
timus. <sup>4</sup> quod quandoque nimium credulis officium Ducis praebeat illufor.



et finguli stolidi et universi male foederati; mutua consilia non raro mutuos astus eludunt; patent, tenentur; jam pridem iis dica scripta, et palam fraudis mendacique convictis fides abrogata <sup>1</sup>. Sunt seductores alii, versipelles quidam Genii, ad fallaciam et technas nati. Hi non in cute subditere, sicut <sup>2</sup> Sensus, sed percolati, et medullam fubeuntes, ad Animum penetrarunt. His utitur Animus, his, ut carissimis convictoribus, totum se credidit <sup>3</sup>; his non ducitur jam, sed agitur, trahitur, raptatur; hos necessarios ei, hos ei dominos fecit diuturna familiaritas <sup>4</sup>. Tandem tamen aliquando <sup>5</sup> manifestis indicibus deprehensi; ad igniculum Rationis, afflictum illum quidem, eluctantem tamen ex intervallo et irradiantem clarius, detecta perfidia; ad iudices etiam delata nomina <sup>6</sup>. Acerrimos habent propugnatores. Boni duces videntur vanis quibusdam et prurientibus ingeniis <sup>7</sup>, quod interdum <sup>8</sup> sine offensâ seducant longius; suspenso gradu ductum obsecuti, praestolantur Eventum; at eventus ille non nisi scrobs aut obex; interea micant ancipiti spe, et ipsâ periculi trepidatione gestiunt <sup>9</sup>. Quosdam longa majorum duces hos sequentium caterva patronos fecit. Superstitiosum hoc genus, cui ne manifestus quidem Antiquitatis error sine sacrario est; *Novitatum otores* audiunt. His accedit Philosophorum vulgus, vecors illud coecae consuetudinis mancipium. Hi communia, quotidiana, pervagata, quae passim apud populum increbuere, cujuscumque illa sint, ferunt; ea quorum insolentes sunt, exsibilant, explodunt,

---

1 Nec duntaxat sensus nostros infamiâ illâ notaverim: impostores illi quidem, sed non admodum vasti, non conspirant satis, mutuas subinde fraudes detegunt; jam dudum ad omnia Philosophiae tribunalia citati, de apertis mendaciis convicti, fidem apud sapientes non habent. 2 sistunt ut. 3 sed intro ad animum penitus penitusque abiire. 4 His ille se ut fidelissimis domesticis commisit; his non d. sed abripitur verius; necessitudinem conciliavit longa familiaritas. 5 Tandem tamen et illi. 6 ad rationis crepusculum detecta perfidia, insuper ad iudices delati. 7 curiosulis quibusdam. 8 subinde. 9 sed. longius; expectant eventum, qui non nisi scrobs aut obex, interea periculo pruriunt.

sarcasminis exagitant et dicteriiis proscindunt <sup>1</sup>. His freti patronis seductores, quem fraude sibi arrogarant, etiamnum fraude gerunt et administrant Ducatum <sup>2</sup>, et porro seducunt impudenter; praeceunt passim in Philosophicis viretis credulum illud et sequax ovile. Et sicut Sensus olim, adipati cliens <sup>3</sup> Epicuri, ridiculam suos affectas devolvit in foveam, dum meridiano sole orientem occidentemque solem <sup>4</sup> majorem fateri cogit, quia majorem oculi testarentur <sup>5</sup>; ita et hi pudendis aequae, quos ducunt, imo turpioribus circumveniunt modis; nisi frontem illaqueatis perfricuisset publicus ille ganeo et corruptor, Mos <sup>6</sup>. Seductores hos hodierno die reos ago <sup>7</sup>. Amor-Sapientiae (partes hae tuae sunt) sedeto pro tribunali <sup>8</sup>. Assistite, quibus a praejudicatis opinionibus <sup>9</sup> vacuum pectus, et justam judicum facite decuriam. Vobis judicibus pedum iis extorquebo de manibus, intensum ad viam indicem caeteris digitis aequabo et flectam in pugnum <sup>10</sup>, insidiosam dexteram usque et usque aventem inferi axillae, religabo post tergum. Ducis illa insignia, Ducis haec munia, soli debentur Rationi; soli vindicabo Rationi. Sic adversariis, antequam jure cum iis experimur, insultamus <sup>11</sup>, sic causae confidimus et judici. Habeant sibi sane ad iniqua Vanitatis <sup>12</sup>, Superstitionis, Inscitiae tribunalia gratiosos patronos; at supremo hoc judice non sperent nisi ferale Theta.

Prodi huc primum Pantomime, Allegoriae, Similitudinum, et Fabularum Genie <sup>13</sup>; judicibus te siste. Quid? In gremio <sup>14</sup>

---

<sup>1</sup> His accedit Philos. vulgus, quibus mos est, quia rationem non percipiunt, inassueta quaevis explodere, et sicut vestium formas aut derident aut suspiciunt, prout eas recepti patriae suae mores vel rejecere vel admiscere, ita etiam philosophandi rationem; lydius lapis, ad quem examinant veritatem, solere, vel non solere dici. <sup>2</sup> His fr. patr. impost. etiamnum usurpant sibi jus ducatus. <sup>3</sup> sub clientela pinguis. <sup>4</sup> dum solem orientem meridiano. <sup>5</sup> eo quod major videretur. <sup>6</sup> ita et hi in paria saepenumero, quin et majora quoque propellunt absurda, nisi gravitatem lapsus extenuaret assuetudo. <sup>7</sup> His ego seductoribus hodiernâ die actionem intentabo. <sup>8</sup> Amor sap. judex esto. <sup>9</sup> a praejudiciis. <sup>10</sup> sublatum indicem compellam in pugnum. <sup>11</sup> Sic adv. insultamus ante pugnam. <sup>12</sup> curiositatis. <sup>13</sup> Pant. assimilandi genie. <sup>14</sup> sinu.

Charitum educatus, inter Parnassi flosculos lascivire solitus, amoenis Rhetorum spatiis inambulare <sup>1</sup>, ludere natus eras, speciose puer; quae te vesana compulit ambitio, munia Ducis, quibus fungendis par non es <sup>2</sup>, affectare? Viam praeire vis ad Veritatem; sed quid ad teneros istos pedes inaccessa Naturae testqua, spinosa Philosophiae nostrae dumeta? Genius hic, iudices, cum ad omnem Metamorphosim inclinat propendetque <sup>3</sup>, tum inanima in animata transformandi longe cupidissimus est <sup>4</sup>. Ipse lapides, ipse silvas, montes, urbes, fluvios, ventos, et quaevis tandem adsciscit <sup>5</sup> in humanam societatem, et jubet homines nobiscum esse. Queri ea saepe, saepe laetari facit, jam amore, jam miseratione, iam odio, aliisque impulsa cupiditatibus inducit <sup>6</sup>. Dum animi gratiâ, dum dicis ergo, inter Poëtas ista suos comminiscitur, remitto, concedo, aequi bonique facio <sup>7</sup>; dum pro feriis vendicat, malas artes! malas artes! vel me tacente <sup>8</sup>, res ipsa clamat. Nec est quod ambigat de crimine; si inficias iverit, convincam <sup>9</sup>. Age. Cum olim in Gindo fluvio equus aliquis qui Cyro in deliciis <sup>10</sup> erat, submersus periisset <sup>11</sup>, nunquid flumini necem illam assignasti <sup>12</sup>, Pantomime? nunquid credulo regi persuasisti, Gindum laesere, et injuriis ultro laesam majestatem provocare <sup>13</sup>? Adeo enim Cyrus facibus tuis exarsit in iras, ut continuo jussit Gindum <sup>14</sup> in centum sexaginta rivulos, quo nobilis quondam fluvius exaresceret, diffecari. Ha, nimis fero corde <sup>15</sup>! Xerxes

---

1 campis exspatiari. 2 quibus impar es. 3 in omnem metam. pronus sit. 4 tum vel maxime prurit, ut inanimata quaevis transformet in viventia; 5 quinimo lapides, ligna, domos, fluvios, asciscit omnia. 6 nobiscum esse; dolorem iis interdum et questus, interdum laetitiam et risus, metum etiam, spem, et iras attribuit. 7 Dum joco haec et animi gratiâ comminiscitur, non reprehendimus; 8 dum pro s. vend. impostorem non ego, sed. 9 Nec est quod de altera illa parte disceptet; inficiari crimen istud non potest; convincam manifeste. 10 regi C. imprimis carus. 11 esset. 12 nunq. fl. sentum affinxisti. 13 Gindum hominem esse. 14 fluvium illum. 15 rivulos dividi. Labet insaniam irridere: o te miserum Gindum! qui ante tam superbe intra alveum tuum decurreras, pontem



etiam, immanis ille *Κίκλωψ*, qui maria pedibus et classibus montes peragravit, eodem Genio in similem actus est furorem <sup>1</sup>. Nam cum Hellepontum contabulasset, et Asiae Europam ponte junxisset; hic vero fluctibus insurgens, stolidam illam compagem excussisset, ruinasque ejus inter undas suas volveret <sup>2</sup>; trecentos mari colaphos infringi jussit <sup>3</sup>, ferreas etiam compedes <sup>4</sup>, ne qua libere vagaretur, sed arctis intra litora sua carceribus detineretur, injecit <sup>5</sup>. Mussitat Pantomimus, nictat oculis, nutat capite, gesticulatur manibus, vacillat pedibus, totus in gestum abivit Genius. Videtur aliquid velle innuere. Quidlibet; modo ne nobis imponat, vastas illas Oceani genas alapis, quas ei Xerxes incussit, livorem suum debere <sup>6</sup>. Sed leve sit singulos aliquos homines <sup>7</sup> decepisse; quod subjiciam <sup>8</sup>, populare delirium est, et ejusdem illius Genii imposturis ac instinctui ascribendum est utique <sup>9</sup>. Psyllorum gens, quae propter <sup>10</sup> majores Africae Syrtes sedem habuit, crebris ab Austro vento damnis et cladibus accepti, nunc obtriti domorum arborumque strage, nunc arenarum, velut in fluctûs quosdam se efferentium, procellis hausti et demersi (siccum enim mare Syrtes exhibent, quod ventis agitatum pro fluctibus arenarum cumulos verfat) horum tandem malorum impatientes, ad arma conclamare, turmatim concurrere, in Austrum, quasi in hostem (agilem illum, et ordines intercurrere subtilem) saxis et telis irruere. Sed ita furentes, et (quod hic vere dixeris) aërem verberantes, adverso turbine violentior ventus occupat, et dicto citius universos cum omnibus copiis armisque, collibus arenarum involvit

---

non ferebas, praeruptis etiam ripis atque aggeribus, novas subinde vias molirebare, decus hinc perdis; pueri te vadabunt in posterum; vitam hinc perdis et nomen. 1 X. etiam eodem genio in similem actus est amentiam. 2 Nam cum Hellepontus pontem subicium fluctibus suis dejecisset. 3 incuti, 4 catenas. 5 quo captivum traheretur, immitti jussit. 6 O ridiculam impotentiam! putei ego vastas illas pelagi maxillas etiamnum a fluctibus istis livere. 7 singulares homines. 8 subdam. 9 instinctui debetur totum. 10 circa.

et sepelit <sup>1</sup>. Silet hîc Genius noster; sed si staret ad plebejum Inscitiae tribunal, jam catastrophën illam mordicus <sup>2</sup> rapuisset in suas partes. Sensit, inquit, qui injurias suas persecutus est ventus, qui ultus est rebelles <sup>3</sup>. At coram hoc judice nostro de nugis istis ne hîscit quidem; pudor vetat. Quid? Idem ille Genius, Barbaros dicam? imo Romanos, viros illos, imo Graecos, cultos illos, tamquam pueros, tamquam fatuos induxit, ut Lunae laboranti (sic enim hi loquuntur), id est noctem nostram offendenti, curationem aliquam adhiberent <sup>4</sup>. Et quidem contra sideris lethargum praesens hoc remedium <sup>5</sup> praescripsit: inconditos clamores tollerent, tubas clangerent, pelves et tintinnabula colliderent, fragoribus complerent omnia <sup>6</sup>. Aniles intemperiae vix Christianos purioribus sacris abstractos demiserunt; hodie Sinas adhuc et Turcas agitant <sup>7</sup>. Dies me deficiat, si porro enarrare pergam praestigias, quibus Genius ille nos ludit et fascinat, in opprobrium Humanae Mentis et fannas. Non negat haec: palam sunt; habet tamen jam pridem (quantum ex gestibus et inquieto vultu conjecisse videor) quod loquatur. Audiamus. *Plebem* <sup>8</sup> *decepi; quid ad hoc forum? Philosophos non circumveni. Et cur insulsam illam ac turbulentam multitu-*

---

<sup>1</sup> sedem habuit, quod Austrum ventum plus nimio haberent invisum, ut sibi ac suae terrae noxium, communi edicto omnes sumptis armis in Austrum quasi in hostem jure belli profecti sunt. Sed ecce rem stupendam! nam ita profectis ventus magno spiritus agmine venit obviam, et universos cum omnibus copiis armisque cumulis arenarum operuit et suffocavit. <sup>2</sup> jam postremum hoc quod dixi, dentibus et unguibus. <sup>3</sup> Sensit, inquit, ventus qui ultus est injuriam. <sup>4</sup> Quid? nonne idem ille genius Romanis olim et toti fere mundo persuasit lunae, dum eclipsin pateretur, subvenire? <sup>5</sup> panchrestum hoc. <sup>6</sup> *Add.:*

..... attonitis quoties avellitur astris  
Solis opaca soror, procul auxilientia gentes  
Aera crepant frustra timent.

<sup>7</sup> Nec duntaxat ethnicos, verum etiam Christianos multos error ille habuit, ut videre est apud Ambrosium fermone octogesimo secundo, et hodie etiam Turcas habet, teste Eugenio Rogerio libro secundo, capite decimo texto descriptionis Terrae Sanctae. <sup>8</sup> *Plebem*, inquit.

*dinem* <sup>1</sup> *eluisse*, *crimini sit?* *Repagulum ponimus* <sup>2</sup>, *dum scite imponimus; fraenum* <sup>3</sup> *et flagellum sunt illi, quos suggerimus, instinctus* <sup>4</sup>; *apprehendat hos prudens rector, utatur his, et domet, et agat quo vult, debili Rationi, vanis legibus obluctantem semper et recalcitrantem feram* <sup>5</sup>. Nihil de istâ Politicâ dicam, qua callidos illos, qui foli Politicorum nomine censentur hodie, callide pellexit in suas partes ista vulpes; nihil, inquam, de istâ Politicâ dicam; aut potius hoc solum dicam: Probrosam esse majestatem, quae populi se tuetur erroribus, quae cives <sup>6</sup> suos pecudes facit, et bubulcum mavult agere quam Principem. Principem ego mihi serium totum, sincerum <sup>7</sup> totum, suspiciente imaginatione repraesento, et velut humani conventûs sanctissimum aliquem gravissimumque praefulem. Fugiant! fugiant Machiavelli noctuae ad illustrem hanc et pulcherrimam boni Principis notionem <sup>8</sup>. Nunc purgationi, Pantomime, respondebo tuae. Plebem decepisse te fateris, non Philosophos? Imo, inquam, Philosophos decepisti, non plebem. In Scholis montes tuarum fraudum; in triviis verrucae tantum. Vin' tibi Stoicos producam, qui Justitiam, Clementiam, caeterasque virtutes, animalia quaedam esse censuerunt? Vin' Pythagoras olim et Platones? Vin' nostrâ memoriâ <sup>9</sup> Keppleros <sup>10</sup> et Campanellas? Quorum alii sideribus et telluri, plantis alii, alii etiam elementis, lapidibus, et metallis sensum impertiti <sup>11</sup>. Quin horum aliquis calorem, frigus, lucem, tenebras, non sentire modò, sed etiam ratiocinari nobis narrat; nec imperite ratiocinari, sicut plerique nostrum, sed accurate; haec talia Geometriam callere, Staticam exercere deprehendit <sup>12</sup>. Sed missos faciamus hos Pantomimi studiosos, hos Volones,

---

1 insulam istam mult. 2 add. ferocienti belluae. 3 add. quoddam. 4 occulti isti instinctus. 5 prudens rector et moderetur. 6 subditos. 7 candidum ego mihi principem et serium. 8 ideam. 9 aevo nostro. 10 In ed. utraque Klepperos. 11 Quorum aliqui in sideribus et terra, alii etiam in omnibus elementis, lapidibus, et plantis sensum invenerunt. 12 quinimo quidam calorem, frigus, lucem, et (si Deo placet) tenebras sensitiva corpora et rationis non expertia, id est, homines esse pro compertissimo habent.

qui ultro eum et deditâ operâ sequuntur; in quo, ut jam fit in eo culpa qui circumvenit, non minor est in iis qui circumveniri se sivere. Ad illos potius orationem convertamus, quos aliud agentes, alio spectantes, et invitos impulit, elusit, induxit. Nos, nos (aperte dico) Peripatetici defecimus, nos qui Rationis Triarii ferebamur, nos, o pudor! transfugae, nos Mimo illo imperatore <sup>1</sup> meruimus, antequam scivimus. Pantomimi illa sunt, pro quibus hactenus, tanquam pro aris et focus, contra Rationem dimicavimus. *Fugae Vacui et Impedimenta Vacui, Appetitiones naturales et Aversationes naturales, Sympathiae et Antipathiae, Formae substantiales et Intelligentiae, Facultates et Potentiae*, sunt, inquam, illa omnia Pantomimi propria, mancipio et nexu, usu et fructu. Quibus adde manubias et praedas, quas, agrum Rationis contra jus et fas depopulatus, asportavit. Principio Pantomimus *Fugas et Impedimenta Vacui* Corporibus injunxit. Nam si forte vasi pleno epistomium detraxerit promus condus, Vinum suspicere Pantomimus jubet, et dolii sui fornicem, num quâ pertusus sit rimâ, diligenter explorare. Quae si nulla pateat superne, vae tibi Bacche, si effluis inferne; sustine, inquam; fraenos injice ponderi tuo, non discede de statione. Si vero vel tantilla rimula detecta sit, eja! jam integrum est erumpere, et, ni cantharus adsit, qui te mature excipeat, pessum ire potes, et in cellae pavimento, ut Liber es, libere volutari. Interea exercet Aërem jus quoddam rigidum, et (audeo dicere) iniquum; hic enim, genio suo indulgente Baccho, et infra per apertum siphunculum dilabente, genium suum defraudare cogitur, descendere, inquam, cum sit naturâ levis, clarus, amplus, perque spiraculi fauces penetrare in vas, quo fit vicarius et locum repleat, quem liquor liquerat. Quod equidem praestare non

---

1 Sed missos faciamus pinguiculos illos, qui jam a ratione ad Pantomimi castra transfugae novum sub vexillis ejus sacramentum dixerunt. Peripateticorum classes, quae fidelissimas rationi se jactant, infectat etiam illa larva, instigat occulte, inscios agit sub sua signa; militavimus ei et stipendia ejus.



valet Aër sine corporis sui ad oras istius angustiae, quam subtilis, exilis, et (pene dixeram) exenteratus perlabitur, allisione, divulsione; itaque duram illam legem indignabundus exsequitur, et saepe (quod promi norunt) cum fremitu. Ast omnes hae Corporum curae, studia, tormenta, quorsum? Nimirum ne inter dolii fornicem et, auxiliis infra dilapsis, subfidens Vinum prodeat aliquando monstrum illud vecors, ridiculum, nugax, sine mente, sine corpore, *Vacuum*, inane, nihil, quod horret jure merito Natura, sicut Manducum

*In gremio matris formidat rusticus infans.*

Ad haec Pantomimus vim quandam vitalem per omnes res pertinentem, *Appetitionem et Aversionem* induxit. Ipso igitur instigante, *non-esse* res omnes horrent; *esse* suum velut vitam et salutem amant medullitus, nihil eo carius, nihil (ut verum dicam) antiquius habent; mox qualiscunque illius vitae subsidia quaedam parant, et abarcent noxia, postremo res meliores quaerunt et de his sibi prospiciunt, quae sunt ad commodum et voluptates. Sic aqua quae incaluit, igne sublato, paulatim excutit calorem, et cudit sibi tacitis malleis novum frigus; calor enim infestus Aquae id agit, ut in fumum ac vapores resoluta dispereat; imo, quod horrendum est magis, dispereat [*sic*], ne residuo quidem cadavere. Sed hîc mihi jam, Pantomime, injicitur scrupulus, cur Aquae frigus affectandum potius quam calorem putes. Ambo, cum modum excesserunt, ex aequo noxia sunt: calor eam in vapores, frigus in glaciem vertet. At enim glacies in Aquam facile liquefcit; et vero vapores quoque in Aquam facile coguntur; ecce par ratio. Quapropter auctor ego sum Lymphae (quod memini prudentiores inculcare mihi facpius; et gratias ago),

*Auream servet mediocritatem,*

si modo nomen Aquae, et usus, quos nobis praebet, lavandi, rigandi, navigandi, integros et salvos esse velit. Denique alias

Aqua in nubes coacta depluit, alias e fontibus scaturit in rivulos, e rivulis in fluvios, et ex his in mare, post multas ambages se devolvit; quae omnia tam sedulo molitur Aqua, ut aucto numero firmior, et adversus hostium insidias tutius, et cum sui similibus degat suavius. Sic mollis ille latex, cum suâ sponte infirmus, et aliorum libidine sit infestus, prudenter et cate se tuetur. Sed avos nostros, lapides, inquam, filices, marmora, genus illud durum, et adversus hostium suorum incursiones perpetuo cataphractum, nescio quae tanta teneat impotentia. Tutum illis sublime versari; imo sublime, quam humi, securius agent; non situm contrahent, non obterentur plaustris, non urentur in calcem. Verum enim vero surdis ea canimus: tantum abest ut, his adducti rationibus, ipsi se in altum subvehant, ut manibus nostris in aërem projecti sexcenties, sexcenties recidant, et ne punctum quidem temporis subsistant loco tam aprico, tam salubri. Quin e domorum et turrium fastigiis, quam primum soluti sunt, praecipitant et devolvunt se in ima, libidine tam effraenatâ, ut infra ad platearum incolas fraterculos suos appulsi dissiliant in partes, et integritatem suam miseri, velut animulam aliquam exhalent. O interim immites cognatos illos, et vere faxeos! qui et hospitem et fratrem, in amplexus suos tam avidè ruentem, non accipiant molliore culcitâ. At, at! E vicino Peripato contenta vox, cum iracundiâ et stomacho: *Inepta sunt ista, quae Peripateticorum sensis passim interponis epiphonemata; tute fabulas istas habe tibi; Peripatetici haec talia non dicunt.* Fateor, non dicunt. Sed, o quisquis es, qui vocem illam animas, incola Peripati; populares tui glossas faciunt; ego interpretem ago, commentarium adfero; estne quod mihi jure succenseas? Illi lineamenta ducunt; ego lineamentis colores induco. Filum illi neverant, et opus erat acu. Sed, o bone vir, etiam in Circo vestro non primos tantum actus, sed integras etiam saltant fabulas (quanquam, quae laus est mutilare, et supremum actum praecidere?). *Materiam* habere se ad

instar foeminae, *formam* esse velut marem; eas inter se diligere, concupiscere; num aliud sapiunt? Hinc vero nascuntur longe lateque diffusae quaestiones triobolares: *An Materia Formam appetat, quam amisit?* Dicas eos quaerere, an Materia lugeat maritum vita jam defunctum. *An Forma, qua fruitur Materia, appetitum ejus expleat?* ita ut novis nuptiis memoriam exuat veteris connubii. *An plures simul Formas appetat?* et omnibus se pervulget. *An vero nobiles prae ignobilibus ambiat?* Tum vero fescennina illa, de *Dispositionibus requisitis in Materiâ, ut a Formâ iniri possit; de copulâ seu Unione Physicâ inter Materiam et Formam;* si quis appellet, honos praefandus sit. Haec et caetera de genere hoc, quae longum est persequi, cum Peripatetici obviis ulnis in Philosophiam receperint, praestent etiam et tueantur necessum est, si hasce meas commentationes, et infinitas quas otiosus comminiscar similes, Philosophicâ civitate donavero <sup>1</sup>. Scimus igitur (et quis id ignorat?), his <sup>2</sup>, quae sensu et cognitione carent, boni nihil aut mali esse; sint, non

---

I antequam scivimus. Pantomimus naturarum nobis fabricavit exigentias, naturales resultantias, essentiarum nobilitates et ignobilitates, sympathias et antipathias et Intelligentias; et si qui similes asseres in pontem asinum non inconcinne quadrant, ab illo sunt ut plurimum artifice. Persuasit materiam formas, et has vicissim appetere materiam, aquam exigere frigus, lapides gravitatem desiderare, sponte suâ deorsum niti, violente sursum trudi ac detineri. Novimus quippe homines, dum carceribus detinentur inviti, si quâ parte detur exitus, erumpere protinus et effugere; et imaginem illam transtulimus ad lapides, quia dum subjecto sibi aëri incumbunt, non sistunt, sed ingratum sublime perosi, provolvunt se in ima, tantâ subinde libidine, ut inferne in plateales forte fraterculos impacti dissiliant in partes, et esse suum miseri velut animulam aliquam exhalent. Immites sane cognati et vere faxei, qui hospitem tantâ in eorem amplexus ruentem aviditate non excipiant molliore culcitra. Ineptum, inquis, postremum hoc, et a Peripateticis non dicitur. Fateor; sed si tu allegoriam inchoas, quis mihi jure succenseat si diducam? Si tu lapides secundum appetitum suum labi dixeris, cur ego appetitum istum libidinem non vocem, et lapides confratres, et horum quosdam inurbanos, pari tecum ratione, pari tecum licentiâ? Tu allegoriam diducis, dum operose quaeris, an materia appetat formas deperditas, et nobiles plus quam ignobiles, aliaque id genus. Cur mihi item istam meam diductionem, et infinitas quas otiosus confingam similes, non liceat philosophicâ civitate donare? 2 iis.

sint <sup>1</sup>, nihil pensi habent lapis, aqua, terra <sup>2</sup>. Sed appetitum, inquis, affingo per Metaphoram, similitudine ab animantibus desumptâ. Belle; abi igitur in patriam Pantomimi; ad Parnassum, inquam, te confer, et

*Castaliâ bene potus undâ*

finge fomnia quot volueris: quid ad indaginem veritatis istae lyrae <sup>3</sup>? Verum ab hoc parumper abeamus <sup>4</sup>; Communes quasdam Notiones, ceu opima spolia Rationi detracta, Peripatetholis appendit Pantomimus <sup>5</sup>; velut *Ea quae moventur, naturaliter ad quietem tendere*, quod eo spiritu instincti canebarum, qui suis quaeque motibus, ut nos cursu et ambulatione, defatigari suggererat <sup>6</sup>. Alterum <sup>7</sup>, *Nihil agere in se ipsum*, quia <sup>8</sup> unumquodque (sic nos comparati fumus <sup>9</sup>) amicissimum sibi videbatur. Cum tamen sciamus, homines quosdam mortem non opperiri, sed manu facere; cur Pantomimus nonquid simile transtulit ad Res Naturales? statuitque earum aliquas furere, et velut desperabundas necem sibi consciscere <sup>10</sup>? Et vero, si memini recte, id <sup>11</sup> ipsum quod ridemus de igne censet Peripateticorum recentium <sup>12</sup> non nemo. Denique <sup>13</sup> *Cessante fine, cessare media*, quo mari suadere solebamus <sup>14</sup>, ne premeret in fundo suo margaritas quaerentem <sup>15</sup> urinatore. Cum enim pondus et premendi vis eo fine data sit aquae, ut locum naturalem, si quando de illo deturbaretur, repeteret; locum verò

---

1 sint an intereant. 2 nihil p. h. lapides. 3 nugae. 4 Sane si Peripateticorum plurimos rhetores magis et poëtas et dialecticos quam philosophos esse dixero, forte non abs re dixero; adeo sunt in verbis, in metaphoris, in allegoriis toti, extra haec paene nihil. Sed ad ulteriora propero. 5 notiones in scholam nostram invexit ille genius; 6 quod non ex alia statuitur apprehensione, quam quâ persuatum habemus, suis quaeque motibus, ut nos cursu et ambulatione, lassari. 7 Secundo. 8 add. nempe. 9 quod inter nos fit. 10 Mirum interim, cum videant homines quosdam violentas manus sibi intulisse, in eam cogitationem non esse dilapsos, ut pari ratione res quasdam furiosas et velut desperabundas statuerint, quae in interitum suum naturaliter se arment. 11 si memini, hoc. 12 censet Neoteri-  
corum. 13 Tertio, 14 persuasum eunt. 15 ne premat subjectum.



illum, quae ad mare pervenit, feliciter et ex animi sui sententiâ consecuta sit aqua; non est quod ibi premat adhuc <sup>1</sup> et fatiget se gratis. Sic Rationis moneta illa proba receditur, et Pantomimi signis deformata, deinceps non facit ad quaestum Veritatis <sup>2</sup>. Tandem <sup>3</sup> vero, cum etiam *Intelligentiae* nobis suppetias venerunt <sup>4</sup>, hae nos in Pantomimi castra totos abduxerunt <sup>5</sup>. Quid enim aliud sunt <sup>6</sup> *Intelligentiae* fideribus aut coelis affixae, infixae, quam id ipsum, quod nos sumus, mentes cum corpore <sup>7</sup>? Sed lepidum hoc <sup>8</sup>, et Pantomimum etiam spirat <sup>9</sup>, quod *Intelligentiis* illis non nisi ampla et magni momenti officia demandamus <sup>10</sup>, quae vero non tanti ponderis negotia videntur, ea <sup>11</sup> *Formis substantialibus* commisimus. Quae quidem <sup>12</sup> ipsae, ut eas commenti sumus <sup>13</sup>, non nisi *Intelligentiae* quaedam sunt, licet illas hac nondum compellatione dignemur. Ne sol aliquando <sup>14</sup> exorbitet ab *Eclipticâ*, directricem ei et viae istius peritissimam *Intelligentiam* adjunximus; Lapidem vero de simili comite non prospicimus, nihil veriti, ne forte dum labitur <sup>15</sup>, a perpendiculari <sup>16</sup> deliret. Hujus tamen error, errore solis non minus perniciosus et exitiosus esset <sup>17</sup>; non vitra fenestrarum <sup>18</sup>, quid dico? non capita nostra tuta sunt <sup>19</sup>, si lapides obliviscuntur viae suae <sup>20</sup>, si fursum ruere <sup>21</sup>,

---

1 Nam cum ad petendum locum naturalem deorsum ei nitendum fuerit, cur eo jam adeptio premat ultra. 2 Quarto, *causam effectui nobiliorem esse debere*; propter quod causae primae toties importuni [*sic*], ut inter collisum chalybem et silicem scintillas dispergat, et alibi plerumque formas substantiales se solâ producat, ad quas materia fuerat aliunde disposita. 3 At. 4 dum intelligentias admisimus. 5 in Pantom. castra toti concessimus. Quid enim rei (ne cavilleris, ne subterfugium quare futili distinctione). 6 quid, inquam, aliud rei sunt. 7 fidera, dum intelligentias illis affigis, imo infingis, nisi animalia quaedam mente praedita? 8 non illepidum est, 9 et ab eodem etiam genio manat, 10 quod Intelligentias illas non nisi gravioribus negotiis deputemus, veluti coelorum motibus et marinis aestibus moderandis, 11 leviora vero negotia, ut nobis quidem videntur, 12 tamen. 13 prout a nobis effectae sunt. 14 interdum. 15 cadit. 16 extra diametrum. 17 tam perniciosus quam illius. 18 nunquam fenestrarum vitris. 19 quid dico? nunquam capitibus nostris tutum erit. 20 oblivisci viae suae contingat. 21 ruant.

aut huc illuc in transversum palari statuunt <sup>1</sup>. *At enim ars major in motu siderum, industriae plus; ea re sideribus assistentes Intelligentiae dantur* <sup>2</sup>. Bonam in partem accipietis, quique de sideribus ita muginamini <sup>3</sup>. Videor mihi Phoebum (sic enim sol inter polyonymos illos vocari mavult) quotidiani operis et penſi ſui difficultates Phaëtoni ſuo inculcantem audire <sup>4</sup>:

*Ardua prima via eſt, et qua vix mane recentes  
Enituntur equi. Medio eſt altiffima coelo;  
Unde mare et terras ipſi mihi ſaepe videre  
Sit timor, et pavida trepidet formidine pectus.  
Ultima prona via eſt, et eget moderamine certo;  
Tunc etiam, quae me ſubjectis excipit undis,  
Ne ferar in praeceps, Thetis ſolet ipſa vereri.*

Ut ovum ovo, ſic fabula <sup>5</sup> haec iſti ſimillima Philoſophiae. Obſequendo confutemus inſaniam, et, quod dici ſolet, clavum clavo pellamus <sup>6</sup>. Ajo ego, in lapidis deſcenſu tantum <sup>7</sup> artis elucere, quantum elucet <sup>8</sup> in ſolis circuitu. Notaſti lapidem, e quocunq; faſtigio demiffum, ad terram rectâ contendere, idque etiam denſiffimis tenebris, quando lynceſ non melius vident quam talpae? Notaſti lapidem, pro morâ lapſionis, impetum et vires augere, motum accelerare juſtiſſimâ proportionem? Notaſti lapides, majorem alterum, alterum minorem, ſi interjecto baculo conjuncti e fenetrâ domûs ſimul ſolverint, praecurrere majorem, et primo ſubjectam aream contingere, ſequi minorem; ſi vero ſoluti fuerint, comitari inter ſe, et eodem ambos momento ad terram illidi? Notaſti item lapides,

---

<sup>1</sup> palentur. <sup>2</sup> Sed in ſolis motu, inquiunt, major cernitur industria, plus difficultatis eſt, quae aſſiſtentem ei Intelligentiam non obſcure arguat. <sup>3</sup> Ignorant; <sup>4</sup> non poſſum hîc non reminifci iſtius Ovidiani Metamorphoſeon ſecundo, ubi Sol ſive Phoebus, ut ibidem audire mavult, diuturni itineris ſui difficultates coram Phaëtonem ſuo exaggerat. <sup>5</sup> poëſis. <sup>6</sup> omitt. et., pellamus. <sup>7</sup> non minus, forte plus. <sup>8</sup> artis ac difficultatis eſſe quam.

majorem alterum, alterum minorem, si quod ad terram e turris apice stadium est decurrant, mediam prope curriculi partem aequis passibus metari, inde subito majorem antevertere, et longo minorem intervallo post se relinquere? \*) Notasti lapidem aequali pondere cum plumbo libratum in aëre, si stateram sub aquâ demergas ascendere, plus tamen ponderis hunc lapidem quam istud plumbum (quod item ad trutinam examinare potes) in fundum aquae derivare? Cedo solaris circuituonis praerogativas; si vel unam dederis, dabo victas manus <sup>1</sup>. Satis est; Amor-sapientiae, ferendae <sup>2</sup> sententiae, silentium poscit. *Pantomime, Scholas nostras deferito. Commenta, quae intuleras, efferto. In patriam, ad Parnassum, quantocius remigrato* <sup>3</sup>. Habet <sup>4</sup>. Abitum maturat <sup>5</sup>, et excerpit, quibus abunde libros nostros infarserat, paginas <sup>6</sup>. Quanta strues jam nunc! ut, cum loquimur, accessione perpetuâ crescit, ut porro crescet <sup>7</sup>! Itaque

---

\*) Hoc sic effectum datur: Sume tibi stateram A; et in una ejus lance pone lapidem B; in altera lance plumbum C, eâ quantitate ut fiat aequilibrium inter B et C, et stateram A sic instructam demerge sub aquam; fac libere pendeat in aqua, ita ut nulla pars ejus fundum aut latera tangat. Videbis lapidem A attolli in aqua; plumbum B deprimi. Exime jam stateram A ex aqua; et parata sit alia statera major D, in cujus una lance sit aquae situla E; in altera lance aquae situla F; atque hae situlae E et F simul cum aquis, quas continent, aequiponderent. Cape praedictum lapidem B, eumque ex fune ligatum et suspensum demerge in situlam E: ita manu funem tene, ut quidem lapis B in aqua situlae E penitus demersus sit, sed nec fundum nec latera situlae E contingat. Sit etiam alius tecum, qui plumbum C, eodem modo ex fune suspensum, eodem modo demergat in situlam F. Videbis illam lancem staterae D, quae continet situlam E, cui immergitur lapis B, deprimi; oppositam vero lancem ejusdem staterae D, quae continet situlam F, cui immergitur plumbum C, attolli. Horum nobis in promptu quidem ratio; sed hic non promenda.

1 circuitu. Notasti libellam filo suo diametrum signare? notasti lapidem culmine demissum unde a saeculo deciderat, eodem quo tunc recidere, idque etiam densissimis in tenebris, ubi lynx non magis videat quam talpa? notasti pondus aliquod pro mora lapsus impetum et vires augere, motum accelerare justissimâ proportionem? notasti majorem lapidem si cum minore funiculo colligatus sit, anteire et primo subjectam aream contingere, si vero solutus, comitari et eodem ambos momento ad terram allidi? Confer huc, si potes, solaris circumvolutionis majores praerogativas, et obmutescam. 2 effèrendae. 3 *In Patriam remigrato*. 4 Bene habet. 5 *add. ille*. 6 quos libris nostris infuserat hinc inde quaterniones. 7 Ecce propemodum succumbit farcinae;

bajulos conducat sibi, aut agitatore cum plaustro; ne si ipse humeris subeat, farcinae suae succumbat tenellus <sup>1</sup>. Interea, cum haec parantur <sup>2</sup>,

Prodeat in iudicium MANGO, ornatus et harmoniae Genius. Adeft ecce. Minio ei et fuco infecta facies <sup>3</sup>; in graciles arcus <sup>4</sup> accuratissime detonsa <sup>5</sup> supercilia; in pariles utrinque cincinnos, cunctante calamistro, divisa caefaries. Collum et brachia inter byssum et vittas circumcludunt monilia. Ex utroque humero, in alterna femora pertinentes <sup>6</sup>, pectus et tergum decussant bullatae torques. Acupicta vestis, mille maeandris in se revoluta, mille fimbriis praetexta <sup>7</sup>, mille striis intorta, centumcoloribus laciniis <sup>8</sup> digitos pedum lambit <sup>9</sup>, et longo secundum calcem <sup>10</sup> exundat in terram syrmate. Gestus ei, nutus, incessus, elocutiones, accentus, tussis, sputum, et his quaecumque aut paria aut etiam minora <sup>11</sup>, omnia sunt perpetuum artificium <sup>12</sup>, omnia affectata, studio composita; germanum nihil. Patria hujus Genii, plumariorum et Phrygionum tabernae. Educatus est in mulierum gynaeceis, inter puparum mundos, inter nundinarum crepundia, inter conchyliata aulaea <sup>13</sup>, inter belluata tapetia <sup>14</sup>, inter caelaminum pampinos et thyrsos, inter Corinthiorum operum crobilos et corymbos <sup>15</sup>; et si quae his similia, in quibus Artis libidine penitus deflorata Natura est. Cum te tuamque supellectilem contemplor, o Mango, non possum quin interpellem, ecquid tibi venerit in mentem, quamobrem ad inamoenos illos et tam tui dissimiles sophistas abieris <sup>16</sup>? Quibus a diurnâ incubatione, situs; a nocturnâ lucubratione, tabes;

---

1 decidunt ei aliquot circa scholae vestibulum pagellae; has colligunt avidè qui sistunt in limine, qui Philosophiam salutant per transfennam. 2 *omitt.* Interea.... parantur. 3 Facies ei minio tincta. 4 tenue filum. 5 lunata. 6 deciduae. 7 laciniis implicata. 8 fimbriis. 9 lambit anteriora pedum. 10 post calcaneum. 11 aut minora. 12 artificium omnia. 13 conchiliatas aulaeas. 14 chymaerica peripetastinata. 15 Corinthiacas operum structuratas. 16 capere satis non possum, quâ tandem persuasus ratione ad inamoenos illos et tam tui dissimiles Sophistas te contuleris.



a rimandis minutiis et <sup>1</sup> argutiis, conniventes oculi, distorti et introrsum acti; ab obstructis hypochondriis, squalor, caperata frons, impexum capillitium, neglecta barba; ab oleo foeda foetidaque <sup>2</sup>, a vetustate detrita, ab egestate pannosa lacerna <sup>3</sup>. In eorum Scholis nudi parietes, diffracta vitra, araneis obducta <sup>4</sup> tabulata, ignotum <sup>5</sup> sub pulveribus pavementum, iisdem oppleta scamna, cathedrae, pulpita, nisi qua parte natibus et cubito verruntur. Ita sane austeros illos incultosque viros, fuco, bullis, et phaleris istis <sup>6</sup> perstrinxisti, fascinasti, ut quidquid aedibus alibi, quidquid templis et coenaculis et vestibis inest mangonii, totum hoc eorum cerebro transcripsisse videare. Toti sunt in smegmate, imaginariis distorquent omnia perfectionibus; si pulchri concinnive quiddam otium suggererit aut somnium, id <sup>7</sup> Naturae rerum obtrudunt liberaliter et plenâ manu <sup>8</sup>. Palam vociferantur: *Mundo nihil abesse potest; hic aptus undique, perfectus, expletus est omnibus numeris. Quod ad ornatum et harmoniam ejus facit* <sup>9</sup>, *nisi Sensus ad ravim usque reclamet, extemplo concedendum est* <sup>10</sup>. Hoc in Philosophiae fundamento reponunt; hoc velut jusjurandum, quo Mangoni se obstringunt <sup>11</sup>, non Philosophi jam sed Philomangones. Aliquot fraudes <sup>12</sup> tuas, o Mango, proferemus in medium, quibus devotum istum gregem deludis; omnes prosequi <sup>13</sup> voluminis opus erat. Tu eos tot ambientium inter se, et aliarum alias implicantium <sup>14</sup> Sphaerarum capsis inclusisti, ut spes nulla suppetat <sup>15</sup> expediendi, et in communem eos, qua caeteri mortalium fruuntur, libertatem vindicandi. Nam principio <sup>16</sup> quidem terram et aquam, in unum globum conflatas <sup>17</sup>, Centro dedisti; huic aërem orbi-

---

<sup>1</sup> *omitt.* minutiis et. <sup>2</sup> ab oleo pinguis. <sup>3</sup> detrita lacerna. <sup>4</sup> subtexta. <sup>5</sup> incognitum. <sup>6</sup> viros bullis istis et phaleris. <sup>7</sup> id protinus. <sup>8</sup> obtrudunt ambabus manibus. <sup>9</sup> Palam vocif. et principii apud eos loco est, *quod ad ornatum et harmoniam mundi facit.* <sup>10</sup> *esse.* <sup>11</sup> Hocce Sacramentum quod Mangoni dicunt, <sup>12</sup> imposturas. <sup>13</sup> recensere. <sup>14</sup> tot implicantium se mutuo. <sup>15</sup> superfit. <sup>16</sup> expediendi. Nam primo. <sup>17</sup> unum in globum convexas.

culatim afflas <sup>1</sup>; aërem incrustas igne; ignem orbe Lunari complecteris; Lunarem Mercuriali, Mercurialem Venereo, Venereum Solari, Solarem Martio, Martium Joviali, denique Jovialem orbe Saturnio coërces. Hosce Planetarum coelos magnâ impensâ, magno Excentricorum Epicyclorumque instrumento tueris; hosce <sup>2</sup>, quo diffidentes inter se gyros et attritiones <sup>3</sup> constantius ferant, poliiſti jam pridem <sup>4</sup> et solidasti. Spiffum opus et operosum <sup>5</sup>! Planetarum coelos majoribus gremiis complectitur Firmamentum; hoc Sphaerâ cryſtallinâ <sup>6</sup>, haec Primo Mobili continetur <sup>7</sup>. Et aliquot adhuc forte coelis interjectis, tandem, tandem Empyreï peristromatis clauduntur omnia. Ultra haec nihil. Sed nihil illud non nihil eſt, imo vero ingens circum Palatium illud area, quam Mundorum, qualem hunc Mango finxit, myriades quotquot nunquam expleverint, *Spatium*, inquam, *imaginarium*, quaquaverſus ſine ſine vaſtum, deſolatum, ab omni corpore, ſed magis mente vacuum. Euge Mango! Euge! Belle! *Καλῶς*! tua ſunt haec omnia et inventa et commenta praclara. Verum inter haſce fauſtas acclamationes aliquid eſt, quod frontem feriat <sup>8</sup>. Exleges in tellure noſtrâ tuberes et colles male te habent; reconcinnare velles, ſi liceret, complanare terram, eamque in perfectum globum tornare, atque adeo <sup>9</sup> nos omnes ſuperfuſis aquis demergere; nam terſa ſic et limpida et politula in Mundi meditullio ſtareſ res <sup>10</sup>. O igitur, ſi id liceret! Non licet; per Senſum, inquam, non licet. Olympos hic nobis et Pindos exhibet, et

*Immanes ſcopulos Acroceraunia.*

Ergo conclamatum eſt, quando invito Senſu nihil poteſ, o

---

1 circumſlas. 2 complecteris; hunc Veneris, Mercurii, et ſuperiorum Planetarum coeli ſimili ſequuntur ambitu cum toto excentricorum epicyclorumque apparatu; hos etiam. 3 periodos et affricus. 4 *omitt.* jam pridem. 5 *omitt.* haec 4 *verba*. 6 dein nona ſphaera. 7 dein primum mobile. 8 primum mobile, et ſi quibus aliis adhuc coelis partem aliquam demere placeat de deſolato illo et horribili Imaginario. Omnia belle, Mango. Video tamen quod diſpliceat etiamnum. 9 complanare velles, et. 10 nam terſius ita eſſet et limpidius.

Mango. Sed hem! Sensui intercedunt Theologi quidam, caperata fronte, male feriati; nam magnâ curâ magnas nugas tuentur. Hi terram olim (non ita multo post *Diem judicii*) abrafo montium rupiumque scabro, reformandam in globum concinnissimum; post haec, aequali circumquaque profundo involvendam praescribunt. Proinde, Mango, exspecta cum patientiâ, et hoc tantisper utere solatio. Sed ab hoc parumper abeamus; *Entium* etiam Rempublicam quamdam commentus est Mango, quam dignitatum et officiorum insigniis eleganter distinxit. Nam inter *Entia*, *Substantiae* praestant *Accidentibus*. Inter *Substantias*, *Spirituales* nobiliores sunt *Corporeis*. Inter has, quae *essentialiter incompletae sunt*, velut *Materia prima* et *Forma Substantialis*, ultimo censentur loco. Quarum illa vix in aliquem numerum venit; tota deses, nihil agit, omnia patitur, parvo intervallo distat a muto illo et penitus penitusque mortuo *Non ente*. Inter *Substantias corporeas completas* patricii sunt Coeli eorumque Stellae, tum etiam Ignis; Aër nobilium ultimus, citimus plebi; plebs ipsa, Aqua, Terra, et hi Terrae filii, filices, argillae, rudera, quisquiliae. Non enim omnes gigantum fraterculi plebeji sunt in hac Republicâ. Quidam, quando admodum opulenti sunt, jus sibi et insignia Nobilitatis coëmerunt, ut Aurum, Argentum, Gemmae: quorum ideo, in sanandis et exspoliandis aegris, virtutes et potestates mirae notae sunt Archiatri et Pharmacopoeis. Omnibus sic inter se communiter constitutis et quadratis, Genius noster mangonizatum vadit singula; et Coeli quidem *Physice simplices*, id est, *Materiae primae* et *Formae substantialis* expertes ponuntur. Spectat enim ad Mundi ornatum et complementum, ut corpus tale aliquod complexu suo teneat; mutila videri posset, si hoc *Gradu entis* destitueretur Rerum Universitas. Ex simili delirio corpora coelestia non generantur, non corrumpuntur, non crescunt, non decrescunt, non gravia sunt, non levia. Post haec, potestatibus miris donantur fidera, *influentiis* et *qualitatibus* a nomine *occultis*, a re tam notis quam

quae vulgo notissimae putantur, Gravitas Levitasque <sup>1</sup>. Elementa sic ornantur: duae dantur singulis *qualitates* ex quatuor primis; Ignis summe calidus et excellenter siccus; Aër summe humidus et excellenter calidus; Aqua summe frigida et excellenter humida; Terra summe sicca et excellenter frigida <sup>2</sup>. Textus perquam amoenus est et verficolor! Quo exemplo, in quatuor *Humoribus*, Bile, Sanguine, Pituitâ, Melancholiâ; in quatuor anni tempestatibus, Vere, Aestate, Autumno, Hieme; in quatuor vitae aetatibus, Pueritia, Juventute, Aetate consistente, Senectute; ac in multis aliis eadem illa tela textitur. Hinc etiam Elementa quaedam *Symbola* dicuntur, quae nempe in eâdem *qualitate primâ* conveniunt: ut Ignis et Aër in Calore; Aër et Aqua in Humore; Aqua et Terra in Frigore; Terra et Ignis in Siccitate (haec inter se orbem saltatorium versant). Quaedam *Asymbola*: ut Ignis et Aqua; Aër et Terra (haec disjuncta tripudiant). His momentis examinant Elementorum aliorum in alia faciles ac difficiles commutationes; in his observantur praeterea multa ficta, frivola, ad quae longum est abire. Sensus interpellat subinde, et alia testatur? non credunt, ne jurato quidem <sup>3</sup>. Obstrepit importunius? os ei batuunt, consputant, improperant <sup>4</sup> omnes, quas aliquando machinatus est, imposturas. Conticescat ocus: quia lubet, et decet, et debet <sup>5</sup> esse quidquid adeo <sup>6</sup> speciosum est. Haec de Coelis et Elementis, quae Mangoni *Corpora simplicia* dicuntur; reliqua ei corpora sunt

---

1 limpidi. Id quidem sensus negat tibi hodie, sed expecta tantisper cum patientia; nam post diem iudicii concedit otiosa quorundam Theologia. Generali ordine statuto genius noster manganizatum vadit singula. Et coeli quidem physice simplices ponuntur; quia spectat ad ordinem universi; mutilum videretur si hic gradus entis deesset. Ex simili delirio nec crescunt nec decrescunt, neque graves neque leves sunt. Post haec energiâ mirabili donantur sidera, infinitis virtutibus horum inferiorum motricibus, et influentiis tam occultis, ut praeter generale hoc nomen vix quidquam habeant quo noscantur. 2 *omitt. ubique summe et excellenter.* 3 frigida. Quam pulchra ludit per binarios istos voluta! Phidiae diceres inventum, non Aristotelis; aliud clamet sensus, non credimus. Si. 4 batimus, improperamus. 5 *add. ita.* 6 quod tam.



*Mixta*, quae hîc in Terrestris globi superficie aut prope ab illa generantur, Metalla, Lapides, Stirpes, et Animalia; quibus conveniunt quatuor *qualitatum primarum* variis modis inter se temperatarum complexionibus variae <sup>1</sup>. Igitur marmor calorem habet, etiam dum gelidâ plus urit glacie; et humor est in pumice, cui ne guttam quidem unam exprimas sub arctissimo torculari. Inter haec, et id genus alia <sup>2</sup>, a quorum longius persequendo <sup>3</sup> catalogo deterreor <sup>4</sup> nausêâ, nulla ratiocinantium sensa <sup>5</sup>, omnia sic volentium placita sunt <sup>6</sup>. Ac miror *Placitorum* etiam nomine <sup>7</sup> cenferi ab iis, quibus oraculorum instar sunt. Nempe quaestionem gravem in mendaces habet Veritas; et quae rebus nomina conveniunt, ea nihil ejusmodi cogitantibus, et alia prorsus agentibus extorquet <sup>8</sup>. Sic auritum illud animal, quod ad clavum subinde fedet in Republicâ, et <sup>9</sup> sub leonis adorandum est exuviis, etiam tunc, forte per oblivionem <sup>10</sup>, audit vêtus suum verumque nomen, Asinus. Fateor <sup>11</sup> equidem in hac Rerum Universitate reperiri quamplurima, quae humanum animum, ordinis ac elegantiae cupidissimum, specie sua delectent et mirum in modum rapiant <sup>12</sup>: In his etiam tam industria sunt quaedam, et ad meram quasi <sup>13</sup> pompam elaborata, ut Natura, quae Artis exemplar esse solet, reciproco lusu capta, videatur Artem imitari voluisse. Quomodo minimas aliquas nivium quisquillas in elegantissimas stellulas crenat et circinat, mille gyris et spiris marinas conchas exsculpit, mille modis Tuliparum flores, pavonum caudas, colla columbarum distinguit <sup>14</sup>. At vero si animum <sup>15</sup> attendimus, sunt

---

1 speciosum est. Reliqua corpora sunt mixta, quibus dantur quatuor qualitates in temperiem redactae. 2 aliaque id genus. 3 prolixiore. 4 absterreor. 5 ratiocinii conclusio. 6 sunt fictionis placita. 7 add. subinde. 8 Habet vim istam veritas, ut convenientia rebus nomina ab inficiis saepenumero ac aliud cogitantibus extorqueat. 9 quod quandoque. 10 per oblivionem forte. 11 Fatendum. 12 mire rapiant et delectent. 13 ut apparet. 14 voluisse. Velut in marinis conchis exsculpendis, nivium stellulis circinandis, maculandis tuliparum foliis, variegandis pavonum caudis. 15 *omitt.* animum.

alia non pauciora, quae tumultuariâ quadam confusione et malignâ specie terrent nos et turbant. Sunt cancri et araneae, sunt foetores <sup>1</sup> tetri, sunt horribiles ululatus, sunt nocturni lemures, qui diro mentem nostram percellunt phantasmate. Cur igitur Naturam Rerum egregie comprehendissè nos existimamus, si eam pulchritudine, quae nobis arrideat, et concinnitate definivimus <sup>2</sup>? si limatula, si politula cuncta confinximus? Ultra sepem istam ludit, et (si genium ejus percipis) rudi interdum, incondito, ac robusto delectatur magis. Hoc amplius <sup>3</sup>: multa sunt, quae magis ad regulam exigere posset <sup>4</sup>, si genio nostro morem gerere Natura vellet. Quid si serenis noctibus pensiles illos sub coeli camerâ lychnuchos, confusos jam eos et nimis temere dispersos, ita redigeret in quadrum, ut Deorum formas et signa, quae Poëtae pariter ac Astrologi notant, repraesentarent ad vivum? Non defigendus esset obtutus, non vis adhibenda Phantasiae; primo statim in fornicem illum conjectu oculorum, perspicue notaremus

*Plejadas et Hyadas, claramque Lycaonis Arcton,  
Aemoniosque arcus, violentique ora Leonis,  
Saevaque circuitu curvantem brachia longo  
Scorpion, atque aliter curvantem brachia Cancrum* <sup>5</sup>.

Quod si Lunae nostrae sororem dedisset Natura, tum vero rem et visu pulchram, et humanis usibus <sup>6</sup> oppido fecisset commodam. Tunc inter se <sup>7</sup> pari forte nocturnas stationes partitae, altera semper pharum aegris mortalibus extulisset <sup>8</sup>. Nunquam ferales illas et tetras, et tam germanas morti in hibernis interluniis ire sivissent <sup>9</sup> noctes; alterius in interlunio silen-

---

<sup>1</sup> odores. <sup>2</sup> si eam adlubente nobis pulchritudine et concinnitate circumscriptimus. <sup>3</sup> Ad haec. <sup>4</sup> in quibus concordantior harmonia statui posset. <sup>5</sup> Quid si firmamentum ita camerasset, ut coeruleis istis sapphiris in lacunaria cemeutatis parallelos fornicum arcus haberent stellae? numquid placidius hoc amoeniusque futurum erat? <sup>6</sup> usibus hominum. <sup>7</sup> *omitt.* inter se. <sup>8</sup> efferret. <sup>9</sup> paterentur.

tium et ferias, alterius in plenilunio compensasset fedulitas et <sup>1</sup> vigilia; simul dividuae, vespertinas illa, haec matutinas tenebras diluisset <sup>2</sup>; deinceps illa <sup>3</sup> crescendo plus, haec <sup>4</sup> decrescendo minus excubisset <sup>5</sup>; sequens vices et onera mutasset mensis. Id si ita esset, post homines natos, nihil aptius, nihil pulchrius esset; cur autem ita esse confirmat <sup>6</sup> nemo? Quia sensus reclamationis; potis ille est Philomangones exsolvere sacramento. At vero adversum clamores ejus aurem obturabant alibi; cur hinc non item? Quia hinc vocalis nimium est, et ingenti, quidquid aures opplet <sup>7</sup>, pertundit boatu. Si ergo non altum increpet, si non stentoriis clamoribus objurget ille Cenfor, putant rem salvam esse, bene geri <sup>8</sup> omnia? Alias raucus est <sup>9</sup>, diutinâ cum furdastris vociferatione, alias hebes, alias <sup>10</sup> coecutit et delirat ipse. Quid ergo? Capió. Errare non recusant; quin imo formosos istos errores suavari cupiunt <sup>11</sup>, ita dulces videntur; si <sup>12</sup> liceat impune, si absit reprehendentium stomachus et irridentium ciconia. Ita est: amabili quadam deludimur infantiâ, dum posthabitâ Ratione ac <sup>13</sup> Naturae phaenomenis, Marte nostro Mundum <sup>14</sup> digerimus. Et sicut fabulam qui legunt, initio quidem fabulam esse satis meminerunt <sup>15</sup>, ideoque non tam ea quae narrantur expendunt <sup>16</sup>, quam <sup>17</sup> narrandi modum narrantisque indolem, affectus, ac studia; longius autem <sup>18</sup> profecti et inescati, totâ mente atque omni animo pendent <sup>19</sup>, sperant modo, et modo metuunt, tum gemunt, et serio tragicis illis nugis illacrimantur <sup>20</sup>; — ita etiam Philosophi, quod praeopi-

---

1 tunc unius in conjunctione ferias alterius in oppositione compensaret. 2 in semiluniis vespertinas una, matutinas altera dilueret tenebras. 3 una. 4 altera. 5 excubaret. 6 Pulchra sunt haec et harmonica; cur asserit. 7 operimentum omne. 8 Si ergo non increpet ille cenfor et objurget altius, putant, bene habent. 9 Raucus est alicubi. 10 hebes alibi, alibi. 11 in formosis istis erroribus suaviant. 12 *omitt.* ita dulces vid. *add.* si modo. 13 dum neglectis. 14 universum hoc marte nostro. 15 ludicra noverunt omnia et ab ingenio poetæ conficta. 16 ad ea q. n. attendunt. 17 *add.* potius. 18 ulterius vero. 19 pro-  
fecti, quasi jam in ferium abierint commenta, ita sunt impensi et inhaerent penitus. 20 gemunt etiam subinde et non falso lacrymantur.

nandi libidine dogma condiderant <sup>1</sup>, id usu, disputationibus <sup>2</sup>, altercationibus, frequenti docentium inculcatione <sup>3</sup>, flagitiosâ discipulorum credulitate <sup>4</sup>, supersticiosâ <sup>5</sup> vulgi de Philosophorum placitis <sup>6</sup> imaginatione, tandem vertunt in fatale et inconcussum <sup>7</sup> Elementum. Sic vis adhibetur Veritati <sup>8</sup>. Hac deinde ligamur <sup>9</sup>, et per errores trahimur <sup>10</sup> catenâ, cujus omnes hamos et annulos humana procudit stoliditas <sup>11</sup> et vecordia. At tibi repente (de via decedite!) Amor-sapientiae depellit Mangonem ab ansâ istius, quae nos tamdiu compedivit, catenae <sup>12</sup>. Ita enim invehitur: *Exi de ambulacris nostris; ocius, inquam, te proripe, fucate, adulterate Mango, cum intolerabili redundantia* <sup>13</sup>, *cum typho, quo cives meos infatuas* <sup>14</sup>, *et fumis et apparatus; loco cede genuinae, nudaе, simplicique Rationi*. Stupet ad hoc tonitru leno; et correptâ temere sub axillis cofinetice, discedit tibubante passu; quaque gradum incertum facit; dissipat, quae brachio non satis astrinxerat, crotala, mitras, redimicula, fibulas. Pone cum scopis Amoris-sapientiae satelles \*), et everrit, ne quid nudam Rationem, mox praesto futuram, ad pedes offendat <sup>15</sup>.

Video, iudices, ejecto Pantomimo, exterminato <sup>16</sup> Mangone, evulsis simul eorum de libris nostris dictatis, commentis <sup>17</sup>, et placitis, Scholasticam pene totam cum illis abiisse <sup>18</sup> Philosophiam, et de turgentibus illis in Bibliothecâ voluminibus non nisi exiguam superesse farraginem. Vix quidquam comperio

---

1 quod absente fecerant experientiâ figmentum. 2 mutuis. 3 crebrâ doc. impositurâ. 4 disc. supersticiosâ cred. 5 exoticâ. 6 sententiis. 7 in irrefragabile vertunt. 8 *omitt.* Sic... Veritati. 9 imposterum stringimur. 10 raptamur. 11 annuli de humana cuduntur stoliditate. 12 Sed propere huc animum advertite. Amor Sapientiae dejiciet Mangonem ab ansâ hujus catenae. 13 superfluo. 14 quo nostrum cerebrum dementas.

\*) Hos Satellites descriptos vide infra pag. 40.

15 passu. Cadunt hinc inde, quas brachio non satis astrinxerat, bullae; has humo et suspiciunt otiosi, degeneres, pigri sententiam explorare et experimentum. 16 abacto jam post Pantomimum. 17 *omitt.* commentis 18 scholarem in immensum decrevisse.



reliquum, praeter <sup>1</sup> Axiomata quaedam (ut prae se ferunt) <sup>2</sup>, Communes Notiones, et Generales Regulas.

In his <sup>3</sup> tamen etiamnum aliquid, quod a Ratione non est. Genius iterum aliquis subolet mihi <sup>4</sup>; exferat se de latebris suis, prodeat in medium. Hem! quam venerabilis ille est! a formoso Pantomimo, a compto Mangone quam diversus! Talis species in religionem veniat populo <sup>5</sup>. In vestitu nihil praeter depexam togam corpori, et capiti, insigne Magisterii, cucullum <sup>6</sup>; erecta facies et plana, nutus nullus; reductae palpebrae, fortes <sup>7</sup> oculi, fixus obtutus; inflatae buccae, sesquipedalium verborum ampullae. Gestus unicus, quo primoribus digitis in summum pollicem coeuntibus, paulatim cum sententiâ attollitur manus <sup>8</sup>, et in obliquum recidiva <sup>9</sup>, cum emphasi concludit effatum. Natus est hic Genius Delphis, sub Apollinis tripode; educatus autem apud Sphingem, inter Gryphos et Aenigmata. Singula ejus verba, singula mysteria; singuli verborum ambitus, singula decreta, singula sunt oracula, miro instinctu et afflatu edita, miris modis perplexa. Ipsummet <sup>10</sup> audiamus: *Conjugatorum sunt conjugata consequentia. Propter quod unumquodque est tale, ipsum est magis tale* <sup>11</sup>. *Quidquid recipitur, ad modum recipientis recipitur* <sup>12</sup>. *Nullum violentum est perpetuum; etc.* Si sensum exquiras horum glossematum <sup>13</sup>, aut rationem qua nitantur <sup>14</sup>, in promptu <sup>15</sup> responsio: *Abi ad Pedanos* (sic Philosophiae tirunculos contemptim appellat praecellentissimus Magister) <sup>16</sup> *et discere*. Quid ni? Fundamenta sunt <sup>17</sup>, Principia sunt. At ubi rudimenta ipsa tradit DOGMATISTES <sup>18</sup>, si quispam prae condiscipulis suis ardelio magnorum istorum crepi-

---

1 nisi. 2 *omitt.* parenthesin. 3 Inter haec. 4 genium iterum aliquem subodoratus sum. 5 Specie ipsâ religionem incutit imperitis. 6 et capiti magistralem cucullum. 7 immobiles. 8 palmus. 9 reciduus. 10 aenigmata. Quot loquitur ex cathedra sententias, tot decreta, tot oracula verborum involucris ut plurimum perplexa. 11 *omitt.* Conjugatorum... magis tale. 12 *add.* *Nihil est in intellectu, nisi prius fuerit in sensu.* 13 harum positionum. 14 ob quam ita tenendae sunt. 15 brevis. 16 *omitt.* parenth. 17 *omitt.* Fund. sunt. 18 Dogmatista.

tuum petat aliquam <sup>1</sup> ratiunculam, *Tu*, inquit, *tace puer*. *Tu* <sup>2</sup> *afinus ad lyram es*; *Aristotelis scitum est* (etiãsi Aristoteles id sciscat nusquam) <sup>3</sup>, *Discentem debere credere*. O dolosum circum! provectos ad rudimenta mittit; rudimentum ex profectu suspendit. His <sup>4</sup> igitur Principiis proveniunt nobis <sup>5</sup> imposterum falsa multa, involuta <sup>6</sup> quam plurima, quia Principiis commentitiis contortisque proveniunt <sup>7</sup>. Sed ecce: aliud quiddam in commodum studiosae juventutis meditatus <sup>8</sup> est Magister Noster; rem hercule compendio facilem! Tene haec pauca, tiruncule <sup>9</sup>, et te deinceps, te, inquam, Naturae consultior erit nemo: *Intelligentias, Formas substantiales, Causam primam, Influentias et Qualitates occultas, Vapores et exhalationes*. Percepistin' haec puncta? Euge! his expedies omnia. *Intelligentias* quidem non applicabis <sup>10</sup> nisi ad res <sup>11</sup> magni momenti magnique moliminis, quae in vasto et patente <sup>12</sup> quasi ad pompam fiunt; velut ad trufatiles coelorum molas circumagendas <sup>13</sup>, et aquas in marinâ mactrâ, quo statis horis intumescant, subigendas <sup>14</sup>. Cave sis, ne arboribus, aut herbis, aut lapidibus *Intelligentiam* ullam adjunxeris, ne Magneti quidem; licet enim hujus operatio, mirabilis <sup>15</sup> valde, plena sit industriae, at in angulo exercetur, non ita palam, nec in theatro; unde is *Influentia*, quae de minorum gentium Diis est, contentus sit. *Formis substantialibus* abutendum tibi erit ad mutandum corpora; sive intrinsicus <sup>16</sup>, quod ipsis eorum *formis* attribues <sup>17</sup>, sive extrinsecus <sup>18</sup>, quod *formae* corporis vicini imputabis; si nulla sit ad manum <sup>19</sup>, cui negotium hoc committi posse videatur <sup>20</sup>, ad asylum commune, ad Influentias coelestes confugies. *Causâ*

---

1 ibidem sciscitetur. 2 Tace puer, inquit. 3 *omitt. parenth.* 4 credere. Ex his. 5 deducuntur. 6 gratuita. 7 ex commentitiis gratuitisque principiis deducuntur. 8 muginatus. 9 *omitt.* tiruncule. 10 occupabis. 11 nisi rebus. 12 patenti. 13 velut coelis in gyrum proterendis. 14 et mari statis horis in tumorem fermentando. 15 admirabilis. 16 ab intrinseco. 17 quod ascribes propriae formae. 18 ab extrinseco. 19 nullum adit tale. 20 cui id jure committi possit.

*primâ* opus tibi est in formandis et producendis *Formis substantialibus* <sup>1</sup>, exceptis tamen formis Elementorum <sup>2</sup>, quibus speciatim concessum est <sup>3</sup> sobolescere, et stirpem suam in vicinâ propagare <sup>4</sup>. Caeterae formae <sup>5</sup> coelibes sunt et viduae; et introductis in *Materia Dispositionibus*, ut plurimum a coelorum occultis virtutibus, Auctor Naturae supplet eas de suo penu. Tandem, ne longior sim, *Vapores et exhalationes* habe tibi <sup>6</sup> ad omnem *Antiperistasis*, omniaque *Meteora* et *Imperfecte mixta* <sup>7</sup> discutiendum. I jam, ascende Cathedram, *resolve magistraliter*,

— — *Sume superbiam quaesitam meritis.*

Quis ineptias istas ferat? quis cordatus homo est, qui se scire aliquid in Naturâ rerum existimet, cum ista sciverit? Quid enim? si quis te miraculi alicujus causam interroget, tu vero <sup>8</sup> *Intelligentiam* adferas <sup>9</sup>, aut *Influentiam*, aut occultas rerum *Sympathias* et *Antipathias*; quid ista summatim continet responsio, nisi simplex illud, quod quilibet e plebe responderet, *Nescio*? Hoc tantum inter te et illos interest <sup>10</sup>, quod hi quidem humeros adducant, et ignorantiam suam fateantur ingenue; tu streperis quibusdam verbis fucum facias, et diffimules. Et vero si quaeratur, cur aqua, quae inferbuit, ab igne semota refrigescat <sup>11</sup>; cur adductae et in arcus sinuatae virgulae, si remittantur, in rectum se porrigant <sup>12</sup>; cur rugatum ab igne corium, si in cella recondatur <sup>13</sup>, explicet se denuo; respondebis, *Formam substantialem* talium corporum, aut *Potentiam* aliquam in iis residentem <sup>14</sup> haec omnia machinari. Nugae!

---

1 in productionibus formarum substantialium. 2 exc. solum elementaribus. 3 id indultum est specialiter. 4 ut se quandoque propagent in vicinia. 5 *omitt.* formae. 6 Vapores et exhalationes, ne longior sim, sufficiant tibi. 7 omnes antiperistases omniaque imperfecte mixta. 8 si mirac. alic. quaesitus causam. 9 protuleris. 10 Haec dumtaxat te inter et illos differentia est. 11 cur aqua semotis calefacientibus, a quibus patiebatur, refrigeat. 12 cur fracto tendine in directum resiliat arcus? 13 si sepositum fuerit. 14 iis insidentem.

Scopae diffolutae <sup>1</sup>! Fili istius, quo res omnes pulcherrime cum Principiis et primis Notionibus Natura copulavit et vinxit <sup>2</sup>, abruptio manifesta <sup>3</sup>! Non inclementius dico, quam par est <sup>4</sup>; ponam exemplum <sup>5</sup>, ut videas. Sit in Geometriâ rudis quispiam et idiota; stylo Dogmatistae docebo <sup>6</sup> eum <sup>7</sup> hac horâ (et equidem non <sup>8</sup> indigeo totâ), ut tam peritus sit Geometriae, quam depontatus aliquis Philosophus Physicae peritus est. Hoc igitur primum positum sit <sup>9</sup>, Triangulum esse aliquid ad instar <sup>9</sup> *Corporis naturalis*. *Materiae* vicem supplebit <sup>10</sup> *Magnitudo* (haec <sup>11</sup> enim indifferens est circa varias *Formas* <sup>12</sup>, nempe <sup>13</sup> *Circuli*, *Parallelogrammi*, etc.). In *Formae* loco habebimus *trium rectarum linearum, extremis inter se punctis tangentium, cohaerentiam* <sup>14</sup>. His igitur ita positis, Geometricae institutionis incipit mihi initium: *Tres anguli in Triangulo simul sumpti, duobus rectis angulis simul sumptis sunt pares*. Sit enim triangulum quodcunque; tum altero pede circini in ejus apice defixo, altero pede portionem circuli, summo angulo, a latere ad latus, quibus utrinque stringitur, subtende; idem fac duobus reliquis, qui ad basim sunt, angulis, circini cruribus eodem semper intervallo divaricatis. Collige jam tres istos arcus, tribus istis angulis subtentos, et in unum arcum dispone; semicirculum habebis, tantam scilicet circuli portionem, quanta duobus rectis angulis subtendendis sufficiat. Eo igitur ventum est, ut tres angulos in triangulo duobus rectis angulis aequales esse, perinde compertum sit et experientiâ notum, atque aquam ad frigus se reducere, vel ferrum ad Magnetem tendere. Restat (quod in Disciplinis utramque paginam facit) ut Ratio promenda

---

1 commentum! 2 quod ex principiis natura per res omnes pulcherrime deducit. 3 manifestus abruptus. 4 Non cenſeo ſupra meritum. 5 ponam negotium in ſimili. 6 idiota; edocebo. 7 *omitt.* eum. 8 nec tamen. 8 Supponat itaque. 9 Triang. eſſe corpus naturale, aut ſi ſcrupuloſus nimium eſt, ſupponat eſſe aliquid inſtar. 10 Locum materiae habebit. 11 illa. 12 ad varias formas eſt indifferens. 13 *omitt.* nempe. 14 Locum formae habebit ipſa forma triangularis.



fit <sup>1</sup>, cur in triangulo omnes anguli sint aequales duobus rectis? Hanc in promptu habet Dogmatistes, et accipe <sup>2</sup>: Quia *Forma* trianguli per naturalem resultantiam tres angulos suos cum duobus rectis angulis adaequat <sup>3</sup>. Pergo: *In triangulo angulus externus interno opposito major est* <sup>4</sup>. Id etiam circino expende; si enim unum latus trianguli deinceps producat, majorem arcum ei subtendes, quam angulo intra triangulum consistenti subtendi possit. Illud igitur sic esse, rursus experimento certum habemus. Ratio petitur? Eadem illa, quae *Formam* trianguli causatur, afferri quidem poterat (nam in omnem pedem quadrat iste cothurnus), sed grata varietas. Aliud igitur Dogmatistae nostro emungamus oraculum: *Exclusa conclusis ampliora fiuntur*; angulus igitur exclusus, et extra triangulum positus, incluso angulo major erit. Et quamvis hoc argumento, angulum externum non minus interno appposito, quam interno opposito majorem esse efficiatur, Dogmatistes tamen decernit, ut tum modo valeat Regula, cum de angulo externo et interno opposito sermo est. Nam, inquit, cum de angulis apppositis loquimur, non semper locum habet ista Regula; et quid mirum? *Omnis Regula patitur exceptionem*. Porro pergo: *Si duae rectae lineae inter se secuerint, angulos ad verticem aequales facient*. Hic pro ratione Naturalis quaedam Sympathia istorum angulorum offerri poterit. *In triangulo rectangulo quadratum lateris, quod recto angulo opponitur, reliquorum laterum quadratis aequale est*. Hic jam in consilium adhibere possumus *Intelligentiam* unam et alteram; est enim hoc Theorema maximi momenti, et Pythagoras (ut nobis narrant) cum id invenisset, tantum accepit subito laetitiae, ut hecatombem faceret <sup>5</sup>. Dixi; pergit jam

---

<sup>1</sup> *omitt.* His igitur ita positis..... promenda sit. <sup>2</sup> duobus rectis? Respondeat. <sup>3</sup> aequat tres angulos duobus rectis. <sup>4</sup> Quaero, cur angulus externus sit interno opposito major? <sup>5</sup> *omitt.* Id etiam circino expende... faceret. *add.* Respondeat, quia forma triangularis est talis naturae, ut si unum ejus latus deinceps producat, majorem ei angulum tradat quam intra se ex opposito contineat.

quisque isto tenore, et suo Marte Mathemata omnia resolvat et pandat <sup>1</sup>. Quid ais, Euclides bone <sup>2</sup>, de extemporalibus hisce meis Mathematicis <sup>3</sup>? num te poenitet jam operosae Demonstrationis, et longae sollicitaeque tuorum Effatorum ad Principia deductionis <sup>4</sup>? Ridete Mathematici, et scitote hos meos Geometrastrum <sup>5</sup> et hodiernos Physicos iisdem caepis vesci <sup>6</sup>. Satis est; Amor-sapientiae ad pronunciandam sententiam accingitur <sup>7</sup>. Quid agat? exilio multet Dogmatistam? Mitior quidem ista sententia ferri in Pantomimum et Mangonem potuit, quibus alibi res suae, nec tenues erant, ambitio (ut fit) compulerat in aliena. At monstrum hoc nulli bono est, extra quam intra Scholam perniciosius. Alibi inter veneficos characteres deformat <sup>8</sup> et immurmurat carmina; alibi cum perspicillis ad nasum legit Sibyllam et interpretatur, et ponderat, et superstitionem injicit popello. Inter haruspices alibi secat animalia, extra consulit, observat avium volatus, et hominum sternutamenta <sup>9</sup>. Alibi inter Physiognomos ex fatalibus <sup>10</sup> in fronte manibusque lineis, praefagia fumit eventuum <sup>11</sup> et fortunae. Alibi cum judiciariis Astrologis notat Planetarum *Domos et Aspectus*, *Rhumbos* facit <sup>12</sup> et *Horoscopus*. Totum illud atrae bilis plasma squalidum, tetrum <sup>13</sup>, nullâ causâ, nullâ ratione fundatum, totum ex Phantasiae ludibrio susceptum <sup>14</sup>, totum <sup>15</sup> se debet huic Genio infesto, perverso, praepostero. Praestat igitur ut hic opportune prehensus <sup>16</sup> tradatur lictoribus exurendus. Pyram dabunt tot chartarum in bibliothecis nostris paginae, imposturis ejus deformatae. Annuit Amor-sapientiae, et jubet, ut lictores sui, Zelus-veri et Contemptus-falsi, sententiam istam quantocius exse-

---

1 Habet satis; pergat jam suo marte per omnia theoremata et problemata. 2 magister Euclides. 3 de extemporalibus hoc meo Mathematico. 4 et longi sollicitique tuarum propositionum ad principia deductus. 5 quod hic Geometrastra mea. 6 et moderni Physici iisdem vescantur caepis. 7 accingit se ad pron. sent. 8 efformat. 9 sternutationes. 10 planetaribus. 11 successuum. 12 format. 13 insulsum, gratuitum. 14 nullis, quae ratio probet, innixum principiis. 15 add. inquam. 16 prehensus.

quantur <sup>1</sup>. Tantâ judicis severitate deterriti, proripiunt se e Scholâ quam plurimi pusiones Genii <sup>2</sup>, quos nominare mihi in promptu non est. Antesignanum tamen novi: GERRO est; qui pridem ex trivialibus Scholis, ex Grammaticâ et imâ Dialecticâ huc appellens, gerras multas nobis contexuit, verborum tricis detinuit, syllabis anxie discutiendis <sup>3</sup> exercuit, proposuit quaestiunculas multas exiles, frivolas, rancidas, auctaria, corollaria, parerga <sup>4</sup>. Esto <sup>5</sup>. Fugâ sibi consulant; accuratâ in abjectam illam plebeculam accusatione <sup>6</sup> sacrae judicis nostri aures non erant obtundendae.

Erasis jam, excisis et abolitis coecis istis Geniorum nostrorum commentis, paucula supersunt, quae sola Ratio dictat Principia; exposita in propatulo, cunctis nota, purissimo liquidae Veritatis radio conspicua. Dives inopia! immensus in parvo scrinio thesaurus! Eliciemus illum et expromemus <sup>7</sup>; sed sensim et sine sensu. Praecipites hîc, prurientes, inconsideratos <sup>8</sup> esse non decet. Gemmas istas tener ordo devinxit <sup>9</sup>; si avide, si temere manum injicis, turbantur, excidunt, et cum spuriis quae humi jacent, confusae, suspectaeque, non satis internoscuntur <sup>10</sup>. Et hinc ordine mutato, quem tradendis scientiis <sup>11</sup> majores nostri praescripserunt, expediret iis primum Disciplinis excolendam dare <sup>12</sup> juventutem, quae sine ullâ Hypothesi, mere ex Communibus Notionibus demonstrant suas Propositiones; quales sunt Geometria et Arithmetica <sup>13</sup>. Ante tamen Scien-

---

1 ut sine dilatione sententia mandetur executioni. 2 quamplurimi adhuc genioli. 3 syllabarum anxiiis discussionibus. 4 rancidas, ad rem impertinentes 5 Bene est. 6 vilis istius plebeculae criminatione. 7 educemus. 8 prurientes hîc. 9 Gemmae istae perpetuo filo nexae; 10 non nisi catenatim una post aliam extrahendi; manifestum alioqui inter manum et capsulam adulterationis periculum est. 11 *omitt.* tradendis scientiis. 12 scientiis pasci. 13 quae meris farciuntur principiis, nulli praesumptionis aut conjecturae lardo transfixis; nam ad legitimas in rebus naturalibus hypothesés maturior stomachus requiritur; magnâ scientiâ; magnâ hic opus experienciâ et judicio, quae ut plurimum absunt a juvenibus. Istis ergo mathematicis se dent, quae abstractae et sine hypothesi sunt; iis ingenio solo sufficiunt.

tiam Consequentiarum, quae est in <sup>1</sup> Logicâ, perceperint; sine qua Apodixes Mathematicae <sup>2</sup> non satis feliciter <sup>3</sup> procedunt, et cujus ope compendium in illis non exiguum fieri potest <sup>4</sup>. Quae quidem scientia non ita ex tempore <sup>5</sup> et sparfim <sup>6</sup> (ut hodie fit) velut silva quaedam et rhapsodia <sup>7</sup> tradatur, sed ordine <sup>8</sup> ac tenore Geometrico <sup>9</sup>. Hanc autem, quam dico, Consequentiae scientiam ita corrigi, et in apicem illum evidendiae subvehi posse, cum jam ante certum haberem ex ratione, ipso etiam eventu, et successu, quem nuper publici juris feci, edoctus sum \*) <sup>10</sup>. Tribus his, Logicae, Geometriae, Arithmeticae, Metaphysicam subnectant, sed probe repurgatam, Mentis et Corporis essentiam ac Proprietatis apodictice perhibentem <sup>11</sup>. Dein <sup>12</sup> ad rerum naturalium Historiam applicentur. Hanc voco congeriem ex diversis Naturae Phaenomenis experimentisque certis et <sup>13</sup> indubitatis, purâ narratione sine <sup>14</sup> conjecturâ rationis, ob quam ita se habere videantur, propositis <sup>15</sup>. Haec Historia <sup>16</sup> a docentibus in communia quaedam capita digeretur; hanc tirones non legent in libris dumtaxat, aut ex pulpito audient, sed oculis ac manibus usurpabunt <sup>16\*</sup>; tantisper suspecta sint, quae ab his vel illis Physiologis arcana jactantur <sup>17</sup>. Constat enim res obviâ facillimâque experiendi tentandas, totam retro Veritatem fefellisse: velut, plumbum <sup>18</sup> celerius labi per aëra quam lignum <sup>19</sup>, indubitatum Antiquis; explodit hodie ipsis etiam triviis non ignotum experimentum. Et hinc Acade-

---

1 *omitt.* in. 2 mathematicae demonstrationes. 3 *omitt.* satis feliciter. 4 *omitt.* et cujus.... potest. 5 temere. 6 *add.* et cum parergis. 7 *omitt.* velut... rhapsodia. 8 sed servato nitore. 9 Geometriae.

\*) Vide libellum meum, quem inscripti Methodum inveniendi Argumenta seu Solertiam. (*Ed. L. B.*)

10 ita castigari posse, tentantem docuit me nuper eventus. 11 *omitt.* Tribus... perhibentem. 12 Post mathematicas. 13 *omitt.* et. 14 exclusâ tamen. 15 cur ita sint. 16 *add.* memoriae gratiâ. 16\* oc. sibi usurpabunt et man. 17 tant. suspendenda fides et suspectum debet esse negotium. 18 *add.* ligno. 19 *omitt.* quam lignum.



miarum supellex non erunt vasta illa volumina, inepti <sup>1</sup> centones, in quibus coeci disputant de coloribus, et pecorum ritu, in Veterum sententias abeunt Minores; sed telescopia <sup>2</sup>, quibus e coelo remotissima quaevis adducuntur, nova sidera deteguntur, aliorum cornua, aliorum asperitates, quas longo intervallo dissimulant, veniunt in conspectum; insuper herbarum et fruticum horti, Anatomica Theatra <sup>3</sup>, Alembici <sup>4</sup>, fornaces, Magnetes, aliaque id genus, quae Natura voluit suorum miraculorum acervos, illices, et exploratores esse <sup>5</sup>. Intelligentiâ jam a scientiis cultâ, ab Experimentiis firmâ ac maturâ <sup>6</sup>, Hypothesis Physica <sup>7</sup> proponatur, quae Sensum cum Ratione, Experimenta cum Scientiis ad amissum conciliet. Tandem agmen hoc claudat Ethica <sup>8</sup>.

Eja Amor sapientiae, in sublime <sup>9</sup> te tolle; defere nos hîc tantisper cum plebe, aeternum equidem tibi jurejurando devinctos. Incessu summorum Magistratuum et Principum Virorum <sup>10</sup> pectora; opes est eorum robusto brachio, ut Genus Humanum, in futilitatem et indignas nugas tam alte demersum, eruatur <sup>11</sup>. Haec restat <sup>12</sup>, et si modo capiant, sola pene restat ad Divinitatem via. Bellis istis et cladibus, quibus ferarum ritu in mutuam necem saevimus hodie, non gloriam, sed probrum rependet aequa posteritas; et magna forte, quae nunc veneramur, nomina audient olim (quod sunt) cruentae belluae et

---

1 insulsi. 2 tubi. 3 horti, distillationum. 4 add. ignium. 5 add. Pudor sane, ubi brevem hi arbitri ac dilucidam offerunt controversiae decisionem, malle nos eam a litigiosa congruentiae ratiunculâ mendicare; imo non malumus; convenire aequifimos istos arbitros non possumus; peregre sunt, vix scimus ubi locorum degant. 6 Formato jam per scientias et maturo per experientias ingenio. 7 aliqua. 8 proponatur; id est, conjectura elementorum naturae, brevis sine superfluo, clara sine figmentis ignotarum rerum, quae experimentis omnibus continuâ deductione satisfaciat, scientiae, cujus vicem gerere debet, quam simillima. In hanc ne juret discipulus; teneatur quoad phaenomenis omnibus respondeat; ubi in puncto deficit, rejiciatur, et aliâ tentetur verum. 9 humo. 10 principum et magnatum. 11 extrahatur. 12 add. iis.

Humani Generis lanii. I, Amor Sapientiae; supple quae sub-  
ticeo; et, si visum fuerit, adde etiam acriora <sup>1</sup>. Audes enim;  
a me quidem dicta, et frustra forent, et non tuta.

D I X I.

---

<sup>1</sup> majora junge.

---

PARAPHRASES  
ET  
COMMENTARIUM,  
QUIBUS ORATIO I

IN EDITIONE LUGDUNOBATAVA ILLUSTRATUR.

---

I.

[Ad Pag. 11: *Continet actionem..... rei aguntur.*]

COMMENTARIUS. Genii isti sunt persuasiones quaedam, quae increbuerunt, vel potius instinctus et proclivitates persuadendi sibi aliquid praeter dictamen Rationis.

Pantomimus est instinctus quidam atque proclivitas, Metaphoram cum Proprietate confundendi, seu ita capiendi, quod metaphorice dicitur, ac si id etiam in proprietate sermonis obtineret. Unde Pantomimi praecipua pars est proclivitas cogitandi, res omnes sensu nobis ac vitâ similes esse, et in actionibus motuque suo, suâ se cognitione dirigere; plurima enim a nobis ad res inanimas per metaphoram et similitudinem translata sunt. Hinc Pantomimus ab ista tantum parte agitur in Oratione nostrâ.

Mango est instinctus ornandi, ordinandi, concinne disponendi. Cum illum ornatum ac ordinem rebus ascribimus, quem Ratione ductiprehendimus, bene habet; res enim omnes procul dubio

concinne eleganterque dispositae sunt ab Auctore suo. Cum ex libidine tantum et instinctu ornandi ornatum illum rebus attribuimus, qui imaginationem nostram capit ac demulcet, hoc vero Mangoni debemus.

Dogmatistes denique est instinctus et proclivitas generatim statuendi, Regularum et Axiomatum formulas tradendi, artium et scientiarum Systemata condendi. Et in Dogmatista considera quomodo in Mangone. Licet profecto generatim concludere, licet Axiomata, Regulas et Systemata ponere, sed ductu et auspiciis unicae Rationis. Ex impetu tantum, instinctu, spirituque ponendi ea ponere, hoc vero et Rationi inimicum est, et foedi in eo haerent ac perniciosi errores.

Sic igitur affecti sunt isti Genii; eodem aliquando ducunt, quo Ratio; nunquam eâdem. Atqui non modo qui non ivit quo eundum erat, sed et qui ivit qua eundum non erat, aberravit. Mango ducit ad ornatum, ad Regulas Dogmatista; eodem saepe Ratio tendit, sed aliâ viâ: haec per lucem, per caliginem illi.

## II.

[Ad Pag. 11: *Quam tetrâs..... pererrat scintilla.*]

PARAPHRASIS. Ratio! Ratio! illa supremi Ducis indubitata tesserâ, tot adulteratur erroribus, tot in Veritatis investigatione difficultatibus infringitur, vix ut ipsa sibi constare, et Ratio jam ratio non amplius esse videatur.

COMMENTARIUS. Ratio (quod Textus innuit) lucerna nostra; qua cum destituimur, obscura sunt omnia; caligo coeca, spissae tenebrae, nox horribilis. Quilibet etiam e vulgo, conscientiae suae testimonio convictus, id agnoscit et verbis palam praefert. Vide sis Logicam meam part. alt. sect. ult. cap. 9. Ratio etiam (quod Paraphrasis innuit) tesserâ divinitatis, qua nutum summi ducis (Dei) et imperium persentiscimus. Sed, proh dolor!



Ratio in nobis magnam partem corrupta est, tum per Errores (qui Rationis, si lucerna est, fumi atri, et involvunt eam; si tesserâ, adulteria, deflorant et inducunt eam), tum per Difficultates (quae Rationes, si ea igniculus est, dura cruda robora, et obruunt illam; si tesserâ, obviae spinae, discerpunt et infringunt illam). Errores illi, Difficultates illae sic affligunt Rationem, ut illa velut intercluso spiritu exstincta dici possit, et jam non nisi creperam aliquam scintillam, ellychnio lucernae depastam ostentare.

## III.

[Ad Pag. II: *Ludibrium . . . . . caligamus sine duce.*]

PARAPHRASIS. Non mirum igitur, si inductâ et oblitteratâ tesserâ, focios et exploratores non internoscimus, si confundimur, si ludibrium debemus hosti.

COMMENTARIUS. Sic affectâ Ratione, si lucerna ea, necessum est, nos in viâ, qua gradimur ad Veritatem, miserum in modum offendere, impingere, ac labi; si vero tesserâ sit Ratio, in expeditione, qua contendimus ad Palladium ex arce Naturae diripiendum, turbari nos oportet, et inter summa pericula versari, signa hostium, ac Imperatoris nostri, non recte dispicientes; adeoque salutares saepe cogitationes ut infestas refutare, pestiferas ut auxiliares copias amplecti.

## IV.

[Ad Pag. II: *hoc deteriore conditione . . . . . seductores.*]

PARAPHRASIS. Sed et hisce malis (o pudor!) nos ipsi causam damus, tum impotentiâ, tum credulitate nostrâ. Impotentiâ quidem, quia reductâ et se in suam caliginem abdente Ratione, quod receptui signum nobis esse debebat, excurrimus tamen avidi, nescio quam fortuitam Veritatis praedam animo agitantes. Credulitate vero, quia cuilibet ductum directionemque polli-

centi acquiescimus. Unde fit, ut loco unius Ducis, cui in verba juravimus, multis et variis nos temere committamus seductoribus.

COMMENTARIUS. Aviditas et credulitas duo mala importunissima et exitialia iis, qui quando satis a consilio firmi non sunt, inter insidiantes etiam versantur. Nascuntur hi morbi ex confidentiâ, quam homines in fortunâ collocatam habent; vident enim hanc aliquando praeter spem aspirare rebus afflictis, et quibus nec consilium nec res suppetebat, iis tamen ex sententia nonnunquam eventum procedere. Sed esto; id in fortunae bonis (quae hinc etiam *fortunae* vocantur) obtineat; haec enim, seu casu seu ratione parta sint, idem valent; imo nescio quo pacto plus valent, magisque quod sunt esse videntur, cum ea temere et aliud agenti casus iniecit. At in animi bonis, inter quae primas tenet Veritas, nihil juris habet fortuna; non enim reperit Veritatem, qui imprudens eam reperit, qui fortis uncum in illam impegit. Ambas, ambas se manus praestat sola Ratio: haec sola Veritatem attingere, capere, tenere potest; quia Veritas nisi sui agnitione non tangitur; et vero agnoscit illam sola Ratio. Planius rem ob oculos ponam. Sit idiota quispiam, et hic forte incidat in Librum Elementorum Euclidis. Amplam sane Veritatem nactus est (singula enim Effata singulae Veritates sunt), sed non capit illas (id ipse ingenue fatetur); tunc demum capiet, cum ratio ex demonstrationibus accesserit. Idem ille idiota videat ferrum ad Magnetem accedere; videat aurum cum aere libratum in aëre, praeponderare in aqua; videat, quae magis obvia sunt, noctium et dierum, hiemis et aestatis vicissitudines, incrementa ac decrementa luminis in Luna, aquarum in mari fluxus ac refluxus. Haec omnia cum videat, nihil horum capit, quia rationem, ob quam ita sint, ignorat, id est, manu, qua capiat ista, destituitur. Quo agitur isti mihi in scientiis avidi, creduli, prurientes? Avem illam, Veritatem,

aucupantur; et manibus, quibus eam prae-hendant, truncati, somniis illam captant, et possident in aëre. Nota nobis parodia, o Belgae. Avem in coelo habere, nihil habere est.

## V.

[Ad Pag. 11—12: *Sensus nostros... fides abrogata.*]

PARAPHRASIS. Cum seductores dico, Sensûs nostros, Auditum, Aspectum, Tactum, Gustatum, Odoratum, et si qui alii sint, non moror. Sunt vero etiam illi seductores; at non ita callidi, non ex astutiorum illorum et versipellium genere, quos insectari mox et agitare decrevi. Quilibet enim Sensus, cum alii suppetias non veniunt, stolidior est quam ut capiat eos, qui teretem mentem habent intelligensque iudicium. Ecce enim Aspectus hominem procerum, si modo is turrim conscendat, in pumilionem subito decrescere testatur; quasi jam gentilis sit eorum, qui cum gruibus pugnant,

*Ubi tota cohors pede non est altior uno.*

Quis credat Aspectui tam impudenter mentienti. Auditus nuper balatrones in specubus et puteis delitescere dejerabat, qui loquentibus obstreperent, et extrema dictionum importuni regerent. Credant hoc Philosophi illi, quos Manducus vesperi ad cunas abigit invitos. Et denique Tactus (mirum, quantum hic sibi sumpserit prae fratribus suis) nunquid urinatoribus saepius jam suavit, et persuasit forte, nullum maris, etiam classibus constricti, pondus esse? Haec et id genus alia mendacia innumera, aperta, splendida fati arguunt, quemlibet de quinque illis fratribus, si suas tantum tendiculas objecerit, frustra fore, nec decepturum eorum quemquam, qui mediocriter sapiunt. Quod si tamen conspirare possent Sensûs, et factâ manu nos adoriri, nullus dubito quin facile circumvenire quemvis nostrum et illaqueare possent. Sed ipsi odiis inveteratis inter se dissident; unde fit, ut saepenumero, quas hic nobis insidias struxerat,

has ille vel evertat vel prodat. Videndi sensus remum, qui pars in aëre consistit, pars sub aquâ conditur, fractum esse clamat; Tactus id ipsum constanter negat. Tactus e contrario, situlam ex fune demissam in cisternam, ubi aquam subiit, a fune solvi testatur; id autem Oculorum acies explodit. Aspectus item et Auditus, eminus forte hominem ligna findentem nacti, quemadmodum non ambigunt inter se! quemadmodum non altercantur! Auditus jam ferire censet, jam securim illidi; Aspectus inficiatur, et securim jam in aërem attolli, ac alterum ictum minari confirmat. Et ita passim isti

*Terrigenae (facinus miserabile!) fratres  
In se constrictas conseruere manus.*

Hoc amplius, quod Sensus in Philosophorum ubique pulpitis, ceu tribunalibus quibusdam, sceleris jam pridem accersiti perfidiaequae condemnati, cassâ sint apud Sapientes omnes existimatione. Jam Cartesius, Rationis ille vindex et Sensuum acris infectator, pessumdedit et abolevit, quidquid illis ex unanimi, quod subinde depromunt, constantique testimonio reliquum erat apud incautos quosdam Philosophos auctoritatis; nec minus suspectum et sublestum esse decrevit, quod stabiles concordisque, quam quod vagi dissonique profiterentur.

COMMENTARIUS. Tres igitur occurrunt causae, quae Sensuum fallaciam enervant, et vim seducendi, quâ pollerent alioqui, vehementer obtundunt. Et eadem tres causae adferuntur in Oratione, cur hîc, ubi stelliones tantum et coryphaei seductorum accusantur, Sensus in numerum aliquem venire non mereantur. Prima causa est, quod Sensus singuli in valde multis negotiis fatui sint, stupidi, stolidi. Altera causa, quod et si juncti aliquid possent, aegre tamen jungantur et conspirent, quin potius mutuas fraudes saepe prode re ac detegere soleant. Tertia causa, quod Sensus sint infames, et jam per omnium Philosophorum Scholas tamquam seductores traducantur.



## VI.

[Ad Pag. 12: *Sunt seductores alii..... diuturna familiaritas.*]

PARAPHRASIS. Sunt igitur praeter Sensûs seductores alii, iique spiritûs, instinctûs, Genii, majoris longe quam Sensûs nostri fallaciae. Cumque Sensûs ut hostes abarceri, atque ad ambitum corporis propelli videamus, tum hos aditu dignatur Animus. Dicas eum consuetudine sibi hos Genios et familiaritate velle devincire. Sed qui familiares fuerant, paulo post necessarij, et ex necessariis non duces, quos se ferebant, sed agasones facti, flagris Animum, ceu inertem pecudem, huc illuc agunt impelluntque pro suâ libidine.

COMMENTARIUS. Genii isti, Pantomimus, Mango, Dogmatistes, plane videntur esse de illorum genere, quos *Affectûs*, et vulgo *Passiones* vocamus; quibus unicum pabulum, quo et nutriuntur et crescunt, obsequium est. Cupiditatibus suis morem gerere, earum impulsu facere quidpiam aut omittere, non est eas sedare, sed irritare; flammae sunt, et oleo isto affuso crescunt quidem, sed non satiantur. Et certe plus ad decipiendum Cupiditas quam Sensus valet; imo nihil hic ad praestigias valet sine cantu istius Sirenis. Quidvis enim Sensus exhibeat, non decipiemur, nisi stimulet nos et inducat proclivitas quaedam et velut libido credendi; atqui haec non alio referri quam ad Cupiditatem potest. Proclivitas haec impotentia quaedam est, luxuries, et animi profusio, qua quod nostrum est jactamus, et in alios temere prodigimus. Inquam, Sensuum nostrorum perceptiones, quae nobis propriae sunt, in causas a quibus excitantur transferimus. Et, cum v. g. paries iste sic affectus talem in nobis sensum causet, quo cum fruimur, album colorem nos videre dicimus; ipsum illi parieti sensum ascribentes, id eum in se habere judicamus, quod in nobis, ut haberemus, effecit. Sic etiam in sole lumen, in igne calorem, in corporibus collisis, aut prope ab illis, sonum esse judicamus; cum extra nos

illorum modo causae, intra nos illa ipsa sint. Similiter ergo facimus, ac si loca maritima, quod famem acuant, fame infecta, et gladium, quod fauciet, imbutum dolore, et postem, in quem oculo forte per tenebras errabundi incurrimus, scintillare putaremus. Sensûs, hac fascinatione sublatâ, integri sunt, incorrupti, nunquam fallunt aut falluntur. Cavendum igitur, ne quas nobis sensus exhibet imagines, earum rerum esse putemus, quae iis formandis occasionem praeberunt, neu quid extra nos illis imaginibus simile comminiscamur. Hoc enim nulla suadet ratio; si vero hoc sine ratione sumpserimus, etiamsi forte verum esset, erravimus tamen; quid quod contrarium non suadeat modo, sed et vincat Ratio? Sed non omnia huc promenda sunt.

## VII.

[Ad Pag. 12-13: *Tandem tamen..... dicteris proscindunt.*]

PARAPHRASIS. Verum enim vero appetente jam crepusculo Rationis, pudere coepit Animum ignominiosae servitutis suae. Atque adeo hos Genios, hos sub ducum exuviis tenebriones, iudicum, id est Philosophorum sententiis exauctorare constituit. Sed illi habent sui studiosissimos patronos, qui rebus eorum (sic prae se ferunt) aderunt ut difficillimis. Horum alii vano, superstitioso alii, alii denique canino ingenio sunt. Vani quidem illi, quos periculum, quos anceps eventus juvat, etiamnum post tot errores et lapsiones experiri volentes, quorsum evadant (si tamen evadant), coeci coecos duces infecuti. Superstitiosi vero, quibus a majorum vestigiis vel latum unguem declinare religio est; quibus haec una bene firma videtur ad statuendum ratio, statutum esse jam dudum, etiam sine ratione. Hi velut heri sunt; hos catelli comitantur, qui, quod dici solet, non mingunt nisi ad illum, quem alii ante perminxerint, parietem. His assentiunt, quibus assuevere, his velut caudâ blandiuntur; insolitum omne vago discursu latratuque perturbant, rictibus tandem etiam et moribus infestant.

COMMENTARIUS. Certe tribus his hominum generibus praecipui continentur errorum tutores et patroni. Et primum quidem qui recensiti, auctores sunt; hi concipiunt et gignunt Errores. Qui deinde notati, alumni sunt; nutriunt Errores, et tempestive, quidquid eis nociturum videtur, abarcent. Nam qui aliqua forte de Naturâ rerum cogitatione, velut navi, qua per mare Philosophicum feratur, oblatâ, cursum dirigit non ad Cynosuram Rationis, sed ad Erraticam Eventûs; longiusque provehitur, et gratulatur sibi, quamdiu obvia consentiunt, et institutum errorem nec remorantur nec produnt; donec quasi tempestate aliqua, ad inopinatam et votis non respondentem *Experientiam* tamquam ad saxum adhaereat; — is profecto in hac Errorum classe familiam ducit, et praetoriam quasi navim gubernat. Caeteri lintribus ac phaselis passim infecuti, dum numero inter se ac turbâ confidunt, consuecunt cum erroribus, solitos eos ac familiares reddunt, et (si opiniones praejudicatae praestare periculum possent) etiam tutos; cum aut non errare penitus, aut non imperite videantur errare qui tam frequentes errant. Breve dicam: Sors parit errores, Mos nutrit. Rationem enim ceu lucernam aliquam mentibus nostris accendit Deus; Sortem nobis coecam esse voluit et meram noctem. Cum igitur non ratiocinari jam (quod nati sumus), sed, quod Sortis est, conicere, divinare, suspicari lubet; etiam cum sic in Veritatem incidimus, tamen aberravimus. Errores, quos sic alii peperêre, foveant alii; cum eorum primo, qui praeceunt, ac dein mutuâ contemplatione, easdem conjecturas et opiniones amplectuntur. Hoc jam moris est, illud fortis erat.

## VIII.

[Ad Pag. 13: *His freti patronis..... corruptor Mos.*]

PARAPHRASIS. Horum in Cimmeriâ Republicâ tam potentium patronorum clientes cum se sentiant Genii nostri, Ducatu, quem malis artibus sibi sumperant, abire nondum decreverunt.

Quin potius in Academiis, ubi magno passim apparatu, magnâ pompâ, iter instruitur ad Veritatem, Doctores se ambitiose Ductoresque profitentur; sed ampla quaedam polliciti, deludunt credulos; et, cum sponte suâ cupidam juventutem, tum speciosis promissis vehementer illectam, abducunt in laqueos et in avia. De Sensu quidem accepimus, olim eum, Epicuro patrono, ridiculos in casses impulisse quem pascebat gregem. Dicebant Epicurei, nunquam Sensum fallere, saepe Rationem delirare; proinde, si quid certi vellemus amplecti, abeundum a Ratione, et standum esse cum Sensu. Interrogati, num igitur Sol in ortu major esset, minor in meridie (id enim videndi Sensus perhibebat), non dubitabant affirmare. Instabant qui rogaverant. Atqui, inquiebant, Sol, cum aliis oritur, tum aliis meridiem facit; simul igitur, et tanto major, et tanto minor Sol est. Hic irretitos se senserunt Epicurei; cumque non esset quod apte responderi posse videretur, irridebantur. Sic Sensus suum gregem; sed Genii nostri turpius longe, longe scelestius fallunt credulos et incautos suos sectatores, eosque velut abrupto repente filo, in Philosophico Labyrintho destituunt, a confusio-num Minotauro devorandos. Et haec eorum non obscura praevaricatio, explorata satis cum helluone collusio; nisi Mores nos, quibus ceu foedere quodam obstricti nefando monstro tenemur, fascinent. Moribus effectum, ut errare non pudeat, ut irriti laboris non poeniteat; ut jam debere videamur, quod saepius per injuriam extortum est. Sicut enim Athenienses Anthropophago Tyranno ex foedere suos liberos commessandos objiciebant, sic ex more plerique nugis et ineptiis bonas horas.

COMMENTARIUS. Constat eum qui, utique (si fieri posset) Ratione repudiâtâ, totus cum Sensu facere decrevisset, concinnius erraturum nec perinde multa turbaturum, ut hos, qui Geniis illis Pantomimo, Mangoni, Dogmatistae dirigendos se dederunt. Cum enim Epicurei, aut quicumque illi (non moror



enim si in numero Fabularum reponatur ista narratio) de industriâ Sensum audirent, obstreperent Rationi; poterant, in eâ quam induxi disputatione, adversariis suis scite respondere: Rationi quidem ineptum ac absurdum accidere, si dicas idem simul et majus et minus esse, non vero Sensui; qui memorare poterat, idem cominus ac eminus visum objectum, majorem etiam ac minorem sui speciem in animo signare. Se vero de Ratione, cui res suas habere jussèrant, non laborare; aequi bonique consulendum, si Sensui probarentur quae censerent. Sic illi cum ratione aliqua universè contra Rationem (si constare sibi hoc dissidium posset) ire satis lepide viderentur. Sed qui Geniis se manciparunt, et imperitius errant, et errorum nulla gratia; turpis squalor et inficeta barbaries. Quod cum exemplis, tum rationibus, Oratio, in quam commentamur, comprobatum dabit.

## IX.

[Ad. Pag. 13: *Seductores hos . . . . soli vindicabo Rationi.*]

PARAPHRASIS. Aufus, o Amor Sapientiae, ad te tuosque candidos collegas, Veritatis intaminatos sacerdotes, in jus adire; aufus ego perfidos illos, et se patronis suis necquidquam effe-rentes veteratores, capitis anquirere; Te ipso adductus pulcher-rimo judice, fretus optimâ causâ, eorumque, quos in consi-lium adhibes, summâ sanctimoniâ.

COMMENTARIUS. (1.) Pedum (id est baculus pastoralis) insigne pastoris est, qui dux quidam suarum ovium. (2.) Indicem (id est digitum pollicis proximum) ad viam intendere, et insigne ducis est, et etiam munus. (3.) Dexteram manum axillae inferere, et ita sustentare gressum ejus quem dirigas, ducis item officium est. Cum igitur et munia haec (3. et 2.) et insignia illa (2. et 1.) Genii nostri involaverint subdole, usurpent injuste, cum summis eorum quos ducunt opprobriis,

periculis, damnis, deturbandi sunt competentium et legitimorum iudicum sententiis et auctoritate ab injustâ istorum insignium et officiorum possessione. Quam in rem, ego quidem mihi partes Accusatoris depono; Amor-Sapientiae (sic enim decet) iudicis officio fungetur; Assessores erunt quotquot vere doctos et vere candidos, nullisque velut opinionum muneribus corruptos, totos, totos, purus ille purae Veritatis Amor incessit. Et hos quidem Assessores Textus innuit; Paraphrasis autem (forte quod tales aliquos in humano coetu repertum iri diffideret) Coelum adiit, et inde divo iudici (Amori-Sapientiae) divos collegas adscivit: Nitorem, Ordinem, Candorem, denique Fas et Aequum, Veritatis (quam solam spectant, cui se jugiter consecrant, et sua omnia semper immolant) devotissimos antistites. Ego igitur hac meâ in Seductores Actione (quid enim talibus iudicibus et tali causâ non sperem?) illis ipsis Geniis Pantomimo, Mangoni, et Dogmatistae (1.) baculum pastorem extorquebo de manibus; (2.) digitum vero secundum a pollice, quem ad viam jugiter intendunt ac porrigunt, caeteris digitis, qui in volam inclinantur (hoc enim gestu viam demonstrare solemus) aequabo, id est, etiam inclinabo, ut tota manus jam sit in pugnum contorta, adeoque ad dirigendum inepta; nam clausâ manu commonstrare non solemus. (3.) Tandem dexteram manum, qua tanquam fortiori, eorum quos ducunt axillas suffulciunt, inde retractam, revinciam Geniis nostris post tergum. Tum vero et insignia illa et munia, Geniis erepta, transcribam Rationi, cui debentur soli. Pedum illa gerat, et nos sola pascat, quae satiare nos sola potest (inanem tantum speciem propinant Genii, quae deludit oculos, mentem non explet); sola monstret viam, quae sola videt (Genii omnes coeci sunt); sola gressum nobis firmet, quae sola sana, sola viget et constat sibi (vix artubus haerent Genii, languidi, flaccidi, laceri).

## X.

[Ad Pag. 13: *Sic adversariis..... ferale Theta.*]

PARAPHRASIS. Sint in foro Vanitatis nugatoribus illis quales merentur patroni; ubi Sors coeca cognoscit causas, vitilitigant et altercantur inter se discordes *Experientiarum* rabulae; avida sibi litem addicit expectatio, anceps eventus comperendinat, et tandem casu vel tempore detectus error pronunciat sententiam. Habeant in Superstitionis tribunali, qui suâ causâ plurimum velint; ubi ex tripode jus dicit Auctoritas; ubi quod majoribus placuit (imo non placuit subinde, sed aliud agentibus excidit) decretum, lex et oraculum est; ubi laborant sub verborum involucris perplexa mysteria; ubi de mente unius aliquando Scriptoris diffusae rixantur Notae, cavillantur Interpretationes et Commentaria. Gratiâ etiam valeant in Consuetudinis regno praepostero; ubi non fit quod faciendum est, sed, faciendum esse quod passim fit, summa lex est; ubi Mos canino rictu disceptat controversias, tumultuantur Opiniones communiter receptae; in novum quodcumque latrant et calumniantur Adagia popelli, Poëtarum versiculi, Sensa vulgi; et contra Rationem, longi temporis praescriptionem objicit, gregatim ipsa se pecudum ritu secuta, Multitudo. Ast in hac Curiâ, in hoc templo sanctitatis, amplitudinis, mentis; ubi tu praesides et leges exerces, o salutaris Amor-Sapientiae; ubi latus tuum cingunt religiosissimi pontifices; in hoc iudicio collegae et focii tui, Nitor, Ordo, Candor, Recti tenor, et Aequitatis splendor; ubi Rationi advocatum veniunt cana Fides, genuina Simplicitas, et pacata Modestia; circumstant alacres Attentiones, Studia in Veritatem et alta Silentia; Foris excubant vigiles Industriae, Constantia, Sedulitas, et late vulgi curas ac celebritatem abarcens Solitudo, et improbus cum nocturnis Lucubrationibus Labor. Sed ecce tibi! Hoc tam austero satellitio perterritos, procul aufugisse sentio delicatos et imbelles Geniorum

nostrorum patronos, et ne quidem ad vestibulum hujus arcis clientes suos comitari sustinuisse. Quid si in haec adyta bubones, in hanc tantam lucem et decus involassent? Prorsus nihil abfuisset, quin adverfo fulgore perstricti, consternati, attoniti corruissent, egissent animam. Igitur praesidio destituti Seductores, vano quidem illo et fatuo, tum apud hosce judices invidioso, detestabili, caduco, viderint ipsi, qua se ratione contra Rationem defendent. Hoc tantum superest. Arma petant a Ratione, quibus ipsam jugulent contra rationem; quae si impetrare se posse diffidant (quid enim Rationem in furias agat? quid ipsam Mentem dementet?), praesentiant jam nunc, quae Fabulam hanc maneat catastrophe.

COMMENTARIUS. Perversi et stolidi homines illi, qui Rationem rejicere, aut ei anteferre aliquid (velut Experientiam, Auctoritatem, Enthusiasum; aut in usu vitae, commoda, voluptates, honores) quoquo modo videri volunt. Interrogati enim, cur ita censeant, conantur illico suae sententiae rationem aliquam comminisci; atque adeo, quod palam profiteri, quod verbis astruere videbantur, re ipsa, ipso suo facto demoliuntur et evertunt. Quomodo enim Ratione potior et antiquior Auctoritas, Experientia, aut aliud hujus generis quodcunque, si cur ita sit, dicenda est ratio? Certe quod ratione aliqua suaderi probarique debet, totum id sub Ratione est. Primum igitur, o homo, Ratio est; aut si quid ea prius est, sine ratione prius est; nam si rationem dederis, ob quam prius sit, jam necessum est, non illud, sed rationem illam priorem esse fateare. In eo autem, quod sine ratione est, jubet Ratio, rationem non quaerere; igitur ne hîc quidem manu mittit te Ratio; etiam cum extra fines ejus ditionemque concesseris, tu tamen in imperio ejus et potestate permanes. Tibi igitur, o homo, primum est Ratio.



## XI.

[Ad Pag. 13—14: *Prodi huc primum..... Philosophiae nostrae dumeta.*]

COMMENTARIUS. Pantomimus ejusdem ferme naturae est cum Cupidine, carnis impudico illo Genio. Pueri quidem ambo; caeterum simplicitatis et innocentiae nihil; personati ambo, et sub puerili habitu circumferunt astutissimos veteratores. Molles sunt, sed vigorem omnem roburque confopiant; humiles iidem et pusilli, sed quidquid in animo surgit et elatum est dejiciunt, inter nugas et crepundia sua contorquent. Pueri tamen merito censentur, quia blanditias tantum et voluptatem curant, qua trahi, pasci, demulceri, puerile est; quomodo videmus pueros saccharis ac bellariis (quae viris nauseam movent) supra modum inescari. Hinc etiam Philosophi Intemperantiam, cum deliniri animus et voluptatum illecebris pellici se finit, puerile vitium esse censuerunt. Pantomimus igitur cum voluptate facit, Heliconis Genius, et Poëtarum deliciae. Omnis enim Poëtarum a Metaphoris et Allegoriis lepos; hae (quod in Logicâ notabam) ubi latius quam par est excurrunt, et animi gratiâ diffusius luxuriant, in Fabulas faceffunt. Et certe, quae passim Fabulae a Poëtis descriptae circumferuntur, non aliud sunt quam Allegoriae sic amplificatae. Quo etiam nomine a Poëtis eorumque fautoribus aut excusantur aut commendantur: quod nempe sub cupediis et aurato cortice salutarem aliquam medicinam contineant, quam adolescentium animis, non nisi lascivire et catillare volentium, furtim instillent; adeoque non sentientes sanent, et, quod vere divinum est, per imposturam conferant beneficium. Ego Pantomimum ita sobrium, ita frugi, non arguo; sed ambiciosum eum petulantemque compeasco, interponentem se rebus non suis, turbantem, ficta cum seriis et vera cum seriis et vera cum falsis promiscua ducentem, excutio, infector, exagito.

## XII.

[Ad Pag. 14: *Genius hic..... cupiditatibus inducit.*]

COMMENTARIUS. Vis mira nobis, homines, indoles mira. Ita complexu et conjunctione gaudemus, tam fumus sociales, ut ea etiam in societatem nostram vocare videamur, quae fera, quae bruta, quae sensûs omnis expertia, nullâ teneri societate possunt. Potentiorum viribus oppressi muta, furda testantur, coelos, mare, sidera. Absentium desiderio languentes, annulum, vestes, arrham, in lacrymas soluti osculantur. Irâ perciti, injurias suas persequuntur in calices, in sedes, in vitra fenestrarum. Quo spectant etiam phrasés quas frequentamus et loquendi formulae: nam veteres aedes ruinam minari, prata verna ridere, laetas segetes, saevum mare, bibulam arenam, pedem montis, et sexcenta quotidie similia, inter confabulandum effundimus; quae clare arguunt, nos personam nostram rebus inanimis, in scenâ vehementiorum sermonum saepe admodum imponere. Hoc amplius: simias, bubones, ranas, deformes et turpes animantes esse, passim asseveramus; quid ita? cur potius hac infamiae notâ inuruntur quam equi, oves, galli? Nimirum propter majorem nobiscum in figurâ similitudinem; tum etiam (quod praesertim in simiis valet) propter similes quasdam gesticationes, facilius quam animantes aliae in humanum genus adoptantur, intra quod imaginationis ope consistentes deficiunt, et conspicuo formae ab hominibus, cum quibus componebantur, recessu, fiunt monstrosae; quo utique probro non laborarent, si in familiâ suâ permanere, et id modo quod sunt apparere potuissent. Jam totum illud Metamorphoseon opus, illud Phoebi corculum, non alio spiritu falit; crebrae illae hominum in feras et aves, in arbores, fontes, et saxa commutationes, undique spirant Pantomimum, et Ovidius, qui ipsissimus ille Genius sub humanis exuviis videri potest, tam hîc festive lusit, tam non cecinit sed pinxit ad vivum,

ut in ipso conversionis puncto, quo vestigium veteris et rudimentum novae formae commiscuntur, in lupis, equis, bobus, arboribus, ipsos homines, quos in ea transformari narrat, non animo tantum, sed oculis videre videre.

## XIII.

[Ad Pag. 14—16: *Dum animi gratia .... Sinas adhuc et Turcas agitant.*]

COMMENTARIUS. Quamvis cum omni vehementiori affectu, seu *passione*, facile consuecat Pantomimus, praecipue tamen irâ gaudet; et constat eos, qui vindictae cupidine distenduntur, isto etiam spiritu plerumque turgere. Id etiam histôriae probant, quae in Textu afferuntur. Tres enim priores Pantomimum in irâ ac furore nidulantem inducunt; sola postrema est, quae illum benevolentiae vel sollicitudine alicui adhaerentem exhibeat. Irae igitur et stomachi familiaris convictor Pantomimus; sed in trivio. Nam in Scholâ factiones alias sequitur, Desidiam et molliem, Rationis austeram semitam formidantes, Pruritum et Veritatis fortuito consequendae praeposteram aviditatem, Superstitionem, Mores. Interdum etiam, nullâ singulariter causâ stimulatus, mere pro libidine suâ, Scholam infestat.

## XIV.

[Ad Pag. 16 -17: *Dies me deficiat ..... recalcitrantem feram.*]

COMMENTARIUS. Equidem Actor ipse, quae domi gerit Pantomimus, in bonam partem accipiebat (p. 14), confabulantem cum Poëtis suis, ludentem cum ludionibus, dummodo sana, seria non defloraret, non viticaret, aequo animo ferebat. Alteram excusationem Pantomimus pro se moliebatur (p. 15); apparebat enim ex gestu, aliquid dicturum; sed ibidem, quantum conjicere possumus, falso, nec opinato sarcasmo ab Actore repressus, obmutuit. Hic tandem prorumpit in illas voces, quae Exceptionem, Adulationem, et Purgationem aliquam continere

videantur. Exceptio id agit, ne coram hoc iudice (Amore-Sapientiae, seu Philosophiâ) de illis criminibus accusandus videatur Pantomimus, quae in Philosophos non commiserit. Adulatio tecta, astuta; palpat Philosophos (praefertim politicos illos et regnandi avidos, quibus hoc jugiter in ore: *Beata Respublica, in qua Philosophi regunt, aut reges philosophantur*); primum quidem, quod omnes, qui hactenus in Textu decepti leguntur, censeat cum plebe, cum tamen inter eos sint potentissimi reges, Cyrus et Xerxes; in eo Philosophos ipsos secutus, qui promiscue omnes, cujuscunque in Republicâ dignitatis aut meriti, si modo Philosophorum Albo ascripti non sint, in ordinem redigere solent, iisque *vulgi* vel *Plebis* notam inurere. Iterum adulatur, cum hoc ipso Philosophos occulte rectores rerum moderatoresque profitetur (velut memor ejus quod de se canunt Philosophi: *Sapiens naturâ rex est*). Quibus etiam in domando populo industriam et artes suas offert. Purgatio tandem in eo versatur, quod usu jam satis edocti sumus: Rationem imbelli populo continendo vinculum esse; felicius longe regimen stare, si, qui in imperio et potestate sunt, cum decipi omnino velint, instinctibus et cupidini suae relinquuntur; ipsos illos tacitos instinctus, qui a Pantomimo et reliquis Geniis proficiscuntur, fraenum subministrare, quo sustineri, et flagellum quo agi possit mala illa bestia, Populus.

## XV.

[Ad Pag. 17: *Nihil de ista Politica ..... verrucae tantum.*]

COMMENTARIUS. Tres partes in oratione Pantomimi observatae nobis fuerant; Actor duabus tantum respondet, Adulationi et Purgationi; Exceptioni nihil. Non quod hanc remittat concedatve (nam iudex hic non in Scholâ tantum, quae regni ejus metropolis est, sed universe in humanâ gente causas cognoscit, cui dies noctesque consulit); verum quod Actor ipse sponte suâ properet ad eam partem, in qua summa hujus iudicii totaque



causa consistit; ubi cum Pantomimo fraudis et injuriarum agendum est, quas in Philosophos, qui judicis nostri curiales et aulici sunt, quotidie machinatur. Omissa igitur Exceptione, Adulationi, quae perversissimam aliquam Politicam celat, perfunctorie, sed generose respondet Actor. Quantum hodie a simplici et generoso discessum! Nobis illi libri teruntur (ut recentes pestes omittam), qui Tiberios exhibent, Caligulas, Neronas, et reliqua illa non Principum sed scelerum nomina. Ex his acroamata leguntur, quae quo magis vafra, torta, ficta, hoc arcana magis et politica videntur. Itaque altum inculcantur juventuti, quae in spem administrandae Reipublicae succrescit; his generosum omne strangulare, futilia tutari sciet. His scilicet artibus et Tyranni illi pulcherrimum imperium a majoribus acceptum, res florentissimas perdere, et Christiani Principes jam a tot saeculis Oriente toto cedunt; et quo tandem cedent? Seditiosi, discordiosi assuescunt Barbari Latronis nutum observare, minas expavescere. Vah degeneres! Tandem quod Actor ad ipsam Purgationem respondet, breve est, sed continet summam totius accusationis: nempe Pantomimum decessisse Philosophos, et magis hos turpiusque decessisse quam plebem. Quod sequentibus in Textu argumentis probandum est.

## XVI.

[Ad Pag. 17: *Vin' tibi Stoicos .... Staticam exercere deprehendit.*]

COMMENTARIUS. Mirum est, homines intelligentes et doctos ad hanc Philosophandi rationem injectos fuisse, ut illis quae passim inanima vocantur, lapidibus, lignis, igni, aquae, sensum aliquem intelligentiamque tribuerent. Cum enim ipsi, qui credi illa volunt, nunquam fuerint aut lapides, aut metalla, aut aliud hujus generis quodcunque, utique, num haec cognitione sensuque censeantur, coguntur ignorare; adeoque, cum hinc scientiae locus non sit, reliquum est, ut *Hypothesim* aliquam

afferre se fateantur. At *Hypothesis* in Disciplinis huc tota refertur, ut declaret et facem praeferat rebus obscuris; quam vero lucem speres ab *Hypothesi*, quae tota caligo, tota nox est? Constat equidem, nos multos membrorum nostrorum motûs nostrâ cognitione et intelligentiâ moderari; sed totum id mutuae, quae inter corpus et mentem intercedit, actioni referimus acceptum. Quippe corpus in mentem, et vicissim hanc in illud agere, conscientiâ notum est; cum enim corpus in oculi pupillâ certo modo vibratur, lumen et colores consequuntur in mente; cum corpus in aure, in linguâ vel palato, in cute, ac alibi concutitur, resultant in mente soni, sapes, odores, calor, frigus, dolor, et id genus affectiones innumerae. Rursum, cum mens nostra vult, pedes in corpore moventur, et imus; lingua movetur, et loquimur; manus moventur, et apprehendimus. Igitur animum in corpus agere, et vicissim ab hoc accipere et quasi pati, est in confesso; modus vero, quo agit et patitur, abstrusissimus et penitus ineffabilis est humanae menti. Quid enim opus est, vibratis certo modo nervis, obversari animo lucem, colores, sonos, sapes? Quid item opus est, cum animus aliud atque aliud voluerit, alium atque alium motum manare in corpus? quis consequentiam illam capit? quis tam lynceus est, qui hîc aliquid videat? Cum igitur modus rei tam sit obscurus nobis, qui rei ipsius intimam habemus clarissimamque conscientiam, quantae nebulae, quanta nos opacabit nox, ubi res et rei modus (quod in his, quae pridem commemoravimus, usu venit) pariter et ex aequo fuerint obscura? Plerique vero, qui dictis rebus intelligentiam ascribunt, hanc suam assertionem non quidem per se notam esse volunt, nec etiam ut *Hypothesim* afferunt, sed ut *Conclusionem*, multis eam indiciis et argumentis comprobantes. Videntur, inquit, stellae suas orbitas, gravia terram, chalybs Magnetem novisse; nam gravia sublime posita, simul ac integrum datur, brevissimâ viâ terram repetunt; stellae ab orbitis, quas insitire, nunquam deflectunt;

et chalybs in amplexum Magnetis, renitente corporis sui pondere, quantocius ascendit. Sed reputent illi secum, haec talia, quamvis mente praedita forent, atque perspicerent, unde recedendum sibi et quo tendendum esset, tamen hanc suam scientiam exserere nunquam posse, nullum cognitionis istis exercitium aut usum fore; non est enim iis corpus aptum, quo quod mente conceperint exsequantur. Nos quidem manum, pedes, linguam movemus; sed sunt nobis idonea motûs instrumenta, muscoli, nervi, denique spiritûs, qui musculis illapfi, motum musculis pro mentis arbitrio dispensent, quibus nihil simile respondet in silice (ut unum illum de inanimis capiam inanimum valde), quo descensum molitur. Sed etsi forte filex generatim e sublimi discedendum sibi decrevisset; tamen cum in sublime datus fuerit, unde resciet hanc sortem suam? oculis et alio quocunque sensûs instrumento, quo id persentiscat, destituitur. Tandem ponamus nobis ob oculos cribrum, atque id, si lubet, sensu praeditum dicamus, ut furfures ac pollinem internoscat. Dic, age, quoniam id jam poni placuit, quid ad secernendos a farinâ furfures conferet illa cognitio, si non corpus cribro multis minutisque foraminibus pertusum detur? Hoc vero corpore in cribrum collato, quid jam ei opus est mente vel sensu? Manibus nostris, ut solet, varie quassum et agitatum, tenebit recrementa, trahiet farinam, sive interim compos, sive (quod est profecto) mentis sit impos. Atqui item, inquam, quid gravibus, quo deorsum vergant, quid stellis, quo in orbem ferantur, quid ferro, quo Magnetem adeat, mens sensusque proderit, nisi corpus iis aptum (quod ex poris et figurâ definiendum est) obtingat, ut vicinorum corporum impulsu vel deorsum agi, vel in gyrum ferri, vel alio denique protrudi queant; quod simul ac nacta sunt, jam satis habent: labi, circuire, sequi possunt, etiamsi non cognoscant.

## XVII.

[Ad Pag. 17—18: *Sed missos faciamus..... antequam scivimus.*]

COMMENTARIUS. Quibus Philosophis (si modo Philosophi illi, et non verius Poëtae) nativo vultu Pantomimus placuit, imbelles illi debent sibi, quod levi fraude (blanditiis) capti, multis deinceps errorum laqueis implicentur. Pantomimus enim suam a se naturam expellere non potest; lepidus est, blandus est, ludit. Eorum erat, animum obfirmare et crepundia haec ex alto despicere. Si quibus vero sic affectis, ut Pantomimum serio traducant, palam exsecrentur, cum his etiam, qui signa ejus sequuntur, internecinum bellum gerendum sibi putent; Pantomimus tamen ita temperet negotium et refingat, ut iidem illi clam et re ipsâ stent a partibus ejus, et toti faciant cum ipso. Hae profecto non artes jam, non fraudes, sed praestigiae sunt istius Genii. Peripateticos dico, quos volentes nolentes praevaricatores sibi apposuit praestigiator ille. Negant illi palam et conceptis verbis, elementa, sidera, metalla, lapides cognoscere; re vero et tacitâ quadam ac interiore, quam ipsi met non satis capiunt, animi sui sententiâ, non aliud clamant, id unum pro-fitentur: cuncta cognoscere, et in suis actionibus suâ se cognitione dirigere. Haec fere sola Philosophiae istius elementa, haec prima lineamenta, quae ut variis postea coloribus inducantur, peritis tamen pictoribus non latent. Quod deinceps in Textu vide, quem huc usque Commentario profecuti sumus. Cui, quando jam domum venit, et res suas agere ingreditur, bene agere et valere.

---



QUAESTIONES  
QUODLIBETICAE

IN UTRAMQUE PARTEM DISPUTATAE.

SERMONI ANNO 1665 LUGDUNI BATAVORUM  
EDITO SUBJUNCTAE SUNT VARIAE LECTIONES EX EDITIONE  
ANTVERPIENSI ANNI 1653.



---

# QUAESTIONES QUODLIBETICAE.

---

## QUAESTIO I.

*An mutuae per plateas <sup>1</sup> et templa Salutationes approbandae?*

Nosci omnes appetunt. Non notum fuisse, ferme est non natum fuisse. Ii ipsi, qui Cynico <sup>2</sup> quasi stupore perculsi, in dolium se abdidere <sup>3</sup>, familiares salutationes et celebriora commercia dedignant, id unum agunt, ut facti raritas oculos in se defigat intuentium, dum caeteri, consueta tractantes, levi oculorum conjectu <sup>4</sup> transmittuntur. Quid ni igitur Salutationes illae inter amicos passim obvios <sup>5</sup> sint approbandae? quibus solis et nosci se a multis et amari videt et coli, cui illae frequentiores obtingunt. Adde, hoc pacto futurae amicitiae fundamenta commodissime jaci <sup>6</sup>, dum qui primus salutat, aut parem aut majorem illius erga se animum explorat et tentat, qui in resalutantis nutu vel gestu manifesto plerumque se prodit indicio. Dum interea qui saepe jam salutavit ac resalutatus est, ad colloquium et familiares sermones et prorumpit fidenter <sup>7</sup> et admittitur facile <sup>8</sup>; in his et animi sui sensa

---

<sup>1</sup> Vicos. <sup>2</sup> Stoico. <sup>3</sup> perculsi delitescere affectant. <sup>4</sup> Levi obtutu. <sup>5</sup> Plateales illae inter am. pass. obv. salutationes. <sup>6</sup> quod... jaciantur. <sup>7</sup> sermones confidentius prorumpit. <sup>8</sup> et facilius adm.

studiaque significat <sup>1</sup>, et obsequia defert, et, quod amare perspiciatur <sup>2</sup>, redamatur; fitque jam subito <sup>3</sup> necessarius et intimus, qui paulo ante totus erat praeter rem et <sup>4</sup> extraneus. Quin etiam veteri et radicatae amicitiae fomentum suppeditant et succum blandi illi amicorum sibi occurrentium applausus <sup>5</sup>, suaves arrisiones <sup>6</sup>; quibus nihil aliud quam mutuos mores et genium novisse se fatentur et approbare. Estque usu et experientia <sup>7</sup> quam notissimum, nubilam curis et moerore mentem vel uno benevolo arridentis oculi radio saepe detergi ac defaecari. Quin etiam leviter interdum suscepti similitudinis igniculi, — irarum tamen et inimicitiae incendia, ni ocius provisum fuerit, meditantes, — hac arte commode praefocantur <sup>8</sup>, et animi ad lenitatem dantur, ut, si <sup>9</sup> quid jurgii et offensiuncularum <sup>10</sup> inter amicos obortum sit <sup>11</sup> (sic enim vivitur), salutet prior qui ansam dedit indignandi, aut visus est dedisse. Denique his ultro citroque <sup>12</sup> salutantium officiis <sup>13</sup> constat <sup>14</sup> publico vigor et vita <sup>15</sup>: dum in platearum compitis obviam facti, catervatim inter se inclinant <sup>16</sup>, festivo ritu capita nudantes, et in templorum atriis, stridente <sup>17</sup> plantarum ad pavimentum affricu <sup>18</sup>, nescio quid solenne exhibentes.

---

His argumentis <sup>19</sup> tamen multum derogat perversa et indigna quorundam ambitio, hoc officii genus, quod amicorum candor progeniit, in fastum et fastidium praepostere detorquentium, dum grandi elatoque supercilio obambulantes, et nescio quid luridum ac torvum tuentes <sup>20</sup>, obsequiorum et salutationum

---

1 patefacit. 2 quia am. perspicitur. 3 fitque statim. 4 *omitt.* praeter rem et. 5 annutus. 6 arrisus. 7 *omitt.* usu et. 8 mariter sopiuntur. 9 *add.* quandoque. 10. *omitt.* et offensiuncularum. 11 interciderit. 12 *omitt.* ultro citroque. 13 mutuis obsequiis. 14 *add.* in. 15 vivacitas vigorque. 16 sibi applaudunt. 17 adytis, strepente. 18 attritu. 19 *omitt.* argumentis. 20 affectantes.



vectigalia <sup>1</sup> jure suo exigere videntur. Quae si quandoque praetereuntium vel simplicitas vel candor pendat, idem tamen illis, qui <sup>2</sup> ante, stat silens ac feralis aspectus <sup>3</sup> ac non nisi post justam moram manus gravate ad pileum ascendit, eumque transversum vix unguem a capite tollit <sup>4</sup>, et fastidium ilico reponit, erubescere interea officioso salutatore, et anxio, quibus caeremoniis <sup>5</sup> infesto illi et male ominato numini deinceps supplicandum sit <sup>6</sup>. Sed quod hi affectant (et non ferendum est) <sup>7</sup>, hoc Philomusi illi et mortuorum socii praeter animi sui sententiam patiuntur (et ignoscendum est) <sup>8</sup>; ut nimirum distractâ saepe atque in museo plusquam semirelictâ mente, in <sup>9</sup> publicum prodeuntes, amicorum occursum non percipiant, eosque velut <sup>10</sup> ignotos praetereant, aut impense officiosis <sup>11</sup> tantum frigide <sup>12</sup> respondeant. Itaque in sermonem incidunt et vapulant: nam habet <sup>13</sup> ista suspicio neglecti officii <sup>14</sup> acre quid et mordax, quod acerbam ex intervallo <sup>15</sup> vellicat, nec sopiri patitur memoriam; scilicet <sup>16</sup> turpis repulsae speciem habet, si, quem ambibat salutans, is resalutando non deferatur honos. Atqui a tam futile <sup>17</sup> causâ saepe compertum est provenire, ut boni doctique viri, ubi pro meritis amari se putant, maledicorum quidem linguis (quod solet) exagitentur, sed nec amicorum (quod par erat) favore sublevantur <sup>18</sup>. Denique compositis his salutationum gestibus, quibus in dies adolescentum vanitas addit demitque, inest virilis animi quaedam effaeminatio et fucata <sup>19</sup> lascivia: quae per simulationem humanitatis <sup>20</sup> libidinis causam <sup>21</sup> agit. Venustarum mulierum ac juvenum

---

1 tributa. 2 ut. 3 obtutus. 4 ad digiti latitudinem capiti demit. 5 quo ritu. 6 infestum illud numen imposterum sit applacandum. 7 quod in his affectatum est et non ferendum. 8 hoc est in viris studiosis aliquousque naturale, ideoque ignoscendum. 9 per. 10 ut. 11 aut officiis. 12 ex parte. 13 his tamen saepe non parcitur quia idem neglecti officii judicium pariter cum caeteris subeant. Habet autem. 14 ista negl. off. contemptusque suspicio. 15 per intervalla. 16 quia nempe. 17 ex tam levi. 18 levantur. 19 palliata. 20 sub humanitatis praetextu. 21 negotium.

occurfus fallaci blanditiâ fora plateaeque infamat; et in <sup>1</sup> Ecclesiis sacra Divis musica profanatur, dum ad ejus modos puellaris greffus et pellex corporis demissio se confingunt, cum illecebris et lubrico spiritu oculorum, cernuas <sup>2</sup> procorum turmas laceffente.

COMMENTARIUS <sup>3</sup>. Salutationis seu reverentiae, quam adversus alios adhibemus, ritûs varii, variae veluti caeremoniae. Omnes in eo conveniunt, quod prosternant et supplicem faciant eum qui salutat; nam cernui plerique salutantium corpus antrorsum inclinant. Mulieres rigido quidem pectore, flectunt poplites; Viri inter Christianos galerum, quem ex lanis coactis cum aliquanto apice gestare solent, a capite tollunt; quo ritu minores jam et subsidisse quodammodo videntur. Omnes hosce gestus idem aliquis Genius animat; omnes enim, ut vidimus, deji- ciunt salutantem, et hoc ipso quasi efferunt salutatum, sublimem eum ac coelo propiorem faciunt. Quia enim importunum erat, si, quem salutatum venires, manibus levare et sursum agere deberes, hinc aliâ id viâ tentandum erat; nam quasi idem assequeris, cum te ipse prosternis aut quoquo pacto diminuis; sic enim salutatus attollitur, et te humili sublimis est. Coelum hîc nobis in corpore versantibus pulcherrima res visa est; quae magni facimus, omnia haec in coelum aut ad coelum ferimus, si non re, saltem animo, verbis, laudibus. Sed ecce! cum Genium istum studiose inspicio, corripior ipso Genio; nam *Magni facere*, quod dixi, ab ejus oestro fuit; magna siquidem appropinquant coelo. Huc faciunt reliquae phrasæ, quibus, quae laudare volumus, *Alta* dicimus, *Ingentia*, *Sublimia*, et *Eminere*; quae contemnimus, *Demissa*, *Abjecta*, *Humilia*, et *Jacere*. Huc et mores faciunt; nam principes in folio, judices in tribunali, professores in cathedra, ut magni facimus, ita in eminenti locamus.

---

1. *add. sanctis.* 2. *pronas sibi.* 3. *Commentarii loco legitur* APPENDIX: Alibi de prioritate; cur inter salutantes de posterioritate certatur?

## Q U A E S T I O II.

*An tradentem audientemque <sup>1</sup> Scientias, recentibus <sup>2</sup> quam antiquis Auctoribus operam dare sit satius <sup>3</sup>?*

Rude Scientiarum Artiumque principium; eas longaevus usus perpolivit et in <sup>4</sup> fastigium eduxit; et minores majorum suorum erroribus sapiunt, supraque molem illam, quae Veterum vires exhaustit, parvo negotio evecti, eique de suo rursus inaedificantes <sup>5</sup>, aliquanto longius prospiciunt <sup>6</sup>. His itaque speculatoribus tutius te committas, quibus ex tam edito datum est despicere sententiarum suarum adversarias rationes, iisque procul adventantibus viam obsepire. Huic <sup>7</sup> accedit Veterum plerorumque magna credulitas; qui receptis suo tempore, et nescio unde depromptis fabellis sine maturiori examine <sup>8</sup> fidem adhibentes, ingenia sua miserum in modum torserunt, dum falsa cum veris, feliciter <sup>9</sup> saepe deprehensis, anxie conciliant, collectoque ex his absurdo dogmate <sup>10</sup>, in plura (quod necesse est) dilabuntur absurda <sup>11</sup>. At Recentium Scriptorum integra, regia, non <sup>12</sup> astricta ingenia; quibus ardor est ad vivum <sup>13</sup> refecare, quae manifesta Ratio Experientiaque non pangunt <sup>14</sup>, quantumvis ea Veterum superstitio coluerit <sup>15</sup>. Et certe (quod a magnis nostrorum temporum Ingeniis admonemur) solum hoc filum est, quod Opinionum humanarum Labyrinthum ingredientibus, inter tortas errorum ambages, totum promittat exitum: omnia non penitus explorata certaue suspectare, quantumcunque plausibili veritatis specie se jactent. Accedit porro Veteribus affectata passim obscuritas, quae quaesitis saepe verborum involucris, plus loci sibi vindicat in eorum scriptis, quam sensus aut rationum momenta. Enimvero non nisi tenebrionum est, fatis

---

<sup>1</sup> tradenti audientique. <sup>2</sup> modernis. <sup>3</sup> inhaerere consultius. <sup>4</sup> ad. <sup>5</sup> *omitt.* eique d. 3. 2. in ead. <sup>6</sup> *add.* quam ipsi. <sup>7</sup> His. <sup>8</sup> ulteriori indagine. <sup>9</sup> argute. <sup>10</sup> inepto principio. <sup>11</sup> plures.... ineptias. <sup>12</sup> Modernorum e contrario regia nec. <sup>13</sup> ardor est penitus explodere et. <sup>14</sup> evincunt. <sup>15</sup> suspexerit.

de se abstrusae, et mille modis intricatae perplexaeque Veritati insuper noctem et latebras conciliare, et de suo ingenio caliginem offundere. Suspectumque id, cum aditum ad Naturae Arcana ducentem diuturnâ indagazione deprehendisse vis videri, eum posteris obferare, prementemque tua vestigia nescio quo sinuoso discursu deludere. Hinc non immerito Recentium Scriptorum in hoc praecipue <sup>1</sup> defudat industria, ut distincta sint, dilucida, ordinataque quae tradunt, dum operis sui Argumentum et artificium in libri <sup>2</sup> vestibulo <sup>3</sup> Lectori exhibent; dum illud scite partiuntur et digerunt in Tractatûs, in Sectiones, in Capita, Quaestiones <sup>4</sup>, Articulos, Dubia, Paragraphos, Numeros, Puncta; nomina, quae bonam partem <sup>5</sup> Antiquorum incondita confusio non novit <sup>6</sup>! Dum ultimae etiam subtilitatis argutias <sup>7</sup>, quae vulgi captum penitus effugiunt, pingui aliquâ similitudine familiariter induunt, ut jam sub isto quasi amictu a quantumvis crasso ingenio hebetique palpentur.

His tamen rationibus in occursum it Soliditas Antiquorum Scriptorum, nihil levi ac volante manu (ut effusus agilisque nostri faeculi genius est), sed plumbeo calamo omnia caute ac mature statuentium, nec quolibet suas cogitationes <sup>8</sup>, quae inter calices forte bene habitam jam et molliculam mentem demulcebant, in Publicum eructantium, sed duntaxat quas momentis suis examinaverant <sup>9</sup>, quas ad Rationis austeram trutinam discusserant, longâ lucubratione, improbâ pertinaciâ. Certe major quondam erat Publici reverentia; et quidquam huc adferre nisi longâ ruminatione digestum, nefas esse credebatur; ubi hoc quo vivimus aevum <sup>10</sup> (quod cultum, quod expolitum, cum

---

<sup>1</sup> principaliter. <sup>2</sup> Statim in. <sup>3</sup> *add.* ad primum fere intuitum. <sup>4</sup> in tractatus, in capita, in quaestiones, in sectiones, in. <sup>5</sup> pro magna parte. <sup>6</sup> inconditam confusionem non novere. <sup>7</sup> argutiae subtilitates. <sup>8</sup> quolibet suos conceptus. <sup>9</sup> *omitt.* quas... examin. <sup>10</sup> faeculum.



ludibrio Antiqui Rudimenti, Nostrates invidiose jactant) quorumvis libidini fraenum dedit, ut scribant, ut censeant, ut quidquid in buccam venerit <sup>1</sup> effutiant, — hoc solo <sup>2</sup> fructu, quod ingenuam et in alta concitatam juventutem <sup>3</sup>, nugis et gerris suis implicitam, remorentur et vilem faciant. Atque <sup>4</sup> has etiam nugas in limine <sup>5</sup> speciose inscribunt: *Quaestio Curiosa, Quomodo Jupiter Junonem duxerit* <sup>6</sup>; *Opus Aureum; Diu desideratum;*

*Fortunam Priami cantabo et nobile bellum* <sup>7</sup>.

*Quid dignum tanto feret hic promissor hiatu?*

*Parturiunt montes; nascetur ridiculus mus.*

Patet etiam, si Veterum scripta dilligenter pervolveris, nihil novi, quod tam anxie deperiunt, hos Novos adferre; sed detractis saepe quibusdam verborum fasciis, ipsissimum esse Antiquitatis foetum, quem ut suum circumferunt. Quin etiam evulgati hodie prostant libri, jussi alienum Auctorem perfrictâ fronte mentiri, in quibus nihil aliud legas, quam Antiqui alicujus Scriptoris constipatam et contractam energiam, misere distentam, et nescio quibus naeniis ad fastidium intertextam; futili laudis ambitu, ut nempe magnorum voluminum Auctores appareant, qui meri plagiarii <sup>8</sup>, qui fures libellorum sunt:

*Quid mihi Celsus agit, monitus multumque monendus,*

*Privatas ut quaerat opes, et tangere vitet*

*Scripta, Palatinus quaecunque recepit Apollo;*

*Ne si forte suas repetitum venerit olim*

*Grex avium plumas, moveat cornicula risum*

*Furtivis nudata coloribus* <sup>9</sup>.

At ubi in diversas partes a Veteribus, non bene lectis aut non bene intellectis, abivêre, popularia quaedam suis placitis

---

<sup>1</sup> ut quae visum fuerit in medium. <sup>2</sup> nullo plerumque. <sup>3</sup> add. nisi. <sup>4</sup> Atqui.  
<sup>5</sup> has etiam in liminari pagina. <sup>6</sup> commendant speciosis titulis. <sup>7</sup> regnum.  
<sup>8</sup> omitt. qui meri plagiarii. <sup>9</sup> omitt. poëtae verba.

appendunt argumentorum pondera, quae jam pridem <sup>1</sup> Veterum indefesso malleo ad exilem usque tenuitatem contusa sunt; ita ut vel solo spiritu ab Antiquitatis defensore dissentent, quibus totam Antiquitatem <sup>2</sup> suppressum et suffocatum ire minabantur. Denique periculo non vacat, et religioni ac publicae quieti palam noxium est, <sup>3</sup> quod Recentiores non pauci frequentant <sup>4</sup>: ut nimirum in rebus seriis, quinimo et sacra concernentibus, ambigere <sup>5</sup>, diversas ac pugnantes inter se sententias committere, ac utrimque rationibus instruere malint, quam solide confutare alteram <sup>6</sup>, alteram solide stabilire <sup>7</sup>; ut hoc pacto Lectorem teneant, spectaculo et creperi certaminis eventu prurientem; doceantque, posse se <sup>8</sup> firma concutere <sup>9</sup> et seria omnia ludibrio habere <sup>10</sup>.

### QUAESTIO III.

*An expediat virum doctum, Principum curis et  
curiis se interponere <sup>11</sup>, an vero in museo et  
inter Musas consenescere?*

Magnetica quaedam in imperante <sup>12</sup> virtus, eorum qui imperantur <sup>13</sup> oculos pariter ac mentem in se convertendi desigendique. Hinc quo ille vel enititur prior <sup>14</sup> vel delabitur, eo etiam hi <sup>15</sup> trahuntur; ad unius exemplum ac pene nutum sive praecipitium focordiae proni, sive in arduum Virtutis erecti.

---

1 diu. 2 eam. 3 add. *id.* 4 recentioribus non paucis affectatur. 5 *omitt.* ambigere. 6 alteram partem solide convellere. 7 et alteri palmam dare. 8 *omitt.* se. 9 concuti. 10 in ludibrium verti. *Add.* APPENDIX: Qui minus scit quam sciendum est, inquit quidam, brutum est inter homines; et qui plus scit quam sciendum est, homo est inter bruta; uter miserior? — Existimant plerumque viri docti operam se perdere, dum aliquibus intendunt aut student quae ad nullam materiam philosophicam alteriusque scientiae, prout jam traduntur, reduci facile possunt; contra vero dum nugis quibusdam ac ultimae sterilitatis quaestiuiculis exaggerantes incumbunt, quae facile ad certum caput reducuntur, putant egregiam a se operam navari. Numquid hoc inter praejudicia non minimum, quibus transversi agimur a vero? 11 immisceri. 12 est in principe. 13 subditorum. 14 ipse prior vel enititur. 15 subditi.

Proinde non de cive aliquo, sed de Republica, non de homine, sed de Genere Humano bene merentur Sapientes illi, quibus id unum agitur, ut praesto sint imperanti, salutarium consiliorum face viam praelucentes ad Templum illud Virtutis et Honoris. Abiectum autem perinde atque inhumanum est <sup>1</sup>, ignava securitatis simulatione <sup>2</sup>, in arido illo Scholae pulvere fordescere, parumper <sup>3</sup> a desidia et oblivionis sepulcro distantem, ubi industriam tuam Patria postulat, ubi virtuti ac doctinae tuae folium dignitatis Fortuna promittit. Quid quod hoc pacto Sapientiae et Bonarum Artium candidatis accrescet animus et aviditas perrumpendi illa taediorum ac laborum septa, quibus Natura Veritatem inclusit, si Sapientiam viderint non jam sub vili pallio latere, non intra humiles casus constringi (ut hodie res dant sese) <sup>4</sup>, sed amplis regum atriis, submissis fascibus suspici, sceptris assidentem. Quod enim alii blandientis Fortunae favor impertiit, facile id sibi pollicetur humana credulitas, avida futurae felicitatis imaginatione delusa, et ex paribus initiis pares successus in praejudicium ambigui casus componens. Ad haec si vir doctus Aulam frequentet, ubi apud Principem pro meritis auctoritate valuerit, facile <sup>5</sup> poterit pestes illas ab Aula profligare, quae eam bonis omnibus infamem pariter atque exosam fecerunt: Fraudibus larvam et fucum, ingenii dexteritate detrahere; adulationibus ambages, per quas se volvunt, obsepire; proterviam et lasciviam comprimere austerâ fronte et Sapientiae conveniente supercilio. Adeo ut (quod decebat) Principes Palatium omnibus jam appareat delubrum quoddam beneficae Majestatis, et afflictæ Innocentiae tutissimum asylum.

---

<sup>1</sup> Vile autem est perinde atque inhumanum. <sup>2</sup> ignavo secur. praetextu.  
<sup>3</sup> parum. <sup>4</sup> *omitt. parerth.* <sup>5</sup> facili negotio.

His tamen obstat, quod ad Principem non pateat nisi per Ministros ejus aditus. Major his quam Principi arrogantia et impotentius fastidium; qui tunc demum egregie se tutari Domini sui dignitatem arbitrantur, si, quod ingenuum erat et non fictum, id omne tamquam laesae majestatis suspectum reprefferint; si, quod sine majorum imaginibus probum ac industrium, id omne tamquam plebejum et profanum a Principis sacrario repulerint. Hos sibi devinciat qui Deo vel notus esse voluerit; scis quo pacto? Assentationibus, servilibus blanditiis, donis, promissis, fordibus. Quod si haec conditio minus aequa videatur et Philosophiae legibus adversari, aevum teras nequicquam, atria quotidianis discursibus fatiges, et inter leviculam illam Aulae juventutem explosus oberres, sicut asinus inter simias. At finge primam illam sepem te perrupisse, nosci te a Principe, ad sermones ejus admitti, rebus seriis aures hîc esse teneras, asperum et inconditum sonare, si quid parumper ab adulationis concentu ad tenorem veritatis deflexit; admonitionem edictum cenferi, consilia ex eventibus aestimari, favores Domini ventorum in morem subinde reflare in diversum, et veteri adagio, *Aulicos esse similes abaculorum calculis*. Hi enim secundum computantis arbitrium modo aurei sunt, modo aenei; et Aulici ad nutum Regis nunc beati, nunc miseri. His adde factiones et dissidia potentum. Alteri parti te jungis? Periculum communicas. Ab utraque dissides? Utrimque premeris. Adde et ingentem invidiae fumum, quem nascens ille splendor excitat, eorum oculos intolerabiliter exagitantem, quibus persuasum est, stemmati et majorum ceris deberi cuncta, Virtuti nihil. Proinde si vir doctus intra privatos parietes se contineat, si chartis mandet, quae Principem instruant, consulat et sibi et Principi; utilius Principi, et sibi tutius; expedit illud calamo quam linguâ ducere. Umbra est vivorum dictis invidia; mortuorum scriptis reverentia.



## QUAESTIO IV.

*An virtuti expediat aperto Marte cum invidiâ luctari,  
an vero tectis artibus eam declinare?*

Pestilens Invidiae venenum in latus circumquaque diffunditur et per aequales serpit; immunis est et qui infra illam depri-  
mitur ad contemptum, et qui supra illam erigitur ad digni-  
tatem. Proinde si expandas Virtutis alas, et uno nifu in altum  
evoles, jam ultra Invidiae fines penetraveris, antequam ad  
carpendum dentes et morsum figere potuerit. Si vero diffi-  
mules, et in altum repas, et subinde a regia via declines, ne  
quo caute tendis ire videaris, aetatem teres et ingenium miseris  
consiliis; frustra inter dejectam plebem Virtutem et Gloriam  
ex longinquo suspiciens. Quid quod sensim suffocetur Animus,  
in his tagnarum latibulis compressus et intortus? cui Natura  
inseverat igneum quiddam et amplum et angustiarum dedignans.  
Quid quod sensim in vitium degeneret? ubi vix distant ab  
ignaviâ lenta consilia, a timiditate nimia cautela, a servitute  
circumspectio, a fraude dissimulatio. Virtutibus enim propinqua  
vitia; facile ipsarum virtutum compellatione dignatur humanae  
mentis effaeminata indulgentia, deinceps specioso nomine tam  
libenter se fallens, ac si Naturam ipsam et Supremam Regulam  
una pervertat. Adde quod sit alto infractoque animo generosum  
et par exercitium, aperto campo in Invidiam ire, viventem ejus  
aciem irretortis oculis ferre, et impavidum subsistere, et pedem  
conferere, et regio huic oneri aequos humeros supponere, quod  
est *audire male cum facias bene*. Nec praeteriri debet, quod  
effraenis et implacabilis est Invidia, ubi locum te cedere <sup>1</sup>,  
ubi declinari se sentit; ex tuo <sup>2</sup> timore suas vires dimetiens,  
ex tuâ <sup>3</sup> imbecillitate sibi feritatem et audaciam sumens, proinde  
ad omnem egregium conatum sese exferet, et ex improvviso  
insiliet, ausa jam non tectim arrodere, sed aperte laniare. Vile

---

1 sibi cedi. 2 alieno. 3 alienâ.

est hoc vitium, si noveris, et debile, et tuo tantum timore potens; si palam despicias, ringitur et crepat.

---

Contra tamen facit, quod haec ad gloriam emergendi ratio, anceps et periculosa penitus, temeritate vix vacet: omnium oculos irritas, omnes ad invidiam et acerbitem provocas, quisquis masculo illo et robusto passu vadis ad Virtutem et Honorem. Nec dumtaxat aequalium, quos praeteris, allatratus et morfus, sed et praecedentium, quos premis, calces metuendi. Quin etiam qui longius evasere, suffocari tamen cupiunt, quem accedere et promicare vident, anticipantes aemulationem ante paritatem; quin etiam unguis et rostrum ad discerpendum acuunt, quos, ceu infaustas atrae noctis Striges, omnis feriae ac manifestae Virtutis exagitat splendor; non equidem invidiâ, sed naturali odio et saevitiâ imbelles pectus armati. Enimvero ubi odia frendent, ubi minae machinantur, ubi in caput tuum pericula conjurant, hic tamen obniti, et contra fremere, et in manifestum interitum irruere, immane quiddam est et rabidum, a placido tranquilloque Virtutis in immensum aberrans. His adde quod naturalior <sup>1</sup> Virtuti triumphus, qui arte, quam qui vi paratur. Ars mitis illa et suavis ministra Virtutis, pariter cum Dominâ suâ, pacis et quietis amica; Vis barbarus quidam fatelles, contra incursum et ad extrema datus. Gratum etiam et ingenuum incidit imaginanti, Virtutem non ilico totum impetum diffundere, et summo rigore discertare; sed cedere tantisper, et connivere, et impari adversario dare aliquid; et ad instar Solis in ortu suo, Invidiae nebulâ nunc tegi, nunc livescere, nunc pallere, quousque meridiem scandat, et jam maturis radiis tumultuantes illas infra se nubeculas discutiat et consumat <sup>2</sup>.

---

<sup>1</sup> conaturalior. <sup>2</sup> add. APPENDIX. Invidia in aequales, non tamen in omnes; non enim in eos, quos temporum aut locorum intervalla sejungunt longius.

## QUAESTIO V.

*An hodiernus mos, aliorum auctoritates in dictis  
scriptisque citandi, sit approbandus?*

Obstringimur a Naturâ religione quadam et reverentiâ vetustatis, anxii majorum dictis et sensis contraire, his obsequi et consentire securi. Et jam

— — *tot labentibus annis*

tandem piaculum est concutere, quod cana Saeculorum sanxit auctoritas, longâ serie post patres suos decurrentibus natis

*Et natis natorum, et qui nascuntur ab illis.*

Quid ni igitur pietatis et observantiae laudem habeant, qui frequenti alienorum sensuum citatione profitentur, majorum se adorare vestigia, ab eâque quam ipsi signavere semitâ, ne <sup>1</sup> latum quidem unguem velle declinare. Porro hac arte dictis tuis, si pulcra sunt, invidiam detrahis, dum ea non tibi sed mortuis ascribis, quos ab invidiâ Fatum semovit; si minus concinna sunt, nescio tamen quam gratiam concilias, dum in iis, quod antiqua putentur, semper quid amplius quam sonet intelligitur, ita Vetustatis Mystico <sup>2</sup> Genio volente. Dum interea magnam dicenti scribentique commendationem parit, Antiquitatis monumenta perlustrasse, evoluisse libros, intellexisse sententias. Cana quaedam et senilis sapientia est, quae de isto fonte promanat, quae non unius aevi limitibus constricta, praecedentia omnia complectitur, et ex his late se diffundit impofterum. Gratum etiam et peramoenum Lectori spectaculum exhibetur, dum uno libello, quinimo unâ paginâ, ingens

---

Numquid igitur hinc invidia nomen habet, quod per oculos magis quam per aures se insinuat. — Pulchre Sanctus Augustinus; Tolle invidiam, et tuum est quod habes; tollam invidiam, et meum est quod habes. Numquid ergo Monasterium et Religioforum conventus est, ubicunque sine invidiâ degitur, cum ibidem omnia sint communia. 1 *add.* ad. 2 mysterioso.

Sapientum chorus in Proscenium accitur, quasi super Quaestione quae decidenda proponitur deliberaturus; dumque suo stylo declamantes inducuntur, suam singuli sententiam produnt, ora ipsa mehercule et lineamenta, non tam corporis quam animi eorum quos nunquam vidimus, videmur tamen quasi praesentes intueri. Denique dum hoc pacto majorum placitis suis honos vindicatur, compefcitur effraenis <sup>1</sup> illa novitatum cupiditas <sup>2</sup>, cui *Veritatis studium* hodie praetexunt; quae <sup>3</sup> licet innoxia <sup>4</sup> videri possit, quamdiu Physicarum speculationum cancellis circumscribitur, ubi tamen ulterius exemplo serpit, et ad Mores ac Religionem se transfert, turbulenta palam <sup>5</sup> et exitialis est.

---

Contra tamen facit, quod haec, in errores pronior, incautos a Veritate seducat semita; dum Auctoritatibus illis et testimoniis undique corrasis <sup>6</sup> hoc agitur, ut quid Auctores <sup>7</sup> dixerint, non quid dicendum sit, quaeratur, et qui indagandi rerum causas avidus accesserat auditor, speciosis Scientiarum nominibus inductus, is rancidularum illarum <sup>8</sup> Quaestionum, quid hic aut ille senserit, demittatur ad vomitum satur. Certe his, ubi modum excessere, inest manifesta vanitas <sup>9</sup> et abjectio <sup>10</sup>, et quaedam quasi servitus. Jam olim dictum volunt, et uberius dictum, quidquid omnino dici potest; gratis fatigari <sup>11</sup> nova molientem. Hinc et Libri, quibus nomen suum inscribunt <sup>12</sup>, non nisi struem quandam continent <sup>13</sup> hinc inde compilatam, et confusas diversorum Auctorum farragines. Hoc Plato dixit, illud <sup>14</sup> Aristoteles, et istud Leucippus, alique alia; et quod nemo dixit, ad minus *Quidam* dixit. In suis vero declamationibus <sup>15</sup> ubi ad Veterum scita, quibus passum intertextae

---

<sup>1</sup> protervus. <sup>2</sup> pruritus. <sup>3</sup> qui. <sup>4</sup> innoxius. <sup>5</sup> palam turbulentus. <sup>6</sup> dum frequenti illa veterum citatione. <sup>7</sup> ipsi. <sup>8</sup> is impertinentium. <sup>9</sup> vilitas. <sup>10</sup> dejectio. <sup>11</sup> divexari. <sup>12</sup> Hinc in libris quorum auctores ferri se volunt. <sup>13</sup> obtrudunt. <sup>14</sup> et hoc. <sup>15</sup> In declamandis vero suis scriptis.



sunt <sup>1</sup>, deventum est, hîc vero stylum abrumpunt <sup>2</sup>, deinceps graviore tono verba singula inflantes et paufis morisque distrahentes. Horum aliquem si audias, Rhadamanthum audire te putes jus dicentem apud manes <sup>3</sup>. Et tamen quae hoc apparatu dicuntur, saepe nihil sacri sunt,

*Sunt apinae tricaeque, et si quid vilius istis* <sup>4</sup>.

Quinimo, quae sua faciunt, antiquis similia credunt, si iis insipidum quid ac inolidum aspergant, quod intelligi facile non potest, quod longâ vetustate jam usque ad ossa macruit. <sup>5</sup> Et tandem in cultum admirationemque rapiuntur <sup>6</sup>, fuspicientes Antiquitatis vegetum illud et felix aevum, cui puriore radio Veritas affulserit, et uberior scaturiverit ingenii vena, arido hoc et fatifcentis Naturae seculo procul ad tenebras et barbariem relegato. Apage cum atrâ bile infomnia tua, quisquis haec nobis moroso cerebro deliras. Ad plebem usque cultum est aevum hoc, et novis inventis insigne, et habet, si recte ponderas, quod cum praecedentibus omnibus de nitore et festivitate contendat <sup>7</sup>. Manum exfere,

— — *aude aliquid et te quoque dignum*  
*Finge Deo.*

Videbis, minimum adhuc esse quod majoribus nostris actum est; immensam esse segetem, in quam illi falcem non miserunt. Occupata non est, etiamnum maximâ parte latet Veritas. Communem illam viam aberrantium pedes triverunt; aliâ tendendum est <sup>8</sup>.

---

<sup>1</sup> scita his intertexta. <sup>2</sup> succidunt. <sup>3</sup> distrahentes; putes Sibyllae folium recitare aut quod olim de tripode dimanavit oraculum. <sup>4</sup> efferuntur, vulgaria saepe tricaeque sunt, et, quod ajunt, lippis passim ac tonsoribus nota. <sup>5</sup> jam emarcuit. <sup>6</sup> solvuntur. <sup>7</sup> add. ac vincat. <sup>8</sup> add. APPENDIX. Citant Franciscani revelationem Brigittae pro immaculatâ conceptione. Citant Dominicami revelationem Catharinae Senensis contra immaculatam conceptionem. Quid restat nisi tertia veraque revelatio, quae utramque illam revelationem nullam esse perhibeat et inutiles ac turbulentas hominum subtilitates meritâ censurâ reprimat?

## QUAESTIO VI.

*An mordaces<sup>1</sup>, an vero edentulas expediat  
inter amicos esse facetias?*

Voluptatis excessum refugiant Sensûs, et ingrati alicujus gestiunt consortio. Acria, amara, falsa, quae pungunt ac vellicant, inter epulas amat Gustatus<sup>2</sup>; saccharo<sup>3</sup> ac bellariis semper vesci etiam feminae puerique abnuunt. Et habet perpetuum illud ac exundans inter amicos obsequium, quo pertaesum saepe faciat, quem nimium delinit. Huic si de jocis acre quid et falsum<sup>4</sup> asperferis, amicum<sup>5</sup> nausêa prohibuisti; officia tua sic condita palatum semper irritant, salivam semper movent<sup>6</sup>. Ingenium etiam, quod sine exercitio torpet et sopitum est, stimulis istis admotis<sup>7</sup>, expergiscitur, agitque se et versat et omnes nervos intendit<sup>8</sup>, ut, quibus perstringebatur, argutias<sup>9</sup> similibus refellat argutiis<sup>10</sup>; nam paribus armis discertandum est: quod momordit, non nisi jocus erat, et non nisi joco remordendum est. Experimur equidem quotidie Musarum Curiales<sup>11</sup>, adolescentulos eos<sup>12</sup>, qui a patriis laribus obtusi et rudes<sup>13</sup>, ad Academiam studiorum causâ concesserunt<sup>14</sup>, ibidem aequalium suorum vexationibus, jocis, et dicteriis<sup>15</sup> dolari penitus et quasi ad cotem acui; mirantibus amicis ac notis, eos in patriam reduces undique<sup>16</sup> leporem jam et gratiam<sup>17</sup> spirare, qui non ita pridem<sup>18</sup> cubito emungebant. Potes etiam arte istâ amicorum, quibus uteris, vitiis commode mederi, dum prudenter aculeum tegis sub facetiâ, ut ulcus incidas incauto. Serio reprehendere, hostem, serio monere, magistrum sapit; illud amicitiae, hoc aequalitatis jura non

---

1 mordaculas. 2 gustus. 3 saccharis. 4 falsum quid ac mordaculum. 5 omitt. amicum. 6 habet imposterum, quo palatum irritet, quo salivam semper moveat. 7 istis pulsum. 8 versat et omni viâ nititur. 9 quâ perstring. argutiam. 10 simili ref. argutiâ. 11 Certe experientia quotidie nos docet. 12 eos juvenes. 13 a materno foco rudes atque obtusi abiere. 14 se conferentes. 15 suorum dicteriis ac irritu divexatos. 16 notis, nescio quid. 17 leporis ac gratiae jam. 18 paulo ante.

ferunt; jocus, si recte uti noveris, quod in his tetricum est, praecidit <sup>1</sup>, quod fructuosum, servat. Denique popularem etiam et urbanum te reddes hac arte. Nam major <sup>2</sup> pars hominum hac est indole, quâ catellus noster, qui eos colit impensius, a quibus irritatur <sup>3</sup> magis; pedem ei trahunt, aurem <sup>4</sup> vellunt, in tergum versant, divaricatos digitos intentant oculis <sup>5</sup>, ipso interim blaeso rictu infestam manum impetente, et frustratos dentes in dentes fatigante. Et his imposterum magis comis <sup>6</sup> est, his in occursum promptior; his caudâ blanditur festivius; ad invidiam omnino et opprobrium eorum, qui saepe et saepius <sup>7</sup> pinguem ei offulam objecerunt <sup>8</sup>.

---

Contra tamen facit, quod dentatae <sup>9</sup> illae facetiae cuniculos agant <sup>10</sup> ad arcem Amicitiae demoliendam. Ex illis in convicia et jurgia <sup>11</sup> facilis et trita semita <sup>12</sup>; et ab his porro <sup>13</sup> ad rixas, ad simulates, ad indictas et apertas inimicitias itur <sup>14</sup>; et, ut sit aliquid quod praecipitem hunc cursum remoretur <sup>15</sup>, utut <sup>16</sup> fistant antequam crebrius utrimque puncti exulcerentur animi; tamen

— — *manet altâ mente repostum* <sup>17</sup>,

et supra crudam injuriam digestu malignum est, quod cum mordaci joco <sup>18</sup> permiscetur ludibrium. Apertam contumeliam extenuat inferentis ira concitatioque, et turbatae mentis impotentia; joco tectam deliberati animi aggravat simulatio et perversitas. Quae serio irrogatur, reconciliatione tollitur; haeret illa, quae a joco leporem sumpsit, et narratur, et in vulgi

---

1 praescindit. 2 servat. Denique major pars. 3 divexatur. 4 auriculam. 5 bifurcatis digitis in faciem eunt. 6 comior. 7 saepe-saepius. 8 pinguem offam ei fecere. 9 mordaciores. 10 tectis cuniculis suffodiant. 11 in impropria et aperta scommata. 12 tritus facilisque delapsus. 13 *add.* ad jurgia. 14 ad simult. itur. 15 *omitt.* et... remoretur. 16 et, ut. 17 manet tamen altâ mente compactum. 18 in joco.

fabulam abit. At apagesis <sup>1</sup> intempestiva illa <sup>2</sup>. Pone rictus, non rictus <sup>3</sup>; pone jocos non ad lanienam, sed ad mortuunculas duntaxat et pruriginem dentatos. Sed <sup>4</sup> et hi sensim erodunt totum hoc, quod inter amicos candidum est et familiare, dum incurioso <sup>5</sup> esse non licet, dum cum amico aliter quam tecum ipse loqueris, metuens sub facetiâ Censorem. Degenerat <sup>6</sup> etiam animus, dum ad carpendum hinc inde coactis fallaciis se intorquet, assuescitque tandem ad nugas se demittere, et plebeculae in morem exquisitae cavillari. Certe serium quoddam et magnificum est, quod ei sapere Natura voluit; frivolis abjectisque <sup>7</sup> rebus inescari, affecti <sup>8</sup> palati indicium est. His accedit, ita comparatum esse, ut acutuli <sup>9</sup> illi, quibus fertilior semper excrescit ad vellicandum unguis, aliorum in se jocos plerumque non ferant; ut nescio quam in amicos et socios dominationem ac tyrannidem <sup>10</sup> sibi fumere <sup>11</sup> videantur. Nam eorum non facetiis modo, verum etiam ineptiis applaudendum est; ni feceris, traheris in fabulam, ludibrio multandus <sup>12</sup>.

## QUAESTIO VII.

*An deceat ingenuum adolescentem, vestem ad  
Novos Mores aptare?*

Quod in vestium ritu Novi Mores ordinarunt, id protinus concinnum esse jubent et elegans; quod abrogarunt, plebejum primo ac rusticum esto, deinde ineptum etiam ac rediculum. Sed exoletis quoque his, cum videtur <sup>12</sup>, pristinam gratiam

---

<sup>1</sup> apage. <sup>2</sup> cum intempestivis illis. <sup>3</sup> *omitt.* pone... rictus. <sup>4</sup> *omitt.* fed. <sup>5</sup> incurio. <sup>6</sup> Vilefcit. <sup>7</sup> minutisque. <sup>8</sup> morbidis. <sup>9</sup> arguti. <sup>10</sup> nescio quem dominatum, in quo alii serviant. <sup>11</sup> fruere. <sup>12</sup> *add.* APPENDIX. Cato quondam, cum invitaret amicum ad ambulandum his verbis: Placetne deambulare? respondit ille: Quid opus est de? Imo, inquit Cato, quid opus est te? et relicto homine ambulabat solus. Numquid optimus hic modus cavillationes vocum et fallacias solvendi, regesto breviter dicto abire et ante vilis labem subducere se a futilibus. <sup>12</sup> quando visum fuerit.



conciliant; et haec quae nuper assumpserant, in contemptûs barathrum abjiciunt <sup>1</sup>; arcano quodam fascino <sup>2</sup> humanis sensibus illudentes. Qui igitur, o Adolescentes <sup>3</sup>, refractarium hisce legibus indumentum habuerit <sup>4</sup>, excidit jam nunc <sup>5</sup> venustatis omnis ac elegantiae commercio, suo ipse se calculo in ordinem <sup>6</sup> redegit. Contra vero dici facile non potest, quantum honoris adolescenti <sup>7</sup> conferat vestis illa, quam Novi Mores aptavere. Nonne vulgi in se vertit ora? nonne aequalium prolicit officia? nonne, si majores suos salutaverit, refaturatur liberalius? Vult <sup>8</sup> ea vestis in Academicis aliisque publicis Actibus ad confessum invitari, et peractâ fabulâ sibi grates persolvi deposcit; ambitur ejus in foro congressus, gaudet frequenti <sup>9</sup>, eâque amplâ ac magnificâ, etiam ignotorum salutatione. Auget etiam vestitus ille formam, perficitque, et conspicuam ac illustrem reddit; haec vero ubi hisce adminiculis fulcita est, nescio qua majestate intuentium animis dominatur, pellicitque, et in sui obsequium favoremque devincit. Habet insuper hoc Novitas, ut qui ejusce caeremoniis ac superstitione reguntur, eosdem inter se facile congreget et in mutuam consuetudinem familiaritatemque insinuet. Horum referti coetus vicis vitam, foro pompam, templis solennitatem faciunt; inter hos apte loqui discas, lepide confabulari, festivo salutare, deferre humaniter; hîc incessus, hîc obtutus, hîc etiam vocis stylus sonusque leges habent; hîc excutitur torpor et barbaries, accerfiuntur sales et gratiae. Erigit denique juvenilem animum illustrium personarum ritu concinnatus habitus, ingeritque paria vesti studia, concitatque in Virtutis arduum, — splendorem et dignitatem, ad quam aspirat, anticipante fiduciâ.

---

1 ad vilipendium abigunt. 2 praestigio. 3 juvenes. 4 refractario h. l. vestitu esse praesumpserit. 5 ipso facto. 6 intra plebem. 7 juveni. 8 Exigit. 9 crebra.

Contra tamen facit, quod haec in luxum et lasciviam protervam juventutem dissolvat licentia; dum animus aetate lubricus in vitium facile diffluit, et, quantumvis castigate coërceatur intra feveritatis ac disciplinae repagulum, ferocit tamen saepius, et fremebundus obluctatur. Quid? nonne vestis illa sternit aditum, et incautum pugilem manu ducit ad prostitutae Veneris palaestram? Salutat officiosius, applaudit festivius, Nymphis illis per vicos obviis, omni mundo muliebri venustis; nam favorem spondet habitus, et turpis repulsae ac fastidii metum, quo inhiheretur, elidit. At quia studiose resalutatur, placere se concludit, tremulo intus lenocinio sollicitante praecordia: pergitque porro ad vespertinum alloquium; et jam effari audet, quid petulantem animum excruciet, extenuatque vocem et blanditias miscet effeminatus, concinnâ simul veste patrocinnante libidini. His adde deplorandum temporis, quod ad seria suppetebat, dispendium. Quanta pars ejus tergendò, torquendo, pectendo, ligando, concinnando, reconcinnandoque consumitur <sup>1</sup>! Reliquum pene sibi vendicant crebri per templa plateasque discursus, etiam intempestivi. Aegre enim vestis illa Museis <sup>2</sup> Scholisque continetur; videri gestit, et ad evolandum prurit. Adde porro, supervacaneo sumptu bona patria lacerari, et saepe alienum aes grande conflari <sup>3</sup>, dum in vestium formis quotidie novi quid effingitur, quod assumendum est, et vix assumptum antiquatur. Nec per se sola culpam habet vestis. Sunt hujus individui comites, qui plerumque lautius haberi volunt quam ipsa. Quantum abliguriunt convivia! quantum expellunt Sphaeristeria! quantum dilapidat phalerata per urbem obequitatio! quantum pessumdant vespertina tripudia! quantum ad Dominae fores explodit nocturna cum fulgetris musica <sup>4</sup>!

---

<sup>1</sup> tergendò, cincinnando, comendo, ligando, ponendo, reponendoque prodigitur! <sup>2</sup> cubiculis. <sup>3</sup> parentum crumenas emungi, et patrimonia prodigi.  
<sup>4</sup> *add.* APPENDIX. Apud Turcos, Arabes, ac generatim omnes Mahumetanos moris est, ut quo quis ad senium magis vergit, eo sumptuosius ac cum diversis

## QUAESTIO VIII.

*An expediat virtuti claris, an obscuris natalibus edi?*

Inest ut plurimum plebejis hominibus vile quid et fordidum, quod nec arte celari, nec dignitatum insigniis obrui facile potest; quod quandoque per medios etiam splendores irrêpit, putetque, et faecem suam titulis allinit, Honorum, quos gerunt, contaminatâ Majestate. Proinde non immerito Virtuti, quae humili tenuique de stirpe ad amplitudinem sublimitatemque nititur, crebris repulsis obsepitur aditus, donec faeculentum illud, quod de plebe trahit, concoctum est. E contrario vero Virtus quae illustri exsurgit profapiâ, inter ipsos enutrita splendores, praecox sibi vindicat ex majorum meritis ad honores aditum. Fovet eam avitum familiae decus, constipatque clientum turba, erigitque et affinis et consanguineus favor; non lassatur ambitu, non infringitur repulsâ; involant in <sup>1</sup> eam congenitae Mitrae, Dignitates, et Sceptra. Ad haec subdunt facem generosae menti monumenta exemplaue majorum. Urunt nepotem tot olim proavis exantlati labores, et quae de tholis pendent spolia, et de altis montium jugis cladem hostibus exprobrantia tropaea. Nam tacite alloquitur cana parentum ac veneranda memoria, et inculcare videtur hoc saepius:

*Disce puer virtutem ex me, verumque laborem;*

arguitque, et increpat, et pudoris ac verecundiae fraeno retrahit, si vel tantillum ab eorum vestigiis degenerem pedem seducat licentia. Quid quod etiam ipsa Virtus, quae clarâ stirpe prodiit,

---

magis ac vividis coloribus se vestiat. Numquid probandus ille mos, utpote qui aequalitatem quandam in republicâ fervet, cum alios quidem aetatis vigor et forma commendet, in aliis vero comptior id ipsum habitus compenset. — Numquid pulchra ac pretiosa vestis bene potest comparari cum o in siphera; si enim persona sit nihili, nil etiam vestis ei conferet dignitatis, juxta illud: Simia manet simia, licet aurea gestet insignia; si vero quis speciem a naturâ et dignitatem habet, decuplo plus augebitur per elegantem habitum. <sup>1</sup> *omitt.* in.

magis conspicua est, magisque ad exemplum exposita? Nam facile discutit invidiae nebulas, quibus emergentium Virtus pallefcit, a stemmate mutuatus fulgor; et tum ipsa evibrat serenum illud jubar, quod aliunde non trahit quod sibi proprium est, pacatque, et delinit intuentium animos ad humani generis dignitatem et delicias.

---

Contra tamen facit, quod magnam clari natales secum adducant expectationem, cui non respondisse, degenerasse est; exspectantur autem majorum gestis gesta conformia; et ut praeclara quaedam praestiteris, possunt tamen illis comparata vilescere. Nam quae Fama benignior ad Applausûs aram consecravît Immortalitati, eadem deinceps in tantum tumorem inflat adulante tubâ, ut suspicienti Posteritati spes nulla relinquatur exaequandi; contra vero novorum recte facta aequâ lance et suis ponderibus, non alienis examinantur. Quin etiam gravior est nova Virtus, quae jam primum obscurâ de plebe surgit; dum ad instar exorientis sideris sensim emergit, et scandit horizontem illum, qui oblivionis ac silentii caliginem a luce famae et dignitatum fulgore discriminat. Intuemur eam defixis oculis, et subinde miramur de coeca nocte talem faculam prodire, et rapimur tacito quodam gaudio, et prosequimur votis, et favemus. Accedit, robustum et par Virtuti exercitium esse, ab imo luctari; eniti et exserere sese per compressâ angustae fortunae latibula; devorare malevolorum odia, aequalium invidas, potentum fastidia; perrumpere per obluctantes factiones, per insidiantes dolos, per insultantes repulsas; et placido sibi semper constante vultu, nec frangi nec efferari. Atqui ex his crescit deinceps historiis ac theatriis digna seges. Nam eorum praecipue in annalibus gesta lectorem pascunt, quos in altum suus labor et sudor evexere. Suspendit legentis animum conatus anceps, abripitque, et obtutum defigit exspectatio; at heroicus vigor, et obstinatus



per dedignans arduum ascensus <sup>1</sup>, favorem prolicit; et tandem optatus exitus demulcet et plausum ciet. Erigiturque in spem, atque ad audendum sollicitatur animus, dum viâ illâ, quae a plebe ad decus est, confragosâ licet et et difficultatuum sentibus horridâ, signantur nihilominus antecedentium vestigia, quibus passum exaequare assuecas <sup>2</sup>.

### QUAESTIO IX.

*An deceat fervidas et clamosas in Academiis esse disputationes?*

Ingentem ac robustum plane spiritum sufficit Veritas iis omnibus, qui sub candido illius vexillo sacramentum dixere; ejuratis, ceu insidiantibus hostibus, quibuscumque Praejudiciis, quantumcunque stabilitis hominum usu, autoritate, consensu. Qui vero adversa signa sequuntur, his angustus animus; et quamvis subinde in pervicaciam obstinatus, confoditur tandem liquidæ Veritatis spiculo, et succumbit. Quidni igitur detur nobis, entheum illum ardorem, quo congesta mens anhelat, ubi pro Veritate stamus, despumare et effutire? et sublatis clamoribus somnum illum abrumpere, quo maxima pars hominum, quae doctum nomen habet, tam altum indormiscit: quos vetustatis scrupulosa mysteria consopiant, quos absorbent captiosae vocum minutiae, quibus unius Scriptoris sensum omnem sepelivit auctoritas, quos superstitio fascinat, quos ut pueros a Veritatis tramite deterrent Manducus et Lemures <sup>3</sup>. Accedit, maximam partem auditorum, qui disputationes nostras avidè circumstant, vulgarem esse es obtusam, nec, quo per

---

1 enifus. 2 add. APPENDIX. Numquid vere dixit quidam, multorum extraneorum nobilitatem nihil aliud esse quam sexaginta circiter leucas abesse a patriâ? — Divinum est illud Ciceronis pro Roscio Amer.: Is mihi proprie et solus honos videtur, quem sis neque majorum commendatione, neque per alterius calamitatem assecutus. Quam paucos ergo numerabis, qui vero honore gaudeant, cum novi homines aliorum plerumque calamitatibus emergant, nobiles vero majorum virtutibus nitantur. 3 Maniae.

argutias subtiliter tendimus, comitari valentem. Hi proinde certamina nostra ex ingenio suo <sup>1</sup> metiuntur; apud hos detectam Veritatem, quae paribus utrimque studiis inquirebatur, agnovisse probum est, nitendum contra et obstrependum est, aut cadis, et mox agêris in triumphum

— — *Manibus post terga revinctus.*

Denique altercantibus istis clamoribus vigent et vivunt Scholae: dum fervet opus, dum Doctorum diffidiis pulpiti personant, et argumentorum sub pondere crepant cathedrae, scinditurque in diversa studia, infremitque pedum pulsu circumfusa juvenus. Explorat omnem exitum coarctata Industria, et subinde elabitur per ignotas sibi ante semitas, insperato quodam per invium manu ducente genio. At in vestibulo stat attonitum ore patulo vulgus, reprimiturque profanum pedem horrore sacro, et multa putat effingitque sibi in caligante cerebro de nostris contentionibus simulacra mira.

---

Contra tamen facit, quod disputantium fervor ille non leve sit vanitatis et jactantiae futilis argumentum. A rudibus gloriolam emendicat ille clamor, et in deficientis ratiocinii locum sufficitur egregius vicarius. Quin etiam evocatam subinde rationibus Veritatem rursus in latibula sua compellit profanus; et ne frustretur eo <sup>2</sup>, quem effusae mentis vanitate praesumpserat <sup>3</sup>, triumpho, perturbat, et chaos ac caliginem rebus inducit. Praeclarum enim vero Philosopho negotium, de palmâ certare, et oblatam Veritatem, quia reperit eam alius, quia tu aberrabas inficiari. Procumbendum ilico et adorandum, ubi Titii Sejive operâ (nec interest) sanctum illud numen humano generi detegitur. Cur commune bonum invidetur uni? Accedit,

---

<sup>1</sup> nostra suo ingenio. <sup>2</sup> *omitt.* eo. <sup>3</sup> quem praesumptione anticipaverat.

nostras illas disensiones <sup>1</sup> indigne remorari avidum Scientiae discipulum; ut qui Scholis docilem et attentum animum intulerat, nihilo exultior, domum reducat aures a vociferationibus tinnientes. Assuescitque tandem malo exemplo, non aequitate niti, non ratione stare et cadere, sed assumptam semel tenere mordicus, et pugnis ac calcibus propugnare sententiam. Quid quod saepe clamores illi, intumescente jam spiritu, abeant in sibilos ac dicteria? Dum praecipitat, nec verba notat lubrica linguae volubilitas et garrulitas, concurritur elisis cornibus, et insultatur utrimque, et non jam argumenta probant, sed scommata cavillantur; contaminantur plebejo jurgio sacra Veritati certamina, et mendacem Philosophi frontem deridet inter irrumpendum muliebris impotentia. Denique ipsum Veritatis Numen, cujus nos Sacerdotes sumus, mite pacatumque est et a turbis semotum. Non reperitur inter efferatos belli tumultûs; procul est a forensi fumo et strepitu; comes ei et amica solitudo, nocturno gaudet et matutino silentio. Quid ad ejus sacra rixosi isti Pertinaciae Corybantes <sup>2</sup>?

### Q U A E S T I O X.

#### *An mulieres ad Philosophicas Scholas admittendae?*

Habet a naturâ muliebris sexus ingenium mite, inditasque, quae deliniant et suavi filo in obsequium pertrahant, blanditias. Huic si ad discendum Scholae, et ad docendum pateant Cathedrae, quantum accedet bonis artibus incrementum! Et ut periculum facias, age, finge animo, in Philosophico aliquo Gymnasio e Magistri pulpito puellam differentem, et tenerâ

---

<sup>1</sup> nostris illis disensionibus. <sup>2</sup> *add.* APPENDIX. Antigenides tibicen discipulo suo magni profectûs, sed parum feliciter populo se probanti, acclamabat: Mihi cane et Musis. Numquid pulchra liberalitas, et nobis totidem verbis invitanda, dum ingenuum subinde discipulum destituit in publico fiducia? — Numquid apposite Zeno adolescenti cuidam multa garrienti nec responsis intendenti, improperat: Aures tibi in linguam defluxere.

voce moventem magnas rationum moles, et venusto ac facili ore implicitam humano sensui Naturam enodantem:

— — *quae norma boni, quis limes honesti;  
Quid Deus; unde nubes, ventusque, et fulminis ignis;  
Quid quatiat terras, qua sidera lege ferantur.*

Vidistin' quanta confluat ad audiendum turba? ut sub numero Discipulo subsellia laborent? ut compressae circumstantium multitudini indignentur parietes? Quam avide dicta docentis excipiunt aures! hauriunt animi, et custodienda chartis tradunt calami. At parte aliâ incomptum Sophistam destituit auditor; et vacuâ Scholâ boanti occlamat Echo, in asperitatis ac tetricae frontis derisum; abducente cunctos, et lenitati ac gratiae ipsâ rerum favente Naturâ. Quid quod femineo in corpusculo saepe habitet animus ingens et erectus? qui indigne staminum et coli pensis exercetur, et humili <sup>1</sup> ac impari <sup>2</sup> negotio ringitur et contabescit. Et sane nescio qua fronte tyrannidem usurpamus viri, et sexum illum, quia contra violentiam debiliior est, suppressimus. Ab aris eum removimus, militiâ abarcuimus, a tribunali et magistratu rejecimus, a Scholâ denique, ne qua pateat ad splendorem rima, repulimus. Quid? unam aliquam gentem ad ignorantiam damnasse, eripuisse libros, vetuisse literarum studia, nefarium sit et inaudita saevitiae. Et eandem illam in mediam generis humani partem, qua quaeso aequitatis specie tegimus injuriam? Nec intra limites istos statur. Sunt qui absentem adversarium in Scholis traducant, sunt qui mite subditumque ingenium modo ut atrox, modo ut ambitiosum depingant. Nec falsâ persuasione, quod ignosci poterat, aguntur, sed ambitu gloriolae; et mulierum hostes libenter audiunt. Pol de sexu suo bene meriti mares! Denique ingenium feminis nostro nitidius est, et momentorum etiam, quae rudes craf-

---

<sup>1</sup> futili. <sup>2</sup> add. sibi.



sique negligimus, curiosum. Atqui a minimis illis tota pendet Philosophiae messis; constat enim merentibus in hoc agro colonis, quod semen hîc jaciendum, si forte vel levi tantum falsitatis rubigine vitiatum fuerit, praeposterâ fertilitate mox in infinita succrescat et luxeriet absurda.

---

Contra tamen facit, quod mulierum ad Scholas nostras admissio (si res caute et provide trutinetur) periculo nostro non vacet. Nam primo quidem sic statuo, acre et excultum artibus ingenium a publicis muniis repelli non debere. Si maligne obsistas, faciet sibi mille dolis et turbis aditum. Igitur si ad Scholas et ad publica munia admittendae sunt feminae; quid si nos collegas non ferant? quid si vices, ut meremur, rependant? abigant nos ad culinam, ad ollas, ad scopas, ad colum, ad infantium pannos et fascias? solae interim ipsae de summâ Reip. consulant, solae arma tractent, solae in templis antistites, in foris iudices, in Scholarum suggestibus magistrae. Nec juvat hic toros suos excutere et viriles lacertos minari. Numero incredibile est quantum vincimur, longâ jam inter nos bellorum clade propemodum absumpti. Ad haec, Natura nobis edendis avarior. Sed meticulosi hominis, si ita videatur, sint argumenta ista. Age, quantus cum novis istis ingeniis novarum opinionum influet in Scholam gurgis! qui deinceps, ut fit, ad mores et religionem derivatus, turbulentis tundet Remp. fluctibus. Quam pertinaces exsurgent disputantium rixae! Cum nec inter nos conveniat, et videbitur indecorum feminis cedere, et illis e contrario non ineptum ad contentiones ingenium; satis id probant domestica quotidie cum pueris ancillisque jurgia. Et subinde non parum angor, ne referatis Philosophiae scriniis, et perspectâ facultatum quas conquissivimus tenuitate, expostulent ocus, et non e communi re gestum negotium nobis impropere; qui jam a tot seculis ad mercandam publico bono Veritatem discurs-

rimus, magno apparatu, exiguo huc usque quaestu et emolumento. Nec deerunt forte, quae garrulâ, ut est illis, linguâ fucum nostrum plebi detegant, et meras nugas, quibus Schola tam saepe fumat, exagitent. Denique muliebris sexus sufficiens in demigrantium loca inquilinis nimis occupatur et infumitur. Videtur illis humani generis propaginem, nobis dignitatem Natura demandasse; illis ne intereat humanum genus, nobis ne degeneret, prospiciendum. Quantum melioris aetatis gestandâ prole, pariendâ, fovendâ, lactandâ ablactandâque discedit! Si foecundus in foetum uterus, ad Sapientiae studia vix supererit fracta senectus <sup>1</sup>.

## QUAESTIO XI.

### *An laudabile diversarum gentium idiomatica perdiscendi studium?*

Magna generis humani calamitas, linguarum, quibus scinditur in varias gentes, diversitas. Nam quos in unum similis ratio conciliat, eosdem inter se dissimilis oratio separat; indeque fit, ut ad distitas forte regiones proficiscentes, videamur nobis inter mille taedia, non a domo et Patriâ, sed ab humanâ societate discessisse. Adeo ad crebra quaesita, quae fertilis in interpellationes sollicitudo progenerat, alibi taciturnitas redditur, alibi risus, alibi disparata nec intellecta responsio. Videtur proinde communem illam calamitatem, in qua cuncti

---

<sup>1</sup> *add.* APPENDIX. Itali et Hispani honoratiores feminas vocant Senioras, nomine a senibus deducto; Belgae autem ac Germani vocant eas Jonckvrouw aut Joffrouw, quod idem est ac juvenis femina. Utra nomenclatura convenientior? — In paradiso Mahumeti (si Alcorano credimus) reperitur arbor, ex cujus pomis puellae prodeunt tam suaves, ut si una earum vel semel in mare spueret dignaretur, totum ilico perderet amaritudinem et delicato mucro dulcesceret instar mellis. Numquid sacer hic Alcorani locus Francis nostris novum terminum opportune suggerit quo amasiae suae adulentur? Inter caeteras enim enormes hyperbolas quibus hic insaniunt, hanc etiam adjicere poterunt: fille du paradis de Mahomet.

nascimur, feliciter a se depulisse, qui in capaci memoriâ plurimarum gentium reposuit idiomata. Ubique inter suos est, omne solum ei patria; nusquam familiaribus inter coenam sermonibus <sup>1</sup> accumbit caperatâ fronte mutus auditor; nusquam viam sciscitaturus, mutilis mixtisque vocabulis cachinnum movet accolae <sup>2</sup>; nusquam inter ridentium sales suspiciosus, quid sibi velint, in aurem insufurrat interpreti <sup>3</sup>. Ad haec, magnum omnino confert bene regendae Reipublicae momentum, confinium populorum, sociorum, hostium novisse mores et genium; atqui ista ex solo etiam idiomate non vane conjiciet peritus rerum aestimator; ita produnt gentis indolem ac studia linguae stylus et sermonis rigor aut lenitas. Hoc amplius <sup>4</sup>, dispersa per Nationum libros arcana in unum thesaurum facile corradit linguarum peritia, et bene meritâ manu conquisitas ab exteris Scientiarum divitias profundit in patriam. Denique venustus est <sup>5</sup>, et circumstantes mire detinet familiaris sermo, diversorum populorum interpolatus adagiis; dum illa praesertim suis linguis, non alienâ, quam saepe non bene callent, effantur. Et quasi Proscenium panditur, quo diversae Nationes in spectaculum prodeant suâ linguâ declamantes. Suâ garrit Gallus, suâ lascivit Hispanus, suâ sibilat aspiratque et gargarizat Germanus, et subinde etiam barbarum quiddam ac exoticum adjiciunt Turcus et Arabs. Suspendit interim audientium animos interpretes, et amoenâ deludit ambage.

---

Contra tamen facit, quod melior vitae portio in linguis addiscendis prodigenda sit, si satis multas ad ostentationem memoriâ tenere, easque tibi familiares et ad nutum promptas esse volueris. Tetricus qui hic defudat aridusque labor est, sine succo qui pascat animum, tricarum plenus, ingenii vacuus

---

<sup>1</sup> menfalibus colloquiis. <sup>2</sup> in cachinnos dissolvit accolam. <sup>3</sup> suspiciosa man divertit interpretem. <sup>4</sup> ad haec. <sup>5</sup> magnam gratiam habet.

quantum ei temporis adjicis, tantum Sapientiae studio detrahis. Et forte ubi multa didiceris, vicina confundes, illaqueatus in ridiculum chaos, aegre admodum expediendus, et jam etiam in materno idiomate balbus. Sed etsi rete istud operose devites, aut obstinate perrumpas, post laborem tamen nulla quies. Fastigium hîc non nisi iisdem, quibus ad id scanditur, nisibus aerumnisque tenetur; si vel tantillum remittas, mox in antiquum rudimentum devolutus, senties te cum Sisypho lapidem rotare. Accedit, tot idiomatum congeriem, qua quidam obruunt memoriam, nulli plerumque bono usui parari, sed Vanitati dumtaxat in theatrum, quo se jactet, subdi. Sufficit nobis, cum vernaculâ, Latina lingua; hanc discipulis, illam popello damus; cur ad supervacua sudatur? Non mendicanda nobis a peregrinis linguis artium praecepta; totus in Latium concessit Scientiarum chorus; totus illi linguae creditur hodie doctrinae thesaurus; sola haec e Magistri cathedrâ tonat, sola Discipulorum calamos exercet, sola replet voluminibus Museia. Hujus commercio in unam Remp. coeunt, quotquot per Europam et ultra disperguntur docti; cum hac, ubi tantum extra vilissimam plebem fumus, ubique in patriâ fumus. Denique in ipsis exterorum linguis, nescio quo contagio, eorundem vitia sunt; alia loquax, alia falax, alia in supervacaneas <sup>1</sup> caeremonias pomposa, alia in ferviles Principum adulationes projecta. Candidus his, o Belgae, quia colorem facile bibit, inquinatur animus <sup>2</sup>.

## QUAESTIO XII.

*An inter amicos conveniat Nova, quae Remp.  
concernunt, narrare?*

Hodiernis moribus opportune decretum est, ut a bonis malivae Novis in familiaribus colloquiis ducatur exordium.

---

<sup>1</sup> superfluas. <sup>2</sup> add. APPENDIX. Quenam linguae maxime differunt genio? numquid Hispanica et Germanica, cum haec unamquamque vocalem plurimis



Nam et ea statim in plurimos diversissimosque discursûs uberi se venâ diffundunt, et scite abigunt rancidos illos miserosque prologos, qui praemissâ salutatione non nisi de praesentis aerae temperie vel inclementiâ praefari didicere. Adde quod exercitio isto intellectus plurimum in Politicâ Scientiâ proficiat; dum bellicos Ducum astûs cum eventibus componit, suae Republicae statum cum hostium opibus trutinat, sociorum ex indiciis fidem probat aut suspectat. Et alibi inter calices etiam de Summâ rei deliberat cum amicorum lepido Senatu: quo pacto novis pecuniis exhaustum aerarium infarciri queat; unde auxilia conquirenda; quo mittendus ad hiberna miles; ubi debeant <sup>1</sup> nova munimenta exstrui, ubi collapsa restitui. Et sunt quae hîc promuntur, inefficaces quidem tamen sine partium studio, sine Principum adulatione sententiae. Adde porro, quod jucunde pascatur animus ambiguis rerum eventibus, inter hastam et caduceum, inter spem metumque suspensus <sup>2</sup>. Nam subinde profugam jam nimium pacem intercipit alicubi ancipiti fiduciâ, et futuram securitatem delibat inter praesentes tumultûs. Et modo insidias, excursiones <sup>3</sup>, ac stragem praefagit, et inter amicos praescire vult videri, et subdit tamen hoc suspirium:

— — *Utinam Patriae sim vanus haruspex!* <sup>4</sup>

Et modo fegnes increpat Ducum cunctationes, et indignatur elapsam incautis inter dentes et ungues victoriam. Nec mora, ipse belli ducem induitur, castra metatur, urbes obsidet, militem in moenia subigit, et instat operi, et a tergo premit, et per-rumpit, et vincit; in amabilem insaniam semper ultra et ultra effraeni se concitante mente. Dantque isthaec luculentum indicium, licet bene merendi occasionem iniqua Fortuna femoverit,

---

consonantibus oneret, illa singulas consonantes aceommodet? — Omnes fere linguae, Graeca, Latina, Germanica, Hispanica, etc., tria habent genera grammaticalia, masculinum, femininum, et neutrum; cur Galligenae neutrum ex sua lingua sustulerunt? 1 oporteat. 2 dum ambiguis... suspenditur. 3 *omitt.* excursiones. 4 optatque tamen, ut sit vanus haruspex.

cordati tamen et unice Patriam amantis animi. Denique debita militibus impenditur Imperatoribusque merces, quorum devota Patriae pectora exponunt se grassantibus hostium furiis gloriosum obicem; dum hesternam victoriam, et abactam nuper ab hostibus praedam, mille modis Fama sedula propalat. In epistolis scribit, ad prelum imprimit, per Tabellarios defert <sup>1</sup>; in foris legit, in templis murmurat, in vicis cantat, in tabernis divulgat; alibi exaggerat, alibi dubitat, alibi certat; et tandem bene meritum facinus in historiarum monumentis tradit immortalitati.

---

Contra tamen facit, quod sua quemque curare <sup>2</sup> aequum est, aliena vero iniquum:

*Navita de ventis, de tauris narret arator.*

Quo ausu stolidum illud vulgus ingerit se in arcanas Principum curas, et circumspecta ac defudata consilia temerariae subjicit censurae? Solo nimirum ista successu plebejum ingenium metitur; a quibus hunc Fortuna rescidit, iniqua sunt illis <sup>3</sup>, vefana sunt illis <sup>3</sup> et perfida consilia, et hinc dilacerant maledicâ linguâ, concitantque se insulso tumultu in optimum saepenumero ac Patriae benevolentissimum Principem. At inter Philosophos (licet a profanis istis plebeculae moribus sapientiâ secretos) exilis ille nimium, qui de Novis instituitur, sermo est. Indignum quippe eos inter formicarum fossas constringere, et civitatum, quas in hoc terrestri puncto distingui rident, obsidionibus detinere, quibus a vastâ corporum coelestium mole non minus turgēt cognatus astris et familiaris animus. Adde, quod Nova renarrantes confictis plerumque nescio pro cuius libidine nugis occupemur; tot ista scatent mendaciis, ut ipsamet fidem, quam creduli adhibemus, irridere videantur <sup>4</sup>. Sunt qui

---

<sup>1</sup> apud Tab. destinat. <sup>2</sup> suis quemque rebus immisceri. <sup>3</sup> omitt. illis. <sup>4</sup> irrideant.

inter nocturna infomnia lucubratam fabulam mane decantent  
facilibus illis et ad novum quemque tinnitum arrectis auribus;  
quae ab his porro ad alios it ac alios, agglutinatque sibi a  
singulorum ingeniis partem aliquam,

— — *et vires acquirit eundo.*

Et subinde vesperi domum devolvitur, per omnium ora  
volutatum phantasma, tot additis circumstantiis oblitum, tot  
accerfitis in munimen figmentorum figmentis, ut jam etiam  
Auctori suo non difficulter imponat. Atqui ista sunt, quibus  
vicissim <sup>1</sup> dolemus ac laetamur, angimur, speramus, desperamusque  
ridiculi. Et elusi hactenus, credulam etiamnum prae-  
bebimus aurem; ad primum rumorem exciti, forum petemus  
ocius, et in circulum <sup>2</sup> pressi, auscultabimus impostorem; mox  
audita domum conferemus avidi, et subinde interpellabimur in  
viis, et renarrabimus scite, et subinde sponte spargemus in  
obvios. Ita urimur <sup>3</sup> mortales, ita juvat decipi <sup>4</sup>.

### Q U A E S T I O XIII.

*An suam Patriam suosque cives aequè exteros  
laudare conveniat?*

Gestat pietatis indubitata tesseram, quem suorum tangit  
honos, quem Patriae suae decus irrequietis adurget stimulis,  
ut impatiens morae involet in <sup>5</sup> munia Famae non satis officiosae,  
et meritam suis pompam apud exteros ducat zelosus apparitor.  
Atque interim arctas ipse sibi leges dictat, paria iis quae laudat  
praestandi; turpe enim erit, si degener, si indignus laudatâ  
patriâ judicetur ipse laudator. Adde, praeconium istud, quod

---

<sup>1</sup> in vicem. <sup>2</sup> globum. <sup>3</sup> prurimus. <sup>4</sup> *add.* APPENDIX. Si verum est istud:  
Rustica gens est optima flens et pessima gaudens; numquid necesse est ut optimi  
hodie sint rustici, utpote qui largam ubique flendi materiam habent, nullam  
ridendi. — Numquid Pax hodie bene posset vocari Messias, et nos omnes Judaei;  
expectamus tamdiu, et non mittitur. <sup>5</sup> *omitt.* in.



plenis buccis in Patriam diffamus, in nos ipsos provolvi latente ductu. Et cum alibi suarum laudum invidiosus sit encomiasta, hîc jactantiam celat artificium, et praetensa pietas geminat honorem. Enimvero gloriosum est, in ea urbe infantem vagiisse, hîc hausisse spiritum, hîc indolem fuxisse, ubi rerum nitor, ubi morum candor, et ad justum pondus temperata cum gravitate comitas; ubi inter sumptuosas aedium structuras ingeniosa ludit artificum industria, et inter opulentum apparatus augusta consternat intuentes amplitudo; credibile quippe fit, illapsam aliquam istius aurae particulam, et cum rudi adhuc animulo permixtam, conformasse eum ad decus et sublimitatem. Quid quod praedicatio illa ad referendam gratias alliciat, et totam Patriam benevolo devinciat alumno? Alibi scite laudasse, unius alicujus popularis amicitiam parit; hîc feliciori proventu, omnium. Et hinc distribuendis Magistratuum officiis intento populo, magnâ jure merito valet praerogativâ, quem constat oblatiis occasionibus e dignitate Civium solitum censere. Sicut e contrario non nisi repulsam apud suos ambit execrabilis candidatus, cui quondam inter pocula soluto, temere excidit, quae Reipublicae Majestatem violabat, calumnia.

---

Contra tamen facit, quod illa Patriae et civium assentatrix laudatio <sup>1</sup> difficulter occulat perorantis jactantiam, alienas laudes sibi arrogantem. Nam quantumvis illa speciosum praetendat, haec tamen a peritis rerum deprehenditur sub fuco, et inter clandestinas ambages intercipitur; hîc vero dum patet, tum ipsa praeter eam, quae sibi propria est, quam de se progignit amarulentam invidiam, nescio quid malignum de fraude trahit, quod non nisi obtortis oculis aspici potest. Quin huc etiam opprobrii <sup>2</sup> contemptûsque speciem ad acerbitatis summam

---

<sup>1</sup> depraedicatio. <sup>2</sup> impropertii.



accerſit; dum namque fuorum decora clangit ſublata tubâ, aut his imparia exteris improperat <sup>1</sup>, aut paribus inſolenter obſtrepit, donec aſſidentium turba, diuturno jam laceſſita faſtidio, mordaces hinc inde regerit facetias, et tandem inter irridentium ſibilos demittit confuſum praeconem. Et vero ſi pretio iſto aliquantus Patriae veniret honos, non eſſent detrectanda ludibria; Scommma eſt, quod illi eminus tanto, et eodem nobiſcum, Patriam involvimus convitio. Gravitationem faſtui, ſplendorem luxui vertunt interpretes perverſiſſimi; ajunt, comem illum, qui nobis proprius eſt, officioſumque ſermonem nil eſſe praeter marſupium palpantis blanditias, et ſub compositâ larvâ inhiantem lucro cupidinem. Quin fuerunt <sup>2</sup>, qui improbo ſpiritu fanatici, lividum calamum diſtrinxere in Dithyrambum, et laudibus, quibus nos gentilis <sup>3</sup> alicujus pietas irradiaverat, diras oppoſuerunt; adeo tenebriones iſtos exagitat, quod ſe non celat decus. Expedit ergo quam ſuos laudare, cum ſuis laudanda facere, et exteros, tacito illo ac ſuavi filo obſequentes, in venerationem Patriae pertrahere, quam intempeſtivo laudum crepitaculo, quaſi vis inferretur, obluctantes experiri <sup>4</sup>.

#### Q U A E S T I O X I V.

##### *An in Theatralibus ſpectaculis exercenda Juventus?*

Orbis terrae Theatrum eſt; in hoc perſonam agimus omnes, et adoratas regum majeſtates, pariter cum ludicro Tyranno, ſaepe circumſcripſit hora una. Quid ni igitur, o juvenes, optabile ſit in Scenam quandoque prodire? id eſt gratâ viciffitudine

---

<sup>1</sup> exprobrat, <sup>2</sup> fuere. <sup>3</sup> concivis. <sup>4</sup> add. APPENDIX. Cum legato Regis Hispaniarum oſtentarent Veneti immenſam in aerario ſuo pecuniae vim plurimaſque divitias, iſ bacillo quem forte manu tenebat, terram ſubter diſcutiebat, quaſi effoſſurus quidpiam. Interrogatus quid ſibi vellet iſta geſticulatio, Tento, inquit, an aurum veſtrum etiam radices agat, ſicut aurum mei Regis. Numquid argute retudit jactantiam, admonuitque, ſteriles divitias cum perennibus non bene comparari.

a magno illo Theatro in parvum quoddam secedere, ac ibidem exutâ plebis, quam inviti geritis, personâ, pari fere cum Mundi Monarchis momento debacchari. Adde, Proceres et Satrapas et circumfusum incurvo poplite Satellitium, quae in vasto illo Proscenio perduellis est, hîc esse tutam turbam. Conspirent quamvis, innoxia est eorum in caput tuum conjuratio, sine caede rebellio. Nec mage laedit, quae fabulam claudet, funesta catastrophæ. Sed etsi triumphales tibi pompas, et supplices ad nutum accursûs, ex aequo ludat simuletque Scena, ne cede tamen, ne cede parte ista Caesaribus. Feres etiam hîc, iudice me, palmam. Horum honores assentator, tuos histrio mentitur; dic quid interest? Tibi inter festivas acclamationes securo esse licet; his sub blandiente palpo insidiatur jugulaturus mucro; quantum interest! At nos qui Orchestram premimus Spectatores, suspicimus in plebejo juvene dignam diademate frontem, et obtutum Solio ac Fascibus parem. Et subinde colligimus, tantillum esse quod humilitatem <sup>1</sup> inter et majestatem est; et deturbamus tandem ex animo pestiferum illud Idolum, quod Principatui tam magnificum effinxerat Superstitio, et cui tot anhela suspiria necquicquam immolaverat Ambitio; nec desunt de circumfusâ plebe, qui nobiscum sentiant, extemporales Philosophi. Videtur etiam exercitio hoc violentos illos spiritus sedari posse, qui, quandoque intra depressæ et angustæ fortis cavernas indignantes, moliuntur irruptionem cum strage, et ad invertendum Reipublicæ statum turbulento feruntur impetu. His si detur in Cothurnum erigere se <sup>2</sup>, et in heroica quaedam crepitacula effutire, videntur sibi inani istâ specie naturalem amplitudinem consecuti; et tantisper laxati, imposterum concutiunt et quassant mitius.

---

<sup>1</sup> vilitatem. <sup>2</sup> erigi.

Contra. Compendiosus ad infaniam juventuti trames exercitatio ista. Animus aetate fervet, et agili implexus spiritu salit et extuberat suapte naturâ. Ad quid adventitio isto instigatur impulsu, nisi ut exorbitet toto coelo? et jam res ipsas hyperbolico pede transgressus, imaginariis implicetur deliriis, fabulorum Heroum ridiculus aemulator. Ita nempe perstringitur ludicris illis Paludamentorum Sceptrorumque fulgoribus, ut ad feria caliget; ita clamoris obtunditur Tragoediae metris, ut verum moderatumque non capiat, mox ad id omne, quod iambico tonitru non immugit, surdaster. Quin haec in scelus, si caute pensites, via lubricat. Et quandoque revera saevus est qui decernit simulata supplicia, qui innocentum sanguine et favillâ gestit Mimis; et ferme sacrilegus, dum Superos seque execratur, dum frendet et furit, et fas nefasque miscet. Non totum illud haeret <sup>1</sup> in alienis exuviis; sine sensu liquefcit <sup>2</sup> aliquid, et distillat in animum. Distat Serium a Ficto non ita magno, ut rudes putant, intervallo; aut sane ab hoc in illud pronus est et lubricus descensus. Utut est, candidum animum non bene stringunt atrae illae et infaustae larvae; nec decet ingenuum adolescentem, Sceleris alicujus, quod detestamur quodque humano generi tam diram inussit notam, tam apte repraesentare personam. Eum ego hominem suspicio, qui nefanda ista (ut sunt) non effatur, qui nescit ista describere, cui displicent non scelera modo, sed et scelerum umbrae; qui vellet foedum illud pus, quod virulento contactu refugientem exulcerat memoriam, Nerones inquam et Heliogabalos, quod unum possumus, in aeterno silentio defodi. Cur cloacam moves? cur portentis illis cortinam aperis? Impius in genus tuum quisquis es nugator.

---

<sup>1</sup> Non manent ista penitus. <sup>2</sup> eliquat.

## QUAESTIO XV.

*An expediat viros doctos divites, an, ut fit, pauperes esse?*

Naturalis <sup>1</sup> amplitudinis Doctrinae vindices Divitiae. Alioqui ad postem Egestatis alligata, necquicquam in valvis ejus promicat, et indignans lora tendit ad sui ferme strangulatum. O si Musarum Mystae, o si Aureum illum Numen propitiâ manu laxet illam, quae tam male nos habet, restim! Quam grata foret inassuetis pedibus patens in excursum area! ut juvaret in aperto sole <sup>2</sup> apricari longo situ jam senta membra! Nec tamen in effraenem proterviam dissolveremur cum Vulgo, cui Dea illa (quod pace ejus dixerim) nimium indulgit. Alias nobis legis praescribunt modestae illae et placidae, quas amamus, quas deperimus Musae. Sed profecto, quae facies rerum! quantus inesset officio nostro splendor, si iidem essemus et Musarum Antistites et Maecenates! Quanta se castris nostris agglomeraret turba! Ut sub opulentis ex stipendio veteranis aemularentur indefessa tirocinia! Jam <sup>3</sup> incredibile est, quantum Virtuti conferrent crebrae, quas illi de more consecramus, disputationes et honorificae censurae. Quantum haberet Sententia nostra pondus, si audientes pariter et ratio convinceret, et fulgor perstringeret! si aurata dicentem fulcirent pulvinaria, et longe in terram firmate deflueret e cathedra murex, astaret pedibus <sup>4</sup> discolor famulitium! At nunc sub detrita pallâ, et nudo e pulpito quod unum superest, Numini tuo litamus, o Virtus. Aequi bonique consule, o Virtus. Magnifice de te censemus, amplum subito stylum adhibemus <sup>5</sup>, sonora verba congerimus, ubi incidis in mentionem <sup>6</sup>. Nec defunt de numero nostro, qui promissam barbam et impexum capillitium efferant austeri, ut splendorem, quem majestati tuae conciliare non possunt, sacro quem a

---

<sup>1</sup> Connaturalis. <sup>2</sup> ad apertum solem. <sup>3</sup> Ad haec. <sup>4</sup> suppedaneo. <sup>5</sup> amplum stylum inflammas. <sup>6</sup> incidit de te mentio.



profanis mentibus extorquent horrore compensent. Sed hoc tacitus nullo modo praeterire possum, Philosophus qui sim <sup>1</sup>. In Physicis summa regula: *Explora naturam experimentis*; suntque haec tum propriis impendiis tum aliorum, ut necesse est fieri, conductis operis sumptuosa. Hoc adminiculo destituti nostrates Philosophi <sup>2</sup>, risum non teneas, ita suspicantur et hariolantur varie; et tandem id statuunt plerumque <sup>3</sup>, quod speciosum, quod Mundi harmoniam ornatumque commendet. Salvete o bene meriti de Natura rerum Errones! Quin ridiculo isto, quo niti-mini principio, Philosophos omnes divites asseritis? Et, ut video, assereretis profecto, nisi Sensus tam vivaci ferulâ doceret contrarium.

---

Contra. Effet doctorum hominum nimis invidenda felicitas, et aliorum deplorata calamitas, si illos et Opes erigerent et Scientiae, hos Paupertas deprimeret et Inscitia. Cur cum tantis montibus voragines <sup>4</sup> tantae? Nimias illas asperitates exosa, planitie gaudet aequabilis Natura, et liberali fluxu profusa, distribuit se potius in omnes, quam avarâ manu in unum congerat, quod caeteris detrahat. Et hinc aliis quidem Musas, aliis Fortunas elargita, videtur istâ compensatione reperisse paritatem; quia tamen varietate capitur, montes etiam subinde quosdam attollit, in quos conglobatâ mole, et Scientias pariter et Divitias et Dignitates accumulât. Non invidemus; sed in subjectum pavementum cum plebe librati suspicimus; et si modo licet, enitumur, et assurgimus exemplo. Sed macte, o quisquis es Musarum Patrone. Colliga, si lubet, intra scamna nostra Doctrinam et Quaestum; et ecce quae species! Mox sartores, futores, fabros, cerdones totum illum Diti ac Lucro initiatum

---

<sup>1</sup> Sed postremum hoc non omittam Philosophus. <sup>2</sup> *omitt.* nostrates Philosophi.  
<sup>3</sup> ut plurimum. <sup>4</sup> abyssus.

gregem, abjectis forcipibus et subulis et incudibus et ferris et trullis, intra Scholas nostras compactum videbis. Quaeenam illa confusio? Interitus rerum paratur isto molimine. Nihil exaggerandi gratiâ dico. Quid? Nympha nostra, nullâ pene dote propositâ, formâ tantum et augusta specie, innumeras illas Studioforum classes pellexit in amorem. Et inter hos, quibus interdum feliciori radio Dominae blanditur oculus, pertinaci ad fores ejus statione perdios et pernoctes videbis, ad siccam usque tussim ac tabem. Dentur divinae isti pulchritudini census et divitiae, et desipio, nisi totus Mundus, relictis necessariis ministeriis, abeat in corrivales. Quod si ista non tenent, sed oblectamur, et porro ad divitias pergimus avidi, saltem hîc in diverticulo tantisper subsistendum censeo, donec divitum leges nobiscum ipsi revolverimus; ne forte castris illis nomen dedisse poeniteat, dum serius est. Eorum haec sunt officia: interdiu saepius oculos invisere, summam recensere, ratiunculam subducere; subinde etiam sperfis hinc inde de industriâ nummulis, domesticorum fidem tentare; vesperi universam domum obire, ceras, vectes, et pessulum explorare; nocte aliquoties lecto exsilire, sedes et scamna infestare, angulos incurfare, et vociferari, ne forte celent alicubi illud revellens claustra, illud effringens fores <sup>1</sup>, quod somnum expulit somnium <sup>2</sup>. O bona Minerva! quam belle dorso nostro quadraret ista sarcina! qui quovis negotio interpellati morosi sumus et inviti, et interdum vel levi tantum strepitu inter sacra tua disturbati excandesimus ad convivium usque et verbera <sup>3</sup>.

---

1 alicubi effringens illud. 2 ludibrium. 3 *add.* APPENDIX. Numquid recte quidam alteri, promittenti quod multa ei post mortem suam relinqueret, decebat: Morere ergo cito, quia qui cito dat bis dat.

## QUAESTIO XVI.

*An officii gratiâ invisentem amicum geniali potione  
accipere <sup>1</sup> conveniat.*

Tardum ac austerum etiam inter familiarissimos <sup>2</sup> sermonis initium. Nam is depulso necdum lentore, quem a praecedente silentio trahit, laborat in vestibulo, et duriuscule, quasi remorantes inter asperitates, provolvitur. Si proinde limen istud geniali liquore proluimus, salva res est: lubricâ <sup>3</sup> jam semitâ, fertur ocius in consuetas fabulas, quae horas devorant et diem, et ne sic quidem expletae, ad feram noctem abrumpuntur verius quam finiuntur. Ad haec laxat ille succus et emollit arcanas curas, quas sobria nimis verecundia constrinxerat in obstinatum sub pectore duritiem. Hae uno jam alterove haustu conspersae, macerantur et <sup>4</sup> liquefcunt fensim, et solutae peritentant exitum; saepiusque repelluntur, et detinentur dentibus, et in summis labiis reperiunt obicem. At caro finui dum se offert, dum probatam toties fidem et spondet et exprobrat, denique committitur depositum; et ecce! jam generosus eructat singultus compactam illam, quae immeritum cor suffocatum ibat, massam. Subit interim partitum onus amicus, extenuatque verbis. Tum ultro citroque consultant; et montes Aetnae omnes atque asperos Athones <sup>5</sup>, quos atra bilis et silentium et solitudo aggeraverant, tandem in planitiem diffundit <sup>6</sup> irriguum de majori Diotâ profluvium. Quin falsos amicos eâdem operâ detegimus. Nam reperto alicubi per larvam spiraculo, exhalat saepenumero cum fumis Lyaei indoles quaedam humilis <sup>7</sup> et prava, inimica candori, probum illud ac industrium indigne exagitans, vafro tamen, quamdiu excubabat, ingenio dissimulata. Et qui terga

---

<sup>1</sup> amicum potu excipere. <sup>2</sup> familiarissimos inter. <sup>3</sup> lubricante. <sup>4</sup> haustulo madefactae. <sup>5</sup> verbis, et lunares illos montes. <sup>6</sup> in solitam plan. prosternit. <sup>7</sup> vilis.

latenter infestaverat Sufurro, formam immutante Libero, faciem non reveretur Contumeliosus. Ridemus dum se prodit, et miseret nos <sup>1</sup>, tantum antehac calamistris et fuco deformem impendisse Momum.

---

Contra tamen facit, quod propinatio <sup>2</sup> ista frequentior amicos dolio tuo pariat, non tibi. Donec huic vena fluat, adhaerebunt lateri Achates isti. Nutus observant obvii, num forte in pomeridianum adeste jubeas. Si jusseris, praesto sunt cum umbris; sedetur, bibitur; et ut propensi cujusque animi certa sit tibi fides, ilico salutis tuae consulunt <sup>3</sup>, non sine caeremoniis. Nam Salius ingentem gutturi devovet ad ultimam usque stillam, quae unguiculo excipienda est, craterem; et *Sospes*, ait, *sit hospes*. Circuit porro per consodaliū orbem Amystis, atque in caput iterum iterumque redit. Sed explora, si lubet, officiosos istos; invisentes siccos habe. Causaberis exanime jam fere vasculum tuum, ad pulsū digiti, miserum in modum bombilare. Ecce, demittunt auriculas, medios ferme sermones abrumpunt, et

— — *diffugiunt cadis*  
*Cum faece siccatis amici,*  
*Ferre jugum pariter dolosi.*

Quid? Nonne grave omne et solidum, quod in Virtutis fundamentum corraserat Sobrietas, emolliunt <sup>4</sup> illa stillicidia, et dissolvunt in inutile lutum? Tum animus a subiecto limo flaccidus, cedit arduo, contra difficilia <sup>5</sup> fugax, subjici <sup>6</sup> et componi promptus, languet ad perrumpendum. Sane experimento discimus <sup>7</sup>, raro versari serium inter pocula sermonem, qui honestati vim et decus addat. Frivolum, et de lanâ caprinâ est, quidquid hîc garrulas exercet linguas; et quae, diductis

---

<sup>1</sup> *omitt.* nos. <sup>2</sup> propina. <sup>3</sup> consulitur. <sup>4</sup> eliquant. <sup>5</sup> difficilium. <sup>6</sup> subdi.  
<sup>7</sup> constat experientiâ.



leviter labiis, modico vix risu dignaremur jejuni, illa et vix illa sunt, quae effusos <sup>1</sup> hîc cient cum temulentiâ cachinnos. Quin ibidem faepe manum fatigat alea, et intentum cerebrum vertigine corripiunt scrupi et chartulae lusoriae; turpiter ille quaestuosus cum jurgiis labor. Quod si incommoda ista ab invipientium coetu rariore scypho propellas, patieris alia non minora; carum inter caetera caput, et meliora meritum, quem obliviosa praeterierit propinatio <sup>2</sup>, neglectûs suspicione confusum, et vultu luctantem cum indigno pudore.

## QUAESTIO XVII.

### *An meridianis praestent vespertina convivia?*

Augustum quid et magnificum habent nocturna solennia. Nam languida funalium lumina naevos et inconcinna celant, et rei speciem vicinitate suâ commendant, ac ultra verum distendunt laterales <sup>3</sup> umbrae; insuper Nox ipsa, quae fores obsidet cum alto Silentio, quo Majestatem Actui conciliet, circumfundit aliquid de superstitioso Terrore. Quin igitur in seram vesperam differas Convivium, si tantus luxus tantillo parari possit impendio. Tunc etiam animus noster, qui interdiu in diversa dispergitur, curis jam defunctus, conferet se totum intra triclinium; retrahensque se ab atrâ illâ, quae terras undique coelumque tenet solitudine, gestiet ad candelarum faculas, insolitâ quadam, quae meridiem non novit, ac titillante laetitiâ. Intempestâ ceu forte nocte insomnes pueri mille timent lemurum ludibria, donec correptâ stragulâ obvolvant caput, tremulo jam gaudio sollicitante corculum, quod confusum illud Silentium chaos, qui minitabant stragem et excidium et his pejora centuplo, egregius iste propulset agger. Si genio indultum luberius, si plus aequo compotatum fuerit, semotis arbitris indicium omne sepe-

---

<sup>1</sup> infusos. <sup>2</sup> propina. <sup>3</sup> collaterales.

litur in caligine. Nec titubantem in reditu pedem notant cum falsâ irrisione late depopulata jam et coeca <sup>1</sup> fora. At anteambuloni suspicionem eximit increpatio; nam accelerat cum lucernâ, retardatve nimium; et vicinior radius perstringit oculum, remotior absorbetur ab opaco. Ambo mali duces; quid mirum si herus cespitet? Domum jam reversum quantocius excipit cubile. Tum vapido, qui cerebrum circumvolat, fumo sponte sociat se Somnus, a subsidio jam intrepidus, jam curarum, quas ante fugiebat, incuriosus <sup>2</sup>; et illabens deciduo cum rore, mulcet artûs in tenacem quietem, quae nil galliciniis, nil languido mota crepusculo, abrumpitur demum valido jam Sole, et altum tumultuante cum vehiculis equisque plebe.

---

Contra. Meditaris vespertinum epulum? Ne dubites; aderit cum convivis Proterviae Genius insolens, Heris invisus ille parasitus. Nam qui januam <sup>3</sup> observat Pudor, cum admittendi excludendique Discretionem, Cereris pariter ac Bacchi largitionibus <sup>4</sup> importune sollicitatus, corrumpitur tandem. Tum <sup>5</sup> sensim a poste reductâ januâ, finit intrudi petulcum quoddam; adhuc exile tamen, et non nisi facetiae festivâ veste compositum. At fuscâ quae supervenit Nocte, quo ruborem tegat janitor, promittente velamen, facessit ille penitus. Jamque <sup>6</sup> bipatentibus foribus, irruit in coenaculum Petulantia cum Turbis et confuso Neglectu. Et inter accumbentes vagabunda discurrens, alibi temerariâ manu evertit cum poculis calices, alibi miscet disputantium jurgia, alibi armifono tinnitu lances collidit et patellas, alibi reducto in angulo delibat osculum cum lucernâ praestolantis ancillae, in herilis severitatis turpe detrimentum. Interea fervet opus, et subinde temulentum attollitur quod laquearia feriat *Evohe*. Fugatur e viciniâ Somnus, et fessos

---

1 coeca jam et late depopulata. 2 incuriosus. 3 ad fores. 4 donis. 5 et. 6 et.

oculos perosa Vigilia mille diris devovet intempestivum cum helluonibus hospitem. Post haec disceditur, sed sinuoso, et subinde tibias decussante passu; donec opportunum nactus, exsilit ex insidiis lavernio, et direptâ fugit cum chlamyde. Tum Fures! Fures! Sed frustra; nam priusquam foribus alicujus efferatur Pharus, tuta jam dudum subiit cum spoliis pirata. Domum venit tandem; impatiens morae lassitudo oblatum forte circa focum procumbit in sedile. Et protinus alto sepulta somno crapula aperit sibi ructibus et runcis spiraculum, crastinis demum ac perendinis medenda repotiis. <sup>1</sup>

### QUAESTIO XVIII.

*An indoles agilis et popularis, an sedata et, ut vocant,  
Stoica sit praeoptanda?*

In motu, in strepitu, in celebritate <sup>2</sup> Vita est; Mortis imaginem habent Torpor et Sopor et deserta Silentia. Et vero Mors ipsa ex his unum est, si modo falcem seponat, si sternat <sup>3</sup> tantum, non metat etiam, si perinde atque affines sui vicissitudinem admittat cum Vitâ. Excitet se igitur, versetque, et irrequietum sit ingenium, ut angustum illud spatium, quod cunis ac feretro, ortu ac obitu Natura definivit, nullo vacuo intervallo <sup>4</sup>, redundet ubique vitâ. Huc Alacritas, Sedulitasque, et vigiles Industriae; abarcete exiguis hisce moeniis, quantum potestis de Morte. Satis illi juris est in immensum illud ac aeviternum, quod haec circumjacet, Nihil. Cur per otium et desidiam in alienum fundum irrepit infatiabile Monstrum? Sic etiam vicinis excutitur veternus, et animantur exemplo, et

---

<sup>1</sup> *add.* APPENDIX. Lycurgus olim Lacedaemoniorum legislator legem promulgavit, ne quis in loco abdito vel clauso coenam aut prandium fumeret; quod ideo constitutum serunt, ne quis lautius quam par erat vesceretur. Sed si hodie lex talis ferretur, numquid omnes vescerentur lautissime? <sup>2</sup> pernitate. <sup>3</sup> inclinet. <sup>4</sup> interstitio.

nostris impulsibus expectati reviviscunt. Tum specie rerum tenemus, et novitate suspendimus; et varietas agili per diversa discursu temperat rancidum illud, quod res omnes inficit, fastidium. Interdum etiam fallimus longum iter, et imponimus horis; et forte navis alvo recepti cum plebe, multa comminiscimur, et cum linguâ nutus pariter gestusque vivunt. Mixtas inter seria facetias avidis bibunt auribus assidentes; et arrepto aliquis per humerum puero, furtim digito nos monstrat, et, Talem, ait, te praestes aliquando.

*Omnis Aristippum decuit status et color et res,  
Tentantem majora fere, praesentibus aequum.*

Denique ingenium illud igneum et a naturâ facile fertur indefesso per Scientias omnes volatu. Nunc in sublime nititur, mox media perlabitur, mox ima legit, et excerpit humanis usibus apta, et accommodat se vulgarium captui. Ubi indoles illa durior sedentario et cunctante labore compingit illiberale quiddam et exoticum, importunum commercio, nisi boni iudicii discerniculo atrae bilis integram libram exscribraveris et quincuncem.

---

Pro opposita parte. Regalis illa indoles et imperio nata, quae torvo venerabilis silentio, virilem praefert sine nutu vultum, sine gesticulatione manum, quae specie ipsâ proscribit e viciniâ suâ proterviam, et pudore multat levitatem, et suo se tuetur contra contemptum pondere. At indoles illa tractabilis et benignior (iniquum hoc quidem, ita tamen est, o Superi) ipsis displicet obsequiis, ipsâ sui copiâ et suavitate vilescit. Non indignatur et cedit; facilis praeteriri et computari cum plebe. Tutior etiam contra malevolorum odia genius ille durior. Nam si foribus alicubi se prodat, et allatret dicacitas, nec subsistit turpi duello, nec gradum concitat molossus, sed nequam ac praevalidâ virtute compestcit adversariorum animos,



et elidit contumaciae laqueo <sup>1</sup>. Si tamen temerarius quispiam perrumpat et insultet, districto unico ac dedignante rictu blaefum catellum abigit inter ejulatûs. Adde, quod aerumnas ferat, et adversis perduret illa indoles. Nam prosperis non enervatur, nihil remittit austera, sed collecto compacto semper semperque robore, perstat obstinata, et riget instar cautis contra faevientem Fortunam. Ubi indoles illa lenior furentibus illis procellis non est ferendo; tum quod effusa sit benignitas, et affectu in diversa partito debilior; tum quod incautam, ac meliora de Diis et sperantem pariter et merentem, duplicatis ictibus adversarum rerum truculentia tundat et indignitas. Denique Scientiis aptius est ingenium illud lentum et consultum. Non vagatur in incertum, nec temere desistit incepto; sed quod semel congerit in rudimentum, hoc digerit, uni, uni, noctu incubando diuque, nec deserit ante complementum. Non seducitur verbis, non haeret in rerum superficie; sed pertinaci ad puteum Democriti ligone fundum everrit, et eruit callosis manibus alte defossam sub hominum delicatâ desidiâ Veritatem <sup>2</sup>.

### QUAESTIO XIX.

*An legitimum sit judicium, quod de ignotis, ex incidente forte cum iis colloquio, formamus?*

Sermo dum animo consonat, interpret ejus, dum dissonat, plerumque proditor est. Nam si animi sensa <sup>3</sup> os inficiari audeat <sup>4</sup>, statim ad equuleum ruboris a conscientia protractum ipsis se accusat indiciis, quin etiam alia quadam a re <sup>5</sup> fatetur saepenumero, confusionis tormento perplexum <sup>6</sup>, quae nisi in fraudis odium fuissent extorta, puro puto silentio concessum

---

1 strangulo. 2 add. APPENDIX. Si oportet omnes ingeniosos melancholicos esse, quod Aristoteles prununtiavit, nonne merito congratulari quis sibi possit, si parum hebetior sit, sed hilarior? 3 si sensa cordis. 4 praesumpserit. 5 disparata quaedam. 6 confusio.

erat oculere. Adeo commercium istud, quod Natura nobis sanxit, non impune rescindimus mortales. Cur igitur non liceat loquentis animum ex sermone suo conijcere, praesertim primo? Qui quo studiosior esse solet, ut se commendet novis auribus, eo etiam mentem ex qua nascitur refert vivacius. Suis nempe motibus dignoscitur animus, et agitatione fragrat aut foetet. Ab omni parte patet, qui cum contentione loquitur; et facile minimum inter ea quae dicit, est id quod lingua dicit. Frons, oculi, nutus, gestus, tonus ipse et modulatio, ipsa per intervalla taciturnitas, nihil horum mutum est, omnia diserta; quam multa excidunt inconsideranti <sup>1</sup>! sed et quam saepe revelat cautela, quod tutius dissimulasset incuria! Adde quod praeproperâ de aliis sententiâ nobis ipsi tempestive consulimus; dum adulatorem ab ipso proscribimus vestibulo, et ante contagium abarcemus quod abjectum est, quod serpit, quod desidiâ torpet et languore sopit industriam, quod obtretrat et sanie pascitur invidiosum, quod attactu conspurcat lutulentum. Matura vocentur ista, quantumvis accelerent, quantumvis praecipitent consilia, quae prospiciunt integritati, quae non vulnus modo cavent, sed affricum, nec uri tantum ab incendio, sed afflari etiam timent. Ne cuncteris hîc, ô iudex; periculum in morâ. Ne dubites; in promptu est, quo lis deceditur, experimentum. Tenta pulsu:

— — *sonat vitium, percussa maligne*  
*Respondet, viridi non cocta fidelia limo.*

Facilem etiam bonis ad nos aditum referamus. Dum parvo admittuntur examine, et extemplo amicos inter recensentur, eosdem fortassis averterent dilata iudicia, saltem morosa suspicio exerceret immerito. Probitas et industria vitio manifestiores sunt; datâ per os viâ, statim alacres exsiliunt ad auras; quia

---

<sup>1</sup> incircumspecto.

publicam lucem non metuunt, fucum non morantur ut prodeant, sciunt se placere genuinâ fronte. Et ut caetera lateant, certe candor loquentis latere non potest; conspicuus ei nitor; etiam cum reliquos

— — *nox atra colores*

*Abstulit,* — — —

micat ille tamen et inditâ sibi scintillâ vivit.

---

Contra. Temeritas vocatur hodie, quae fidit humanae linguae; levitas vocatur hodie, quae tam imbelli nititur <sup>1</sup> conjecturâ; aut inscitia, quae non redarguit, quae fallaci frontis argumento dat victas manûs. Sermo, nutus, gestus, dolis ubique ac mendaciis infames. Inusta est, o pudor! detergi non potest illa nota; palam est, celari non potest. Perfricuerunt <sup>2</sup> jam saepius homines, et ingenuam frontem triverunt <sup>3</sup>; superest servilis, quae adversum Conscientiae carnificinam induruit, callo, et sub verbere negat et pejerat obstinata. Si tempestate hac vultu ducimur et linguâ, faveamus ergo vaframento, et, repulso candore, suffragio nostro gaudeat indignus competitor; amicorum larvas numeremus imposterum, non amicos. Fidem et officiosam sollicitudinem ad vivum imitantur inanes rugae et inquires et crebra sciscitatio. Benevolentiam simulant obsequia, et ne simulationem nimia prodant affectatio, fraudem fraude temperat versipellis simplicitas, et praetenta <sup>4</sup> libertas inter increpandum adulatur. Hae olim Aulis principum vix notae, nunc plebi quoque familiares artes; ambitionis tunc quidem ministrae, lucro nunc etiam serviunt, donationes captant et haereditates. Adde, praematura illa judicia bonis viris ut plurimum male cedere <sup>5</sup>. Quid usitatius quam primos eorum affatûs ad expectationem non esse?

---

<sup>1</sup> se fundat. <sup>2</sup> Perfricere. <sup>3</sup> trivere. <sup>4</sup> praesumpta. <sup>5</sup> in grande praejudicium vergere.

Frontem plerumque negligit Soliditas, et quo in secessu fruitur, contenta est. Eliciendum, et sensim se exferet, quodcumque re ipsâ magis quam specie bonum est. Primum oculum quilibet e vulgo pictor rapit in suam tabulam; levis tantum variusque color est quo ille rapitur. Si Zeuxis pinxerit aut Apelles, defige te ex adverso, attende animum, intuere singula. Quid ais jam? Miraculum penicilli! Spirat ad invidiam Naturae et vivit imago ista. Atqui item <sup>1</sup>, bonum virum non nosti quisquis eum in fronte legis. Intus ille est, retraxit se, et seposuit in arduos casûs. Non vacat ei ad passim occurrentia depro-mere sese, majoribus intentum. Amicitiam ejus promerere, insinua te in ejus familiaritatem; usu deprehendes illum et probabis.

#### QUAESTIO XX.

*An levando vitae taedio, varia magis quam stabilis vitae ratio conducat?*

Quid homini taediosius quam vivere! Vitae moram lusu, jocis, somno fallit; vitae sensum legum solennitatibus, superstitionum caeremoniis, inutilium Scientiarum tricis obruit et obtundit; Vitam ipsam, praesentium impatiens, futuri spe et aviditate praecipitat. Triste quoddam et fatale est sub quo gemimus onus; graves ipsi nobis et intolerabiles sumus; nec, quid discruciet, dici potest, et non dici videtur expedire. Tabem illam melius effugies si non noveris; incrementum sumit dum correptum te fateris. Ne scrutere; vulgaris esto. Sanari potes, si decipi potes, si fidem habes amuleto. Principia rerum, recenti succo esculenta, acrimoniâ suâ palatum vellicant et salivam cient; decocto novitatis condimento, arescunt et insipida sunt media; quod deinceps ad finem vergit, nausêa foetet et vomitu. Vides brevi compendio, quam partem in rebus Vigor

---

<sup>1</sup> similiter.



habeat, quam partem occupet Fastidium; hanc devites, istam tene. Uni te mancipat quae in futurum prospicit anxie, quae momenta perpendit <sup>1</sup>, deliberatio. In arenâ consilium, quod de vitae conditione statuatur. Hanc cape vel illam; non tantum interest quantum suspicantur morosae curae. Qualisqualis ista sit quam feligis, novitate placet, fastidium excludit a vestibulo. Per principium ejus decurre, meta figatur ante medium; hinc resilies, et ad aliam mox ac aliam divertes te palaestram, non dissimili intentione. Nulla vita vivacior quam varia; quae, irritato leviter appetitu, mox delibat aliud, nec satietate sed aviditate <sup>2</sup> pascitur. Cur inchoanti lex est ut perficiat? Quis hoc decernit? Atra bilis; ut habeat nempe quas Fastidio mactet victimas, et Pertinaciae, et Desperationi; ut sensim nos astringat et exsiccet, et amandet extra rerum Universitatem quidquid fluidum, solutum, liberale. Non feremus; dentibus et unguibus rescindimus importunum <sup>3</sup> decretum. Loquere; te audimus, o Vigor, tibi paremus;

*Dimidium facti, qui bene coepit, habet,*

et ultra finem est, qui mediis appropinquat alacriter. Larga regula; sed tamen te limitat Solertia. Vive, glisce, sed Principium inter et Medium; si proserpis ultra, si rerum arcana penetres penitius, mox amisso formoso nomine, verteris in anile delirium; hallucinaris; in prunis castra vides et lucos in nubibus.

---

Pro opposita parte. Taedia circumfert instabilis et vaga vita, non aufert. Si palaris et in devium aberres, plus lassabere, quam si directo calle finem premas incessanter. Est et ipsius Varietatis ac Inconstantiae fastidium, gravissimum id quidem, et quod ex ipsis nascatur remediis, insanabile. Dum nulli stabilis insitit, inter divertendum se perdit animus; dispergitur, et irretitur hinc inde, nec colligere se potest attonitus. Ut

---

<sup>1</sup> praepensitat. <sup>2</sup> pruritu. <sup>3</sup> praejudiciale.

quondam pueri, crepundiis infani, a paternis laribus abscedunt longiuscule; pavent experrecti derepente, circumspiciunt ignota majoribus ocellis, hiant, sudant, et incerta discursatio expedire nititur illud insuperabile chaos; — ita vagus animus, domestico, quem solita familiariaque pandunt, destitutus secessu, vacillat inter aliena, impos sui; et hinc rerum peregrinâ facie percellitur, illinc obruitur indigestâ multitudine. Scilicet ut harmoniâ rerum, et rite dispositis pacatur animus, ita disturbant illum quae temere congesta, quae confusa sunt. Angimur subinde, et exercet nos minutum quiddam, quod immorigerum est, nec ordini concordat quem imaginatio praescripserat. Unam aliquam vivendi normam praescribe tibi, non speciosam; duram, rationi magis quam opinioni consentaneam; in hanc jura. Quas hic generosus Ardor rogaverit leges, nunquam illas abroget Desidia, nunquam in dissuetudinem trahat Intermissio, nihil immutet Inconstantia, nihil in favorem partem interpretetur Indulgentia. Rigidus ipse tibi exactor esto. Ut multa lubenter facias, illa saepe fac quae non lubenter facis. Solidissima voluptas, quam ipse rebus, quibus deerat, assuetudine paraveris; tua est, tu illam rebus, non res tibi contulere; totam tibi vindices jure meritissimo. Quo minus alliceret specie, Virtutem gaudio tinxit Natura. Sed tinxit tantum; haec eadem bonae mentis exercitio delibuitur penitus et exsaturatur jubilis. Si taedium creat assiduitas, et taedium terit assiduitas. Consto in sententiâ <sup>1</sup>: amarulenta potio uno <sup>2</sup> bibenda <sup>3</sup> est spiritu <sup>4</sup>. Cur abnuam pueriliter? cur differam? cur forbillem modo, et modo remittam, duplicatâ nausêâ repetendum Decoctum?

### QUAESTIO XXI.

*An probabilis affectatio, quae aliorum mores assumendo, nativam indolem corrigere studet?*

Fundi potest Humanus Animus, <sup>5</sup> et typi, cui se ingerit,

---

<sup>1</sup> omitt. in sententia. <sup>2</sup> una. <sup>3</sup> diglutienda. <sup>4</sup> amyctide. <sup>5</sup> Fusilis est animus.

lineamenta consequitur facile; ab illo laevis est aut asper. Nil scalpro, durâ nil opus incude, nec friante malleo, ut demissâ veteri, aliâ circumscribatur figurâ; dum alienos ritûs inspicit attentius, eodem quo capitur, liquefit radio, et in cavum devolutus, influit angulis, circumfluit tuberculis; et inducto coagulo, novus derepente prodit e novâ formâ. Opportunum <sup>1</sup> igitur fuerit, ad boni alicujus viri, <sup>2</sup> cujus copiam nacti simus, ingenium nos confingere <sup>3</sup>. Mores ejus notet Observantia, et in nostros transcribat Exercitium; Nutûs etiam gestûsque, et quae vulgi captum effugiunt minutias, imitabimur <sup>4</sup> studiose. His, si nescis, arctissime signum suum impressit Animus; conformemur, ut pulchrâ metamorphosi boni simus imposterum. Dura nobis indoles et morosa? Lenior aliquis inquirendus in exemplar; teneriores ex illo erimus et mites. Si contra soluti sumus et effeminati, severiore quopiam proposito reformabimur in viros. Si torpet genius et desidet, excitabimur agili; si fervet et ebullit, compefcet sedatus. Quam vecors pertinacia! quae totâ vitâ ratum id habet, quod e pravâ nutrice fuxit infans, quod quondam puero persuasit pappus, quod imposuerunt <sup>5</sup> nocturna terricula <sup>6</sup>, quod inflixit sub ferula magister. Haec <sup>7</sup> sunt quae primam indolem formavere; haec congenita nobiscum, haec ipsa Natura videtur insevisse; religioni ducimus ea concutere. Stramine ligatur Stultitia; cur caput non exserimus e <sup>8</sup> turbâ? quid hîc periculi, ô miselli? Fidite; pacatiora sunt hîc omnia. Inscitia vulgi fulminum ictibus infamat superiora; quia nubes aequat sideribus, putat fumis nostris involvi Solem. Imum est, infani, quod elusis oculis suspicitis inter altissima. Si assurgere non piget, si aequo animo dissentimus a plebe, jam crepundia rejecimus, jam praetextam exuimus, et pari passu gradimur cum viris. Divinum quid habet Philosophi in moribus

---

<sup>1</sup> Consultum. <sup>2</sup> bono alicui viro. <sup>3</sup> componere. <sup>4</sup> exsequemur. <sup>5</sup> imposuere. <sup>6</sup> terriculamenta. <sup>7</sup> Illa. <sup>8</sup> *omitt. e.*

a plebe diffensio <sup>1</sup>; non aegra illa et astricta, sed exercitio multo liberalis jam et robusta. Audeamus modo; priscam cum neglectu gravitatem praeferemus redivivi Catones.

Contra.

*Naturam expellas furcâ, tamen usque recurret.* <sup>2</sup>

Frustra cespitem dimoveas, et fundum pertentes ligone Rationis. Nunquam erues annosum illud robur, quod tam alte demisit intricatum radicem; sin relictâ stirpe sarmentum putes, mox pertinaciori frutice repullulat, et jacturam sui compensat cum foenore. Non nisi sarcophago depones, quod sub fasciis commiserunt incunabula; tecum coaleuit, non divelles; tecum ascendet in cathedram, tecum sedebit in tribunali, sub togâ tecum erit et sub sagâ, tecum deportabitur ad Sarmatas, tecum revertetur in Patriam. Dum nativam indolem recudere studet <sup>3</sup> Exercitium, inanem pascit sine successu Credulitatem; periculum faciente et profectûs specimen requirente Casu, non respondebit Eventus; multa praemeditatum, multa consultum destituet in arenâ Fiducia. Huic tamen abeunti si <sup>4</sup> vicariam feceris Pertinaciam, depromet haec <sup>5</sup> de duro penu tetricum quiddam et invitum, quod adstringit astantium ingenuitatem, et taedio vexat <sup>6</sup>, et mille modis importunum est. Mussitamus, caput scalpimus impatientes, et inter abeundum oggerimus illud Poëtae:

*O imitatores servum pecus!*

Scilicet genuino capimur, fictum et affectatum non ferimus. Humile <sup>7</sup> est quod emendicat; quod aliena sibi miscuit, adulteratum est, et descivit a germano. Sed cur inquietamur queruli? cur ista tam speciosa sunt, quae nostra non sunt? In aliena te concitas, et si aestimare modo nosses, tua, quae tibi viluerunt <sup>8</sup>,

---

<sup>1</sup> habet a plebe difformitas. <sup>2</sup> add. et quod consuetudine stabilitum est, usurpat sibi jus naturae. <sup>3</sup> praesumit. <sup>4</sup> Si tamen abeunt. <sup>5</sup> illa. <sup>6</sup> divexat. <sup>7</sup> Vile. <sup>8</sup> viluere.



sunt optima. Sortitus es rudem indolem et severam? Gaude, Virtuti debetur ista; cur emasculatum te vadas futilibus gratiis, et lacertis istis non conveniente cultu? Si remissa, si faceta sit indoles, euge! gratus eris, amabere; cur ferenitatem istam obnubiles supercilio? cur explicatam a naturâ frontem deturpent adscititiae rugae? Si lentus sit genius, constans hic idem erit et solidus; si excitatus, duplicabit tibi vitam. Pia mater Natura, dum singula mortalibus dispensat, compensat tamen omnia <sup>1</sup>. Pauca consideranti enormis se ingerit asperitas <sup>2</sup>, cuncta comparanti patefcit lenis aequalitas. Quam asper videtur ille nobis quem incolimus Globus; hîc sidera feriunt turres et alpes, illic in tartarum dehiscunt voragines; si tamen de coelo propiciat Jupiter, totum unico dimensus obtutu, glabrum hunc dicat et concinnatissimum.

## Q U A E S T I O XXII.

*An animi et exercitii gratiâ procum agere conveniat ingenuo adolescenti?*

Arcanâ pollet energiâ puellaris spiritus, dum teneris evibratus oculis pertentat juvenile praecordium; de statu <sup>3</sup> dejicit animum, ubi incidit ex improvîso, consternat et percellit, et sponte sequacem pellicit in lasciviam, aut aegre sub luctâ sibi constante <sup>4</sup> pugili, ovat interim invidendâ facilitate. Agnosceres hîc imperium simile Virtutis imperio: blandum est utrumque, sed potens, suave, non violentum; utrumque confusione plectit rebelles. Concessisse proinde nonnihil et paruisse satius est, o Ingenuitas, quam indigno rubore palloreque vapulari refractariam. Obsequio devincitur illa potentia, congressu, colloquio, familiaritate cicuratur. Exteros attonitos hebet Majestas, non suos. Nocturni Manium bombi non terrent vespillones. Quidquid ad cotem Panici pavoris acuitur, hoc aciem perdit et hebescit

---

1 singula. 2 disparitas. 3 statu suo. 4 sibi constante.

usu. Est et ingenio perutilis labor, quem ista suppeditat exercitatio. Dominam fermone <sup>1</sup> detineas necesse est; disertum te faciet haec Schola. Sed ecce quae Rhetorica: sacros de Religione, philosophicos de Naturâ, forenses de Republica, familiares de Oeconomia sermones, ab elegantissimis proscriptis magister Amor. Tetricos hos vocat aut frivolos; inter Mioses ei et Battologias recensentur; si aliquam ex his phrasim dictis tuis aspergis, ad manum ei vibratae ferula <sup>2</sup> facetiae, et ni ocius desistas, <sup>3</sup> turpis scutica repulsae. Sit geniale, festivum, et cum caeremoniis officiosum, <sup>4</sup> quidquid huc adfertur <sup>5</sup>. Est tamen et in parte ista, quod evites. Si exquiras nimium, et e libello dicas, <sup>6</sup> irridebere Pomphologus. Adde quod a venustatem efflorescit animus, qui subinde reficitur <sup>7</sup> arrisione <sup>8</sup>, et benigno Dominae radiatur oculo; crudus ille est in juvene et acidus, et non nisi influxu hoc maturescit in dulcorem. Ut se effert! quantum sibi fumat fiducia! si longo in Ecclesiis atrio conspecta forte Phyllis protinus assurgat inclinanti, et decorâ poplitum bis terve subsidat inflexione, hinc interea, pedis in aversum ductu, stridente pavimento, erigit se exferitque Puber, circumspicit astantes, et tacite sciscitatur super praerogativâ sententiam, et serenatâ fronte praejudicat. <sup>9</sup> Post haec recipit se, et Dominae praestolatur egressum. Si non gravetur illa, si admittat oblatam inter officiosas mussitationes dexteram; tum vero! Vix e templi vestibulo solvit, et singultit, et in acutos cachinnos crepat laetitia. Securius jam a fulcro concitat se puellaris gressus. Praetervolantes excipiunt officiosâ salutatione noti, ignoti, majores pariter ac aequales; at retro corrivalium zelus longo cum suspicionibus prosequitur obtutu.

---

Contra. Muliebrem sexum natura fecit sequiorem. Imbellis est quisquis nostrum cedit, et herilem nescit obfirmare vultum.

---

<sup>1</sup> colloquio. <sup>2</sup> mordaces. <sup>3</sup> si porro pergas. <sup>4</sup> geniale ... esto. <sup>5</sup> adducitur. <sup>6</sup> libellos dictes. <sup>7</sup> refocillatur. <sup>8</sup> arrisu. <sup>9</sup> perjudicat.

Obsequeris partim, et partim obniteris lenocinio, diversum te faciunt intestina diffidia. Sed collige te, et in unum corrade vires; totus obluctare, vinctes, infra iram deinceps infraque negotium habiturus hostem. Si tamen ab improvise fecerit impressionem, consta qua potes meliore parte; nil deprecare; cladis notam non penitus effugit, qui cum hoste cogitur pacisci. Erubescat sub luctu vultus et palleat; tanti sane est asseruisse libertatem, et ingenuâ cervice recusasse jugum, nec ad unguem discessisse proposito. Nihil animo par est, ubi nosse se coepit, et, praelucente ratione, debitum sibi Sceptrum capeffivit imperii. Ad haec, periculosa juveni cum puellâ familiaritas; et non nisi robusti illius ac incuriosi, <sup>1</sup> quod in nobis pulcherrimum est, mercanda dispendio. Exile quoddam et minutum, paululum supra crepundia est, quo tota distinetur et capitur mulier. Si placere vis, descende, vocem extenua, parvus semper sit tuus pullus. Superi! quam bene quadrant Herculi colus et pensa! Gradu scilicet inter nos et pueros medius est ille Sexus; ambitiosus tamen, fucio rerum et ementitis blanditiis inescatur; ferium omne et quod res est infirmo nauseante stomacho. Restat igitur ut insuper Proco serviliter sit adulandum. Sideribus assimilet quaedam, quaedam Cynosurae, et Allegoriae non minima pars sit benignus ille Solis, qui inferiora vegetat, influxus; de aris interdum et sacriis despiciat, interdum ceu alter quidam Briareus congerat Hyperbolarum montes, et coelo inferat Dominae suae divinitatem. Ludicra videantur ista; ecce fyrtes! ecce brevia! Sua deinceps credit commenta, et quod fecit, adorat Numen. Jam demulcet eum fractus Puellae incessus et affectata deliquia; nutus unus, gestusque, certus tussendi modus languentem habet. Quinimo

*Turpia decipiunt coecum vitia, aut etiam ipsa  
Delectant, veluti Balbinum polypus Agnae;*

---

<sup>1</sup> incurii.

et ad haec defigit interdum scintillantes oculos, molli quadam teneritudine, cordis fauciente <sup>1</sup> meditullium. Totus dedititius <sup>2</sup>, totus impensus; diffluit inter deperiendum, et perit. Adeo praecipitat hic femita, male cauti Puberes, quae de Ficto vergit in Serium. Et ut alibi sit latum satis Genuinum inter et Simulata discrimen, certe mimefis amoris amor est. <sup>3</sup>

### Q U A E S T I O X X I I I .

*An, quod illustres quidam Auctores fecerunt, commentitias  
Historias edere conveniat?*

Soror historiae fabula. Magis arctum est inter illas, quam imperiti putent, contubernium. Fidelissimus etiam Commentator multum habet de Poëta. Extemporales inter gesta fuerunt Principum Ducumque sermones; eosdem habet Historia compositos <sup>4</sup> a disertissimis hominibus, elaboratos cunctante stylo, et exoticam istam imaginationem, qua quondam Heroës effinximus, exaequant. Insuper quae vulgaribus circumstantiis immixta latebant partim, et partim communione viluerant, juxta regulam Historiae praecisa, jam omnino sunt alia, jam ad oculati quoque testis suspensionem inolescunt, rara penitus et augusta sunt. Speculum Veritatis est Historia; sed auget formam; textrix est, et telam, cui Natura cum auro forte et bysso vilem lanam et cannabim interneverat, rudi glomo rejecto, retexit in Attalicum Paludamentum. Quid juvat ergo se constringere, et arctam Veritatis sepem circumdare, si transfiliendum sit alicubi? Latus et pulcherrimus in procursum campus, si maceriam illam tollas. Quid juvat proplasma <sup>5</sup> praefigere tabulae, si evagetur <sup>6</sup> generosior penicillus, si imitari dedignetur, et superet propositi

---

<sup>1</sup> fauciente cordis. <sup>2</sup> acclinis. <sup>3</sup> *add.* APPENDIX. Quidam interrogatus, quot essent Sacramenta? Sex, respondit. Jussus enumerare, Poenitentiam omisit. Quod quum objectum fuisset, seite respondit: Poenitentia sufficienter subintelligitur ad Matrimonium. Sed numquid subinde sufficienter etiam subintelligitur ad Ordinem? <sup>4</sup> praemeditatos. <sup>5</sup> ideam. <sup>6</sup> exorbitet.



speciem? Euge! ista colorum temperies, liberalis ille ductus, istud lineamentum tam decens <sup>1</sup>, tam vivax, in hanc aut illam Nympham non quadrant; summae sunt ista reservanda Pandora. Bonae mentis adhuc illa labes est, ut Virtutem, quod eam quamplurimis optet esse communem, affingat immeritis; probrum adulationis sibi consciscit incauta Pietas. Nulli formam istam astringe materiae; divina est. Exhibe <sup>2</sup> nobis boni Principis Notionem <sup>3</sup>; dic licet in schemate quid egerit; dic iustitiam clementiâ, dic potentiam temperasse modestiâ, dic terribilem hostibus, mitem devictis, Patrem inter suos magis audivisse quam Dominum; cur hunc Alexandrum appelles? Faceſſat

*Felix regnorum praedo, non utile Mundo*

*Editus exemplum;*

cur Caesarem voces? Impotens ille est, dominatus libidini fas omne prostituit; Anonymum vocabis eum. Si suspensum desideras et avidum lectorem, ab humili Principem tuum deduces in fastigium, infractum repulsis, adulationum negligentem ambages, pulchrâ per invium eluctantem incuriâ. Narrabis, ut insidias eluserit sine dolo, ut fraudes Aulæ sine fraude devicerit, turpes illas Machiavelli Noctuas simplici semper excoecante Candore. Ah quomodo nos rapit robustum illud et liberale! quantum ei decus! Hoc sane, si quidquam, humanis mentibus inditum, vocabimus divinae particulam auræ. Tandem aevi nostri vitia infectabere liberius. Queri licebit exulem ab animo pietatem, et ad externos ritûs proscriptam; Serium omne nugis et argutiis contaminatum; praeclusum generosis ingeniis ad amplitudinem iter, vaftris et humilibus patulum; credulos gubernatores, Reipublicae clavum piratis cedentes, non secundum immobilem iustitiae Cynosuram, sed privati quæstûs et ambitionis Erraticam velificantibus. Si haec auctoribus suis subscribas vitia,

---

1 vehemens. 2 describe. 3 ideam.

*Periculosae plenum opus aleae**Tractas.*

Sub patria potestate sunt; non irritabis impune. Ubi larvis quibusdam et fictis nominibus emancipantur, tutum est ea prout merentur traducere; Posterius, sic hodie sunt Candor et Veritas.

---

Contra tamen facit, quod Commentitiae istae Historiae fraenum paulatim laxent calumniis, dum satyricis ingeniis in latibulis suis spondent impunitatem. Vix carceribus et lictore coercetur ille furor, quin oestro suo percitus erumpat aliquando, et Principum virorum famam fugillet, et optimi cujusque verecundiam proterat sub pedibus. Dexteram ei praecidas <sup>1</sup>, maledicam linguam evellas e faucibus; non desistet; minatur etiam sic, immurmuraturum se terrae, ut isto semine surgant arundines Midiae, quae ad venti flatum resonent occulta vitia, quae te toto Mundo traducant, et infament,

*Et misero societ Lycambi.*

Sic debacchatur intra clathros suos ista rabies; quid futurum existimamus, si quovis praetextu fores habeat referatas? Sed esto. Scriptor Commenti vir bonus sit; Candidum sit ei pectus, et a furialibus istis facibus non suffumigatum; nosti Saeculum hoc quale sit? Callidis scatet et acutulis, et (si ullum antea) in exoticas interpretationes effusum est; verba singula percolant, syllabas omnes ad vivum discutiunt. Et quod Pappo accidit, dum forte sub seram vesperam ad focum garrit cum nepotulo; nam in semisopitis prunis castra vident, et reges, et si Dis placet, Belluam Lerna; — ita et hi delirant; legunt in Auctore quae non scripsit, quae ne per somnium quidem cogitavit. Futile vitium, nec tamen magnis caret exemplis. Audi Lipsium nostrum de hoc hominum genere conquerentem: *Quae nos, inquit, communiter diximus, sic volunt accipi, quasi in Titium*

---

<sup>1</sup> praescindas.

*aut Sejum dicta, imo Vates etiam agunt, non lectores, nec sumunt a nobis sensum, sed adferunt, et mentem aliquam affingunt ex sua mente.* Si in Doctorem haec audent, qui non gesta narrat, sed gerenda praecipit, vitia damnat, non homines; quid in Historiam? praesertim ubi personarum rerumque fictio superstitiosis ingeniis auguria suppeditat, allegorias ingerit et mysteria. Ecce! nasutior iste Sibyllam interpretabitur; sensum tuum odoratus <sup>1</sup> est, rem acu tetigit. Nega, clama; fecus non credent, ne jurato quidem. <sup>2</sup> Adde, fieri facile posse ut Fabulae istae veris nostri temporis Historiis fidem derogent. Caduca res est testimoniorum religio; dum vacillat, evertitur; suspecta res est; dum in uno fefellisse deprehenditur, tota rejicitur. Periculum fane, ne ubi verissima etiam in Annales contulerimus, Graecae tamen fidei insimulent aevum nostrum <sup>3</sup> feri nepotes. Adeo sunt ad Scenam pleraque, sed heu funestam! Si autem historicam fidem a posteris non requiras, si perspicaci lectori fatis innuas, Ideam te scribere voluisse, non Historiam, — steriliter fane te fatigas. Surculus ille quem pangis, eodem pene quo Historia labore rigari et coli postulat; praecipuum tamen Historiae fructum, studium inquam imitandi, non profert. Exempla nos docent, non commenta; quia homines pedum post se vestigia relinquunt, quae viam signent, non inanes umbrae. Flosculum forte delectationi progignet ille frutex, sed vanum et brevi deciduum. Nec solide, nec diu delectat, quod tantum delectat. Natura voluit voluptatem condimentum esse, non cibum. Pernici semel oculo lustrasse Fabulam, avidae <sup>4</sup> curiositati sat est. Imo subinde sistimus in medio, conscii nimirum, earum apud nos imaginum innumerabilem esse copiam, quas exponimus obtutui, dum volumus, nec ad sculpendum alieno nos indigere caelo. <sup>5</sup>

<sup>1</sup> subodoratus. <sup>2</sup> *add.* velis nolis dithyrambicus es, Anticyras tibi navigandum. <sup>3</sup> Graecam tamen notam apponant aevo nostro. <sup>4</sup> prurienti. <sup>5</sup> *add.* APPENDIX. Aegyptius olim sacerdos Solonem et Graccos pueros appellabat, quod veteres historias nescirent; sed numquid hi qui nimis belle callent illas, et recentes historias negligunt, senes et bis pueri sunt?

## QUAESTIO XXIV.

*Utra praestantior, Belgica <sup>1</sup> an Latina lingua?*

Acris saepenumero in symposiis aliisque amicorum coetibus Idiomatum inter se digladiatio. Nos Latium huc et Belgium <sup>2</sup> produximus in Palaestram, induimus Caestûs, et concitamus in Luctam. Rident quidam, ut video; Herculem ex nunc distinguunt et Antaeum. Sed praeoccupati sunt; homines praejudiciis hîc ferme laborant omnes; Aequitas sola Brabeutes esto.

Primum igitur pro Latinâ linguâ est, quod latissime per Orbem dispersa <sup>3</sup>, in Sacris ritibus, in Scholarum pulpitis, in doctorum libris pene sola sit. Belgis etiam ac Germanis, nescio quo fato, plusquam Italis suis placuit; lippi callent hîc illam et tonfores, et pene dixeram, mulierculae. Certe quod olim de Romano Imperio cecinit Poëta, hodieque id obtinet in Linguâ:

*Gentibus est aliis tellus data limite certo;  
Romanae spatium est urbis et orbis idem.*

At Belgica <sup>4</sup> lingua ubi est? In hoc terrae augulo, in hac glebâ; et ibidem non nisi verna et famula, per culinas strepit et popelli tabernas. Aulam frequentat Gallica, Academiam Latina, mercatorum Basilicas Lusitana, inter elegantiorum subinde coetûs Itala lascivit et Castellana. Quam sonat iste caestus, o Belgica! <sup>5</sup> Nil miror, si diro verbere dentes aliquos excusserit tibi; quod si ita est, degluti et absorbe protinus, ne advertat Antagonista.

Ridet indignans; et quod nos exitialem interpretabamur ictum, testatur inanem esse dumtaxat inter caestûs complodentes crepitum. Et caput quassans cum generoso fastu: *Vices suas habent res quaeque; erit, inquit, cum fucum pertaesus, adorabit Can-*

---

1 Flandrica. 2 Flandriam. 3 recepta. 4 Flandrica. 5 Flandria.



dorem, et Belgarum imperio colla lubens submittet Orbis. Tunc non unius victrix certaminis, sed Pentathla ferar. Sic ait, et protinus in mediam se proripit arenam, ingruitque Latio prior, agitque hoc argumenti pondere. Belgas <sup>1</sup>, quibuslibet peregrinis linguis addiscendis, sua lingua promptissimos reddit. Ita est; id ipsum exteris frequens jam comprobavit experientia. Paucorum mensium exercitio Italus Italum, aut ipsis etiam Hispanis mentimur Hispanum; nisi subinde conspicua magis cutis celare nos nolit. Vocis accentum, quin etiam crebriores in isto populo nutûs ac gestûs (quorum quidem nos sincerior Natura fecit expertes) animi tamen gratiâ, dum lubet, imitatur ad vivum. In ipsâ etiam Romanâ linguâ quibus cedunt Belgae? imo qui non cedunt Belgis? Unde depulsâ nuper praecedentium saeculorum barbarie, priscus illuxit Orbi Latino nitor, nisi e nostro hoc Belgio <sup>2</sup>? Erasmi, Lipsii, Grotii, Puteani nostri sunt; da Latium adhuc viros, quibus debes tantum. At vero qui aliud in cunis idioma fuxerunt <sup>3</sup>, mirum est quam exterorum linguis deinceps addiscendis sint inhabiles: quocunque devenerint, semper olent maternas caepas. Et ne longius excurram, res patet in vicinis nostris Walonibus; qui vixdum ex ephebis egressi, et huc forte translati, dum idioma nostrum affectant, oleum et operam perdunt; *Curvilingues* (sic Belgis vocantur) <sup>4</sup> degunt inter nos ad capularem usque senectutem. Eandem difficultatem Itali experiuntur et Hispani, tum in mutuis linguis ac Latinâ, quas confundunt, tum in Germanicâ ac Belgicâ, quas misere mactant, addiscendis. Et id ipsum procul dubio notaremus etiam in Latinis, si alicubi restarent indigenae <sup>5</sup>, si non tempestive totos se abscondissent in libris.

Haec pro Belgio. At intentatum ictum retundit hoc umbone Latium: Egregiam vero laudem, o Belgica <sup>6</sup>. Quid hoc, quo

---

<sup>1</sup> Flandro-belgas. <sup>2</sup> Flandro-belgio. <sup>3</sup> fuxere. <sup>4</sup> *omitt. parenth.* <sup>5</sup> indigetes.  
<sup>6</sup> Flandria.

ita turges, est aliud quam caeteris idiomatibus ancillari? Nam quemadmodum Ludiones et Pyrrhicharii plumbum circumferunt in soleis, quo pes ab onere solutus in Scenâ <sup>1</sup> cum levi focco saltet agilius; — ita Belgica <sup>2</sup> lingua gentiles suos aspere habet. Duriuscula est et barbarizat. Vox ut plurimum non nisi syllaba; et in unam syllabam integrum aliquando plaustrum exonerat Aspirationum et Consonantum. Hinc dum Belgae nitidis exterorum ac facilibus se addicunt linguis, velut manumissi a rigidâ paedagogâ, luxuriant, plusquam ipsi indigenae <sup>3</sup> in eloquium effraenes. Honorarium est istud verber, mi Belgica; pectore excipias aut cavo latere, ut sonet, et testetur sub artubus robur. Ne te pudeat, ne diffiteare; Virago <sup>4</sup> es pariter cum Germanicâ linguâ, sed tamen sorore, vel (ut quidam volunt) matre tuâ placidior.

Admittit, ut suademus, et ultro insultans: At Latina lingua, inquit, mollis et effaeminata. Vix ultra duas Consonantes proferre valet sine fulcro Vocalis. Blaesa etiam est, et balbutit, frequenti ejusdem syllabae geminatione; audi balbutientem in exemplo: *Quid de re mererere? Quid de re rere rara? Jactat faber fecisse sese securim.* Hoc amplius <sup>5</sup>, quia ultimam syllabam Latina lingua non producit, in qua tamen Nominum ac Verborum Declinationes constituit, hinc minus per clamores non intelligitur. Ex Theatro etiam ac Suggestu non percipitur, nisi ab exercitatis pronuncietur, qui usu didicerunt vim aliquam ultimis syllabis, licet eas corripiant, impartiri.

Excandescit crebris his laceffitum ictibus Latium, et cum convitio: Da, si potes, exlex et barbara, Regulas quae te dirigunt <sup>6</sup>: etiamnum in incude Grammatica tua nec prodit; et ut vides, desperant, qui in hoc unum tam impense defudant artifices. Quid exteros invidiose traducis? quid miri, nunquam bene disci, quod doceri non potest?

---

<sup>1</sup> profcenio. <sup>2</sup> Flandrica. <sup>3</sup> indigetes. <sup>4</sup> mascula. <sup>5</sup> ad haec. <sup>6</sup> quibus dirigeris.

Irrumpit adversum istaec cum furore Belgium: Quid? — Sed ne ludicra vertantur in serium, finis esto Luctae. Ecce quia Gymnasta sum, deponunt caestūs et obediunt <sup>1</sup>.

### QUAESTIO XXV.

*An furor Principis, an populi magis exitialis sit?* <sup>2</sup>

Atrocior est noster quam Jovis ignis. Alpes hic ferit et turrium apices, securae valles humilesque caesae. Ille dum furit, ventorum forte flatibus irritatus, tecta, templa, silvas, segetes, ima pariter ac summa, nullo corripit discrimine. Sic dum Principis aliquantisper simultate pressa intumuit ira, crepat illa cominus, et stragem edit in Satrapas; tutum est eminus Terrae Filiis spectaculum. At si vulgi turbulenta rabies Legis excusserit capistrum, contumaci ungulā

— — *ruit omnia late;*

fas, nefas, sacra, profana fusque deque habet. Inter balistas et fragores, inter fudes et saxa, inter faces et incendia grassatur in Principem ac Optimates, etiam per suum latus. Theatrum est Moscua, Moscoviae metropolis, in qua trux Erynnis lugubrem nuper exhibuit Tragoediam, quae locuples testimonium faciat meae Sententiae. Res ita se habet. Anno 1648., 1 Mai. <sup>3</sup>, Moscoviae et Russiae Imperator cum Patriarchā et Clero ac praecipuis regni proceribus (Bojardos vocant) ad solennem, quae quotannis isto die peragi solet, Supplicationem accingitur. Cives Moscuenfes, opportunum rati, querimoniam scripto ediderant, eam ad Imperatoris genua, dum pietati vacaret, dela-

---

1 *add.* APPENDIX. In linguis vernaculis hodie nullae sunt nominum declinationes; defectus casuum suppletur per diversas propositiones. Numquid magna commoditas adduceretur si de verborum casibus seu temporibus idem fieret? — An recte M. Pomponius grammaticus interpellaverit Tiberium Caesarem admiscentem orationi suae aliquid quod minus Latinum videbatur, his verbis: Tu quidem Caesar civitatem dare potes hominibus, verbis non potes. 2 An exitialis furor Principis an populi? 3 *omitt.* 1. Mai.

turi; querebantur *immensis se vectigalibus, quae aliquot jam annos pendebant, exhaustos; quod miseris a duro isto torculari supererat sanguinis, id Bojardorum praedam esse; quapropter malle se semel cum conjugibus ac carissimis pignoribus jugulum lictori praebere, quam infelicem vitam tamdiu trahere per tot aerumnas.* Hoc instructi libello, accurrunt ad Caesarem. Densa stipabat illum Bojardorum corona; hi abarcebant ingruentem populum et prohibebant aditu. Quidam etiam e Bojardis videntes libellum, quem unus supplicum praetendebat, diripiunt eum e manibus, perlectum lacerant, de caetero mandant famulis, *fustibus egregie multent insolentes illos vappas, et abigant in malam crucem.* Probrum hoc, et mistum cum saevitiâ ludibrium, multitudinis animum, gravissime jam ante afflictum, incredibile est quantum exulceraverit; dissimulant tamen, quoad Sacrorum caeremoniae finiantur; interea mutuo fremitu, et summi Numinis obtestatione, justas iras exacuunt. A meridie cum turbis confertim adsunt ad Caesareum Palatium; hîc plebi junguntur Imperatoris praefidarii, et ipsi propter imminuta nuper stipendia desperabundi, qui accessione suâ seditiosum illum numerum auxerunt ad aliquot millia. Hinc factâ manu concurritur ad palatium Borysli, summi totius Russiae Gubernatoris, qui ab aliquot jam ante mensibus <sup>1</sup> Imperatricis germanam duxerat in uxorem; irruunt diffractis portarum ceris ac vectibus, momento diffunduntur intus per omnes aulas et atria; et non invento Borysio (nam is clanculum per posticam evaserat ad Caesarem) immensam auri ac argenti supellectilem pretiosissimasque margaritas per fenestras undique conjiciunt in publicum. Nemine eas deinceps manu contingente, certatim clamabant: *Toot nassi kroof!* id est, Ecce noster sanguis! Reliqua, quibus ars pretium fecerat, velut picturas, tapetes, et statuas, gladiis conscindunt, et proterunt pedibus. Hinc vertunt se ad domum Tsistefii, qui erat

---

<sup>1</sup> *add. Augustam.*



summus imperii Cancellarius; et offendentes eum in lecto (decumbebat enim ex male ominato vulnere, quod non ita pridem ex equo prolapsus acceperat in occipite) nudum eripiunt cubili, capite prostratum, per pavementum raptant; dein in hortum trahunt ad sterquilinum; hinc pugnis, faxis, stipitibus vapulat. Quique letalem ei ictum securi impertitur: *Ismeenic toot pro sol*, id est, Proditor, hoc pro sale; sali enim infelix iste Tisitesius grande vectigal nuper constituerat, nescius, ah demens! brevi id sibi capitis tributo apud rigidos hos telones solvendum restare. Ast illi, occiso hero, nihilo segnius domum ejus impetere, obvia quaeque prosternere, secare, demoliri, vastare; inter pulveres et rudera, inter fumum et ruinas, consuetum hoc rugire: *Hic est noster sanguis*. Mox domus Praetoris urbani ac plurium aliorum Bojardorum simili gaudent sorte; ipsi tempestive se subdlexerant, et ad vicina monasteria confugerant. His gestis nox supervenit, et exasperatos leniturus videbatur sopor. Cum postero die, orto vix Sole, recrudescit hesternum ulcus. Confluunt iterum ad Imperatoris Palatium, postulantes ocus sibi sisti ad manus Pleseophum, qui unus prae caeteris civium omnium flagrabat odiis et execrationibus; item etiam Borysium Russiae Governatorem, qui pridie e manibus eorum elapsus fuerat; item etiam Troghniotophum. Imperator, sperans unâ victimâ pacandum populi furorem, Pleseophum emittit cum Lictore, qui ad conspectum securi caedat <sup>1</sup> infelicem. Vix prodierat, involant; ad forum pellunt, raptant; huc ubi devenit, fudibus contundunt, secant securibus, confodiunt gladiis, nudum ac discerptum cadaver spectaculo relinquunt. Et rursus ad Palatium, pro Borysio jam. Videt Imperator, rabiem illam, dum sanguinem lingit, efferari magis magisque. Prodiens igitur cum planctu, quem res fictum esse non sinebat: *Amici*, inquit, *et cives mei, biduum concedite, ut consulam de* <sup>2</sup> *duobus istis*,

---

1 ad conspectum decollet. 2 super.

*quos tradi vobis petitis; respondebo voluntati vestrae quantum fas est.* Et nihil de his, quae impraesentiarum gerebantur, conquestus, subtrahit se cum gemitu. Humilis ista Majestatis species et abrupta cunctorum animos emollivit pariter ac percussit. Altum subito silentium, nec ultra quidquam; domum abeunt sedati et moesti. Sed ecce tibi inopinatum <sup>1</sup> quiddam, et his quae hactenus praecefferunt atrocius. Eodem die sub meridiem incendium ingens, nec unicum, variis dissitisque locis dispersum, quod ventis instigatum, et his qui ad extinguendum accurrebant, quod in diversa tenderent, in se mutuo impactis et confusis, grassabatur impune; adeo ut spatio quatuordecim ferme horarum tertiam magnae illius urbis partem redegerit in cineres. Qui interfuere, ajunt incendio illo absumptas esse domos ultra quinquaginta millia: inter quas etiam Palatium <sup>2</sup> Nikitzii, Imperatoris avunculi, quod inaeestimabilis pretii fuisse perhibetur; structurâ pariter ac sumptuosâ, qua refertum erat, supellectili stupendum <sup>3</sup>. Cumque incendium istud inciderit in meridiem, perierunt tamen homines, sive flammis impliciti, sive fumo praefocati, mille septingenti. Hoc tunc etiam accidit memorabile. Sub mediam noctem, cum flamma jam perrexisset ad forum, ubi cella vinaria Imperatoris, in qua vinum adustum, cujus apud gentem istam creber potus, maximâ asservatur copiâ; cumque periculum esset, ne si flammam concepisset, pereundum esset omnibus; ajunt Monachum quendam adfuisse, stricto <sup>4</sup> gladio; quantum poterat coetum populi coëgisse; et protinus: *Nisi caput hujus Sceleris* (monstrabat autem cadaver Plesephi, quod nuper <sup>5</sup> per lanienam exanimatum, nudum etiamnum jacebat in foro), *nisi*, inquit, *caput hujus Sceleris ultricibus istis flammis devovemus, actum est de nobis omnibus.* Nec plura; ipse caput cadaveri amputat, et vino adusto intin-

---

<sup>1</sup> insperatum. <sup>2</sup> aula. <sup>3</sup> cujus pretium aestimabatur quatuor millium millium Roblorum, id est, secundum nostram monetam aureorum vices centies millium. <sup>4</sup> evaginato. <sup>5</sup> pridie.

ctum conjicit in medias flammās. Res miraculo similis; nam in foro sedatur incendium. Extemplo consequitur vulgi superstitio, et truncum eadaver in partes concisum, variis locis, flammis propitiandis objectant. Inter haec quidam ex Incendariis deprehensi et in carceres detrusi; postridie vero, in quaestionem postulati et torti, fatebantur diserte, ad facinus pecuniā emptos se a Borysio Russiae Gubernatore, qui suavi hoc diverticulo populum detinere <sup>1</sup>, et a conceptae in eum sententiae executione avocare studuerat. Tum vero frendere omnes et dirumpi <sup>2</sup>; ad Palatium irruere; sublatis vociferationibus Scelus istud et Patriae bustum deposcere ad faevam necem, sine morâ, jam, jam. Contra Imperator laborare, viri salutem humiliter deprecari, instare, et quae antehac bene gesserat <sup>3</sup>, apud populum exaggerare; ad haec Nikitzium avunculum <sup>4</sup> suum deprecatorem <sup>5</sup> facere. Erat is populo perquam carus, tum ob recentem ac communem in incendio isto jacturam amabatur tenerius. His tandem flexi, descendunt <sup>6</sup> in hanc sententiam: ut praedictus Borysius, Russiae Gubernator, muniis omnibus ac fortunis exutus, insuper tonsus et cucullum indutus, initietur in Monachum, ablegeturque in Monasterium Kirilienſe, quod centum milliaribus distat a Moscua, situm ad ripam Sochinae; et sententia haec executionem sortitur duodecimâ Junii, eodem anno 1648. <sup>7</sup>

---

1 intertinere. 2 ringi. 3 praecedentia ejus merita. 4 cognatum. 5 intercessorem. 6 condescendunt. 7 *add.* id est, a quatuor jam circiter annis. APPENDIX. In Moscovia, propter lapidum penuriam, domus, turres, moenia, imo strata platearum, ex lignis omnia; igitur incendiis infames sunt omnes civitates. At in Hibernia paludes sunt omnium scriptis decantatae, quae injecta sibi ligna vertunt in lapides. Numquid Natura melius fecisset, si aliquas ex istis paludibus ad miseram Moscovitā transtulisset? — Quid causae, quod Moscovitae frigidissimam plagam incolentes vivant fere moribus calidarum nationum? Nam mulieres apud illos non prodeunt in publicum; in meridie etiam cubitum discedunt usque ad secundam aut tertiam pomeridianam, ad instar Italorum.

## QUAESTIO XXVI.

*Opposita pars praecedentis quaestionis hic tenetur.*

Mitior est naturalis quam artificiosus ignis. Nam si intempestâ forte nocte non rite sopitus focus alicubi fecerit incendium, exciti ad pulsum Feralis Nolae, concurrimus protinus cum scalis et hamis; et hinc detractis, qui suppetebant in pabulum, titionibus, depluentibus illinc syphonibus et situlis, tandem abigimus indignantem inter stridores Vulcanum. At si is pyrio conceptus pulvere latentes devolvitur per cuniculos, premant eum gravia murorum moenia et incumbentes cum turribus arces, non suppriment. Onere laceffit eluctabitur, et perrumpet in stragem horribiliorem. Sic etiam populi furor apertâ nititur viâ. Non textae, non repentinae machinationes; maturâ seditiosi capitis suppressione, incussâ superstitione, vanâ spe, aliisque quibus mancipatus est affectibus, terretur, circumvenitur, sedatur facile. At Principum Tyrannis ambage tectâ molitur excidium; non probitas illam, non dignitas, non merita comescunt, quin insimulet, et subornet, et omnem lapidem moveat, quo tandem ceu perduellem feriat, quem obstare libidini suae suspiciosa dictat ambitio. Adsit Sophy Cha-abas, Persarum nuper Tyrannus, et effuso a se innocuo ac Regio sanguine obsignet meam Sententiam crudeli liturâ <sup>1</sup>, cui sanctos denique cineres et Martyris favillam inspergat <sup>2</sup>. Sophy Cha-abas Persarum Rex, missis Legatis ad Alexandrum Georgiae Regem, Christianum Principem, qui pridem, ita cogente necessitate, sub Persarum protectione se dederat, petit fidei obsidem Constantinum, filium ejusdem Alexandri natu majorem. Mittitur; Tyrannus ubi juvenem recepit, complectitur, fovet blanditiis, maria montesque pollicetur. His tandem <sup>3</sup> asse-

---

<sup>1</sup> sanguine subscribat meae sententiae crudelem lituram. <sup>2</sup> *add.* Historiae gesta praecipua intra nostram aetatem sunt, ideoque, licet prolixior sit, gratam tamen fore non diffido. <sup>3</sup> blanditiis; numeribus tandem ac speciosis promissis id.



quitur, ut Constantinus Christum ejuret, et nomen det Mahometi. Sceleris rumor pios Principes, Constantini parentes, incredibile est quantum affligerit. Execrantur sacrilegum transfugam, nec jam amplius inter suos numerant, qui sub Christi signis non censeretur. Tota jam iis profapiae spes in Davide suo, natu minore <sup>1</sup> recumbit. Cui proinde principem et lectissimam virginem desponsant, nomine Catharinam; quae et <sup>2</sup> filium ei peperit, qui vocatus est Tamaras Myrsa <sup>3</sup>. Hunc Myrsam, tenerum adhuc, (quod videretur haeres regni, excluso Constantino ad Davidem jam devoluti) etiam deposcit Persarum Rex in fidei obsidem, et quia non tutum videbatur tergiversari, confestim mittitur. Myrsam ad se delatum Rex iisdem aggreditur blanditiis, quibus ante Patrum ejus Constantinum pellexerat in suam sectam. Necquidquam; nam adversus nefandae Sirenis cantum nimis alte mentis aurem obturaverat generosus Puer. Igitur Rex ad Constantinum suum revertitur (quia jam ad omne scelus projectus videbatur <sup>4</sup>, qui nuper Christianum, id est mitem illam et teneram pietatem, protritum iverat sub pedibus), et palps: *Constantine*, inquit, *tempus jam dudum et res ipsa postulant, ut stem promissis, et obsequiis in me tuis aliquando respondeam. Sed non sentis alienatos a te tuorum animos? Quo res vergat, non percipis? Sceptrum, quod jus et natura tibi dederant* <sup>5</sup>, *excussum de manibus non vides? Primus ego rebus tuis consulam. Sic age: si patrem tuum hujus in te consilii architectum, fratremque qui te supplantavit* <sup>6</sup>, *tibi sisterem; tantumne animi, ut acinacem strinxeris, et iniquum illud filium, quo corona perduellionis* <sup>7</sup> *imminet vertici, recideris? Exercitu meo stipatum et tutum reponam te paterno folio.* Tyranni mentem percepit Constantinus, et inhorruit; pallet, haeret. Tandem ira et <sup>8</sup> dolor

---

<sup>1</sup> Davide secundo-genito suo. <sup>2</sup> mox. <sup>3</sup> add. nomine Persico, utile hoc fortitan rati devincendis suae familiae Persarum animis. <sup>4</sup> add. nec injuria. <sup>5</sup> porrigunt. <sup>6</sup> fratremque juris tui invasorem praesentes. <sup>7</sup> usurpatoris. <sup>8</sup> add. repulsae.

et indignatio, et sibi <sup>1</sup> debiti (sic censebat <sup>2</sup>) Scepri cupido, effraenem jam excussâ Religione animum concitarunt in facinus. Annuit, et *Tuis*, inquit, *o magne Sophy, ut aequum semper duxi, parebo jussis et consiliis*. Nec mora; mittit Rex, qui suo nomine praesto esse jubeant Alexandrum et Davidem Georgiae Reges, cum manu quatuor millium e suis: ita regni sui negotia postulare. Ubi advenere, convivio eos accipit Constantinus lauto, regio; sed demum inter bellaria quam funestum apophoretum! Ex improvise confurgit horridus, momento citius, et sicam stringit, et recondit eam in patris sui pectore, et rursus in auras librat, et adigit per fraternalum latus. Extemplo volare fama execrabilis parricidii, et Georgianorum castra tremulo tumultu miscere. Adest Rex Persarum <sup>3</sup>; voce, gestu levat consternatos. Facinus adscribit temulentiae, contentionibus, jurgiis, *quibus dum cognatus ac familiaris sanguis colluctatur, saevius ut plurimum in mutuam perniciem ebullit quam ignotus. Caeterum cum tristis casus ita tulerit, nolle se in illam impotentiam severius animadvertere. Sed pacandis Georgianis rebus intentum se et sollicitum, dare iis Constantinum in Regem, utpote Regiae familiae germen, cui jam ante haereditario jure sceptrum deberetur*. His Parricidae munita via; qui protinus ad suorum castra tetendit; et auctus insuper manu quatuordecim millium Persarum, abitum maturabat in patriam. Sed jam nuncius horribilis parricidii ferenissimam feminam Catharinam perculerat, ac tantum non exanimaverat; simul instare sacrilegum parricidam cum infidelium exercitu detulerat. Quid agat? colligit se, et sexum egressa, altâ simulatione premit dolorem pariter et consilium. Interea militem in insidiis locat ad montium, quae Georgiam a Perfide discriminant, angustias; obviam ipsa procedit Constantino. Ubi ad praedictos montes deventum, mittit qui Constantino dicant: *Lugere se, ut par erat, mariti ac soceri sui*

---

1 omitt. sibi. 2 ut sibi videbatur. 3 Rex ipse.

triste letum; caeterum jam ante e Persarum Rege didicisse, id non Constantino, sed repentinae cuidam irae, cujus compotes non sumus mortales, imputandum. Ad <sup>1</sup> regni limites in occursum se adesse, et porro perrecturam fuisse, nisi suorum consilio, quibus id praeter sextus pudorem videbatur, obsequendum judicasset. Quapropter rogare se, ultro ipse veniat; esse quod conferat de terrore, quem externus miles civibus ejus, nihil nisi Constantini adventum anhelantibus, incuteret, deque aliis, quae coram commodius quam per legatos agenda, differret. Accepto nuncio, exsultat Parricida <sup>2</sup>; et jam etiam fratris a se mactati thalamum cogitare audet incestus <sup>3</sup>. Paucis comitantibus domesticis, per montium fauces ad Reginam pergit; cumque jam casses effugere non posset, exsilit ex insidiis miles; circumveniunt incautum; trucidant; et generosus astus vices rependit sceleri. Nec fatis; per montium juga effunduntur, et suis aggregati, numerum cum Persis aequant, quos confusos ac ignaros caedunt, uno ferme ac altero, qui cladis nuncium deferrent, elapsis. His inauditis Persarum Rex ad interiores artes se convertere, et fraudem jam fraude temperare; Myrsam matri suae remittere cum literis. Quibus primo quidem heroicam illam parricidii vindictam extollebat <sup>4</sup>, et dignam immortalitate censebat; dein mandabat *unicum hunc regiae stirpis surculum, sollicitè a se hactenus fotum, quamprimum pangeret, ut Georgiae sceptrum constaret, quae ceteroqui, regia deficiente propagine, Persidis accederet coronae.* Ubi matri redditus adolescens, prudentissimae feminae summae curae erat, non quidem compositis Tyranni consiliis, quae alium scopum spectabant, parere, sed quod res ipsa postulabat, exsequi. Igitur principem puellam e vicino regno Teffliensi Myrsae suo in matrimonium petit. At Persarum Rex corrivalem tempestive subornat Alovassam Tefflis regem, et telo ac invidiâ horum

---

<sup>1</sup> Circa. <sup>2</sup> *add.* tectum quid invenit in verbis legatorum, quod titillet. <sup>3</sup> incestuosus. <sup>4</sup> depraedicabat.

Christianorum Principum opportune abusus, datis clam ad utrumque literis, alterum in alterius necem instigabat. Sed utrique suspectum negotium, quod tam sedulo Veterator urgeret; cujus perfidiam, quidquid ipse praetexeret, satis jam prodebat eventus. Igitur suspicio ad colloquium eos excivit, colloquio veritas detecta est. Tum vero indignitate moti, statuunt se Persarum tyrannidi subtrahere, et Turcorum protectioni regna sua transcribere. Resciit Persa quantumvis tecta consilia, et ingentibus copiis vicinam sibi Georgiam inundat. At Catharina, pro suorum salute obicem se positura, pergit in occursum Tyranni. Excipit ille genibus suis advolutam, nec asperum quidquam prae se ferens, abducit Catharinam in Persidem. Saepius scribenti Myrsae, et matris reditum obnixè efflagitanti, nihil; donec Muscoviae Legatus, qui illac forte cum muneribus ad Persarum Regem tendebat, precibus et pietate flexus, Myrsae patronum se fecit. Hic enim constrictum se sensit Tyrannus, et ultra impatiens simulatio crepuit in apertam rabiem. Mandat ocius Catharinam deferri ad civitatem Chyram; Gubernatori literas ipse destinat, quarum haec summa: *Velle se ut ad manus ejus Catharina renunciaret Christo, et Mahometi nomen det.* Addit promissâ quae pelliciant, inter quae consortium tori et regni; addit minas quae compellant, non unam per laniatûs et supplicia mortem. Haec ubi Catharinae exhibita, vultum attollit animosa; terror nihil, et minus, si fieri possit, profecere blanditae. In jubilum effusa suspicit Divina Consilia, quibus visum esset Sanctam suam Legem, tot olim heroum oppigneratam sanguine, nunc etiam vilis (sic agebat) mulierculae signo firmare. Igitur ubi a sententiâ non dimovetur, ex praescripto Regiarum literarum tortoribus traditur; qui innocuam hanc Christi oviculam vestibus exuunt ad summam nuditatem, ad palum ligant, ac primo quidem ubera, dein brachiorum ac tibiarum furas candentibus avellunt forcipibus, et purpurâ suâ jam rite ornatam, jam speciosam divinis oculis sponsam, in ardentem rogom con-



jiciunt. Nunquam antehac in Solio suo tam formosa. Unicum hoc ei inter tormenta suspirium: *Exile, nihil, Jesu, quod pro te patior.* O non degenerem Christi sobolem post tot saecula! o invidendam (aude pietas) ipsis etiam Ecclesiae primordiis Heroinam!

### QUAESTIO XXVII.

*An hodie non sit periculosissimum, ad magnas in Republicâ dignitates evehi?*

Vidi concitato nimis certantem cursu, impactum in metas, ad letale asthma contudisse pectus; vidi violentâ ruentes in repagulum trabe, super ipsum praecipites, dirâ plagâ cruentasse vultum. Et Emblema vidi ingentis cujusdam ac immanis animi, quem iniqua paupertas coarctat, et generis pessum premit humilitas. Tantum ei roboris coacervavit angustia, tantum irritavit indignitas, tantum stimulat conscientia, ut, effuso de repente in primum illud ac iners obstaculum impetu, concidat cum ipso in ruinam; aut eluctatus, et jam etiam victoriâ ferocior, sui viriumque suarum impotem se ad illos ipsos honorum titulos allidat, in quos tam pernici et invidendo pede contendebat. Horum aetas nostra ferax Exemplorum; tot una suppetit, quot multa simul juncta majorum saecula non colligunt: Bassam Nasuf in Turciâ, Miersam Tachi in Perside, in Germaniâ Albertum Walstenium Ducem Fridlandiae, Rodericum Calderonem Comitem de Oliva in Hispaniâ, Conchinum Concini Marchionem d'Ancre in Galliâ, et ibidem ac alibi plures. Ex quibus omnibus visum est unum istum Conchinum, quod magis ad manum sit, in Scenam producere. Hic igitur ex Italiâ in Franciam tendens, Irus quidam in patrio etiam solo non notus, vix tantum in Fortunae castris merebat, quantum villi lixae sufficeret ad victum. Ubi in Aulam se intrusit, nescio quo genio aspirante, favorem Reginae Mariae de Medicis, quae

per id tempus demortuo marito clavum tenebat, tam dextere captavit et ceu proprium sibi vindicavit, ut primo quidem uxorem ab ea impetraverit Eleonoram Dori (haec fabri cujusdam Florentini filia, ob acre ingenium Reginae intima), dein etiam ad Marchionatum d'Ancre, et inter Franciae Pares evectus fit. Tum vero campum nactus, et pueritiâ Regis opportune abusus, res novas moliri, aerarium expilare, externos accire, usurpatâ sibi autoritate militem conscribere, inexpertum Regis animum a proceribus alienare, illos vicissim in Principem suum concitare; his denique luxum ad invidiae summam conjungere, unâ sibi nocte aureorum trecenta et amplius millia per aleam et convivia prodigere. Horum jam saepius criminum <sup>1</sup> coram Rege a Dynastis insimulatus, qui, ut optimus etiam fuisset, zelo tamen fredebant hominis et peregrini et novi sciverat nihilominus callidum et vivax ingenium, speciosis erga Regem suum obsequiis criminationes istas diluere. Sed invalescentibus adversariis, et in dies invidiâ crescente, ajunt tandem sensissè Regem, ab insidiis irrequieti hominis ne capiti quidem suo satis tutum esse. Proinde Vitrio praesidiariorum suorum duci mandat, Marchionem d'Ancre sibi sistat; vivum, mortuum, non interessè. Nec multo post praedictus Marchio, fati impendentis ignarus, Parisios contendit, Regem officii gratiâ conventurus; cumque insolitâ pompâ stipatus Palatio appropinquaret <sup>2</sup>, majores etiam valvas honoris ergo referatas habuit. Sed mox in interiore arêa a Vitrii militibus aliquot sclopetorum glandibus trajicitur, et sine voce aut ejulatu concidit 24. Maji anno 1617. Ubi rumor caedis increbruit, tanta populi exultatio, tantus ad Palatium confluxus cespitantium hinc inde, et mutuis recurribus turmatim labentium, ut insanire prae gaudio tota simul multitudo videretur. Rex aderat e superiori fenestrâ civium studia despiciens. Illi festivas non voces, sed vocifera-

---

1 De his jam saepius. 2 propinquaret.

tiones tollere: *Vive le Roy*. Et Rex quidem caput honoris ergo populo detegere cernebatur, sed liberale istud *Le Roy vous remercie*, quod per suos identidem responderi jubebat, exaudire per immanes strepitûs et clamores non licebat. Interea cadaver Marchionis in cubiculum janitoris protractum; postridie vero sine funeris apparatu elatum, in D. Germani, sub organo forte, in fossam abjicitur, ore pronum, capulo in dorsum illiso <sup>1</sup>. Sed a plebejà rabie mox effossus, ad patibulum raptatur, et ubi ex pedibus aliquantisper suspensus fuerat, comburitur; cineres in profluentem sparguntur. Haec in irritum et ridicula saevitia, quae larvas impetit, et dentem fatigat in exuviis; istud commiserationem jure habeat. Uxor occisi Marchionis Eleonora Dori, in carceras detrusa, exquisitis insimulabatur criminibus laesae Majestatis, et magicarum artium, ac etiam caedis cujusdam Proûille. Ex his morti addicitur; cumque uterum gestare se proclamasset, obstetricum brevi examine praemisso (quod nudum sine re praetextum arguissent), jubetur collum lictori porrigere; ausa etiam tunc sub umbrâ collimantis in cervicem gladii, ad districtum Dei tribunal judicem suum citare. Truncus ad extremum et caput infelicitis Marchionissae flammis data.

### Q U A E S T I O XXVIII.

*An frigidae plagae ferociores incolas habeant quam calidae?*

Immite coelum, et hujus focii <sup>2</sup>, labor, nuditas, egestas, ubi conglobatâ incubuere mole, animos efferant humanum omne exutos et ulcerant. At exulceratos deglubit census et apparatus Barbarorum Principum, et immanitas, vectigalium omnium ac tributorum inexplabile barathrum. Grassantur interim in populo per fraudes furta, per violentiam rapinae, per famem rabies, per tenebras confusio, membrorum per frigora fiderationes,

<sup>1</sup> impacto. <sup>2</sup> fociae.

mutuae per furorem caedes, reorum per deteriores leges supplicia, et indomita, dum lubuit, Tyrannis spectaculo duntaxat et gratis ludit in humano sanguine. Solum iter Legatorum Belgii <sup>1</sup> per Moscoviam, anno 1616 institutum, sufficiet huic confirmandae Sententiae. Rem Belgico <sup>2</sup> stylo describit Antonius Goeterus, qui et ipse in eorum comitatu aderat. Cum, ait, Novogroodtae in castro versamur, et emendi gratiâ saepius in civitatem excurrimus, luctuosum memoratu, qualia per plateas passim se ingererent spectacula. Hîc hominum conglaciata cadavera, et stipitum instar indurata, funestabant publicum; illic mutuis brachiis impliciti discurrebant cum uxoribus et infantibus viri, pannosi omnes, aut nudi verius inter faevissima frigora, fame tabidi, stipem et opem aliquam tam miserabili ejulatu implorantes, ut ferrea etiam fuorum civium corda emollire potuissent, si tantum fuissent ferrea. At illi frustum panis juglandis magnitudine interdum porrigebant; currebant porro miseri, unicum hoc domando frigori solatium nacti, donec moribundi conciderent, etiam tunc neglecti; et inter irrita lamenta exhalabant animam in publico conspectu. Circuibant mane, qui sparsa cadavera in feretrum accumulabant, et in domum aliquam comportabant; inde statim temporibus integrae per plaustra strues efferebantur in puteos extra civitatem ad hoc effossos. Et subdit idem Goeterus: Hieme istâ, quâ nostri legatione funguntur, atroci isto mortis genere absumpta sunt octodecim millia hominum in solâ civitate Novogroodtensi; quid in pagis? Deus bone! Sepulta per octiduum cadavera rursus in nefandas epulas exhumata; mactantes invicem et devorantes homines; imo viscera sua in viscera sua regerentes matres. Quae cursim transeo, enecant enim immorantem. Cuncta interim haec iisdem Legatis, per Starram Russam iter suum prosequentibus, tum oculis tum fide dignis testibus comperta. Pergit porro Goeterus,

---

1 Hollandiae. 2 Flandrico.



et aliam tragoediam adjungit. Irreperant, inquit, Novogroodtae in culinam nostram tres Russi juvenes, qui coquo spe micarum ministrabant. Horum unus cum infirmari coepisset, nocte quadam ab aliis duobus in focum conjectus est; invidiâ scilicet, quod offae inter tres partitae minor portio veniret ad singulos. Postridie semitostum cadaver cum nidore in licibus repertum; quod hospes, nihil casu consternatus, forcipibus detulit in sterquilinum. Sed quod ibidem de Basilio Moscovitarum Imperatore ex eorundum relatione subdit, quam horrendum! Hic Basilius anno 1569, cum esset Novogroodtae, ex ponte quo fluvius Wolgoda instratus est, dejecit in profluentem mille septingentos cives, et multos insuper monachos et sacerdotes, nullâ nisi spectaculi causâ, pastus natantium confusione et cum fluctibus ac morte luctâ. Cumque post alios praedivitem quemdam mercatorem, fune ad lumbos accinctum, in flumen demississet, et immergi crebro ac vicissim extrahi jussisset, tandem restituto in pontem homine petiit per ludibrium: Si miri quiddam in fluvio speculatus fuisset (otium etenim habuerat), enarraret. *Ego vero, inquit mercator, per fluvium et fundum fluvii in Infernum et Gehennam usque prospexi; et vidi ardens inter picem et sulphura, quod te manet, Solium, Tyranne. At ego, inquit Basilius, tibi cui faceto etiamnum esse non piget, de calidiore balneo prospiciam, ubi commodius quam in frigidâ lascivias et argutere.* Et protinus virum corripiens, ac in lebetem olei conjectum, admoto sensim igne lixavit.

---



# ORATIO II

EX EDITIONE LUGDUNOBATAVA ANNI 1665.





---

ORATIO II,  
DE  
REMOVENDIS  
PARERGIS

ET  
NITORE CONCILIANDO DISCIPLINIS,

*quam dixit auctor Lugduni Batavorum, d. 14 m. Oct. a. 1662,  
cum Lectiones publicas in Logicam auspicaretur.*

---

Nitor et intaminata puritas, Charitum prima gratia est. Hic Acheloius ille fons est, quo illae lavantur; sordent Gratiae sine hac gratiâ. Ornatus cum Nitore non est quod se conferat; ante omnem comparisonem primas ei debet. Nitor ingenuus est et sui juris; Ornatus servit, et fingit refingitque se ad mores ac rumores. Illi nativa venustas est; huic varie conquistata, et velut ostiatim emendicata lenocinia. Diffluit hic, totus in pompis, in bullis, in calamistris et phaleris; continet ille et, rejectis omnibus supervacaneis, redigit se intra gyrum necessarij et decori. Hic lascivit, ille viget; hic adulteratus, ille genuinus; hic effeminatus, ille totus masculus est; hic nimis habet, ille fatis; hic redundat, ille sufficit. Sentio equidem, mihi Belgae, ad vos Belgas dicenti, promptum et facile Nitoris encomium esse. Mundus quidam est ipsum Belgium, si a munditiâ, quod volunt, Mundus dicitur; ita hîc nitorem spirant, ad amussim et affabre

se habent omnia. Nitor in aedium structuris, nitor in stratis platearum, in vallorum et portarum munimentis, in pomoeriorum hortis, in aquae ductibus, in navigiorum apparatu; nitor in mechanicis instrumentis, nitor in domesticâ suppellectile, nitor in vestibis, nitor in ipsis hominum corporibus. Et candor in animis nostris, quotquot non degeneravimus, o Belgae! Hic a domorum reductis angulis, hic a reconditis sub terrâ caveis, hic ab editis sub tecti fastigio tabulatis, ab horreis, ab ipsis haris, a pecorum caulis et stabulis fimus, strigmenta, fuligines, araneae, mucor, uligo, et denique quidquid in sordium familiâ est, studiose discutitur, austere proscribitur. Repetitis lavacris, indefessis fetarum, scoparum, peniculorumque deterfionibus, pellucet in fenestris vitra, relucent in lacunaribus robora, in pavementis marmora, in parietibus dolata quercuum, in picturis ebena marginum, aes in pessulis, in feris chalybs. Verbo dicam: Nitor natales suos debet Belgio. Alibi subinde peregrinatur; hoc ei patria est, hic sedem fixit, hic habitat.

Sed si Nitor, quocum Belgis tanta necessitudo, quorum animos totus incessit, quibus jam, quod dici solet, in succum et in sanguinem abivit; si, inquam, formosus ille Nitor exfularet a Scholis? (Scholas non intelligo, sicut vulgus, parietes aliquos, aut pluteos, aut cathedras, aut subsellia; sed tenorem docendi, methodum tradendi Scientias, castam cum Musis nostris consuetudinem illo nomine designo.) Nonne indignum hoc foret, si domi quidem limpidi, foris nitidi, volutaremur autem in Scholâ? Huc centones conferremus et farragines, et

— — — *Crispini scrinia lippi?*

Rem ita se habere, non ajo, non nego, sed tantum, si ita se haberet, quam iniquum hoc foret, perpendo. Et sane hujus turpitudinis vel solam suspicionem, si quae esset, nonne deceret Belgas, tam amantes elegantiae, tam nitoris cupidos, omni conatu, summis viribus a se quantocius amoliri? Existimemus

vero rem non ita se habere; occurrere tamen et cavere licet, et excludere tempestive, quod nondum irrepsit. Ego igitur limum illum, illud coenum designabo, quod imperita si forte manu commotum fuerit, fundo abstat, et sacra Hippocrenes fluentia colluvione sua conspurcet; ut, si fieri potest, mature subducatur ex alveo; sin minus, et fundo quandoque se tollet, subsidere sensim sinamus, ne turbato fonte potemus avidam et Scientiae sitibundam juventutem. Haec cum paucis exsequor et cursim perstringo, tum id obnix deprecor, quae communiter dico, ne sic accipiatis, quasi in Cajum aut Sejum dicta sint. Indole sum alienissimus a faciendo convicio; tum etiam particulatim ignarus, ut qui me nunquam interponam rei ad me non pertinenti.

Parergon illud, illuviem, inquam, Scientiarum nitidas lymphas inquinantem, eructant hae quatuor potissimum Cloacae: PROLOGUS, PROGNOSIS, RHAPSODIA, et ANOMALIA. Ad PROLOGUM spectant *Quaestiones*, ut vocant, *Prooemiales*, prolixae illae, centum argumentationibus, earumque rursus refutationibus, centum *plicis* ac *replicis* exaggeratae, quibus antequam datâ operâ Scientiam aliquam tractent, de ipsâ illâ Scientiâ diffuse tractant. Et ut uno velut exemplo complectar omnia, Logicam tradituri quaerunt, *Quid sit Logica; An sit pars Philosophiae an Instrumentum; An sit Ars an Scientia; Quid Logica docens, quid utens; Quid naturalis, quid artificialis; Quod objectum ejus, quis finis; An ad alias Scientias adipiscendas sit necessaria; In quot partes ac tractatûs dispesci debeat*, et id genus alia quamplurima. Quidam adhuc altius rem ab exordio repetunt, et Logicam (ut in eodem exemplo persistamus) tractaturi, non tantum de Logicâ tractant, sed universim de Philosophiâ, transcribentes huc Nani et Langii, et nescio cujus adhuc similis convasatoris integras Polyantheas. Inepta sunt haec, quod vel me tacente res ipsa loquitur. Quid enim? quaeris quid sit quod ipse traditurus es? Eja trade, et videbimus. Nunquam

melius hoc docebis quam tradendo. Quaeris num sit Scientia, quam traditurus es? Id tu videris. Si enim bonâ et rectâ ratione subnixum est quod differis, certe Scientiam praestabit tua dissertatio; si vero conjecturas tantum accumules et hario-leris, si controverseris tantum, et argumentorum laqueos vicissim nectas ac solvas, si quod aliorum testimonio coecus imbibisti, rursum tuo testimonio propines, — scrupulos, opiniones, confusiones, imposturas, et quidvis potius quam Scientiam conferet tractatio tua. Sed quid opus est ea te disceptando praefari? Age quod agis, dic quod dicendum habes, et litem istam satis dirimet eventus. Quod si tamen disputatio illa non de tuo sit instituta discursu, nec quaeras quis aut qualis ille sit, sed quem et qualem res, quae prae manibus est, vel admittat vel deponat, — hanc fateor ex genere suo non esse supervacuum disquisitionem; quin potius utilem in Prologo, velut legem aliquam operi subsequenti, quam cum ipse praescripseris, aequum est ut rigide ferves. Sed arctandam illam disquisitionem, cum ibi non sit proprius locus ejus, et obiter habendam esse contendo; siquidem alterius longe naturae est, et spectat ad Disciplinas toto coelo diversas, Scientiam aliquam tractare, et de Scientiâ illâ tractare. Logicus aliquis aut Physicus tractatus ad Logicam pariter aut Physicam pertinet; sed quae sunt de Logicâ vel Physicâ Disputationes, non his Scientiis, sed Metaphysicae, aut, quod malo, Disciplinae cuidam, cui nomen non est, quaeque de ipsis Disciplinis agit, debentur. Sed et hisce legibus circumscriptam ac ita contractam Praefationem, in libris quidem perito et exercitato Lectori facile crediderim, sed eâ rudem in Scholis Discipulum non inturbem. Non distraham in sublime, demissum et etiamnum fundamenta molientem. Non raptim in penetralia, laborantem adhuc in vestibulo. Non distineam Metaphysicâ subtilitate, Logica rudimenta requirentem. Discat hic Logicam per partes, etiam ignarus, Quid sit Logica; Quid illa praestet, et quorsum tendat; Quis eam inter et alias Artes ordo, quod



commercium, quae necessitudo; haec et his quaecunque similia tiro quilibet tutus ignorat.

Haec de PROLOGO. Proxima Sentina PROGNOSIS est. Nam amplis illis quos commemoravi PROLOGIS, tum ipsi qui docent dilassati ac fere viribus defecti, tum confusione perditum, et enectum ipsius rei, quae semper differtur, expectatione Discipulum, deducunt ad PRAECOGNITA, ut passim vocant. Et hîc iterum gurgēs, et iterum obruuntur. Nam forte in Logicâ, quo eâ Mentem in operationibus suis dirigi demonstraverint in PROLOGO, non dubitabunt ab ipsâ Mente tractationem suam auspicari; de Intellectu ejusque causis ac origine, ejus operationibus et effectis, ejus cum a voluntate tum a sensibus distinctione, fusa, confusa comminiscētes. Ita praeoccupantibus omnia, et in caput ac primam partem suorum commentariorum attrahentibus, praeter jejuna quaedam et rancida, vix suppetit in progressu, quod dicant, tamquam exhausti jam et marcidi; edentes profecto fungis quibusdam quam simillimos tractatûs; quibus amplius quidem pro capite bulbus obtigit, caeterum exiguus caudex et nulla radix.

Quidam, ut id incommodi devitent, infestant tertiam Cloacam; ad RHAPSODIAS, inquam, se conferunt, et ex his affatim hauriunt, quo res suas, alioqui tenues et exiles, infarciant. Hi pro re natâ varias Historias narrant, lepidas Fabellas admiscēt, Versûs etiam saepe citant e Poëtarum aliquo et Sententias ex Oratoribus, intertexunt et Adagia. Ubicunque, etiam ex rebus levissimis captant occasionem haec in medium producendi; imo non sumunt occasionem ex rebus, sed adferunt. Verbi gratiâ, in Logicâ de *Individuo* forte agentes, in Exemplum adducunt *Alexandrum* et *Bucephalum*, quasi *Petrus* et *Paulus*, qui ad pedes eorum assident, illi muneri obeundo non sint pares; et mox (quasi referatâ jam in RHAPSODIAM fenestrâ) *hic*, inquirunt, *est ille Alexander Philippi, qui tot Persarum exercitûs delevit, et totum Orientem suo subjugavit imperio; Bu-*

*cephalus autem est equus ferocissimus, quem ille puer etiamnum domuit, quo facto Philippus ei praesagiendo sponderat Orbis imperium.* Atque ita passim corradunt ex Veterum Annalibus, imo etiam ex Sacris Paginis, et ex cunctis angulis Exempla, quasi in summâ penuriâ; cum tamen eorum plena sint fora, et quotidie versentur ante omnium ora manusque. Alii ex eadem RHAPSODORUM familiâ, citandis Auctoribus, praesertim veteribus (quod illis obsoleti plus inesse credant) gnaviter incumbunt; et *quid Zeno, quid Leucippus dixerit, quid contra Parmenides et Melissus censuerint, quid Pythagoras et Empedocles, quid Democritus et Epicurus statuerint, imo statuere debuerint,* multis exponunt. His Auctoribus velut in Theatrum quoddam et Proscenium accitis, tum vero Versibus et Adagiis Fabula peragitur; nam *Zeno rem acu tetigit; et Leucippus in Sententiam ejus manibus pedibusque concessit; Parmenides et Melissus extra chorum saltant; Epicurus!*

*Spectatum admissi, risum teneatis amici;*

*Et tandem Aristoteles*

*Solus habet mentem, reliquis errantibus umbris.*

Affigunt iis Sententias, quas nunquam senserunt, de quibus forte ne per somnium quidem cogitaverunt. Si monstrari tibi petas, ubi tandem, ubi Veteres illa dixerint; respondent, quod res est, *Eorum plerorumque commentarios injuriâ temporis intercidisse;* ut nempe vel hoc solo indicio clare intelligas, totum hoc ferme commentum imaginariis eorum conjecturis deberi.

Restat ANOMALIA, congeries immensa sordium; Augiae stabulum dixeris, et Hercules profecto labor est illud expurgare; ita profunde subdidit, et per cuniculos in purissima quaeque surrepit illa colluvio. ANOMALIAM in Scientiis voco cum *Objectum* uni, et tractandi modus alteri cuidam Disciplinae accommodatus est; ut si res Logicas Physice, aut Physicas Logice contemplemur. Plerumque, qui in hac Sentinâ voluntantur, *Objectum* ex quavis Disciplinâ nacti, modum tractandi

mutuantur ex Grammaticâ et Metaphysicâ; quod hae duae Disciplinae generales sint, et omnium quodammodo, Metaphysica quidem rerum, Grammatica vero nominum. Ex Grammaticâ hos praecipue Typos desumunt: *Etymologiam*, *Conjugationem*, *Homonymiam*, *Synonymiam*; ex Metaphysicâ *Causas*, *Effecta*, *Genera*, *Species*, *Conspecies*, *Subjecta*, *Adjuncta*, etc. Penes has Normas expendunt quidquid inciderit, cujusvis illud naturae, et ad quamcunque pertineat Disciplinam. Verbi gratiâ de *Argumentis* acturi (lubens enim Exemplis Logicis insisto, quod in his invidiae minus sit), *Argumentum*, inquiunt, *ab arguendo dicitur, quod est alterius dicta refellere et rationibus allegatis confutare*; Alii (etiâsi forte nemo alius hoc dixerit) *Etymon istius nominis deducunt ab Ergo, quod est praecipua pars et velut anima quaedam Argumenti*. Ubi dicendo exhaustum est quidquid *Etymologiae* lacuna continebat, conferunt se ad secundum Ty-  
pum, nempe ad *Conjugationem*; *Argumentatur*, inquiunt, *is qui alterum Argumentis aggreditur, ut Thesim ab eo propositam evertat, eique Respondens seu Defendens opponitur*; atque ibi, si modo velint, ingens excursus de antiquis ac hodiernis Disputantium ritibus se pandit. Ubi jam etiam exaruit ista vena, *Synonymiam* consulunt: *Argumentum*, inquiunt, *etiam Argum-  
tatio dicitur, item Ratiocinatio, a Ratione, quae in eâ maxime conspicua est*; Gracae vero *Syllogismus* dici potest, de quo *Aristoteles* tam multa scripsit, et inter caetera praeclaram scilicet illam *Definitionem*: *Syllogismus est oratio, in qua quibusdam positis, aliud quid a positis, praeter ea quae posita sunt, necessario sequitur*. Numquid apposite? Ubi etiam ex hoc penu, quidquid suppetebat, depromptum est, convertunt se ad *Homonymiam*: *Argumentum*, inquiunt, *subinde etiam dicitur de Indicio; ut cum Seneca dicit, Primum Argumentum bene compositae mentis existimo posse subsistere et secum morari; ibi Argumentum idem est ac Indicium. Argumentum subinde etiam capitur pro Materia scriptionis vel dicendi, etc. apud Calepinum*. His tandem, quae

Grammatica fuggerebat, belle defuncti, reliquum est ut Metaphysicas considerationes eâdem aviditate depascantur; et primum quidem de *Causis Argumenti* despiciant. *Efficiens et Prima Causa Argumenti*, inquiunt, *Deus est; et quamvis ille Argumentum efficiat, non dicitur tamen argumentari*. Atque ibi ingeritur Locus ex Theologiâ, cur Deus non argumentetur; cui scite subnectent, ubi et quomodo Christus aliquando fuerit argumentatus. *Causa secunda Argumenti est homo, qui Argumentum animo concipit, et ore veluti parit ac in lucem edit*. Atque ibi rursum nascitur controversia, an Angeli etiam, et Mentis nostrae dum a corporeis vinculis solutae sunt, argumententur. *Causa finalis Argumenti*.... Sed abrumpo; vereor enim jam dudum, Auditores humanissimi, ne patientiam vestram naeniis istis, licet fufurratis tantum et summatim propositis, plus aequo fatigem. Antequam sane reliquos Typos Mimesis mea percurrisset, jam vos per Theologorum arcana Mysteria, per Pandectas Jure Consultorum, per Medicorum Aphorismos, Astrologorum Horoscopos, Chymicorum Chryfulcas, Poëtarum Fabulas, Annalium Historias, ac nescio per quas non ambages et in se subinde recurrentes Labyrinthos circumduxissem. Horas et diem absumpsissem capitibus materiae duntaxat enarrandis, ne dixerim pertractandis, et ea, quam immensa rerum multitudo postulat, oratione deducendis. O miscella rerum! o confusio! Haec, quae in Argumentationem tam prolixa, tam ultro citroque conquisita, commentus es, ANOMALE, cui bono sunt? Si quis illa studiose pervolverit, quid inde reportabit emolumenti? Promptior erit ad Argumentandum qui ista sciverit, hebetior qui nesciverit? Ratio dictat et suffragatur Experientia, obesse quidem illa saepe, ut quae diffrahant, quae sensum obtundant et mentem obruant; prodesse nunquam. Quid enim? Nos, qui venam illam tuam exploravimus, ANOMALE, nos qui illud tuum Cornucopiae deteximus, putasne tam abjecte de te sentire, ut Argumento cuiquam imparem te esse suspicemur? Dices si



voles de gerris et lyris, de luto dices, de quifquiliis, de calceis et caligis, et de quovis horum diffuse dices ac tomis integris. Ars id tua promittit, promittunt illi Typi, quos consuetus aspectas, velut totidem semitas in amplissimos dicendi campos excurrentes. Sed si de calceis (ut hos duntaxat in Exemplum assumamus) more tuo scripseris, per *Etymologiam*, *Conjugationem*, *Homonymiam*, *Synonymiam*, *Causas*, *Effecta*, *Species*, et reliquos Typos discurrendo (ut liberrimos hîc discursûs offerunt isti Typi), non unum tamen futorem formet commentatio tua; ipse etiam a lucubratione istâ nihil instructor, calceum non conficias, imo ne refarcias quidem, qua parte detritus est aut rimam agit. Vides igitur, omissâ totâ aliquâ Disciplinâ, de *Objecto* tamen istius Disciplinae diffusissimam institui posse tractationem, adeo ut res Logicae sine Logicâ, Physicae sine Physicâ, Ethicae sine Ethicâ, et ita deinceps, tradi facile possint et soleant. Qui igitur Scientiam aliquam rite excolet, is *Objectum* abstrahat necesse est, et separet ab omni materiâ, et id modo, quod ex intimâ illius naturâ dimanat, amplectatur; caetera tamquam spuria removeat, omnem iis illabendi rimam occludat; tantum abest, ut aucupetur, et intrudat etiam reluctantia. Qui secus fecerit, sciat se in hoc, quod ad Sapientiam est, itinere non progredi, sed vagari; et circuire Delubrum illud Musarum, non adire. Tetrum etiam prae reliquis exhalat haec Cloaca, et mephitim sub auras spergit. Afflat accolis suis garrulitatem, fastum, et desidiam. Et esse quidem garrulos hujus stagni colonos necessum est; nam propositâ quacunque materiâ, etiam eâ quam profundissime nesciunt, ex Typis tamen illis, quos sibi jugiter praefixos habent, nunquam deest quod coaxent. Tumidi sunt etiam, et multo spiritu distenti; ut qui persuasum habeant scire se cuncta de quibus dicunt, et quanto liberalius de illis dicunt, tanto melius scire. Cum vero et per plurima passim oratione divagentur, et facile perspiciant, nihil esse, in quo tali methodo non possint quam latissime palari, etiam si

aliam ab eâ, qua jam instructi sunt, scientiam sibi non conquirant, — huc nullo negotio seducuntur, ut se tamquam omnia mente complexos, et Pandorae cujusdam aut Deae Copiae gratiosos sponso circumspiciant ac mirentur; caeteros autem, quos saepe non latet quidem ars eorum, sed pudet artis eorum, despiciant, velut aridos, siccos, exsanguis, et Minervae (crassae scilicet illius) turpe repudium. Factum desidia sequitur; cur enim studeant, qui sibi satis superque docti sunt? Cur anxie quaerant, quod consecutos se credunt? Quo scandant, quos jam in culmen evexit sua persuasio? Lexica modo sint ad manum, Indices, Analecta, Polyanthaeae, Theatra Mundi, et similes ad omnem pedem facti cothurni; his freti, secure stertunt, et dormiunt, quod dici solet, in utramque aurem. Quin etiam farragines illas (ita frontem perfricuere) subinde non verentur palam hoc Titulo notare venditare: *Dormi secure*. Erubescit ad hoc probrum Diligentiae praefes Aurora, ejulant antelucana galliciana, obmutescunt nocturna conticinia, tam amica Philomusis, tam familiaris societas; dum interim *Anomali* Collectaneis illis et Elenchis suis, ceu baculis quibusdam et crucibus, axillas subnixi, librant se fat belle, et assultim prodeunt; iisdem forte destituti, haesitant ubique, ubique cespitant, et humi repunt potius quam gradiuntur deformes Empusae.

Hicse PROLOGIS et PRAENOTIONIBUS, hicse RHAPSODIIS et ANOMALIIS, cum omnes prope Disciplinae foedum in modum inquinatae sint, tum vel maxime Logices contemneratus est decor et polluta gratia. Purissimus ille latex versus est in obscoenam paludem, unde jugiter in alias Scientias restagnent Parerga, et ANOMALORUM RHAPSODORUMQUE recrementa. Siquidem in Logicâ nunc, praeter ANOMALIAE Typos, quos paulo ante commemoravi, nihil serio tractatur; hi soli praecipue spectantur ibi, inculcantur ibi, et in usum, in habilitatem ac Naturam quodammodo crebris exercitiis deducuntur; caetera tantum incidunt, tamquam praeludia, tamquam antecoenia, et quod eo

conferre aliquid, aliquid eam in rem facere quoquo modo videantur. Res igitur in Parergon, Discursus in excursus, Logica in Paralogifmum converſa eſt. Sed heus erro! Metamorphoſim non patitur illa Forma, divina eſt. Et homines quidem in alias formas mutatos, in Poëtis legimus, non Deos. Illud volui dicere, Paralogiſmum ab ignaris coli pro Logicâ, illum hujus loco ſuffectum ab incautis; Logicam illibatâ gratiâ et inconcuſſâ majeſtate diſceſſiſſe, evaſiſſe, ſubduxiſſe ſe ab indignis. Nam quae ſplendorem illum praefocet confuſio? quae nitorem illum polluat impietas? quae vigorem illum laceſſat temeritas? qui pari fere cum almâ Ratione, qua Deum ipſum referimus ad vivum, dignitate praepollens, quo ſupra tumultum et injurias efferatur altius, vix habet. Ita eſt: divinae illi Particulae tam ſimilis eſt Logica, ita matriſſat, tam undiquaque refert et ſpirat Rationem, ut eodem et nomine et vultu non peregrinis modo, ſed familiaribus ſuis ſaepius imponant. Qua ſpecie quidam e Philoſophiae non infimis proceribus deluſi, et longius quam par erat quaſi reverentiâ ſeducti, Logicam a Scholis ſubmoven- dam eſſe decreverunt, quod eam cum Intellectu confundentes, Diſciplinâ non opus eſſe judicarent, ubi doceret Natura. Sed nempe ſeducti ſunt et errant illi. Quamvis enim Logica ſuas inter ſorores (reliquas, inquam, Scientias) natu maxima ſit, non eſt tamen ipſâ Ratio, ſed Rationem, ex aequo cum ſororibus ſuis, ut matrem agnoſcit. Nec enim *Principia* tantum (quod Rationis officium eſt) et *Communes Notiones* perhibet Logica, ſed *Theoremata*, quae ex *Principiis* elicienda ſunt legitimâ et catenatâ *Demonſtratione*. Exempli gratiâ: *Quod dicitur de Praedicato, dicitur etiam de Subjecto; Ex quo non ſequitur Conſequens, ex eo non ſequitur Antecedens, etc.* non ſunt *Principia*, nec ſimpliciter ſumi poſſunt, ſed probari debent; citra *Demonſtrationem* ſuſpecta ſunt. Ea vero ſine *Demonſtratione* recipere, quod Exemplis quibuſdam confirmari videantur, temerarium eſt et coecum et infinitis erroribus obnoxium; quia ſaepe, quod



in quamplurimis Exemplis obtinet, eo ipso tamen corrui, quod fallat in uno. Et hinc Sapientum Oraculo sancitum est: *Scire est per Definitionem cognoscere*; non vero per Exempla, quae quotquot numero producantur, quamdiu tamen non constat omnia produci, non figunt mentem, sed suspendunt, anxiam an alibi forte non lateat aliquis error. Cum igitur Logica non sit ipsa Ratio, sed partus quidam Rationis, primum quidem hisce cunis, et cum adoleverit illi gynaeceo, Scholis, inquam, et Academiae debetur. Nec faciem tantum et externa lineamenta Rationis aemulatur Logica, sed multo magis indolem, affectûs, ac munia. Matris quodammodo partes circa germanas suas explet haec soror natu grandior; sinu fovet eas et bajulat in ulnis. Hoc ajo, Scientias omnes Logicis *Theorematis* ceu fundamentis suis incumbere; his non probe jactis vacillare, his quassis collabi necessum est, quidquid in reliquis Disciplinis exstructum est molis. Haec Theoremata: *Ex vero nil nisi verum; Ex quo Antecedens, ex eo Consequens*, et caetera, quae Cubo Logico a me nuper edito continentur, subtrata sunt omnibus Disciplinis. Toti Scientiarum machinae supposuerunt arduos humeros Atlantes isti; sine fulcris illis in Scientiis non unus discursus, vix unus passus. Igitur imago Divinitatis est Ratio (hoc ipsa Ratio clamat; hoc in confesso est apud omnes); imago Rationis est Logica (hoc ne quidem adversarii ejus negant, qui eam ideo Scholis interdixerunt). Quid ad dignitatem praeclarius, quid ad majestatem sublimius in Logicam dici poterat? Imago enim quodammodo est res illa, quam repraesentat; imo imago a materiâ, quam insidet, mente cogitationeque separata, non est jam amplius imago, sed res expressa. Sicuti, si posthabitis lineamentis ac maculis, quas tabulae penicillus asperfit, totus in rei, quae ad vivum exhibetur, contemplatione defigare, jam non Artem, sed Artis exemplar, non effigiem, sed effectum, non picturam, sed Naturam vides. Quae cum ita sint, mirari profecto subit, ecquid causae sit, quod Humanus Intellectus



Physicis quam Logicis considerationibus inhiet avidius; quin imo in his plerumque taedio quodam torpeat, quod non nisi alacritas oppugnet, et non nisi assiduitas averruncet. Non est mihi animus classicum canere, et bellum inter Scientias seminare; sacrum hoc inter sorores contubernium importunâ nolim aemulatione discindere. Dicam tamen, o Naturalis Minerva, dicam pace tuâ, quod res est, et fidens animi dicam; memor cum Scientiis, id est cum ipsis Gratiis mihi esse negotium, quae arctis benevolentiae brachiis inter se complexae, mutuas praerogativas libenter agnoscunt, iisque subinde gaudent impensius quam suis. Igitur a Corpore, quod contemplatur, suas Physica mutuatur illecebras; eadem ferme blanditias edocta Mathematica, addictiores procos habet quam Logica. Magis tamen adhuc, quam Mathematica, Physica pellicit, quia non Corpus tantum, ut illa, sed et motum ejus, qui Mentis nostrae cum Corpore vinculum est, considerat. Constat autem Mentem, hîc inescatam carne, ergastulum hoc et compedes suas non ferre jam aequo animo (quod Ratio jusserat), sed perditae amare, et indole degeneri frui servitute, differre libertatem. Haec est illa Humanae Mentis ad Corpus agglutinatio, et totis affectuum uncis adhaesio; et hinc ut plurimum ille a Physicâ, in juveniles praesertim animos, quos carnis ille limus altius absorpsit, pruritus et irritamentum. Logica vero Mentem nostram considerat, ejus Motum seu Discursûs contemplatur; et, quod mirere, Discursûs illos recurûs esse videt, repetitiones, et Idearum miro ordine in se remeantium gyros et flexûs. Adeo ut nullus (quod alibi demonstravi) legitimus sit Discursus, nulla bona *Consequentia*, quae non Repetitione, geminatione, et aliquo ex *Antecedente* in *Conclusionem* resumpto nitatur. Non gaudet hisce, non capitur Mens, a Corpore, cum quo tota consuevit et ferme coaluit, obesa, obtusa, hebes. Nam ipsa sibi non sapit, quae a se exfulat, et desiderium pulcherrimae illius Patriae jam dudum exuit; et ordinatas illas Repetitiones ac Rhythmos ceu recoctam

crambem detestatur; nihil praeter nauseam et vomitum ad ista parat, et Maeandros illos, ingenuos suos lusûs, ut tricas, ut spinas aspicit, imo ut Maleam quamdam suspectat; nihil praeter taedia, fastidia, formidines ad ista gerit. Sed generosae Mentēs exsolvunt se istis *Praejudiciis*; malunt secum, quam cum corpore versari. Et hisce Logicam placere necessum est; sed genuinam Logicam; nam in spuriam illam merito debacchantur; illa mihi juxta ac illis invisa semper erit.

## D I X I.

LOGICA

FUNDAMENTIS SUIS,

A QUIBUS HACTENUS COLLAPSA FUËRAT,

RESTITUTA.

EX ED. LUGD. BAT. A. 1662,  
AMSTELODAMI A. 1698 AD VERBUM REPETITA.





---

# ACADEMIAE LUGDUNENSIS

## CURATORIBUS.

---

*Nobilissimi, Amplissimi Viri.*

**A**ccurrit ad vos Libellus iste, velut ad munitam Arcem adversus obtrectantium insultus; simul etiam acturus causam Auctoris sui, ut qui barbari ac inculti sermonis nescio qua veri specie apud vos insimulatus, indigebat scilicet isto periculo, quo probrum hoc quaecumque dilueret. Patrocinium igitur faciat mihi Libellus meus, et meliora testetur, in loco et cum otio lectus. Non quod flosculos hic et verborum delinimenta pollicear (non patitur haec Argumentum quod tracto, et legat me alibi quia ista volet; nec enim in amoeniori illo genere dicendi sine monumento sum); sed sermo, quantum per Artis nostrae praecepta licuit, Latinus est, non quaesitus, familiaris mihi et in ore natus, quem non praemeditatus effundo, Belgicâ linguâ, quae mihi materna contigit, in plerisque promptiorem. Quod nec mirabitur, cui vel tantillum perspecta fuerit vitae meae ratio, utpote qui inter assiduas jam inde a prima pueritia lucubrationes, quidquid in hoc idiomate cultiorum Auctorum est, evolvi. Adolescens Philosophiam Lovanii duodecim annos palam, et sex postremis annis in prima cathedra, cum frequentissimo Discipulorum affluxu professus, nuper autem ad virilem aetatem, et simul etiam ad Academiam vestram e naufragio rerum mearum appulsus, nihildum remisi de antiquo rigore; eandem operam, etsi privatam et minus quaestuofam, navo Ju-

ventuti vestrae Collegia mea frequentanti. In his, cum Latio mihi semper idiomate loquendum esset, ita moderabar istam provinciam, ut ornatum et Latinitatem sponte quasi miscentem se dissertationibus meis, non rejicerem unquam; squalidum illud ac barbarum, sine quo nec sibi nec aliis docti videntur multi, non tantum non affectarem, sed studiose repellerem; ac si quid hujus generis ex aliorum consuetudine velut contagio irrepsisset in sermonem meum, id protinus excuterem. Sed sicubi tenor Latinae Linguae vim faceret Sensui, tenebras affunderet Dictioni, laqueos necteret Philosopho; hic vero mihi et Sensus moribus, et Res verbis, et Veritas Latinitate potiora videbantur. Et cur id mihi non sumerem, quod Ratio deferebat? Imo cur id mihi Religioni ducerem Philosophus, quod summi illi et veteres eloquentiae Romanae praefules non temere, non in trivio forte, sed ad aram Suadae, inter polluctum et media sua sacra verfantes, profanum non putavere? Hinc apud ipsum Ciceronem trita parenthesis (*ut ita dicam*) qua plerumque remollescunt, quae ex stricto jure Sententiae, praeter morem Latinae Linguae dici videbantur. Sed harum jam satis superque rationum est; nec decet Vos diu ex uno negotio suspensos habere, quos oportet pares esse tam multis. Reliquum est, ut genibus vestris advolvant se deploratae res meae et succisa fortuna, quae a Lustris jam fere, quo hic verfor, praeter malevolorum odia, calumnias, fastidia, contemptum, et rabiem nihil sunt; id innuentium, id gestu prae se ferentium, id ipso rerum mearum huc usque successu convincere volentium, Spem decolasse, et de me conclamatum esse. Sed ego spem illam, quam in Vobis et Humanitate vestra collocaveram, nondum abjeci; persuasum enim habeo, curae vobis et cordi imprimis esse, doctos viros eosque bonos ut foveatis, praesertim cum mala fortuna colluctantes, et perspectos jam Vobis ac probatos. Sic decet, sic agite; ita Deus benefaciat isti quae vobis incumbit Reipub. Literariae; ita benefaciat Summae, cujus potiores partes Vobis

commiſſae ſunt, Rei, et Vos utrique ſoſpites diu ac incolu-  
mes conſervet. Hoc meum Votum eſt. Valete. Dabam Lugd.  
Batav. 1. Auguſt. MDCLXII.

*Nobiliff. et Ampliff.*

D. D. V. V.

Obſervantiſſimus Cultor

ARNOLDUS GEULINCX.

---

## LECTOR BENEVOLE.

---

Genus quoddam hominum est in Logicam universe injurium; pusillum iis, minutum, et mera quisquiliae, quidquid ab hac Arte proficiscitur. Quid his hominibus facias, quibus nihil Magnum videtur esse praeter Colossos et Obeliscos? Eja tamen resipiscite, quiqui estis; ne ite extra vos diffusi, et in Carnem ac Corpus confusi; intro ad vos ipsi et ad Mentem vestram venite. Hic quaerite; hic interrogate, *Quid sit Magnum?* Utique non aliud feretis responsi, quam *Magnum esse quid multae considerationis*, id est, in quo Mens nostra multa cogitanda invenit, idque veris, clavis, et ordinatis cogitationibus. Hoc stabilito (ut nihil de aliis dicam) solam vobis *Consequentiam* ob oculos ponite. Invenietis rem esse non Magnam modo, sed inter Maximas; ita sunt infinitae Proprietates, quae ex illa scaturiunt, ordine pulcherrimo et mirâ concatenatione se trahentes, omnes nativâ luce, quam ortu suo (id est *Demonstratione ex Natura Consequentiae*) trahunt, radiantes, ut Mens tantae magnitudini contemplandae par esse vix possit, et Animus jugi Rationum serie pastus et expletus capere non possit suam voluptatem.

Quod si hoc, quod *Magnum* Menti esse diximus, insuper summam attentionem requirat, omnem distractionem prohibeat, totam in se Mentem deponat, minimâ Idearum transpositione vitietur, id jam etiam Menti *Subtile* vocabitur, *Tenerum* et cum cura ac circumspeditione tractandum. Atque haec etiam omnia in *Consequentia*prehendimus; nam si v. g. has ex ea



*Proprietates* elicueris: *Ex quo Antecedens, ex eo et Consequens*; item: *Ex vero nil nisi verum*, etc., nisi accures, nisi totus attendas et ordinem in Ideis sollicitè serves, minimâ turbatione deflorantur; veluti *Verum non nisi ex vero*, aut *Ex quo Consequens, ex eo et Antecedens*, etc. absurda sunt.

Tandem si quod ita *Magnum, Subtile, ac Tenerum* est, nullâ praesumptione vel hypothesi Mentem implicet, sed sinat se totum solâ manu Rationis evolvi, insuper *Purum* vocabitur. Quod etiam liquido competit rebus Logicis; nullam enim Suppositionem haec Disciplina desiderat; estque haec Logices ad Physicam comparatae manifesta praerogativa. Sunt igitur *Magna*, eademque *Subtilia* ac *Tenera*, insuper et *Pura*, quae in Logica tractanda sunt.

Sed quid refert, si tractanda sint? Non tractantur. Fateor; sed hoc Docentibus vitio vertite, non Doctrinae. Miscent illi plerumque; imo non miscent jam, quia ferme peregrinum est quidquid habent. Tantum ex Metaphysica *Tractatus* aliquos huc transcribunt, truncos, mutilos, graviter affectos. Et quod inter miserendum impense rideas, cum ita confoderint et ferme truncidarint, putant hoc solo Logicae (quasi illa Nosocomium quoddam sit) proportionatos esse, cum alioqui integros illos et vegetos *Tractatus* fateantur ad Metaphysicam pertinere.

Scio equidem, quid eos moverit ad accersendum distortam hanc et male coherentem turbam. Nempe videbant *Argumentationes a Causis, ab Effectis, a Subjectis, ab Abjunctis, etc.*, itemque *Definitiones* ac *Divisiones* ex iisdem *Locis* excitas, sine auxiliaribus istis copiis aggredi se tuto non posse. Sed potiori jure cogitandum illis fuerat, cum his *Locis* nullum sibi negotium esse debere, eas considerationes ad se non spectare. Quod facile vidissent, si Naturam *Objecti* sui v. g. *Consequentiae* sedulo contemplantes, tantum inde sumpsissent, quantum illa suppeditabat, et ex his sumptis, rursus quantum illa suppeditabant, et porro; studiose semper caventes, ne quid corraderent alieni.

Vidissent se tali *Abstractionis* et seclusionis semitâ (quam solam et unicam insistant *Scientiae*) a *Consequentia* quidem ad *Antecedens* et *Conclusionem*, et ab his ad *Enunciationem* et *Contradictionem*, indeque ad *Affirmationem* et *Terminos*, *Terminorum Concordiam Discordiamque*, aliaque passim a nobis in hoc Libello proposita, posse devenire; sed laudatam illam et arctam Semitam nunquam eos ad *Causas*, ad *Effecta*, *Subjecta*, similiaque, quae Metaphysicae tantum considerationis sunt, ducturam fuisse.

Ego igitur conatus sum, quod Titulus Libelli promittit, ejectis omnibus alienis, quae jam totam fere Logicam occupaverant, eam sibi restituere. Num feliciter? Judicium penes alios esto. Equidem vapulaturum me apud Rhapsodos et facile pervideo, et non moror. Quid? inquit, e Logica exterminare amplissimos illos *Locos*? quibus Juventus instructa erat ad *Syllogisandum de omni proposito Problemate*, etiam in materia spectante ad Disciplinam aliquam cui nomen suum non dederant, et de qua nihil intelligebant; idque horas integras, prius ad ravim quam ad dicendi penuriam terminantes? Et vero Methodum etiam a Logica divellere! hocce castigare Logicam, an castrare est? et eas illi partes exsecare, quibus Mater (plerumque tamen Ancillam malunt dicere) Scientiarum audiebat, partes tam utiles Juventuti, quae Libros jam nunc et magnos Tomos conscribendos  
*de tenero meditatur ungui.*

Quis non aegre ferat, extirpatis succulentis illis et floridis, relinqui tantum arida quaedam et stricta, quae saepe tetricum illud A, B, C Mathematicorum affectant? Hae et similes Rhapsodorum querelae (quas ex sensu, non forte quem ipsi sed quem res ipsa vult, interpretatus sum) cum se ipsae satis explodant, non est quod a me pluribus refellantur.

Caeterum hoc serio moneo, et Libellus meus pluribus in locis praefert, me sicut *Logicam Fundamentis suis restituere* fatago, ita de solis *Fundamentis* cogitasse; quidquid in Arte nostra sublimius, imo quidquid prolixius erat, studio praeter-

miſſiſſe et alio reſervaviſſe. Sciebam nempe, fundamenta et demiffa et conſtipata eſſe debere. Sed et haec eſſe Fundamenta, quae jeci, et hiſce ac non aliis, quidquid ad Logicam ſpectat (Celfum illud ſit an Humile, Anomalum an Analogum) ſuperſtruendum, et quidquid hiſce non nititur, in hac Arte parergon eſſe, certus ſum.

*Argumentorum* nucleus et intima Natura reſidet in *Cubo* noſtro, quem ſex *Quadratis* inſtruxi, cortex vero et exterior apparatus ac Forma ex ſuis *Capitibus* petenda eſt; in hac ſubinde prolixior fui, quia id intra cancellos Logicos licebat, ac non ideo opus erat effringere; ſimul etiam conſului Diſcentibus, quibus illa *Forma* notior et ſenſum magis ferit; ſimul etiam morem geſſi Logicis, upote qui non ſoleant Argumenta, et quidvis aliud ſui *Objecti*, niſi penes exteriorem illam *Formam* et apparentiam conſiderare; ut aliquoties mihi notatum in hoc Libello.

In ordine ſubinde et nitore Demonſtrationum video quod emendari poſſit, ac ipſe, ſi hoc jam integrum eſſet, pluſcula emendarem; ſed dandum eſt aliquid primae inventioni. Sine Antefignano hic fui; ſimul etiam anguſtiâ temporis circumventus; cum Opuſculum, primo quidem lineamentis ſuis leviter adumbratum, biſeſtri fere ſpatio, quo ſub prelo deſudavit, potiores ſuas partes a me receperit.

Ad extremum moneo, ne curſim haec legas. Euripus Logicus non patitur ſe navigari tam plenis velis; et periculum, ne crebris illis rerum in ſe recurrentium gyris in vertiginem actus, evertare, confuſionum fluctibus involvendus. Atque ab inquietis illis et feſtinantibus Ingeniis omnia ſunt in Logicam convicia; cum enim aegre ferant irretiri ſe (quod tamen ſine cura palantibus et concitatis neceſſum eſt evenire) diras dicunt reti, quaſi iſtâ impotentiâ jam ſatis ſe exſolverint.

---





---

# LOGICAE RESTITUTAE

## PARS I.

### SECTIO I.

#### CAPUT I.

##### *De Affirmatione et Negatione.*

1. **R**adix Logices est Affirmatio. Quidquid enim in Logica tradendum est, ex ea deducitur continuâ et non interruptâ serie usque ad ipsos Artis nostrae fructus, quos vocant *Instrumenta Sciendi*.

2. Quid sit Affirmatio, non debemus dicere. Primum hoc est in Logica, insuper etiam notissimum, atque Actum illum, quem Affirmationem dicimus, sexcenties agimus quotidie; exempla interim adducam, ne cui forte sit ambiguum *Affirmationis* nomen. *Sto* itaque est Affirmatio, item *Disputatur*, et *Petrus est doctus*, etc.; qui enim haec talia pronunciant, censentur aliquid Affirmare, atque adeo eorum pronuntiationes *Affirmationes* vocantur.

3. Ex ista radice proveniunt nobis primum duo furculi, Subjectum et Praedicatum. Nempe si affirmem, oportet esse de quo affirmem (atque illud *Subjectum* dicitur), et oportet esse quod de illo affirmem (vocaturque *Praedicatum*). Sic in *Sto* Subjectum est *Ego* (de me enim affirmo, cum stare me dico), Praedicatum est *Stans* (hoc enim ibidem de me affirmo). Subjectum Grammaticis *Persona*, Praedicatum illis anonymum esse videtur. Subjectum item et Praedicatum communi nomine dicuntur Logicis *Termini* et *Extrema*; claudunt enim utrimque Affirmationem, dum ea isto ordine digeritur, quem sensus requirit.

4. Ultra haec extrema reperitur in Affirmatione aliquid sensu medium, quod Logici *Copulam*, Grammatici *Verbum* vocant. Atque non est aliud, quam Affirmandi Nota; sicut *An* est Nota interrogandi, *Hem* vocandi, *Vae* minandi, *O* exclamandi, etc., sic in hoc tota versatur Copulae seu Verbi natura, quod Affirmandi Notam agat. Quidquid ultra hanc Notam adhaeret Verbo, non spectat ad Verbum, sed ultra Naturam ejus consistit; unde errant Grammatici, dum genuino Verbo *Sum* tot spuria Verba, Activa, Passiva, Neutra, Deponentia, etc. ad censent. Non sunt haec Verba, sed Verba cum extremis suis, aut altero extremorum; v. g. *Sto* non est Verbum, sed Verbum in se complicat simul cum Subjecto seu Personâ praecedente, et Praedicato sequente; si autem dixerō *Petrus stat*, illa dictio *Stat* non quidem jam Personam in se continet (haec enim praecedat in illa dictione *Petrus*), sed saltem Verbum cum Praedicato.

5. Praeter hanc scoriam Extremorum connascuntur subinde Verbo quidam Modi: ut Modus temporis praesentis, Modus temporis praeteriti, et futuri. Et prior quidem illa scoria Grammaticos fugit, haec etiam Logicos latet; putant enim hanc pertinere ad Verbi naturam, cum in Definitione Verbi ingerant mentionem significationis temporis. Iidem sibi non constant, alibi dictantes, in Propositionibus aeternae Veritatis Verbum absolvi a tempore; nihil enim a natura sua absolvi unquam potest. V. g. hîc: *Duo et tria sunt quinque*, Verbum *Sunt* absolvitur, inquiunt, a tempore, id est, nullum tempus significat; non est enim sensus, *Duo et tria jam esse quinque, aut olim, aut nuper, aut cras*, sed simpliciter, *Duo et tria esse quinque*; adeo ut Verbum *Sunt* ibi nihil aliud agat quam Affirmandi Notam; atque ita genuinum Verbum est, ab omni scoria probe repurgatum. *Est* autem hîc: *Carolus est rex*, non est purum Verbum; etsi enim ab extremis suis secretum sit, coaluit ei tamen adhuc Modus seu Adverbium temporis, a quo sic exi-

mendum est: *Carolus nunc est rex*; illud enim *Est*, quod ibi jacet, purum putum Verbum est, nuda Nota Affirmandi. Caeteris enim muniis, quae quandoque obire solet ista dictio, defunguntur ea quae circumstant; ipsa his omnibus exuta nec Tempus significat, nec Personam, multo minus Praedicatum; tantum sibi retinet Grammaticum aliquod jus quaedam ex his officiis, datâ opportunitate, resumendi.

6. Atque ita purum et proprium Verbum, seclusis omnibus ei peregrinis, exhibuimus; eratque operae pretium, quia in radice nostra (in Affirmatione) Verbum est princeps et velut anima; extrema enim tantum corpus quoddam suppeditant Affirmationi. Veluti *Carolus rex* non est Affirmatio, sed cadaver aliquod Affirmationis, quod simul ac Verbum accessit (hoc modo: *Carolus est rex*), jam reviviscit et Affirmationem spirat.

7. Affirmationi opponitur Negatio; et quid illa sit, etiam non dicimus, nisi per exemplum. *Non disputatur, Petrus non est doctus, etc.* sunt Negationes. Cur haec similiaque multa definienda non sint, videbis infra, ubi de Definitione agam. Hoc interim nota, in Negatione semper contineri Affirmationem, ut in *Non sto* continetur *Sto*; continetur, inquam, Affirmatio, sed non integra, non illibata, at corrupta refractaque per Adverbium negandi *Non*, quod et ipsum seorsim aliquando vocatur *Negatio*, sed alio sensu. Sicut ergo naufragium non potest esse sine navi, sic neque Negatio sine Affirmatione; quamvis in naufragio navis, et in Negatione quodammodo pereat Affirmatio. Quia igitur Affirmatio est in Negatione, hinc etiam Subjectum et Praedicatum sunt in Negatione, hoc ipso, quo illa sunt in Affirmatione. Non sunt tamen Subjectum et Praedicatum ipsius Negationis (quamvis sic loqui soleant Logici per abusum), sed Affirmationis inclusae.

8. Affirmatio et Negatio communi nomine vocantur *Propositiones*. Sic ubi proinde Propositionem dixerimus, oportet eo nomine sive Affirmationem sive Negationem intelligere.

## CAPUT II.

*De Subjecto et Praedicato.*

1. Subjectum et Praedicatum tripliciter sumuntur: per Actum, per Potentiam, per Dignitatem. Subjectum actu est, de quo hic et nunc affirmamus; Praedicatum actu, quod hic et nunc affirmamus de aliquo. V. g. cum jam dico *Sto*, Subjectum actu est *Ego*, Praedicatum actu est *Stans*.

2. Subjectum potentiâ est, de quo possumus affirmare aliquid, sive interim jam affirmemus sive non; Praedicatum potentiâ est, quod affirmare possumus de aliquo, sive interim ipsum jam affirmemus de illo sive non. Sic *Homo* est Subjectum potentiâ, quia possumus de illo affirmare, quod sit *Animal*; similiter etiam *Homo* est Praedicatum potentiâ, quia potest affirmari de *Petro*. Subjectum potentiâ vocant Grammatici *Substantivum*; Praedicatum potentiâ, saltem si purum fuerit, vocant *Adjectivum*; de quibus infra.

3. Subjectum dignitate est id de quo alterum, ad quod comparatur, affirmari potest affirmatione verâ; Praedicatum dignitate est quod de eo, ad quod comparatur, affirmari potest affirmatione verâ. Sic *Aurum* est Subjectum *Metalli*, et *Metallum* est Praedicatum de *Auro*, utrumque per dignitatem; nam et *Metallum* meretur affirmari de *Auro*, et *Aurum* meretur subijci *Metallo*, quod meritum seu dignitas aestimatur penes Affirmationem veram, in qua hoc de illo dicatur. *Aurum* vero est quidem Subjectum *Lapidis* per potentiam, imo etiam actu, si aliquis dicat: *Aurum est Lapis*; sed non est Subjectum dignitate, cum *Lapis* non possit affirmari de *Auro* verâ Affirmatione. Praedicatum per dignitatem vocant Logici *Praedicabile*, et Subjectum dignitate vocant *Subjicibile*; nos retinebimus nomen *Subjecti* et *Praedicati*, quia vix de alio Subjecto et Praedicato loqui solent Logici, quam de Subjecto et Praedicato per dignitatem. Cum



proinde Subjectum aut Praedicatum dicimus, oportet ea per dignitatem sumere, nisi aut nos ipsi aliter moncamus, aut circumstantiae nostri sermonis aliud exigant.

4. Praedicatum de Subjecto *Dici*, *Affirmari*, *Praedicari* censetur; Subjectum vero ei *Subjici* dicitur; quae omnia solent etiam per dignitatem sumi. Sic enim dicimus: *Lapis* non affirmatur de *Auro*; quod perinde capitur, ac si dictum fuisset: non affirmatur in verâ Affirmatione; alioqui *Lapidem* de *Auro* dici, sive verâ sive falsâ Affirmatione, nihil obstat.

5. Praedicati haec est insignis Regula: Nihil censetur absolute affirmari de aliquo, nisi affirmetur de ipso Affirmatione tali, in qua nihil Subjecto, nihil Praedicato, nihil Copulae addendum subaudiendumve sit, ut vera fiat. Hinc *Aurum* non est Praedicatum de *Metallo*; etiamsi enim verum sit *Quoddam metallum est aurum*, ibi tamen aliquid apponitur Subjecto, quo non apposito Affirmatio ista non foret vera; siquidem *Metallum est aurum* non est verum, cum metallum non potius sit aurum quam argentum aut aes, etc. Similiter *Immortale* non affirmatur de *Homine*; etiamsi enim vera sit haec Affirmatio: *Homo est immortalis secundum animam*, ibi tamen aliquid additur Praedicato, quo dempto non esset verum quod restat, *Homo est immortalis*. Tandem etiam *Homo* non est Praedicatum de sua *Statua*; etiamsi enim haec vera sit Affirmatio: *Statua humana apparenter* (seu secundum apparentiam sensûs) *est homo*, tamen ibi aliquid apponitur Copulae, quo detracto restantia ista non est vera: *Statua est homo*.

6. Non nego tamen, *Aurum* dici de *Quodam metallo*, aut *Immortale secundum animam* affirmare de *Homine*, aut *Apparenter hominem* de *Statua humana*; siquidem ista Praedicata dicuntur de Subjectis illis, ad quae ibi comparantur, sine ullo addito vel subintellecto; sed tantum occurro et caveo, ne ideo existimes, aut *Aurum* de *Metallo*, aut *Immortale* de *Homine*, aut *Hominem* de *Statua* suâ dici; de istis enim Subjectis non dicuntur ista

Praedicata, nisi aliquid superveniat Subjecto, Praedicato, vel Copulae, expresse vel implicite.

7. Ex his facile intelligitur ista Proprietas Praedicati: Praedicatum in se quodammodo continet suum Subjectum. Continet, inquam, penes Affirmationem, et Disjunctive, sicut *Metallum* continet *Aurum*, *Aes*, *Stannum*, etc. *Metallum* enim est *Aurum* vel *Aes* vel *Stannum*, etc. Praedicatum autem non semper continet disjunctive suum Subjectum, tamquam partem suam (sicut *Metallum* continet *Aurum*), sed subinde etiam tamquam idem se ipsum; sic *Metallum* etiam est Praedicatum de *Metallo*, quia metallum maxime metallum est. Non tantum enim Totum continere Partem suam dicitur, sed et se ipsum; sicut numerus binarius non tantum singulas unitates, sed ambas simul, id est, se ipse continet. Igitur Praedicatum quodammodo Totum est; Subjectum autem vel pars ejus, vel idem est cum ipso.

8. Secunda Proprietas: Subjectum, quod penes Affirmationem continetur in Praedicato, illius Praedicati Subjectum est. Vel enim erit idem cum ipso Praedicato; et sic sane Praedicatum de ipso dicitur, quia A est A; vel cum alio subjecto disjunctive continebitur in Praedicato; et sic iterum Praedicatum dicitur de isto Subjecto, quia manifestum est quod A sit A vel B.

### C A P U T III.

#### *Primum Quadratum Logicum.*

1. Quid sit Quadratum Logicum, et quorsum tendat, commodius dicam infra, ubi sex similibus Quadratis propositis, Cubum Logicum ex illis constructum exhibebo. Hoc sufficit in antecessum admonere, in quolibet Quadrato quatuor Axiomata reperiri, velut totidem Lineas Quadratum illud circumscribentes; quorum duo, Sensûs affinitate conjuncta, Affirmativa

sunt, pariuntque ex se duo Negativa per Conversionem Soriticam. Sed quid sit ista Conversio, non potest hic dici, sed infra parte 3 dicitur.

2. Primum Axioma: Quod dicitur de Praedicato, dicitur etiam de Subjecto. Velut si A sit Praedicatum, et B Subjectum ejus, atque C dicatur de A, necessum erit, C etiam de B dici. Cum enim A sit Praedicatum de B, consequenter A continet B (*per 1. propr. praeced. cap.*); sed cum C dicatur de A, consequenter C continet A; ergo C etiam continet B, quia quod continet continens, continet etiam contentum ejus (ut quia cella continet dolium, in quo continetur vinum, hinc etiam cella continet vinum). Si igitur C contineat B, nempe quoad affirmationem, ut hîc intelligo, ergo C affirmabitur de B (*per 2. propr. praed. cap.*). Quod erat demonstrandum.

3. Secundum Axioma: Quod non dicitur de Subjecto, non dicitur etiam de Praedicato. Si enim diceretur de Praedicato, jam etiam diceretur de Subjecto, juxta praecedens Axioma. Hoc est Axioma Negativum, correspondens praecedenti Axiomati Affirmativo per Conversionem.

4. Tertium Axioma: De quo dicitur Subjectum, de eodem dicitur et Praedicatum. Si enim aliquid contineatur in contento (Subjecto), etiam continebitur in continente (Praedicato). Est hoc alterum Axioma Affirmativum, quod sensûs affinitate conjunctum est cum primo Axiomate.

5. Quartum Axioma: De quo non dicitur Praedicatum, de eo nec dicitur Subjectum. Si enim Subjectum de illo diceretur, jam etiam Praedicatum de illo diceretur, juxta tertium Axioma. Hoc est Axioma Negativum, per Conversionem correspondens Tertio Axiomati.

6. Quia nudas illas et abstractas demonstrationes vix percipiunt Tirones, adhibebimus exempla. Sint isti Termini: *Aurum*, *Metal-lum*, *Corpus*; cum ergo *Metallum* sit Praedicatum de *Auro*, et *Corpus* dicatur de *Metallo*, hinc *Corpus* etiam dicitur de *Auro*,

juxta Primum Axioma (quod dicitur de Praedicato, dicitur etiam de Subjecto). Rurſum, cum *Metallum* fit Subjectum *Corporis*, *Metallum* autem dicatur de *Auro*, hinc etiam *Corpus* dicetur de *Auro*, juxta Tertium Axioma (de quo dicitur Subjectum, de eo dicitur et Praedicatum). Sume jam iſtos Terminos: *Aurum*, *Metallum*, *Lapis*; quia *Lapis* non affirmatur de Subjecto (*Auro*), hinc neque affirmatur de Praedicato (*Metallo*), juxta Secundum Axioma. Rurſum quia Praedicatum *Metallum* non dicitur de *Lapide*, hinc nec Subjectum (*Aurum*) dicitur de *Lapide*, juxta Quartum Axioma.

7. Dices: *Brutum* non dicitur de Subjecto (*Homine*), et tamen dicitur de Praedicato ejus (*Animali*); *Quoddam enim animal eſt brutum*. Reſpondeo: *Brutum* non dicitur de *Animali* (falſum enim eſt, quod *Animal ſit brutum*, cum animal non ſit potius brutum quam homo), ſed *Brutum* tantum dicitur de *Quodam animali*; vide Reg. Praedicati cap. praeced. Licet autem *Quoddam animal* ſit Praedicatum de *Homine*, hoc modo: *Homo eſt quoddam animal*, eſt tamen aliud *quoddam animal*, quod de *Homine* affirmatur, quam de quo *Brutum* affirmatur.

#### CAPUT IV.

##### *De Subſtantivo et Adjectivo.*

1. Subſtantivum, ut cap. 2. monui, idem eſt quod Subjectum potentiâ, ſeu id de quo aliquid affirmari poteſt, id de quo aliquid dicere poſſumus; ut *Homo*, *Lapis*, *Petrus*, etc. Sed gravis hîc veſtibulum pulſat difficultas: Num ergo quidlibet ſit Subſtantivum? de quolibet enim dici aliquid poteſt. Reſpondeo: de rebus ipſis, praeveniendo omnem noſtram expreſſionem, qua eas verbo aliquo (oris ſcilicet vel mentis) exprimamus, nihil poteſt affirmari; tunc tantum affirmari de illis aliquid poteſt, cum apte exprimuntur. Quia vero quidlibet ſic poteſt apte



exprimi, hinc quodammodo de quolibet etiam affirmari aliquid potest, sed remote tantum, quamdiu non exprimitur; tunc demum proxime, cum idonea expressio accessit. Ratio manifesta est, quia non possumus dicere de aliquo, nisi ipsum intra dictionem nostram admissum sit; intra illam autem non admititur aliter, quam si ipsum etiam dicatur seu voce exprimatur; adeoque prius est ipsum dici, quam de ipso aliquid dici.

2. Ajo igitur, inter res nudas et nulla voce investitas nullum etiam Substantivum esse; cum de rebus ut sic affirmare non possimus; inter autem res expressas, nominatas, ac intra dictionem nostram admissas (quas quidam *Themata* vocant) illae tantum habent rationem Substantivi, quae tali modo exprimuntur et significantur, ut de illis affirmari aliquid possit; ita ut tota ratio Substantivi consistat in certa expressione seu certo modo significandi. Sic *Sapienter* non est Substantivum, quia, ut ibi jacet, nihil potest de illo dici; *Sapientia* autem est Substantivum, quia de illa dici aliquid potest.

3. Adjectivum est Praedicatum purum; ibi Praedicatum fumitur per potentiam, adeoque efficitur hic sensus Definitionis: Adjectivum est tale Praedicatum potentiâ, ut non sit Subjectum potentiâ, id est, ita potest affirmari de aliquo, ut de eo nihil possit affirmari. Ut *Albus*; potest enim affirmari de *hac charta*, hoc modo: *Haec charta est alba*, at ipso non possumus affirmare, nisi ei aliquid apponamus; tunc vero non de ipso, sed de composito quodam ex ipso affirmamus. Veluti si dixerimus: *Album est visibile*, ibi non de *Albo* seorsim, sed de *Ente albo* seu de *eo quod album est* affirmavimus; sensus enim est: *Quod album est, est visibile*.

4. Substantivum de se ipso affirmari videtur; ut: *Petrus est Petrus*, *Lapis est Lapis*, etc. At Adjectivum ne quidem de se ipso dicitur, quia nihil de eo dicitur; unde cum Adjectivum de se, aut aliud quidpiam de Adjectivo dici videtur, Adjectivum ex parte Subjecti positum adsciscit sibi *Ens*, quia Adje-

ctivum se solo non potest implere locum Subjecti. Sed si acutius rem perpendamus, forte non tantum dicemus, Adjectivum non posse subjici, sed etiam, Substantivum non posse praedicari. Sicut enim Adjectivo aliquid deest, cum subicitur, quo minus impleat istum locum, sic in Substantivo aliquid redundat, cum praedicatur, quo locum istum excedat. Nempe in Substantivo semper residet *Ens*, quod non est aliud quam Nota Subjecti seu Substantivi; quae certe Nota redundat in Substantivo, dum ex parte Praedicati ponitur, adeoque illâ Notâ tunc tamquam superfluâ excidente, non superest ex Substantivo nisi merum Adjectivum. Igitur sicut Substantivum est Subjectum potentiâ, sic Adjectivum in hac sententia non est aliud quam Praedicatum potentiâ; ita ut non sit necessum in definitione Adjectivi apponere *Purum*. Hanc sententiam ita obiter propositam non sequar in hoc libello, cum plusquam credi possit praejudicet communi Doctrinae, cui me, quantum fas erat, attemperare studui. Supponam itaque, Substantivum etiam posse affirmari et stare loco Praedicati, non detruncatum. Alioqui, si ne quidem *Ens* affirmari posse dixerò, quod et ex hac sententia sequitur et verum est, nimis quam Paradoxa dixerò, et jugulum petiero hoc Logico pugione innumeris Metaphysicorum subtilitatibus; quod jam equidem non faciam.

5. Adjectivum substantivari dicitur, quando Substantivum aliquod (praesertim *Ens*) ei subauditur; non quasi Adjectivum eo casu fiat Substantivum, sed quod Compositum ex Adjectivo et subaudito Substantivo sit quoddam Substantivum. Adjectiva Substantivata sunt semper ista Adjectiva neutro genere constructa, quae seorsim exprimuntur ex parte Subjecti. V. g. *Dulce delectat, Grave cadit, etc.*; ibi enim ex parte Subjecti subintelligitur *Ens*, quod exponitur *Id quod est*, hoc modo: *Ens dulce delectat, Id quod grave est cadit*. Solent etiam Adjectivum et Adjectivum Substantivatum multis casibus vulgariter aestimari et pro iisdem haberi, potissimum in materia Argumen-

torum; revera tamen multum differunt, habentque se ut pars et totum, nam Adjectivum est pars sui ipsius Substantivati. V. g. *Dulce* substantivatum est *Ens dulce*, cujus Adjectivum *Dulce* tantum aliqua pars est. In materia igitur Essentiae et Definitionem ac Divisionum habentur pro valde diversis Adjectivum et idem Adjectivum Substantivatum.

6. Notandum, Obliquos, seorsim positos ex parte Praedicati, habere vim Adjectivorum, imo et esse vera Adjectiva apud Logicos; licet defectu exterioris alicujus apparatus non veniant in illum censum apud Grammaticos. Ut *Petrus est domi*; ibi *Domi* habet vim Adjectivi, et perinde est ac *Existens-domi*, si hoc unâ voce efferre liceret; et *Haec civitas est circa mare* perinde est atque *Haec civitas est maritima*; item *Haec mensa est ex ligno* perinde est atque *Haec mensa est lignea*. Et idem obrinet, quando propter penuriam vocum non suppetunt Adjectiva grammatica Obliquis istis aequivalentia; penuria enim illa vel copia, quae ab hominum arbitrio dependet, non potest aliquid immutare circa res ipsas. Unde cum dico: *Liber Petri*, non definit Obliquus *Petri* aequipollere Adjectivo, etsi forte nulum hodie suppetat Adjectivum, quod eodem sensu manente in locum istius Obliqui surrogari potest. Sicut enim dicimus: *Imperator Romanus*, id est *Imperator Romanorum*, sic etiam natura rei patitur, non tantum *Librum Petri*, sed etiam *Librum petrinum* dici; etsi posteriorem illam dictionem non ferat usus et mos Latinae Linguae. Circa Substantiva redundant Genera ista Grammatica, Masculinum, Femininum, etc., quae non alio spectant, quam ut inutili ac difficili caeremonia distineantur et occupentur toti, qui Linguae alicui perdiscendae se addicunt. Sed de his ac similibus multis dicam alibi.

7. Substantivum dividitur in Purum et Mixtum. Substantivum Purum est, quod non componitur ex Adjectivo, ut *Ens* seu *Res*, exponiturque: *Id quod est*; quamvis in rei veritate non sit hoc Substantivum, sed tantum Nota Substantivi, cui nihil

correspondeat objective, sed tantum formaliter; quod tamen hîc non supponam, ut dixi. Substantivum Mixtum est, quod ex Adjectivo componitur; qualia sunt reliqua omnia praeter *Ens*, ut *Lapis*, *Aurum*, *Lac*, etc.; haec enim sunt *Certa entia*, *Quaedam res*, *Tales res*, adeoque includunt Adjectivum, quod istis Notis *Certum*, *Tale*, *Quoddam* designatur. Substantivum Purum etiam Simplex, Mixta vero Composita dicuntur.

## CAPUT V.

*De Essentia et Accidente.*

1. Essentia est Praedicatum in Subiecto; id est, in Affirmatione, in qua de Subiecto suo dicitur, praecedit ex parte Subiecti, antequam veniat ad locum Praedicati. Sic *Homo* est Essentia *Hominis albi*, quia *Homo* est in isto Subiecto *Homo albus*; et cum dico: *Homo albus est homo*, jam *Homo* praecessit in loco Subiecti, antequam veniret ad locum Praedicati: eâdem de causâ etiam *Albus* est essentia *Hominis albi*.

2. Et quidem, cum sic expresse Praedicatum in Subiecto reperitur, difficultatem non habet Essentia, quia Sensum ferit. Sed perito Logico implicita perinde sunt ac expressa; adeoque agnoscimus, *Hominem* etiam esse Essentiam *Petri* et *Lapidem* esse Essentiam *Marmoris*. Cum enim dico: *Marmor est lapis*, ibi *Lapis* non praecedit quidem ad oculum ex parte Subiecti, antequam veniat ad locum Praedicati, sed tamen absolute praecedit, quia implicite seu tecte praecedit; cum enim *Marmor* non sit aliud quam *Certus lapis*, si de *Certo lapide* dixeris, quod sit *Lapis*, jam manifeste praecedit *Lapis* in Subiecto, antequam veniat ad locum Praedicati. Atque idem illud implicite fit, cum dico: *Marmor est lapis*. Ex quo jam facile colligitur, quod Substantivum Purum sit Essentia cujuslibet Substantivi Mixti; cum enim Substantivum Mixtum non sit aliud quam *Certum ens*, si *Ens* de illo dicatur, necessum est, *Ens* expresse vel implicite praecedere ex parte Subiecti, an-



tequam veniat ad locum Praedicati. Colligitur etiam, Essentiam aliquando Tectam, aliquando Retectam esse. Retecta est, cum verbotenus sonat in suo Subjecto; Tecta vero, cum, licet sit in suo Subjecto, tamen verbotenus non sonat in illo. Tam Tecta quam Retecta essentia est vera essentia, imo eadem essentia modo Tecta, modo Retecta esse potest; sicut eadem pictura jam patet, jam cortinis obtegitur, aut idem tapes modo convolutus est, modo ad parietem appensus explicatur. Sic v.g. *Ens* in *Ente extenso* est Essentia aperta et retecta, in *Corpore* vero, quod penitus idem est ac *Ens extensum*, obiectum est *Ens* involucri istius vocabuli *Corpus*.

3. Essentia dividitur in Substantivam et Adjectivam. Essentia Adjectiva est Essentia quae est Adjectivum. Haec vocatur *Forma*; sic *Albus* est Forma *Hominis albi*; et Adjectivum quod designatur per *Certus*, quando dico *Certus lapis*, putans *Marmor*, est Forma *Marmoris*.

4. Essentia Substantiva dividitur in Totalem et Partialem. Essentia Totalis est Essentia quae est eadem cum suo Subjecto; ut *Homo* respectu *Hominis*, imo etiam *Animal rationale* respectu *Hominis*; haec enim etiam sunt eadem, et tantum sicut tectum et retectum, sicut convolutum et expansum differunt. Essentia Partialis Substantiva est Essentia Substantiva quae distinguitur a suo Subjecto. Atque haec *Materia* dicitur, ut *Homo* respectu *Hominis albi*, item *Lapis* respectu *Marmoris*. Non sufficit igitur ad Materiam, quod sit Essentia Substantiva, cum Essentia Totalis etiam sit Essentia Substantiva, nec tamen Materia. Sed nec sufficit ad Materiam, quod sit Essentia Partialis, cum Forma etiam sit Essentia Partialis. Cum enim Forma debeat esse Adjectivum, consequenter non potest esse eadem cum suo Subjecto; si enim esset eadem cum suo Subjecto, ipsa etiam esset Subjectum, et per consequens esset Substantivum, non vero Adjectivum. Utrumque igitur ex aequo requiritur ad Materiam, nempe ut et Substantiva sit Essentia, et Partialis

Essentia. Ad Formam autem sufficit ut sit Essentia Adjectiva; quia rationem Partialis Essentiae in Forma satis infert ratio Adjectivi in Forma.

5. Adjectivum tantum potest esse Essentia Partialis; Substantiva vero sunt sibi ipsis Essentiae Totales, et compositis ex se ac aliquo Adjectivo, quocum apte cohaerent, sunt Essentiae Partiales. Adjectivum non habet Essentiam; nihil enim habet Essentiam, nisi sit Subjectum. Substantivum Purum tantum habet Essentiam Totalem; quia *Entis* nulla est Essentia nisi ipsum *Ens*; cum enim nulla sit Forma in ipso, per consequens etiam nulla Materia in eo esse potest, adeoque nulla est in *Ente* Essentia Partialis. Tandem Substantiva Mixta et Totalem Essentiam habent et Partialem. Materia eorum est *Ens*, Forma in illis designatur per illud Adjectivum *Certus* (cum non sint *Ens ut sic*, sed *Ens certum*); ipsa vero sibi, ut dictum est, sunt Essentiae Totales.

6. Essentia dividitur etiam in Essentiam Proximam et Remotam. Essentia Remota est Essentia Materiae comparata ad Subjectum istius Materiae; sic *Corpus* est Essentia Remota *Auri*; *Corpus* enim est Essentia *Metalli*, *Metallum* autem est Materia *Auri*. Essentia Remota subdividitur in Materiam Remotam et Formam Remotam; sic *Extensum* est Forma Remota *Auri*; est enim Forma *Corporis*, quod est Materia *Auri*. Essentia Proxima est Essentia Subjecti, et non Materiae Subjecti; sic *Aurum* est Essentia proxima sui ipsius, ac etiam *Hujus auri*. Totalis Essentia semper est Proxima; Partialis vero subinde Proxima, subinde Remota est.

7. Accidens est Praedicatum ad Subjectum; id est, in Affirmatione, in qua de Subjecto suo dicitur, praecise consistit loco Praedicati, nec diffundit se ad locum Subjecti. Ut *Rex* respectu *Caroli*; cum enim dico: *Carolus est rex*, tunc *Rex* tantum consistit in Praedicato, et neutiquam reperitur ex parte Subjecti; non expresse (hoc patet); non implicate, quia *Carolus* etiam est

quando rex non est, sed exsul; itaque in *Carolo* non est *Rex*: alioqui enim *Rege* desinente etiam ipse desiisset, quod est falsum.

## CAPUT VI.

*De Potentiâ et Actu.*

1. Praedicatum distinguitur in Potentiam et Actum. Potentia est Praedicatum quod affirmatur penes *Posse*; ut *Calefactivum*; id enim est *Potens calefacere*, adeoque affirmatur de *Ignē*, de *Aqua*, etc. penes *Possē*. Actus est Praedicatum, quod affirmatur penes *Esse*, et non penes *Possē*; ut *Homo*, *Calefaciens*, etc. Actus est verum Praedicatum, sed Potentia non est verum Praedicatum, at Praedicatum sumptum cum modo seu Adverbio Copulae. Cum enim dico: *Aqua est calefactiva*, Propositio efficitur Modalis, nempe haec: *Aqua possibiliter calefacit*; adeoque *Calefactivum* idem est ac *Possibiliter calefaciens*; et sic non est merum Praedicatum sumptum cum Modo Copulae. Modi enim illi, *Necessario*, *Non*, *Possibiliter*, etc., non possunt cadere nisi in Copulam, ut magis patebit parte 2, ubi de Enunciatione Modali agetur. Unde cum Modi isti a Copula violente abstrahuntur, et verbotenus apponuntur Praedicato, sensu tamen et quasi affectu semper adhaerent Copulae.

2. Quaelibet Potentia habet Actum. Atque Praedicatum illud, quod ultra Modum *Possibiliter* includitur in Potentia aliqua, ejusce Potentiae Actus dicitur; sic Actus *Calefactivi* est *Calefaciens*. *Calefactivum* enim idem est quod *Possibiliter calefaciens*, adeoque *Calefaciens* est Praedicatum, quod in praedictâ Potentiâ reperitur ultra Modum *Possibiliter*. Potentia autem censetur ad Actum suum terminari; quia Modum *Possibiliter*, qui formaliter Potentiam repraesentat, sensu sequitur Actus; ut in *Calefactivo* seu *Possibiliter Calefaciente*, post Modum *Possibiliter* sensu sequitur Actus *Calefaciens*. Modus enim ille sensu adhaeret Copulae; *Calefaciens* autem tenet se ex parte Praedicati; jam

autem Copula sensu praecedat Praedicatum. Dicitur etiam Potentia reduci ad Actum, item exire in Actum, quando jam non ipsa tantum de Subjecto suo dicitur, sed etiam Actus ejus; sic *Calefactivum* in *Aqua* reducitur in Actum, quando *Aqua* inferbuit, adeoque non tantum calefactiva est, sed et calefaciens.

3. Unde Potentia dividitur in Puram et Impuram. Impura Potentia est quae in Actum reducta est, ut *Calefactivum* respectu *Aquae fervidae* aut *Ignis*; haec enim non tantum calefacere possunt, sed et calefaciunt. Pura Potentia est, quae non exit in Actum; ut *Calefactivum* respectu *Frigidae*; dicitur enim quidem *Calefactivum* de *Aqua* quae jam frigida est (potest enim calefacere, hoc ipso quo calefieri potest), sed *Calefaciens* de illa non dicitur. Potentia Absoluta (cum ad Puram ac Impuram respicimus) est potentia sive Pura sive Impura. Potentia Pura tolli potest a suo Subjecto, potest et Impura; at Absoluta Potentia non potest a Subjecto suo tolli. Sic *Calefactivum pure* tollitur ab aqua cum calefacit, *Calefactivum impure* ab ea tollitur cum refrigit, nec amplius calefacit; at *Calefactivum absolute* non potest ab illa tolli; semper enim potest absolute loquendo calefacere, sive calefaciat sive non, imo sive existat sive non; potest enim existere et incalescere, adeoque et calefacere. Potentia etiam alia Proxima, alia Remota. Remota est, quae non nisi praeviâ mutatione Subjecti reducitur in Actum; sic *Calefactivum* est Potentia Remota in *Frigida*, quia non reducitur in Actum nisi mutato Subjecto, id est Aquâ e frigidâ in calidam versâ. Potentia Proxima est quae sine alia Subjecti sui mutatione reducitur in Actum, ut *Calefactivum* respectu *Aquae fervidae*. Potentia Absoluta (cum Proximam et Remotam respicimus) est Potentia sive Proxima sive Remota. Potentia Proxima tolli potest a suo Subjecto; ut *Ambulativum* ab aegro (quando scilicet pro Potentiâ Proximâ capitur *Ambulativum*); potest et Remota tolli a suo Subjecto; Absoluta vero tolli non potest.



4. Ex dictis facile intelliguntur haec Axiomata: Impossibilis est Potentia, quae non potest reduci in Actum; quia Potentia non est aliud quam Possibiliter actus. Ut *Calefactivum* non est aliud quam *Possibiliter calefaciens*; si ergo quidpiam non possit calefacere (id est, non possit reduci in Actum istum *Calefaciens*), impossibile est ut sit *Possibiliter calefaciens*. Frustra est Potentia, quae semper in Actum reducitur; id est, Frustra dicimus, *Posse esse*, quod semper et perpetuo *est*. V.g. inepte dicimus: *Aurum potest esse metallum*, quia Aurum perpetuo et simpliciter est metallum. Frustra est Potentia ad Potentiam; id est, Frustra ponitur Potentia terminata ad aliam Potentiam. Potentia enim (scilicet Absoluta) semper et simpliciter est. Loco hujus Axiomatis, dicunt quidam: *Non datur Potentia ad Potentiam*; nimis temere; cum enim v. g. Petrus possit ambulare, sequitur, quod possit posse ambulare, et ex hoc rursus sequitur, quod hoc posse possit, atque ita sine fine; nec in isto progressu in infinitum aliquid impossibile occurrit, sed tantum aliquid inutile. Frustra est Potentia, quae nunquam reducitur in Actum; id est, Non praesumitur Potentia, quando nullus Actus ejus comparet.

5. Potentia distinguitur in Positivam et Negativam. Positiva Potentia est vera Potentia, et jam ante definita. Negativa Potentia est non repugnans (scilicet quoad praedicationem). Talis Potentia est Praedicatum hujus: *Metallum potest esse aurum*; hoc enim sic exponitur: *Metallum non repugnat quoad praedicationem cum auro*. Non autem sensus est, quod Metallum proprie possit esse aurum, quia impossibilis est Potentia quae non potest reduci in Actum; jam autem impossibile est, ut Metallum unquam sit aurum; sed tantum quoddam metallum est aurum, idque jugiter et in aeternum.

6. Subjectum Potentiae dicitur esse in Potentia; sic *Aqua* est in Potentia calefaciendi, seu, ut loqui solent, in Potentia ad calefacere; et siquidem calida sit, est in Potentia proximâ

ad calefaciendum, et si actu ac de facto calefaciat, est in Potentia impura ad calefaciendum. Si vero sit frigida, est in Potentia remota, itemque in Potentia pura ad calefacere. *Animal* etiam est in Potentia positiva ad Sentiendum, ad Dolendum, ad Irascendum etc.; sed est tantum in Potentia negativa ad esse hominem, vel ad esse brutum. *Animal* enim sentire potest, dolere potest, irasci potest; esse homo tantum hoc sensu potest, quod non repugnet cum *Homine*, et simili tantum sensu potest esse brutum; non vero aut homo esse potest aut brutum absolute et proprie loquendo, quia nullum est in tota Aeternitate omnique tempore possibili momentum, quo hoc verum sit: *Animal est homo*, aut hoc verum sit: *Animal est brutum*; adeoque impossibilis ibi est quaecunque proprie dicta Potentia, utpote quae non possit reduci in Actum. Potentia tamen Negativa (id est non repugnare cum *Homine*, non repugnare cum *Bruto*) sane est in *Animali*, ut magis patebit infra, ubi dicetur, quid sit repugnare, Sect. 2. cap. 1.

## CAPUT VII.

*De quatuor Praedicatis.*

1. Haec sunt: Superius, Differentia, Proprietas, et Accidens. Logici quidem communiter enumerant quinque Praedicata, nempe Genus, Speciem, Differentiam etc. Sed nos duo priora, scilicet Genus et Speciem, comprehendimus sub Superiori; discrimen autem quod inter Genus et Speciem intercedit, non videtur mihi Logicae considerationis; non video enim quid emolumenti ex ea distinctione redundet in Logicam; ideo satis esse duxi utrumque communi nomine complecti. Porro haec quatuor Praedicata comparantur ad Subjecta a se distincta, nam Substantivum cum de se ipso affirmatur, nec Superius sui, nec Differentia, nec Proprietas, nec Accidens est.

2. Quid sit Forma, dixi cap. 5. Forma vero alia per se,

alia per accidens. Forma per accidens est Forma, sed alterius Accidens; ut *Albus* respectu *Hominis albi*; est enim Forma *Hominis albi*, sed Accidens alterius, v. g. *hujus chartae*. Forma per se est Forma et nullius Accidens; ut *Rationale* respectu *Hominis*; est enim Forma *Hominis*, at nullius Accidens; cujus enim non est Forma (ut v. g. non est Forma *Parietis* aut *Aquae*, etc.), de eo ne quidem Praedicatum est, ac per consequens neque Accidens est. Sic etiam *Extensum* est Forma per se respectu *Corporis*; ad quodcunque enim Subjectum comparatur *Extensum*, aut est Forma istius Subjecti, aut non praedicatur de illo, et sic nunquam potest esse Accidens. Conformer dividuntur Substantiva Mixta, nempe in Mixta per se et Mixta per accidens. Substantivum per se Mixtum est, cujus Forma proxima est Forma per se, ut *Corpus*, *Homo*, *Lapis*, etc. Mixtum per accidens est, cujus Forma proxima est Forma per accidens; ut *Homo albus*, item *Globus*, quia Forma ejus proxima est *Solide rotundum*, quod est Accidens *istius Ligni* quod in globum efformatum est.

3. Forma-per-se vocatur *Differentia*: et sic unum ex quatuor Praedicatis erutum videtur e latebris suis; ex cujus disquisitione videmus, eam non in Subjecto Puro (hoc enim non habet Formam), non in Subjecto Mixto-per-accidens (hoc enim Formam quidem habet, sed non Formam-per se), sed tantum in Subjecto-per-se-Mixto stabulari. Et quidem illam designare per facile; designatur enim per Adjectivum *Certus*; ut cum dico: *Certus lapis*, putans *Silicem*, illud Adjectivum *Certus* designat Differentiam *Silicis*; et cum dico: *Certa arbor*, putans *Laurum*, illud Adjectivum designat Differentiam *Lauri*, et sic porro. Ipsam vero Differentiam secundum se deprehendere ac in medium protrahere, perdifficile. Atque inde difficultas Definiendi; Differentia enim ingreditur Definitionem tamquam pars ejus praecipua; ex difficultate Definiendi difficultas sciendi; scire enim est per Definitionem cognoscere.

4. *Superius* est *Materia*, quae juncta cum *Differentia* constituit suum *Subjectum*. Sic *Ens* est *Superius Corporis*, quia junctum cum *Extensio*, quod est *Differentia*, constituit *Ens extensum*, quod idem est ac *Corpus*. At *Ens* non est *Superius Entis albi*, quia *Ens* non constituit illud *Subjectum* cum *Differentiâ*, sed cum *Formâ-per-accidens*. Hinc etiam *Homo* non est *Superius Militis, Regis, Mercatoris, etc.*, quia *Homo* quidem in omnibus illis subjectis reperitur, tamquam *Materia Logica* eorum, sed tamen non constituit ista subjecta cum *Differentiis* seu *Formis-per-se*, sed tantum cum *Formis-per-accidens*; *Mercari* enim et *Regere* et *Militare* sunt *Accidentia* quorundam hominum, licet sint *Formae* subjectorum praefatorum. Superiori correspondet *Inferius*; et non est aliud quam *subjectum Superioris* ut sic; id est, *Compositum* adaequate ex *Superiori* et *Differentia* comparatum ad ipsum *Superius*. Sic *Corpus* est *Inferius Entis, Homo Animalis, etc.* *Superius* dividitur in *Genus* est *Speciem* (scilicet *Praedicabilem* seu *specialissimam*). *Genus* est *Superius Superioris*; ut *Ens*; est enim *Superius Corporis*, quod et ipsum *Superius* est *Metalli*. *Species* est *Superius*, nullius tamen *Superioris*; ut *Aurum*; est enim *Superius Hujus auri, Illius auri, etc.*, inter quae nullum est *Superius*. Sed, ut dixi, haec *Divisio Superioris* non video quid conferat in rem *Logicam*, ideoque obiter illam percurro.

5. Atque ita fuerunt duo *Praedicata*. Porro *Accidens* vel sequitur ex *essentia*, vel non; atque ita etiam inventa sunt duo reliqua *Praedicata*, *Proprietas* et *Accidens* stricte dictum. *Proprietas* est *Accidens* quod sequitur ex *essentia*; tale est *Divisibile*, item *Palpabile*, respectu *Corporis*; haec enim sunt *Praedicata* de *Corpore* (*Corpus* enim est *divisibile* et *Corpus* est *palpabile*), et sequuntur ex *essentia Corporis*, nempe ex *Extensio*, quod est *Differentia Corporis*; recte enim sequitur: *Extensum est, ergo Divisibile est*, item: *Extensum est, ergo Palpabile est*. Sed quin *Divisibile* et *Palpabile* sint *Praedicata* de *Corpore*,



quin item sequantur ex Differentia *Corporis*, difficultatem non habet; difficultas est, quare sint Accidentia *Corporis*, et cur non potius sint essentiae ejus. Videntur enim esse in *Corpore*, saltem implicite, tam bene quam *Extensum* sit in *Corpore*. Respondeo et dico, *Corpus* esse quid antea istis Praedicatis, et per consequens ista Praedicata non esse in *Corpore*, sed ad *Corpus*. Prius est enim esse quam posse (quia nihil nihil potest); igitur prius est esse quam posse dividi, aut posse palpari. Atqui non sufficit esse ens, ut dividi vel palpari possit (cum multa sint entia, quae nec dividi nec palpari queant); debet ergo esse *Certum ens* (nempe *Ens extensum*) ad hoc ut dividi vel palpari possit; ideoque illud *Certum ens*, (nempe *Ens Extensum*, seu *Corpus*), prius est quam *Divisibile* vel *Palpabile*; adeoque illa non sunt in *Corpore* tamquam Subjecto; cum Praedicatum in Subjecto vel sit ipsum Subjectum vel pars ejus. Subjectum nec se ipso prius est, et multo minus sua parte prius est.

6. Accidens stricte dictum est Accidens quod non sequitur ex essentia sui Subjecti; ut *Rex* respectu *Caroli*. Tota enim essentia *Caroli* est *Homo hic*, ubi *Homo* Materia et Superius, *Hic* vero Forma et Differentia. Atque ex tota ista *Caroli* Essentia non sequitur ullatenus, quod rex sit; *Carolus* enim est *hic homo*, ergo *Carolus est rex*, nulla consequentia; sicut et hae Consequentiae nullae sunt: *Est homo hic*, ergo *existit*, ergo *fuit exsul*, ergo *uxorem ducet*, etc. Igitur *Proprietas* passim dicitur dimanare ex essentia Subjecti (id est, inde sequi), Accidens vero stricte dictum non dimanat ex Essentia subjecti.

## C A P U T VIII.

### *Considerationes circa haec Praedicata.*

1. Discrimen inter Accidens stricte dictum et reliqua tria Praedicata est, quod Accidens stricte dictum affirmetur in tempore, Tria reliqua Praedicata affirmantur extra tempus, et

in Aeternitate. Hinc et propositiones aeternae veritatis dicuntur, in quibus tria prima Praedicata dicuntur de suis subjectis. Affirmari in Tempore est affirmari cum Adverbio Temporis praesentis, futuri, praeteriti, vel mixti, expresse vel implicite adhaerente Copulae; ut: *Carolus est rex* (id est, *Carolus Nunc est rex*), *Carolus fuit exsul* (id est *Tunc*, designando tempus praeteritum, *est exsul*), *Carolus uxorem ducet* (id est *Tunc uxorem ducit*, designando tempus futurum), *Carolus saepe consultat* (ubi Adverbium *Saepe* importat tempus mixtum ex *nunc et tunc*). Affirmari extra tempus seu in aeternitate, est affirmari sine Adverbio temporis expresse vel implicite cohaerente Copulae; ut *Corpus est ens*, *Corpus est extensum*, *Corpus est divisibile*, non nunc, non tunc, non heri, non olim, non nuper, non saepe, non raro, sed simpliciter. Ita ut *Est* in praedictis Affirmationibus nihil aliud agat quam Notam Affirmandi.

2. Porro Accidens stricte dictum non tantum affirmatur in tempore, sed extra tempus seu in aeternitate nequit affirmari. Si enim dixeris: *Carolus est rex*, atque dictionem *Est* absolveris a tempore (ut loquuntur Logici), id est, ita intelligas illam dictionem, ut sit mera Nota Affirmandi, nullum sibi expresse vel implicite Adverbium temporis adsciscens, falsa erit ista Propositio; quandoquidem Carolus, praeveniendo tempus, non sit rex, sed indifferens ad regiam et aliam quamcunque conditionem; sicut Metallum non est aurum, sed indifferens ad aurum et quodvis aliud metallum.

3. Ex quo et illud sequitur, quod vulgo valde Paradoxum videbitur, Accidens stricte dictum non esse verum Praedicatum; non enim affirmatur sine addito vel subintellecto ad Copulam, cum tamen irrefragabilis Regula cap. 2. allegata requirat Affirmationem sine addito, sine subaudito veram se praestare, in qua verum Praedicatum de vero subjecto dicatur. Tria igitur tantum erunt Praedicata, nam quantum hoc tantum est analogum Praedicatum.

4. Secunda Consideratio. Proprietas aliquando sumitur pro Affirmatione, in qua Proprietas dicitur de suo Subjecto. Sic v. g. non tantum dicimus, *Divisibile* esse Proprietatem *Corporis*, sed hanc integram Propositionem *Corpus est divisibile* vocamus Proprietatem *Corporis*. Unde distinctionis causa Proprietatem Applicantem et Applicatam dicemus, vocantes quidem Propositionem, in qua Proprietas de Subjecto suo dicitur, Proprietatem Applicantem; Praedicatum vero istius Propositionis, Proprietatem Applicatam. Ex quo etiam intelligitur illud Axioma Philosophorum: Sublatis Proprietatibus tollitur essentia: ubi *Sublatis* idem est quod *Negatis*, et *Proprietas* sumitur pro *Applicante*; et jam Ratio Axiomatis redditur, quia, cum ex Essentia sequatur Proprietas (per definit. Propriet.), ex Contradictoriâ Proprietatis (quae est Proprietas negata) sequetur Contradictoria essentiae; juxta 1. Axi. 4. Quadr. par. 2. sec. 2. cap. 11. n. 2. Sic v. g., quia recte sequitur: *Extensum est, ergo divisibile est*, hinc etiam sequi debet: *Non est divisibile, ergo non est extensum*. Ex his patet, quod non tantum Proprietas distingui possit in Applicantem et Applicatam, sed etiam Essentia, imo et reliqua tria Praedicata; non est tamen in illis tam usitata ista distinctio sicut bene in Proprietate.

5. Proprietas Applicans aliquando videtur etiam Negatio esse; sed tunc Praedicatum in ea non censetur Proprietas Applicata, sed Praedicatum sumptum cum Adverbio negandi *Non* censetur eo casu esse Proprietas Applicata; quamvis illud Adverbium non spectet ad Praedicatum proprie loquendo, sed ad Copulam. V. g. haec est Proprietas *Corporis*: *Corpus non penetratur ab alio Corpore*; ubi Proprietas Applicata est *Impenetrabile* (scilicet ab alio corpore). Unde etiam Proprietas dividi solet in Positivam et Negativam; et quidem omnes Negationes, quae ex Essentia alicujus verae Rei sequuntur, sunt istius Rei Proprietates; sunt enim omnes istae posteriores ipsa re, cum prius sit unumquodque esse hoc quod est, quam non esse aliud quidpiam. Atque adeo non sunt in Sub-

jecto, utpote quod praeceſſit antequam ipſae adveniant, adeoque cum ſuo modo dicantur de Subjecto, neceſſum eſt ut ſint ad Subjectum, adeoque ſint Accidentia, et, cum ſequantur ex eſſentia, Proprietates. Pari Ratione colligimus, omnes Potentias, quae de Subjecto aliquo dicuntur, eſſe Proprietates iſtius Subjecti; prius enim eſt unumquodque eſſe quod eſt, quam poſſe aliquid aliud. Et quidem omnes univerſim Potentiae ſunt Proprietates fuorum Subjectorum; cum enim ſint ſemper poſteriores ſuis Subjectis, ſemper etiam dimanant ex eſſentia fuorum Subjectorum. Sed non univerſim omnes Negationes ſunt Proprietates fuorum ſubjectorum; quia etiamſi ſemper ſint poſteriores ſuis Subjectis, non tamen ſemper profluunt ex eorum eſſentia; ut *Non ſans*, etiamſi ſit poſterius *Petro*, de quo affirmatur, non tamen ſequitur ex eſſentia *Petri*.

6. Tertia Conſideratio. Differentia eſt communis fons et origo Proprietatum. Proprietates enim famoſe comparantur ad illud Subjectum, ex cujus Differentiâ profluunt; v. g. *Diviſibile*, *Mobile*, *Impenetrabile*, *Palpabile* dicuntur Proprietates *Corporis*, quia profluunt ex Differentiâ proximâ *Corporis*, nempe ex *Extenſo*; hae autem non ita famoſe dicuntur Proprietates *Metalli*, aut *Lapidis*, aut *Ligni*, etc., ſed potius dicuntur Proprietates Superioris eorum, quia nempe non ex horum Differentiâ Proximâ, ſed ex Differentiâ Proximâ *Corporis*, quod Superius et Genus eorum eſt, dimanant. Similiter *Cogitabile* non tam apte dicitur Proprietas *Corporis*, quam *Entis*, ideo nempe quia non profluit ex Differentia *Corporis*, ſed ex Supetiori ejus, nempe ex *Ente*; Corpus enim non praeciſe quia extenſum eſt, ſed quia Ens ſeu aliquid eſt, cogitari poteſt. Ex quo vides, Fontes Proprietatem non tantum eſſe Differentias, ſed etiam *Ens*. Communes tamen et ordinarii Fontes ſunt Differentiae; Differentiae enim multae, imo infinitae ſunt, *Ens* autem unicum eſt, ex quo paucae et uniformes Proprietates dimanant; cum ex Differentiis innumerae et maxime diſcrepantes ſcaturiant. Proprietas ſubinde etiam pro-



fluit ex alia Proprietate; v. g. in *Corpore* ex *Impenetrabili* profluit *Resistivum* (resistat enim necessum est Corpori versus se moto, quod a Corpore isto penetrari non potest), et ex *Resistivo* ulterius profluit *Palpabile* (cum enim in id quod resistit manus nostrae fuerint impactae, palpabitur). Proprietas tamen eo casu non potest dici Fons Proprietatis ex se derivatae, sed Rivulus, unde alius quispiam Rivus deducitur; illa enim Proprietas adhuc dimanat aliunde, nempe ex Differentia vel *Ente*; *Ens* autem et Differentia sunt Fontes, quia ex ipsis quidem dimanant Proprietates, ipsa vero non dimanant aliunde. Quod de *Ente* quidem omnimode verum est; *Ens* enim non sequitur ex ullo priori, sed simpliciter Primum est; Differentiae vero potentialiter quidem sequuntur ex *Ente* (adeoque sunt etiam Potentiales quaedam Proprietates *Entis*), sed actualiter non sequuntur ex *Ente*. *Ens* enim v. g. potest esse extensum, potest cogitare, sed actu nec extensum est nec cogitat; unde et *Posse esse Extensum*, seu *Non repugnare esse Extensum*, et *Posse Cogitare*, seu *Non repugnare Cogitare*, sunt Proprietates Negativae *Entis*.

7. Quarta Consideratio. Superius et Differentia inserviunt Definitionibus, et ratione Inferioris etiam Divisionibus et exemplis. Proprietates inserviunt Rationibus. Accidens vero est extra Logicam et spectat ad vulgare commercium. Haec melius videbis infra parte 4.

## CAPUT IX.

### *De Speciebus Proprietatum.*

1. Quia Proprietates inserviunt Rationi, quae est praecipuum Instrumentum sciendi, hinc operae pretium erit, in Species earum aliquanto diligentius indagare. Prima igitur species Proprietatis, eaque facillima, et quae nullo negotio ex Rei cujusque Essentia dimanare comperitur, est Proprietas Negativa; datâ enim re aliquâ, sunt infinitae Proprietates Negativae (nempe

inſinitae Negationes aliarum rerum) quae ex re iſta ſuo modo profluunt. V. g. propoſito *Lapide*, ſequuntur ipſum iſtae Negationes: *Non eſt metallum*, *Non eſt arbor*, *Non eſt homo*, etc. Et quidem huiusce generis Proprietates non ſolemus proponere in Diſciplinis; ſatis enim ex ſe ſolent eſſe manifeſtae; ſubinde tamen peculiare aliquid continet Proprietas Negativa, cui ſenſus refragari videntur, aut ipſa Proprietas Negativa Seminarium eſt Proprietatum Poſitivarum; atque talis Proprietas Negativa etiam in Diſciplinis proponitur. Qualis eſt iſta Proprietas in Phyſica: *Corpus eſt impenetrabile ab alio corpore*; videtur enim ſenſus contradicere, cum juſculum pani, et aquam ſpongiae ac cineribus inſinuari videamus; atque inſuper iſta Proprietas eſt ſeminarium huius Proprietatis Poſitivae: *Corpus eſt palpabile*.

2. Secunda Species Proprietatis eſt Potentia, ſcilicet Abſoluta (nam Potentia Pura, item Impura, Proxima, item Remota, ſolent eſſe Accidentia ſtrictè dicta ſuorum Subjectorum). Potentia enim ſemper profluit ex Eſſentia ſui Subjecti, atque illo poſterior eſt, cum prius ſit Eſſe quam Poſſe. In eo convenit Potentia cum Proprietate Negativa, quod ambae Modum aliquem a Copula praecedente mutuuntur; Proprietas enim Negativa mutuatur a Copula Modum ſeu Adverbium *Non*; Potentia vero mutuatur a Copula Modum *Poſſibiliter*.

3. Tertia Species Proprietatis eſt Analogia, Proportio, Similitudo. Cujuſque enim Rei Eſſentiam inſinitae Proprietates analogicae, Proportiones, et Similitudines conſequentur; ſic *Evertens Affirmationem* aut *Expungens Affirmationem* eſt Proprietas Analogica Negationis; Eſſentia enim Negationis infert aliquam Similitudinem ſeu Proportionem, penes quam dicere poſſumus, quod evertat Affirmationem, ſicut procella evertit navim, proportionate loquendo, aut expungat Affirmationem, ſicut ſpongia notas cretà vel carbone deformatas expungit. Sic etiam *Praedicatum dare* ſeu *tribuere Subjecto* eſt Proprietas Analogica *Affirmationis*; habet enim ſe Affirmatio inſtar dantis,

et Praedicatum suo Subjecto largiri videtur; nam si dixeris: *Petrus est doctus*, *Doctum* seu Doctrinam quodammodo largitur *Petro* ista tua Affirmatio. Sic etiam *Remove Praedicatum a Subjecto* est Proprietas Analogica *Negationis*, et *Continere Subjectum* est Proprietas Praedicati, etc. Has esse Proprietates convincitur facile, quia sequuntur ex Essentia Subjecti, ut per se patet, atque sunt ipso posteriores. Prius enim est esse, quam alteri alicui simile vel proportionatum esse; et licet harum Proprietatum ratio detur per Essentiam Subjecti, difficulter tamen ut-plurimum illa ratio protrahitur ad sermonem; ex quo factum, ut multis hae Proprietates ipsissimae Essentiae videantur. Sed clarum est, esse duntaxat Proprietates; cum enim tantum Proportionem aliquam aut Similitudinem sui Subjecti dicant, necessum est Subjectum ante ipsas esse; prius enim est esse quam alteri simile esse. Videtur etiam tertiae speciei Proprietas Modum aliquem mutuari a Copula, scilicet Adverbium *Veluti* aut *Quasi*, quod subinde quidem verbotenus subticetur, sed tamen sensu semper subauditur; sic dicas: *Negatio velut evertit Affirmationem, quasi expungit Affirmationem, Affirmatio quasi largitur Praedicatum suum suo Subjecto, etc.*

4. Quarta Species Proprietatis est Relatio, Respectus, Habitudo ad aliud quidpiam, quae ex Subjecti Essentia dimanat. Sic *De aliquo* est Proprietas relativa *Affirmationis*; Affirmatio enim est de aliquo. Ibi *De aliquo* habet vim Adjectivi. Sic etiam *Alicujus* est Proprietas Respectiva *Affirmationis*; siquidem Affirmatio est alicujus. Ibi ordo ac habitudo ad Praedicatum importatur, sicut in praecedenti Proprietate importabatur habitudo ad Subjectum. Atque etiam hanc Speciem spectare ad Proprietates, facile probatur; quia prius est esse, quam ad alterum comparari seu alterum respicere; adeoque Relatio seu Praedicatum Relativum posterius est suo Subjecto. Si jam Praedicatum hoc ex Essentiâ sui Subjecti sequatur, habebit omnia requisita ad Proprietatem.

5. Atque hae ſunt quatuor Species Proprietatum per ſe. Licet enim quandoque ſiant Formae, quando nempe comparantur ad Compoſita ex ſe et ſuo Subjecto, ſemper tamen comparari poſſunt ad Subjectum, in quo non ſunt, ſed quo poſteriores ſunt; ut circa ſingulas Species demonſtratum eſt. Subinde vero praeter haſce quatuor Species quaedam aliae ſunt Proprietates, ſed non ita per ſe, at quodammodo per accidens; ſic v. g. *Aequangulum* eſt proprietas, dimanans ex Differentia *Trianguli Aequilateri*, nempe ex *Aequilatero*, ſed et *Aequilaterum* eſt Proprietas dimanans ex Differentia *Trianguli Aequanguli*, et proprietas *Trianguli* eſt *Tres angulos duobus rectis aequipollere*, etc. Quae ac ſimiles proprietates non ſpectant ad ullum genus ex quatuor recensitis.

## SECTION II.

### De Affectionibus Terminorum.

Quatuor occurrunt Affectiones conſiderandae in Terminis, quarum ſingulae conſtant combinatione duarum: 1. Concordia et Diſcordia Terminorum, 2. Acceptio et Suppoſitio Terminorum, 3. Homonymia et Synonymia Terminorum, 4. Ordo et Diſſolutio Terminorum. Harum quaedam ſpectant ad Affectiones Logicas Argumentorum, de quibus infra, ſed non omnes.

## CAPUT I.

### *De Concordiâ et Diſcordiâ Terminorum.*

1. Terminus Concors eſt, qui habet Subjectum commune cum alio Terminino, ad quem comparatur, ſeu tale Subjectum, de quo uterque eorum affirmari poteſt. Sic *Brutum* concordat cum *Bipede*; datur enim Subjectum utrique commune, nempe



*Avis*, de ea quippe et *Brutum* affirmatur et *Bipes*. Termini autem dicuntur concordare in Subjecto communi, ut *Brutum* et *Bipes* in *Ave*. Terminus Discors est, qui habet Subjectum sibi proprium, id est, tale Subjectum de quo ipse affirmatur, alius vero Terminus, ad quem comparatur, non affirmatur. Sic *Brutum* etiam discordat a *Bipede*, quia *Brutum* affirmatur de *Bove*, de quo non affirmatur *Bipes*. Terminus autem dicitur discordare ab alio Termino in Subjecto sibi proprio, ut *Brutum* discordat a *Bipede* in *Bove*.

2. Concordia Terminorum est mutua; id est, cum unus Terminus concordat cum alio Termino, tunc etiam alius concordat cum priori; unus enim non concordat cum alio, nisi affirmetur de aliquo, de quo et alter affirmatur; proinde hoc ipso alter etiam affirmatur de aliquo, de quo prior affirmatur, adeoque alter etiam concordat cum priori. Discordia vero Terminorum non debet esse mutua; potest enim fieri ut hic Terminus affirmetur de aliquo, de quo non affirmatur ille Terminus, sic tamen ut ille non possit affirmari de quoquam, quin de eodem affirmetur prior. Sic. v. g. *Brutum* discordat a *Bove* (potest enim affirmari de *Cane*, de quo affirmari non potest *Bos*), at *Bos* non discordat a *Bruto*; hic siquidem de nullo potest affirmari, de quo non possit affirmari *Brutum*. Atque inde fit, ut termini inter quos unus est Concors, absolute Concordes sint; sed Termini inter quos unus est Discors, non semper absolute Discordes sunt, ut patet in illis Terminis: *Bos*, *Brutum*.

3. His positis exfurgunt quatuor Combinationes Terminorum: Repugnantes, Convertibiles, Subalterni, et Disparati. Termini Repugnantes sunt, qui non concordant; ut *Brutum*, *Homo*, nullum enim utrique commune Subjectum est; quamvis bene detur Praedicatum utrique commune, v. g. *Animal*, item *Ens*, etc. Termini Convertibiles sunt, quorum neuter discordat ab altero, ut *Homo*, *Animal rationale*; neuter enim dicitur de

aliquo, quin de eodem dicatur alter. Termini Diſparati ſunt, qui concordant et diſcordant; ut *Brutum*, *Bipes*, concordant enim in *Ave*, et *Brutum* diſcordat a *Bipede* in *Bove*, et *Bipes* diſcordat a *Bruto* in *Homine*. Termini Subalterni ſunt, quorum unus tantum diſcordat ab altero, ut *Brutum*, *Bos*; quia *Brutum* diſcordat a *Bove*, ſed *Bos* non diſcordat a *Bruto*. Inter Terminos Subalternos ille dicitur Subalternans, qui diſcordat, ille Subalternatus, qui non diſcordat; v. g. inter hoſce Subalternos: *Brutum*, *Bos*, prior Subalternat, et poſterior Subalternatur.

4. Neceſſum autem eſt, quamlibet duorum Terminorum combinationem ſpectare ad unam ex quatuor recenſitis; ſumptis enim quibuſcunque duobus Terminis, vel concordant illi vel non concordant (quidlibet enim eſt vel non eſt). Si non concordant, ſunt Repugnantes (per definit. Repug.). Si autem concordant, ergo vel unus inſuper diſcordat ab altero, vel neuter diſcordat ab altero; ſi neuter diſcordat ab altero, ſunt Convertibiles (per defin. Convert.). Si vero concordent et unus ab altero diſcordet, ergo vel unus tantum diſcordat, vel uterque ab altero diſcordat; ſi prius fiat, ſunt Subalterni, ſi poſterius fiat, ſunt Diſparati. Quicumque autem Terminus Comparatione factâ ad alium quemcunque Terminorum, uno ex quinque modis ſe habet ad illum: nempe vel Repugnat illi vel Convertitur cum illo, vel Diſparatur cum illo, vel Subalternatur illi, vel Subalternat ſibi illum. Quia Terminus comparatus ad alium quemcunque Terminus, facit Combinationem incidentem in unam ex quatuor Combinationibus recenſitis. Si incidat in Combinationem Repugnantium, Convertibilium, aut Diſparatorum, neceſſum eſt, ut cum altero illo Termino Repugnet, Convertatur, aut Diſparetur. Si vero incidat in Combinationem Subalternorum, aut Subalternabit ibidem, aut Subalternabitur.

## CAPUT II.

*De Legibus Concordiae ac Discordiae.*

1. Prima Lex: Subjectum et Praedicatum concordant. Demonstratur, quia Subjectum de se ipso dicitur (omne enim Substantivum de se ipso affirmari potest), et Praedicatum dicitur de Subjecto; ergo Subjectum et Praedicatum dicuntur de eodem, nempe de ipso Subjecto; adeoque concordant Subjectum et Praedicatum. Quod erat demonstrandum.

2. Secunda Lex: Termini Repugnantes non possunt se habere sicut Subjectum et Praedicatum. Demonstratur, quia Termini Repugnantes non concordant (per definit. Repug.); concordarent autem si se haberent sicut Subjectum et Praedicatum (juxta 1. leg.); igitur Termini Repugnantes non habent se etc. Quod erat demonstrandum. Oportet autem in hisce Legibus intelligere Subjectum et Praedicatum per dignitatem, ut famose solent intelligi.

3. Tertia Lex: Terminus, qui discordat ab alio Termino, semper habet Subjectum Repugnans cum alio illo Termino. Demonstratur. Terminus A discordet a Termino B; dico, Terminum A habere Subjectum repugnans cum Termino B. Si enim nullum Subjectum A repugnet cum B, ergo A quoad omnia sua Subjecta concordat cum B (si enim esset unum, secundum quod non concordaret, secundum illud repugnaret, juxta defin. Repug.). Atque A ultra omnia sua Subjecta nihil continet; ergo A secundum se totum concordat cum B; adeoque convertitur cum vel subalternatur illi B, adeoque non discordat a B; quod est contra suppositum, supponebatur enim, quod A discordaret a B. Igitur A habet Subjectum aliquod Repugnans cum B. Quod erat demonstrandum.

4. Hinc proprie loquendo non dicimus, Terminum discordare ab alio Termino, nisi in illo Subjecto, quod repugnat cum

alio Termino. Sic v. g. *Animal* discordat ab *Homine*, in *Bruto*, *Bove*, *Cane*, etc., non autem proprie in *Bipede*; licet enim *Animal* dicatur de *Bipede*, et *Homo* non dicatur de *Bipede*, tamen *Bipes* non est Subjectum Repugnans cum *Homine*, sed Subalternans. Similiter *Animal* discordat a *Bove* in *Homine*, *Cane*, *Equo*, etc., non autem in *Bruto*, proprie loquendo, etc.

5. Quarta Lex: Terminus qui discordat ab alio Termino, non subjicitur illi. Demonstratio. Sint Termini A, B, et A discordet a B; dico quod A non subjiciatur ipsi B. A enim habet Subjectum Repugnans cum B (juxta leg. 3.), v. g. C; igitur si A subjiciatur ipsi B, jam B affirmabitur de C (quia, de quo affirmatur Subjectum, de eodem etiam affirmatur Praedicatum *sect. 1. c. 3. n. 4.*); quod est absurdum (juxta leg. 2.), C enim repugnat cum B. Igitur A non Subjicietur ipsi B; quod erat demonstrandum.

6. Quinta Lex: Termini Disparati non possunt se habere ut Subjectum et Praedicatum. Demonstratio. Quia uterque Disparatorum discordat ab altero (per definit. Disparat.), ergo si Disparata haberent se ut Subjectum et Praedicatum, necessum esset Subjectum discordare a Praedicato, quod est contra 4. Legem. Est hoc Corollarium 4. Legis.

7. Sexta Lex: Terminus Subalternans non subjicitur Subalternato. Ratio est: quia Terminus Subalternans discordat a Subalternato (per defin. Subalternantis), ergo non potest Subalternato Subjici (per 4. Leg.); quod erat demonstrandum.

8. Septima Lex: Subjectum debet subalternari Praedicato, vel converti cum illo. Ratio est: quia Subjectum non potest sibi subalternare Praedicatum (per 6. Leg.), non potest disparari cum Praedicato (juxta 5. Leg.), non potest repugnare cum Praedicato (juxta 2. Leg.), restat igitur ut Subjectum subalternetur Praedicato vel convertatur cum illo; quia tantum aliquo ex quinque modis potest se habere unus Terminus ad alium Terminus, ut demonstr. cap. praeced. n. 4.



9. Octava Lex: Terminus qui convertitur vel subalternatur alii Termino, etiam alii isti Termino subicitur, modo scilicet prior iste Terminus sit Substantivum, aut si sit Adjectivum, Substantivetur. Ratio Legis est: quia Terminus Convertibilis continet omnia Subjecta sui Convertibilis, adeoque et ipsum Convertibilem Terminus; similiter et Subalternans continet omnia Subjecta Subalternati, adeoque et ipsum Subalternatum continet quoad Affirmationem, et sic etiam de ipso, modo ad naturam Subjecti satis paratus sit, affirmari potest; sect. 1. cap. 2. n. 8.

10. Nona Lex: Terminus Convertibilis idem est quodammodo cum suo Convertibili. Continent enim se mutuo quoad omnia Subjecta; unde nihil est in uno Convertibilium, quod non sit in altero, nec contra. Hinc sequitur, quod Terminus Convertibilis cum Termino Repugnante etiam repugnet, cum Disparato etiam disparetur; ut si A, B sint duo termini inter se repugnantes, C autem convertatur cum A, eo casu etiam C, B repugnabunt: et si A, B sint termini disparati, C vero similiter convertatur cum A, erunt etiam C, B termini disparati, et sic porro.

11. Decima Lex: Terminus Subalternans semper habet duo Subjecta inter sese repugnantia. Demonstr. Sit Terminus Subalternans quicumque, v. g. A, oportet ut is Subalternatum habeat (quia juxta definit. Subalterni non datur Subalternans sine Subalternato). Sit igitur B Terminus Subalternatus ipsi A; erit igitur B Subjectum ipsius A (per 8. Leg.); sed et A discordat a B (per definit. Subalternantis); igitur A habet Subjectum repugnans cum B (per 3. Leg.), v. g. C; igitur A habet Subjecta inter se repugnantia, nempe B, C; quod erat demonstrandum.

12. Undecima Lex: Subjecta Repugnantia alicujus Termini necessario Subalternantur isti Termino. Demonstr. Sint Termini A, B inter se repugnantes, iidemque Subjiciantur singuli Ter-

mino C; dico, tam A quam B Subalternari ipsi C. Cum enim sint Subjecta Termini C, ergo vel subalternantur ipsi C, vel convertuntur cum C, vel unum eorum convertitur et alterum subalternatur (per 7. leg.). Non possunt converti cum C, quia sic etiam A, B converterentur; si enim A convertatur cum C, ergo A est idem Terminus cum C (per 9. leg.); sed C convertitur cum B ex supposito, ergo A, idem cum C, etiam convertitur cum B, quod est absurdum; supponebatur enim quod A, B repugnarent, igitur A, B non possunt converti cum C. Dico, quod non possit etiam unum eorum converti cum C et alterum subalternari cum C; quia, si v. g. A convertatur cum C, A erit idem Terminus cum C (per 9. leg.). Sed B subalternatur ipsi C (ex supposito), ergo etiam B subalternabitur ipsi A, quod est absurdum, cum A, B repugnent: igitur A non convertitur cum C, B subalternato ipsius C. Eodem modo demonstratur, quod B non possit converti cum C, A subalternato ipsius C. Igitur restat ut A, B ambo subalternentur ipsi C; quod erat demonstr.

## CAPUT III.

*De Toto et Parte.*

I. Totum est plura simul sumpta; Pars est unum ex pluribus simul sumptis. Sic *Arbor* est totum, quia est radix, truncus et rami simul sumpta; *Radix* autem est pars, quia est unum ex istis pluribus. Solet autem Pars ad Totum comparari; ut *Radix pars arboris esse* dicitur. Totum etiam ad Partem comparatur, sed non tam expedite; unde *Arbor est totum radice* duriusculum est, et tantum circumlocutione aliquâ remollescit, hoc modo: *Arbor est totum comparatione factâ ad radicem suam*. Ex quibus etiam vides, Totum et Partem non esse in rerum natura, sed fieri ea per operationem nostrae Mentis, dum simul sumit. Plura, inquam, sunt in rerum natura et unumquodque istorum plurium; sed nec hoc rationem Partis, nec illa rationem Totius

indipifcentur, nifi accedat a Mente noſtrâ ſimul-ſumptio iſtorum plurium. Totum autem pro Termino aliquo capere, qui ſit plura ſimul ſumpta, opportunum eſt in Logica; ſimiliter et Pars pro Termino aliquo capi poterit.

2. Quia Totum eſt plura, hinc numeranda veniunt iſta plura. Poſſunt autem dupliciter enumerari: Copulative, nempe per *Et*, et Diſjunctive, nempe per *Vel*. Unde Totum etiam duplex eſt, Actuale et Potentiale. Totum Actuale eſt Totum copulatum, id eſt, plura ſimul ſumpta cum intercedente particulâ *Et*; ut *Arbor*, quatenus eſt *radix, truncus et rami*. Totum Potentiale eſt Totum diſjunctum, id eſt, plura ſimul ſumpta cum intercedente particulâ *Vel*; ut *Arbor*, quatenus eſt *Laurus vel Quercus vel Ceraſus, etc.* Totum actuale uno nomine vocatur *Compoſitum*, diciturque ex Partibus ſuis componi; ſic *Arbor* dicitur componi ex ramis, radice, et caudice. Totum autem Potentiale non dicitur ex ſuis Partibus componi, ſed eas ſub ſe comprehendere cenſetur; ſic *Arbor* non dicitur componi ex Quercu, Tiliâ, Fraxino, etc. ſed *Arborem* dicimus Laurum, Quercum, Tiliam, etc. ſub ſe comprehendere. Atque hinc etiam Partes Totius Potentiales dicuntur Partes Subjectivæ.

3. Compoſitum dividitur in Eſſentiale et Integrale. Eſſentiale eſt, in quo partes habent ſe ut Materia et Forma; ut *Homo albus*, et generatim omnia Subſtantiva Mixta, quatenus ex ſuâ materiâ et formâ componuntur. Compoſitum Integrale eſt, in quo partes habent ſe non ut materia et forma; ut *Arbor*, quatenus componitur ex ramis, trunco, et radice, item *Menſa*, quatenus componitur ex aſſeribus et palis; horum enim nihil aut materia eſt aut forma Compoſiti, cum nihil horum affirmetur ſeorſim de Compoſito, nam nec *Arbor* eſt ramus aut radix, etc. nec *Menſa* eſt aſſer aut palus, etc. Debent autem Forma et Materia de compoſito ſeorſim affirmari, cum ſint Praedicata de ipſo, ut patet Sect. I. cap. 5. Sed dices: *Aes* eſt materia *Statuae*, et *Certa figura* eſt ejus forma; et tamen

nihil horum affirmatur de *Statua*. Respond. Sic passim loquuntur; at existimo abusum esse in phrasi, et Tropus subolet mihi, qui Substantivum in locum Adjectivi suffecerit. Nam, ut Aes certae statuae materiam esse concedam (dicendo nempe, Statuam illam non esse aliud quam Aes certo modo figuratum), tamen *Certa illa figura* non potest dici ejus forma, si proprie loquendum sit; sed *Certo modo figuratum* aut Forma ejus est, aut illam designat. Frequens autem est iste Tropus, qui Substantivum Adjectivi vicarium facit. Consule Rhetores, confer et ista hodie trita: *Tua Dominatio*, *Tua Reverentia*, *Celsitudo*, *Majestas*, etc.; substantiva vides loco Adjectivorum. Ut ut est, certe Materia et Forma non debent censerī Logicae considerationis, nisi affirmentur de Composito; in Logicam enim nihil recipi debet, quod non ex istâ radice, Affirmatione, pullulet.

4. Igitur Compositum Logicum, seu quod Logicae considerationis est, dividitur in Compositum-per-se, et Compositum-per-accidens; quae coincidunt cum Mixtis-per-se et per accidens, de quibus Sect. 1. cap. 7. n. 2. Totum Potentiale etiam dividitur in per-se et per-accidens. Totum Potentiale-per-se est totum potentiale, cujus partes subjectivae sunt inferiora ejusdem; ut *Metallum* respectu *Auri*, *Argenti*, etc., item *Arbor* respectu *Quercus*, *Tiliae*, etc. Totum Potentiale-per-accidens est totum potentiale comparatum ad partes suas Subjectivas, quae non sunt inferiora sua, sed composita ex se et diversis formis-per-accidens: ut *Homo* respectu *Militis*, *Mercatoris*, *Nautae*, etc.

5. Totum Potentiale affirmatur de qualibet sua parte. Continet enim suas partes subjectivas penes affirmationem seu disjunctive, adeoque de qualibet earum affirmatur, juxta ea quae demonstrata sunt Sect. 1. cap. 2. n. 7. et 8. Unde si partes Subjectivae repugnent, Totum Potentiale erit etiam Subalternans earum; ut patet ex Demonstratione ultimâ praeced. cap. Atque illud magis usitatum est totum Potentiale; solemus enim ipsum comparare ad Partes Subjectivas repu-



gnantes. Sed et omne Subalternans comparatum ad plura sua Subjecta Subalternata (ad quae semper comparari posse demonstratur cap. praeced. n. II.) est etiam Totum Potentiale respectu illorum; cum enim illa sint Subjecta ejus, ergo continentur in illo disjunctive, ut demonstr. Sect. I. cap. 2. n. 7. et 8., et sic Subalternans est illa plura Subalternata intercedente particulâ *Vel*; adeoque Subalternans est Totum Potentiale, et Subjecta Subalternata partes Subjectivae, juxta definit. Tot. Poten.

## CAPUT IV.

*De Suppositione et Acceptione Terminorum.*

I. Quid sit Suppositio et Acceptio, non debemus dicere, nisi per exemplum; v. g. in reddendis rationibus, is qui calculos ponit loco nummorum et fummarum, is Supponit, ille vero cui ratio redditur, Accipit eosdem calculos pro nummis et fummis. Unde eadem res est Suppositio et Acceptio, sed respectu ad diversas personas distinguuntur. Atque hactenus Suppositio etiam naturâ prior est Acceptione: prius enim est unum pro altero supponere, quam id ab alio quopiam ratum haberi. Porro hîc non de quavis Suppositione et Acceptione tractandum nobis fuerit, sed de ea tantum, qua voces supponimus inter loquendum, et easdem accipimus inter audiendum, propter mutuum commercium seu cogitationum nostrarum communicationem. Unde et haec non tam est Affectio Terminorum (sicut Concordia et Discordia, Ordo et Dissolutio) quam bene vocum, quibus constant Termini. Solet autem Loquens plerumque voces suas supponere pro certis rebus, et pro iisdem accipiuntur ab Audiente (unde et *Voces* dictae videntur, quasi *vices rerum*); v. g. *Albor est color*, *Albor non est sonus* dicimus, et hoc dicendo videmur verum dixisse; quod utique non foret verum, si vox *Albor* ibi staret pro se ipsâ: illa enim vox non est color sed sonus.

2. Haec igitur Acceptio, quae ſic voces concernit, quaeque proinde Logicae conſiderationis eſt, dividitur in Ordinariam et Extraordinariam. Acceptio Ordinaria eſt, qua vox accipitur nude pro re quam ſignificat; ſic accipitur vox *Mus*, quando dico: *Mus rodit caſeum*; hoc enim intelligitur nude de ipſo mure, nullo ad alia quaevis habito reſpectu. Haec Acceptio eſt omnium frequentiffima, et fere dixerim perpetua; atque adeo Ordinariam vocavi. Acceptio Extraordinaria eſt Acceptio qua vox vel non pro re, vel non nude pro re ſumitur. Dividiturque in Acceptionem Grammaticam et Logicam. Acceptio Grammatica eſt acceptio vocis pro ſe ipſa; ſic Accipitur *Mus*, quando dico: *Mus eſt ſyllaba*; hoc enim intelligitur de nomine muris, quod ibi ſonat, non autem de ipſo mure; is enim nequit eſſe ſyllaba. Haec Acceptio frequens eſt in diſcurſibus Grammaticorum, atque ideo Grammaticam vocavi. Acceptio Logica eſt Acceptio vocis pro re quatenus certo modo ſignificatâ per vocem; ſic accipitur *Mus*, quando dico: *Mus ſubalternatur animali*; hoc enim non de nomine muris, nec de ipſo mure ſimpliciter intelligendum eſt, ſed de mure, quatenus iſta voce *Mus* ſignificatur: ſic enim et non alias ſubalternatur *Animali*.

3. Quod ut melius intelligas, Nota, res ſecundum ſe, ſeu nudas res, non ſubjici, non affirmari; ſed ut ſubjiciantur vel affirmantur, debent certis vocibus exprimi, ſeu debent certo modo dici (ore ſcilicet vel mente); praeveniendū autem iſtam dictionem, impoſſibile eſt de ipſis aliquid affirmare, aut ipſas de aliquo affirmare. Librum v. g. quem habes in manibus, poteſ ipſum paginatim pervolvere, poteſ eum projicere, poteſ eum diſcerpere; ſed ipſum affirmare de aliquo, aut de ipſo affirmare aliquid non poteſ, niſi prius ipſum dicas ſeu certo modo eum ſignifices, adeoque ipſum veſte quaſi idoneâ induas, ut prodeat in iſtam Scenam. Cum igitur res nuda, res ſecundum ſe, res, praeveniendū noſtras de ea cogitationes, affirmari ſubjicique non poſſit, certum eſt, etiam nullum ex iis Attributis ei com-

petere, quae ex ista radice (Affirmatione) pullulant; qualia sunt Converti, Subalternare, Essentia, Accidens, Proprietas, Superius, etc. Adeoque cum ista Attributa de aliquo dicuntur, non de ipso secundum se dicuntur, sed de ipso, quatenus certo modo per voces nostras significatur. Et sic in Subjecto fit *Acceptio Logica*.

4. *Acceptio Ordinaria* dividitur in *Communem* et *Singularem*. *Acceptio Communis* est *Acceptio ordinaria* pro pluribus Subjectis Termini. Sic accipitur vox *Homo*, cum dico: *Omnis homo est doctus*; ibi enim accipitur pro *Petro*, *Paulo*, *Joanne*, aliisque innumeris, qui sunt plura Subjecta istius Termini *Homo*. *Acceptio singularis* est *Acceptio ordinaria* pro unico Subjecto Termini. Sic accipitur *Petrus*, cum dico: *Petrus est doctus*; accipitur enim pro unico isto Subjecto, pro hoc homine, qui *Petrus* vocatur. Cum vox ordinariâ Acceptione accipi potest communiter, tunc efficit Terminum Universalem; adeo ut Universale non sit aliud quam quod communiter sumi potest; Singulare vero est Terminus, qui quidem ordinarie, sed non communiter sumi potest.

## CAPUT V.

### *De Enumeratione.*

1. Quia *Acceptio Communis* fit pro pluribus Subjectis Termini, hinc ei adhaeret *Enumeratio*, qua plura illa Subjecta Enumerantur. Est autem *Enumeratio* duplex, *Copulativa* scilicet et *Disjunctiva*, ut monui cap. 3. hac Sectione. Utraque ista *Enumeratio* aut *Laxa* est aut *Pressa*. *Laxa Enumeratio* est, qua Enumerata recedunt abs se invicem integrâ et perfectâ Sententiâ. Sic *Petrus* et *Paulus* hic Enumerantur *Copulative Laxe*: *Et Petrus est doctus, et Paulus est doctus*; hic vero *Disjunctive Laxe*: *Vel Petrus est doctus, vel Paulus est doctus*. *Pressa Enumeratio* est, qua Enumerata recedunt a se invicem

tantum parte Sententiae; non vero integrâ et perfectâ Sententiâ. Sic Copulative Preſſe Enumerantur *Homo* et *Brutum*, quando dico: *Homo et Brutum ſunt duo*; non eſt enim ſenſus: *Et Homo eſt duo et Brutum eſt duo*. Eadem Enumerantur Diſjunctive Preſſe, quando dico: *Homo vel brutum requiritur ad curſum*. Non eſt enim ſenſus: *Vel homo requiritur ad curſum, vel brutum requiritur ad curſum*; ſiquidem falſum eſt quod iſto ſenſu perhibetur (cum tamen Propoſitio, cujus ſenſus praetenditur, ſit vera); falſum enim eſt quod homo requiratur ad curſum (nam ſolum brutum ſufficit), falſum etiam eſt quod brutum requiratur ad curſum (nam ſolus homo ſufficit). Cum igitur ambae partes ſint falſae, neceſſum eſt ipſum totum falſum eſſe.

2. Nota, Enumerationem Preſſam aut Laxam non aeſtimari a nobis penes Expreſſionem, ſed penes Senſum; unde cenſeo hic Laxam Enumerationem fieri: *Petrus et Paulus eſt doctus*; licet enim *Petrus* et *Paulus* ibi ſe mutuo preſſe ſequantur, ſi attendamus ad verba quae jacent; tamen ſi voluerimus attendere ad Significationem et Senſum, videbimus Laxam Enumerationem fieri, cum ſenſus ſit: *Et Petrus eſt doctus, et Paulus eſt doctus*. Unde et Regula eſt, Enumerationem Laxam ſemper habere locum, niſi ſpecialis aliqua ratio militet pro Enumeratione Preſſa. An autem ſpecialis aliqua Ratio militet pro Enumeratione Preſſa, deſpiciendum eſt ex Regulis Acceptionum, et potiffimum penes obviuſ ſenſum. Si enim Propoſitio in obvio ſenſu vera, efficiatur falſa per Laxam Enumerationem, et veritas ejus ſalvetur per Preſſam, judicandum eſt Enumerationem Preſſam in ea vigere. Sic ex veritate, quam in obvio ſenſu habet iſta Propoſitio: *Homo vel brutum requiritur ad curſum*, mox colligebam, *Hominem* et *Brutum* in ea Enumerari preſſe.

3. Notandum etiam, quod paſſim Enumerationem Preſſam et Laxam videantur aeſtimare penes eandem vel diverſas Propoſitiones, quas ingrediantur Enumerata; ſtatuunt nempe, Preſſe Enumerari, quae intra eandem conſiſtunt Propoſitionem, Laxe,



quae in diversas propositiones recumbunt inter Enumerandum. Frequens quidem est, ut ea distinctio obtineat, sed non est perpetuum. Si enim nodus in thorace tuo adhuc novo non possit adigi per foramen ei ex adverso respondens, si eo casu dixerim: *Vel quia nodus est nimis magnus, vel quia foramen est nimis parvum non potest fieri transitus*, ibi fit Enumeratio Pressa *Nodi ut nimis magni* et *Foraminis ut nimis parvi*, et tamen consistunt in diversis Propositionibus ista Enumerata. Cur igitur non Enumerantur Laxe? Quia non recedunt ab invicem integrâ et perfectâ Sententiâ; haec enim imperfecta sententia est: *Quia nodus est justo major* (quamvis contineat integram Propositionem), et pendet propter particulam *Quia*, quae inficit sensum istius Propositionis. *Vel quia foramen est justo angustius*, iterum imperfecta sententia est, et adhuc pendet; sed hoc complemento perficitur: *Non potest fieri transitus*. Non licet autem isto casu laxam Enumerationem instituere, hoc modo: *Quia nodus est nimis magnus, non potest fieri transitus; vel quia pertusio est nimis angusta, non potest fieri transitus*. Falsa enim est ista sententia, cum utraque pars istius Disjunctionis sit falsa, siquidem falsum est: *Quia nodus est justo major, non datur transitus* (nodo enim eandem figuram et molem retinente, fiet transitus, si foramen fiat magis amplum); falsum etiam est: *Quia foramen est nimis angustum, non potest fieri transitus* (stante enim istâ foraminis angustîâ, fiet transitus si tantum nodus diminuatur). Sola igitur Pressa Enumeratio hoc casu rem tangit, et veram praestat Sententiam.

## CAPUT VI.

*De Acceptione Copulativa et Disjunctiva.*

1. Acceptio Communis dividitur in Copulativam et Disjunctivam. Acceptio Copulativa est Acceptio communis cum Enumeratione Copulativa Subjectorum, pro quibus fit Acceptio.

Sic accipitur Copulative *Homo*, quando dico: *Omnis homo est doctus*; sensus enim est: *Et Petrus est doctus et Paulus est doctus etc.* Ibi advertis Enumerationem Copulativam eorum pro quibus fit Acceptio. Acceptio Disjunctiva est Acceptio communis cum Enumeratione Disjunctiva Subjectorum, pro quibus fit Acceptio; sic Accipitur *Homo*, cum dico: *Aliquis homo est doctus*, quia sensus est: *Vel Petrus est doctus vel Paulus est doctus etc.*

2. Acceptio Copulativa dividitur in Universalem et Quasi-universalem. Acceptio Universalis, quae uno nomine vocatur *Distributio*, est Acceptio copulativa cum Enumeratione laxa Subjectorum, pro quibus fit ista Acceptio. Sic accipitur *Homo*, cum dico; *Omnis homo est doctus*; sensus enim est: *Et Petrus est doctus et Paulus est doctus etc.* Ibi vides non tantum Enumerationem Copulativam, sed etiam Laxam eorum pro quibus vox *Homo* accipiebatur. Acceptio Quasi-universalis est Acceptio Copulativa cum Enumeratione Pressa Subjectorum, pro quibus fit Acceptio ista. Sic accipitur vox *Elementa*, quando dico: *Omnia Elementa sunt quatuor*; sensus enim est: *Et ignis et aër et aqua et terra sunt quatuor.* Ibi vides quidem Enumerationem Copulativam istorum Subjectorum, sed Pressam; non enim sensus est, quem Laxa Enumeratio faceret: *Et ignis est quatuor, et terra est quatuor etc.*

3. Acceptio Disjunctiva similiter dividitur in Particularem (quae et Determinata dicitur) ac Quasi-particularem (quae et Confusa dicitur). Acceptio Particularis est Acceptio Disjunctiva cum Enumeratione Laxa. Sic accipitur *Homo*, cum dico: *Aliquis homo est doctus*; sensus enim est: *Vel Petrus est doctus vel Paulus est doctus etc.* Ibi vides Enumerationem et Disjunctivam et Laxam istorum Subjectorum, pro quibus vox *Homo* accipiebatur. Acceptio Confusa est Acceptio Disjunctiva cum Enumerationem Pressa; sic accipitur *Navis*, quando dico: *Aliqua navis est necessaria ad navigandum*, sensus enim est: *Vel haec*

*navis, vel illa navis, vel ista, etc. est necessaria ad navigandum;* non autem sensus est, quem faceret Enumeratio Laxa: *Vel haec navis est necessaria ad navigandum, vel ista navis est necessaria ad navigandum, etc.*, quia falsum est, quod illo sensu dicitur, cum tamen Propositio, cujus sensum prae se fert, sit vera.

4. Quod ut commodius intelligamus, supponamus, omnes naves esse tres numero, A, B, C (in parvo enim numero melius videmus, quod tamen in magno et immenso obtinere pari pacto intelligitur). Dicamus jam Enumeratione Laxa: *Vel navis B est necessaria ad navigandum* (falsa est haec pars, quia possum navigare navi B), *vel navis B est necessaria ad navigandum* (falsa est et ista pars, quia possum navigare navi C), *vel navis C est necessaria ad navigandum* (falsa tandem etiam est ista pars, quia possum navigare navi A). Vides omnes partes istius Disjunctionis esse falsas, et per consequens ipsam Disjunctivam Enunciationem, quae ibi exhibita fuit, etiam falsam esse. Sed contra haec jam dicta sic ago: Sublatis omnibus, quae non sunt necessaria ad navigandum, poterit adhuc institui navigatio. Sed navis A non est necessaria ad navigandum; tollatur ergo. Navis B non est necessaria ad navigandum; tollatur et ista. Navis C non est necessaria ad navigandum; tandem etiam ista tollatur. Naviga jam, si potes, sine navi; nulla enim, juxta suppositionem factam, amplius suppetit navis, et tamen superflua tantum navigationis ablata sunt. Respondeo, eorum quae necessaria non sunt, singula quidem tolli posse, sed non omnia simul. Sic v. g. *Stare me* non est necessarium, nec etiam necessarium est *Non stare me*; singula igitur ista tolli possunt, utrumque simul tolli est impossibile. Similiter nulla est navis, quae non possit tolli salvâ potentiâ navigandi, sed non omnes simul tolli possunt salvâ istâ potentiâ.

5. Acceptio Communis aliter dividitur in Communiorem, et simpliciter Communem. Acceptio Communiior, seu frequentior inter Communes, est Acceptio Communis cum Enume-

ratione Laxa; cum Enumeratione Preſſa rariores ſunt Acceptiones. Ideoque Terminus qui communiter capitur, plerumque accipitur communius, raro autem communiter ſimpliciter.

## CAPUT VII.

*De Homonymiâ et Synonymiâ.*

1. Homonymum (Latinis Aequivocum) eſt plures Termini ſub eodem nomine; ut *Gallus* in hoc Paralogiſmo: *Omnis Gallus eſt avis, Ludovicus eſt Gallus, ergo Ludovicus eſt avis*. Ibi enim ſub illo nomine *Gallus* uno ac alio loco alius atque alius Terminus velatur; priori enim loco continet Gallum gallinaceum, ſeu Gallum naturâ, poſteriori loco continet Gallum nativitate, quem hodie Francum dicimus. Synonymum (Latinus Univocum) eſt unus Terminus ſub pluribus nominibus; ut *Mulier* et *Femina*. Ibi enim duo quidem ſonant nomina, at unus ſub iſtis nominibus conſiſtit Terminus. Synonymum aliquando etiam capitur pro uno Terminò pluribus locis recurrente, etiamſi forte recurrat ſub eodem nomine. Sic dicimus: *Homo* univoce affirmatur de *Petro* et *Paulo*, quia cum dicitur: *Petrus eſt homo, et Paulus eſt homo*, ibi *Homo* unus idemque Terminus eſt, quamvis bis occurrat. *Gallus* autem in præcedenti Paralogiſmo æquivoce capitur, quia licet utroque loco recurrat idem nomen, non tamen et idem Terminus.

2. Ex quo patet, Acceptionem etiam Univocam aut Aequivocam dici. Et quidem Acceptio univoca, quoad Terminum ſuum, ſeu quoad id pro quo fit Acceptio, una eſt; Acceptio autem Aequivoca, quoad Terminum ſuum, eſt multiplex, fit enim Acceptio pro aliis ac aliis, cum Terminus æquivoce accipitur. Sed num univoce, num æquivoce capiatur vox aliqua, quae pluribus locis recurrit, dijudicari debet ex eo, an eodem an diverſo ſenſu dicatur de illis Subjectis, ad quae uno ac alia loco comparatur. Hoc autem ipſum, diverſone an eodem



seusu uno ac alio loco dicatur, non est sciendum ex alia ratione, sed ex lumine Naturae. Sic v. g., *Gallum* aequivoce sumi in praedicto Paralogismo, *Hominem* autem univoce sumi in proxime allegatâ Sententiâ, hoc indicio scimus, quia *Gallus* alio sensu de *Ludovico* dicitur, ad quem comparatur in Minori, alio sensu de *Certa Ave*, ad quam comparatur in Majori. *Homo* autem de *Petro* ac *Paulo* dicitur eodem sensu; sed cur *Homo* potius de *Petro* et *Paulo* dicatur eodem sensu, quam *Gallus* de *Ludovico* et *Certa Ave*, nulla ulterior dari potest ratio, sed hoc per se patet omnibus, qui significationem utriusque vocabuli *Gallus*, *Homo* recte perceperint.

3. Aequivocum dividitur in Aequivocum Purum et Analogum. Aequivocum Purum est plures Termini aequaliter venientes sub eodem nomine, id est, unus tam proprie quam alius, unus tam famose quam alius: ut *Gallus* semel sumptus pro Gallo Franco, et semel pro Gallo gallinaceo. Etiam si in Annalibus per *Gallum* magis intelligere soleamus oriundum ex Gallia, et in Historia animalium magis intelligendus sit Gallus gallinaceus, tamen abstrahendo ab illis circumstantiis, et per se loquendo, aequè unus ac alius illorum Terminorum venit sub isto nomine *Gallus*. Idem est de isto nomine *Jus*, quod in Medicorum quidem libris jus significat, quod forberi solet, in Jureconsultorum libris, jus quod in Curia dici solet. Analogum est plures Termini inaequaliter venientes sub eodem nomine, nempe unus proprie, alter improprie, unus cum additâ vel subauditâ particulâ, alius absolute et sine tali particula: ut Magistratus et Nauclerus, quatenus veniunt diversis locis intelligendi sub isto nomine *Gubernator*. Nauclerus enim proprie, Magistratus improprie seu metaphorice intelligitur isto nomine.

4. Analogiae plures sunt Species. Ac primo quidem, cum Terminus uno loco sumitur proprie, et alio loco per Tropum Rhetoricum. Talis Analogia committitur in hoc Paralogismo: *Omne ridens est animal, Prata rident tempore veris, ergo Prata*

*tempore veris sunt animalia*; ibi enim *Ridens* in Majori fumitur proprie et in Minori metaphorice.

5. Secunda Species: cum Terminus, qui per Actum, per Habitum, per Potentiam, per Dignitatem capi potest, uno loco, hoc, alio, isto modo capitur. Talis Analogia relucet in isto Paralogismo: *Omne animal sentit; qui profunde dormit, non sentit; ergo, qui profunde dormit, non est animal*; ibi enim *Sentit* in Majori fumitur per Potentiam, in Minori per Actum. Similis farinae est iste: *Omnis bonus filius honorat suos parentes; sed qui jam non cogitat de suis parentibus, non honorat illos; ergo qui jam non cogitat de suis parentibus, non est bonus filius*; ibi enim *Honorat* in Majori fumitur per Habitum, in Minori per Actum. Item: *Quod honoratur est honestum, divitiae honorantur, ergo divitiae sunt honestae*; ibi enim (Majorem admittendo tamquam veram) *Honoratur* priori loco fumitur per dignitatem, ut idem sit ac *Merito honoratur*, posteriori autem loco per actum aut habitum capitur.

6. Tertia Species: quando Terminus uno loco accipitur certâ Acceptione, alio loco aliâ Acceptione; veluti si uno loco ordinarie, alio loco extraordinarie, aut uno loco Logice, ac alio loco Grammatice fumatur, etc. Talis Homonymia apparet in hoc Paralogismo: *Mus rodit caseum, mus est syllaba, ergo syllaba rodit caseum*; ibi enim *Mus* in Majori ordinarie, in Minori extraordinarie et grammaticè fumitur. Talis est etiam iste Paralogismus: *Mus est syllaba, mus subalternatur animali, ergo syllaba subalternatur animali*; ibi enim *Mus* priori loco accipitur Grammaticè et posteriori loco Logice. Talis est etiam iste: *Rationale est forma Logica; homo est rationalis; ergo homo est forma Logica*: *Rationale* enim primo fumitur Logice, et deinde ordinarie.

7. Unde dimanavit Regula: Nullae Species Acceptionum possunt inter se permutari sine aequivocatione, excepta Universalis et Particulari. Hae enim duae Species, si nihil aliunde

accedat, permutari possunt sine aequivocatione; ut etiam permutantur in hoc Syllogismo: *Omnis homo est animal, Petrus est homo, ergo Petrus est animal*. Ibi enim *Homo* in Majori distribuitur seu accipitur universaliter, in Minori vero particulariter capitur, et tamen syllogismus bonus est; utique non esset bonus, si *Homo* aequivoce fumeretur, quia essent quatuor Termini, cum Aequivocum sit duo Termini, ut patet ex Definitione. Quoad caeteras Acceptiones, non potest unius earum in alteram fieri transmutatio in eodem vocabulo, sine multiplicatione ipsius Termini; unde et peccat iste: *Omnia elementa sunt quatuor elementa, aër et ignis sunt elementa, ergo aër et ignis sunt quatuor elementa*; ibi enim *elementa* accipitur tantum quasi-universaliter priori loco, posteriori loco accipitur etiam particulariter.

## CAPUT VIII.

*Regulae generales Acceptionum.*

1. Suprema Regula Acceptionum est mens loquentis. Nimirum cum loquens mentem suam abunde manifestat, pro quo vocabulum a se positum capi velit, standum est isti ejus voluntati. Unde si loquens velit istam vocem *Gallus* capi pro Gallo galinaceo, quando dicit: *Ludovicus est Gallus*, accipiendum est ita, reclamante quantumvis obvio sensu Propositionis, et favore quem alias veritati deberemus; si enim velimus attendere ad obvium sensum istius Propositionis, *Ludovicus est Gallus*, oportebit nos *Gallum* accipere pro Gallo natione, quem hodie Francum dicimus; si velimus etiam favere Veritati istius Propositionis, idem praestandum fuerit. His tamen non obstantibus obediunt loquenti, quisquis ille sit, et quantumcunque videatur vilis, dum advertimus aliud eum jubere; idque prompte facimus et pene inscii, solo Naturae instinctu, quae nobis voluit tam sanctum esse commercium.

2. Secunda Regula: Acceptionem accommodamus obvio sensui

Propositionis; id est, ita accipimus vocem positam in certa Propositione, pro ut eam requirit accipi communis et obvius sensus istius Propositionis. Haec Regula; cum enim de mente loquentis aliunde specialius non constat, utimur in eâ interpretandâ, hac secundâ Regulâ. Sic si quis dixerit: *Ludovicus est gallus*, nihil aliud innuendo, accipiemus *Gallum* pro oriundo ex Gallia; hoc enim requirit sensus obvius istius Propositionis, cui nos conformamus, quamdiu loquens aliud non jufferit.

3. Tertia Regula: In favorem Veritatis accipimus Vocabula; id est, eâ Acceptione accipimus Vocabulum, quae potest veram reddere Propositionem, in qua Vocabulum illud ponitur. Hac Regulâ nunquam utimur, nisi deficiente Primâ Regulâ, et vix unquam nisi similiter in defectu Secundae Regulae. V.g. proposito hoc Argumento: *Quid honoratur, est honestum; divitiae honorantur, ergo divitiae sunt honestae*, poterimus Majorem concedere, conformando nos huic Regulae, etiamsi neganda esset conformando nos Secundae Regulae, quae jubet attendere ad Sensum obvium, juxta quem Major est falsa. In obvio enim sensu est falsum, *quidquid honoratur, honestum esse*, cum multa etiam scelera hodie ac olim sint in honore. Igitur si te Tertiae huic Regulae conformare volueris, capies *Honoratum* per dignitatem seu meritum in Majori, hunc apud te sensum faciens: *Quidquid merito honoratur, honestum est*. Si autem volueris conformare te Secundae Regulae, negabis Majorem, atque tunc *Honoratum* in Majori capies per habitum, ut sensus sit: *Quidquid solent homines honorare, honestum est*.

4. Quarta Regula: Acceptionem accommodamus Conformitati locutionis. Veluti si loquens dixerit: *Omne animal sentit; qui profunde dormit, non sentit; ergo qui profunde dormit, non est animal*, si Majorem concefferimus (juxta tertiam Regulam, quae jubet favere veritati, non omnino abnuente Secundâ Regulâ, cum ille etiam sit satis obvius sensus istius Propositionis, juxta quem *Sentiens* sumitur per potentiam), postea negabimus Minorem insistendo huic



Regulae, accipientes nimirum Terminum *Sentiens* iterum per potentiam, id est, accipientes illum Terminum conformiter ad Acceptionem qua accipiebatur in Majori. Quod si loquens in vertendo Praemissas dixerit: *Qui profunde dormit, non sentit; omne animal sentit; ergo nullum animal profunde dormit*, poterimus rursus concedere Majorem (accipiendo Terminum *Sentiens* per actum) juxta Secundam et Tertiam Regulam, et negare Minorem (accipiendo eundem Terminum iterum per actum) juxta hanc Quartam Regulam; id enim postulabit conformitas locutionis. Ex quo patet, eandem vocem, etiam in eadem Propositione sitam, diversimodè capi posse, variato ordine quem habet cum alijs Propositionibus; nempe quia aliud ac aliud, in uno ac alio ordine postulat Conformitas sermonis. Subinde etiam arbitrii partes sunt, quando secunda et Tertia Regula diversum suadent; veluti si dictum fuerit: *Quod honoratur, honestum est*, fere arbitrarium est concedere ac negare, hoc Secundâ, illud Tertiâ Regulâ dictante; fere tamen standum est secundae Regulae, praesertim in Schola et inter Doctos. In Trivio autem et cum vulgo agentibus, standum est saepe Tertiae Regulae, quia horum, utpote hac in parte imbecilliorum, dictis favendum est, et quantum fieri potest benignâ interpretatione sublevandi sunt; praesertim cum in fines nostros concesserunt, et Philosophari nobiscum pro modulo suo volunt; tunc enim benigne tractandi sunt, tamquam peregrini in hac Regione Sapientium.

5. Hae quatuor sunt Regulae Capitales, Generales, Naturales, ex dictamine Rectae Rationis emanantes. Atque hae omnes latae sunt in favorem Loquentis. Prima quidem Regula loquenti favit; haec enim non aliud clamat, quam nutui Loquentis ac imperio parendum esse. Secunda Regula studet facilitati Loquentis; facilius enim novissè praesumitur, quod usitatum, quod obvium et commune est; adeoque etiam facile accommodat se obvio et communi sensui ac sermoni, quando aliud ei non lubet imperare. Tertia Regula veracem praesumit Lo-

quentem, et vera velle profari. Quarta Regula aliter adhuc dignitati Loquentis conſulit, cum praefumit eum non diſſoluta et vaga, ſed connexa et ſibi cohaerentia loqui. Adeo ut Imperii quandam imaginem hic conſpiciam, in quo Rex ſit qui loquitur, etiam cum ad genua provolvitur et ſupplex rogat, quia vel ſic etiam imperat in hac Republica humani commercii. Subditi ſunt quibus loquitur; Hoſtes et peregrini quodammodo ſunt de quibus loquitur.

## C A P U T I X.

### *Regulae ſpeciales Acceptionum.*

1. Regulae ſpeciales omnes derivantur ex Secunda Regula generali; haec enim poſt Primam ſumma eſt. Itaque Regulae Speciales tantum attendunt, quis ſit obviuſ et communis ſenſus Propositionis, quam vox aliqua ingreditur, eique accommodant Acceptionem. Unde hae Regulae Speciales non ſunt aliud quam particulares quidam caſus iſtius Legis generalis.

Prima Lex Specialis: Vox accipitur Grammaticae, cum de ea dicitur attributum aliquod Grammaticum; Logice, cum Logicum. Sic accipitur Grammaticae ſubjectum harum: *Mus eſt maſculini generis*, *Mus eſt tertiae declinationis*, *Mus eſt ſyllaba*, etc., Logice vero ſumitur ſubjectum harum: *Mus ſubalternatur animali*, *Mus repugnat cum bove*, *Mus eſt ſuperius huius muris*, etc.

2. Secunda Regula: Vox Logice vel Grammaticae ſumpta inter ſcribendum ſubductâ lineâ, et in libris impreſſis diverſo a reliquis (plerumque minutiori) caractere denotatur. Hoc videre eſt in Logicorum et Grammaticorum libris, in quibus difformitas illa caracterum paſſim conſpicua eſt. Interdum tamen etiam Regulae et Axiomata diverſo caractere depinguntur; ſed expedit his tertium aliquod genus caracterum reſervare.

3. Tertia Regula: Acceptio Ordinaria eſt fere perpetua. Quia ſemper obtinet, praeterquam in Logicis ac Grammaticis

discursibus, et in his adhuc discursibus plurimum tenet, cum Praedicatum in illis fere semper accipiatur ordinarie, et multa insuper alia; ut facile colligitur ex Secunda Regula, quia in Grammaticorum ac Logicorum textu plura communi quam minuto caractere impressa leguntur.

4. Quarta Regula: Acceptio Singularis aequipollet Distributioni. Unde, cum Regula Syllogismi jubeat Medium in altera Praemissarum distribui, fatisset isti Regulae etiam cum Medium Singulare accipitur; unde placet mihi, ut Acceptio Singularis etiam nomine Distributionis in Regulis Syllogisticis et Argumentorum intelligatur.

5. Quinta Regula: Subjectum, cui expresse vel implicite praefigitur Nota *Omnis* aut *Nullus*, distribuitur. Sic distribuantur Subjecta harum: *Omnis homo est doctus*, *Nullus lapis est homo*, *Homo est animal*; in illa enim postrema Propositione saltem implicite Nota *Omnis* praecedat Subjectum. Hinc istae Notae, *Omnis*, *Nullus*, dicuntur Notae Distributionis, item Notae Quantitatis Universalis. De Quantitate infra agitur.

6. Sexta Regula (et haec exceptionem aliquam continet a Regula Quinta): Subjectum pluralis numeri, cui expresse vel implicite praefigitur Nota *Omnes*, et ex parte Praedicati tribuitur ei numerus, *Duo*, *Tria*, *Quatuor*, etc., accipitur quasi-universaliter. Sic accipiuntur quasi-universaliter Subjecta harum: *Omnia elementa sunt quatuor*, *Omnes planetae sunt septem*, *Planetae sunt septem*, etc.

7. Septima Regula: Praedicatum Propositionis Negativae distribuitur. Sic distribuuntur Praedicata harum: *Petrus non est lapis*, *Nullus homo est brutum*; sensus enim prioris est: *Petrus non est silex et Petrus non est marmor et non est later*, et sic pergendo per reliquos lapides; similis est sensus posterioris. Cum vero Praedicatum Negationis fuerit Singulare, non quidem proprie distribuitur; sed tamen Acceptio ejus, ut alias quodcumque, aequipollet Distributioni.

8. Octava Regula: Subjectum, cui praefigitur Nota *Aliquis*, accipitur particulariter. Sic accipitur particulariter Subjectum harum: *Aliquis homo est doctus*, *Aliquis homo non est doctus*, etc. Atque hinc ista Nota vocatur passim Nota Acceptionis Particularis, item nota Quantitatis Particularis.

9. Nona Regula (et haec exceptionem aliquam continet ab Octava Regula): Subjectum de quo, communiter sumpto, affirmatur *Requisitum ad etc.*, *Necessarium ad etc.*, accipitur confuse. Sic accipiuntur quasi-particulariter seu confuse Subjecta harum: *Aliqua navis est necessaria ad navigandum*, *Calamus requiritur ad scribendum*, etc.

10. Decima Regula: Praedicatum Propositionis Affirmativae accipitur particulariter, quando scilicet capax est talis Acceptionis. Sic accipitur particulariter *Homo*, quando dico: *Petrus est homo*; sensus enim est: *Petrus est hic homo vel Petrus est iste homo etc.* Dixi: quando capax est etc., quia si Praedicatum Affirmationis fuerit Singulare, cum illud sit incapax Acceptionis Particularis (non potest enim accipi pro pluribus suis Subjectis, sed tantum pro uno), non accipietur particulariter.

11. Dices: haec est Affirmatio: *Omnis bos est brutum*, et tamen Praedicatum non accipitur Particulariter, quia tunc sensus esse deberet hic: *Vel omnis bos est hoc brutum, vel omnis bos est istud brutum, et sic porro*; non est autem iste sensus, quia quod sensu isto perhibetur, falsum est, cum nullum sit determinate brutum, quod sit omnis bos. Respondeo, nihilominus Praedicatum istius Affirmationis accipi particulariter; sed non semel tantum (quod Objectio supponit), at saepius; sensus enim est: *Et hic bos est brutum* (ibi *Brutum* accipitur semel particulariter) *et iste bos est brutum* (ibi adhuc semel accipitur particulariter) *et sic porro*, adeo ut *Brutum* in ista Propositione (*Omnis bos est brutum*) accipiatur toties particulariter, quot sunt Subjecta, pro quibus distribuitur *Bos*; cum singulis enim eorum semel conjungitur semelque particulariter capitur.



## CAPUT X.

*Secundum Quadratum Logicum.*

1. Primum Axioma : Quod affirmatur de Subjecto, affirmatur etiam de Praedicato particulariter sumpto. Id quidem, quod de Subjecto affirmatur, non debet absolute affirmari de Praedicato. *Rationale* enim affirmatur de Subjecto (*Homine*), et tamen non affirmatur absolute de Praedicato (*Animali*), cum *Animal* non sit rationale, absolute loquendo, sed indifferens ad *Rationale* et *Irrationale*. Hoc igitur tantum verum est: *Quod affirmatur de Subjecto, affirmari etiam de Praedicato particulariter sumpto*; unde *Rationale* non quidem de *Animali*, sed tamen de *Aliquo animali* dicitur. Et Ratio hujus Axiomatis est, quia affirmari particulariter de certo Termino nihil aliud est, quam de aliquo ejus Subjecto affirmari; igitur quod de Subjecto affirmatur, necessario etiam affirmatur de Praedicato particulariter sumpto.

2. Secundum Axioma : Quod negatur de Praedicato distributo, negatur etiam de Subjecto. Ubi rursus notari debet, quod de Praedicato negatur, non necessario negari de Subjecto; nam *Rationale* negatur de Praedicato (*Animali*), non ideo tamen negatur de Subjecto (*Homine*). Hoc igitur tantum est verum: *Quod negatur de Praedicato distributo, negari etiam de Subjecto*; nec mirum, quia praedicatum distributum non est aliud quam omnia sua Subjecta. Sic, quia *Lapis* negatur de *Animali* distributo, negatur etiam de *Homine*, *Bruto*, et quovis alio Subjecto *Animalis*.

3. Tertium Axioma : Quod dicitur de Subjecto particulariter sumpto, dicitur etiam de Praedicato particulariter sumpto. Sic, quia *Bipes* dicitur de *Quodam Bruto*, hinc etiam dicitur de *Quodam Animalis*.

4. Quartum Axioma; Quod negatur de Praedicato distributo, negatur etiam de Subjecto distributo. Secundum Axioma tantum importat, simpliciter negari de Subjecto, quod negatur de Prae-

dicato distributo. Hoc Axiomate plus dicitur, nempe etiam negari de Subjecto distributo; subinde enim negatur aliquid de Subjecto simpliciter et absolute, quod tamen non negatur de Subjecto distributo. Ut *Rationale* simpliciter negatur de *Animali*, non negatur tamen de *Animali* distributo; licet enim *Animal simpliciter non sit rationale*, non tamen *Nullum Animal est rationale*. Ex quo etiam patet discrimen inter Affirmari simpliciter et simpliciter Negari. Nempe simpliciter negatur, quod negatur de Subjecto, etiamsi tantum particulariter sumpto; sed quod de Subjecto sic sumpto tantum affirmatur, non simpliciter affirmatur de illo Subjecto. Non censetur enim Terminus absolute affirmari de Termino, nisi affirmetur de quocunque Subjecto istius Termini; at de Termino negatur hoc ipso, quo negatur de aliquo Subjecto Termini.

5. Appendix ad hocce Secundum Quadratum. Primum Axioma: Quod affirmatur de uno Terminorum Concordium, affirmatur etiam de altero particulariter sumpto. Ratio est, quia Termini Concordes habent aliquod Subjectum idem; quod igitur simpliciter affirmatur de uno eorum, affirmatur hoc ipso de aliquo Subjecto alterius, et per consequens de illo altero particulariter sumpto. Quod autem simpliciter affirmatur de uno Concordium, non debet affirmari simpliciter de altero Concordium. *Irrationale* enim affirmatur de *Bruto*, non tamen affirmatur simpliciter de *Bipede*, concordante cum *Bruto*, sed tantum particulariter, hoc modo: *Aliquod bipes est irrationale*.

6. Secundum Axioma: Quod negatur de uno Terminorum Concordium distributo, negatur de altero. Ratio est, quia quod negatur de Termino distributo, negatur de quolibet ejus Subjecto, et per consequens de aliquo Subjecto alterius Termini Concordis, per consequens etiam de ipso altero Termino. Quod enim de uno Subjecto alicujus Termini negatur, id simpliciter de ipso Termino negatur. Hinc sequitur: *Nullum brutum est rationale, ergo aliquod bipes non est rationale*.

## CAPUT XI.

*De Ordine et Dissolutione Terminorum.*

1. Ordo Logicus desumitur penes Affirmationem veram, in quam plures aliqui Termini conjici possint. In Affirmatione autem Subjectum formaliter loquendo, seu Subjectum qua tale, sensu praecedit Praedicatum qua tale; licet Subjectum materialiter, seu id quod est Subjectum, saepe sensu sequatur id quod est Praedicatum. V.g. in hac affirmatione: *Aurum est metallum*, id quod ibi Praedicatum est, nempe *Metallum*, sensu praecedit id quod ibi Subjectum est, nempe *Aurum*; nam cum *Aurum* non sit aliud quam *Metallum tale*, constat, *Metallum* jam praecessisse, antequam complete dici possit *Aurum*.

2. Ordinem igitur Logicum inter eos Terminos esse dico, qui eandem Affirmationem veram ingredi possunt, eosque Terminos Colligatos esse censeo; Dissolutos vero, qui non possunt intra eandem Affirmationem veram commorari. Unde hi Termini sunt Colligati: *Homo*, *Animal*; conjiciuntur enim in hanc Affirmationem veram: *Homo est animal*. Imo etiam isti: *Animal*, *Rationale*; licet enim colligari non possint tamquam Subjectum et Praedicatum (quamdiu scilicet *Rationale* capitur in vim Adjectivi), possunt tamen colligari per modum Materiae et Formae intra idem Subjectum, ut hîc: *Homo sentit*; ibi enim *Animal* et *Rationale* implicite consistunt ex parte Subjecti. Isti vero Termini: *Homo*, *Bos*, sunt Termini Dissoluti, quia non sinunt se in eandem veram Affirmationem construi, nec tamquam extrema, nec tamquam partes extremorum. Partes, inquam, essentielles; nec enim eos Terminos colligari censeo, qui in eodem aliquo Termino reperiuntur, aut velut Partes Subjectivae, aut veluti Partes Integrales; alioqui enim *Bos* etiam et *Homo* essent termini colligati, sunt enim partes Subjectivae istius termini *Animal*; imo quaelibet Substantiva mixta essent colligata, quia haec omnia sunt Partes Subjectivae *Entis*. Ex dictis patet,

Terminos dupliciter colligari, nempe ut Coëxtrema, et ut Compartes ejusdem extremi.

3. Termini Colligati vel sunt simul in Ordine Logico, vel unus eorum prior, alter posterior est. Simul sunt isti Termini, qui in eandem Affirmationem veram Colligati, sic se habent, ut neuter alterum praecedat sensu. Ut *Homo, Animal rationale*; si enim duos illos Terminos intra eandem Affirmationem conjicias, nullus alterum praecedet quoad sensum; v. g. hîc: *Homo est animal rationale*, licet *Homo* qua Subjectum praecedat, non potest tamen dici quod etiam absolute et secundum se spectatus praecedat, cum sic spectatus sit idem cum altero Termino, qui obtinet locum Praedicati. Terminorum autem unus prior, alter posterior dicitur, qui intra eandem affirmationem veram conjuncti, sic se habent, ut unus alterum praecedat quoad sensum. Ut *Homo, Animal*; sic enim colligantur: *Homo est animal*; ibi *Animal* sensu praecedit, quia Terminus *Animal* consistit ex parte Subjecti, ante ipsum Subjectum complete positum, cum sit Materia istius Subjecti.

4. Ex quibus patet primo, quod Materia sit Logice prior suo Subjecto; priusquam enim Subjectum possit integre poni in Affirmatione aliqua, jam sensu praeceffit ejus Materia. Veluti si dicam: *Aurum est metallum*, aut: *Aurum est quodcunque*, antequam complete dicatur *Aurum*, jam implicite dictum erat *Metallum*; cum enim *Aurum* non sit aliud quam *Metallum tale*, patet, hoc complete non dici, nisi jam ante dictum sit *Metallum*.

5. Patet secundo, Materiam etiam Formâ priorem esse; cum enim de Subjecto affirmatur aliquid, praecedit Materia Subjecti (quando nempe Subjectum est compositum) et sensu sequitur Forma, complens Subjectum et absolvens, quod a Materiâ tantum fuerat inchoatum. Sic cum dico: *Aurum est hoc vel illud*, ex parte Subjecti, quod non est aliud quam *Metallum tale*, praecedit Substantivum *Metallum*, tamquam Materia, et subse-



quitur quoad sensum Adjectivum designatum per *Tale*, tamquam Forma *Auri*.

6. Patet tertio, Formam etiam Logice priorem esse suo Subjecto; antequam enim complete nanciscamur Subjectum compositum ex Materiâ et Formâ, haberi debet et Materia et Forma. Interim in ipso quasi momento, quo Forma accedit ad Materiam, jam habetur Subjectum; unde Forma fere simul est cum suo Subjecto, et quodam modo ambigit inter antecessum et comitatum; Materia vero perspicue praejacet, et Compositum perspicue subsequitur. Unde ambiguitas illa Formae in favorem ejus deceditur, et Forma etiam inter priora computatur.

7. Patet quarto, Essentiam totalem esse simul cum suo Subjecto; quia in Affirmatione vera, in qua Subjectum ejus ponitur, nec est prior suo Subjecto, nec posterior, sed eadem et simul.

8. Patet quinto, Accidens esse posterius suo Subjecto; quia cum in eandem veram Affirmationem cum Subjecto suo colligatur, nunquam praecedat Subjectum, sed necessario tantum sequitur. Nam sive colligetur cum suo Subjecto tamquam Co-extremum, tantum consistit ex parte Praedicati post Copulam, Subjecto praecedente Copulam; sive colligetur tamquam Compar ejusdem Extremi, consistit a tergo ejus tamquam Forma, Subjecto praestante vices Materiae.

9. Ex his expeditus est Ordo Logicus. Primo loco occurrit Materia Subjecti (quando scilicet Subjectum est compositum). Secundo loco Forma. Tertio loco ipsum Subjectum ex Materia illa ac Formâ compositum. Quarto loco Accidens Subjecti.

10. Inter Materias ejusdem Subjecti, Materia Materiae praecedat Materiam ipsam, eodem jure quo haec praecedat ipsum Subjectum. Sicut enim *Aurum* praecedat *Hoc aurum*, sic *Metalum* prius est *Auro*, et *Metallo* prius est *Corpus*, et *Corpore* prius est *Ens*. Si enim dixerò: *Hoc aurum est etc.*, antequam dictum sit integrum Subjectum dicitur ejus Materia, nempe *Aurum*; et antequam haec Materia dici potuerit, prius dicta

fuit ejus Materia, nempe *Metallum* (cum dicere *Aurum* non fit aliud quam dicere *Metallum tale*); et antequam rurfum haec Materia dici potuit, prius dici debuit ejus Materia, nempe *Corpus* (cum dicere *Metallum* non fit aliud quam dicere *Corpus tale*); et priuſquam haec Materia dici poterat, prius dici debuit ejus Materia, nempe *Ens*. Ex quo etiam vides, omnem Affirmationem inchoari ab *Ente*, ſeu *Ens* primo loco conſiſtere in omni Affirmatione. Nam ſive de *Ente* dicatur aliquid, *Ens* conſiſtit primo loco quoad ſenſum; ſive de Subjecto Compoſito dicatur aliquid, *Ens* etiam primo loco reperitur, tamquam Materia, quae neceſſario dicatur antequam ipſum Subjectum Compoſitum dici queat. Ideo *Ens* eſt Primum Logicum.

11. Inter Formas ſimiliter Forma Materiae (cum ſcilicet Materia rurfum Compoſita eſt) prior eſt Formâ Subjecti. Materia enim non eſt ante ſuam Formam componentem, et tamen Materia prior eſt Formâ componente Subjectum. Unde neceſſario evenit, Formam Materiae Formâ Subjecti priorem eſſe. V. g. cum *Metallum* fit *Corpus tale*, Adjectivum, quod designatur per *Tale*, quodque eſt Forma *Metalli*, prius eſt Adjectivo, quod designatur per *Tale*, cum dico: *Metallum tale*, putans *Aurum*, quia *Metallum* eſt ante hoc *Tale*, et eſt poſt illud *Tale*. Igitur etiam illud *Tale* praecedat hoc *Tale*.

12. Inter Accidentia, Proprietates, quae ſunt Potentiae, praecedunt Accidentia ſtricte dicta. Cum enim in eandem Affirmationem veram colligantur, praecedunt Potentiae et ſequuntur Accidentia ſtricte dicta. Potentiae enim tenent ſe ex parte Copulae tamquam Modi Copulae; Actus vero earum, qui ſunt Accidentia ſtricte dicta, tenent ſe ex parte Praedicati; jam autem Copula ſenſu praecedat Praedicatum. *Vide ſupra Sect. 1. cap. 6.* V. g. cum dico: *Petrus eſt ambulatorius*, ibi *Potens ambulare* et *Ambulans* colligantur, nempe tamquam Potentia et Actus ejus; at Potentia praecedat ad Copulam, et Actus *Ambulans* illam ſequitur ex parte Praedicati, tamquam Terminus et Finis quidam iſtius Potentiae.

---

## PARS II.

### SECTIO I.

#### De Enunciationibus.

Agitur in Logica de Enunciationibus propter Argumentationes. Argumentatio enim est quaedam Enunciatio, item partes Argumentationis, nempe Antecedens et Consequens, sunt quaedam Enunciationes.

#### CAPUT I.

##### *De Enunciatione in genere.*

1. Enunciatio est verum vel falsum. Quidquid ergo verum est, hoc Enunciatio est, ut: *Duo et tria sunt quinque, Carolus est rex, etc.*; quidquid falsum est, hoc Enunciatio est, ut: *Duo et tria non sunt quinque, Carolus est exsul, etc.* Quinimo hoc: *Arenae maris sunt numero pari*, Enunciatio est; quia saltem verum id est falsumve, licet nemo facile dixerit, falsumne sit an verum.

2. A definiendo Vero ac Falso excusari videor; distincte eorum fatis clara, fatis explorata nobis indita sit notio. Sed, inquis, distingue ergo, *Arenae maris sunt numero pari*, verum hoc sit an falsum. Lubens fateor, non posse me quod nemo potest; sed hoc non arguit nescire me, quid sit verum, aut quid sit falsum, sed tantum nescire me, num quod proponitur, verum sit, num falsum. Alioqui satis superque scire me quid sit verum, et quid sit falsum, hoc argumento est, quod clarissime firmissimeque sciam, verum esse vel falsum, quod proponebatur; quod utique non possem perfecte scire, nisi scirem perfecte, quid sit verum et quid sit falsum. Verum etiam *Veritas*,

et Falsum *Falsitas* vocatur. Unde ipfas etiam Enunciationes Veritates Falsitateſque conſuevimus appellare.

3. Sed eſtne *Aurum* etiam Enunciatio, cum ſit verum aurum, aut *Aurichalcum*, cum ſit falſum aurum? Reſpondeo, non eſſe; quia *Aurum* non eſt ſimpliciter verum (ſicut *Duo et tria ſunt quinque* ſimpliciter verum eſt), ſed eſt verum aurum; et *Aurichalcum* non eſt ſimpliciter falſum (ſicut *Petrus eſt bos* ſimpliciter falſum eſt), ſed eſt falſum aurum. Quamvis nec iſtae locutiones ſine abuſu ſint: *Aurum eſt verum aurum*, *Aurichalcum eſt falſum aurum*: Adjectiva enim ibi irrepſerunt in locum Adverbiis debitum; quia potius dicendum fuerat: *Aurum vere eſt aurum* et *Aurichalcum falſo eſt aurum*; ibi Adverbia, *Vere*, *Falſo*, ſignificant veritatem falſitatemque harum reſpective Enunciationum: *Aurum eſt aurum*, *Aurichalcum eſt aurum*. Verum igitur ac Falſum quomodocunque non cadunt niſi in Enunciationes.

4. Omnis autem Enunciatio, ſive ipſa Verum ſit, ſive ipſa Falſum ſit, verum ſe eſſe dicit. Sumamus in exemplum quamlibet Enunciationem, v.g. iſtam: *Sto*; illa, inquam, dicit ſe eſſe veram. Si enim ſtare, eſſet vera; atqui ipſa dicit me ſtare, ergo ipſa ſe veram eſſe dicit. Cum enim hoc totum eſſe dicat, quod ad ſui veritatem requiritur (nihil autem aliud requiritur, niſi ut ſtem), hoc ipſo quodammodo ſe veram eſſe dicit; unde et ſi *Sto* dixerim, et dixerim *Verum eſt me ſtare*, idem dixiſſe videor.

5. Omnis Enunciatio quodammodo eſt Affirmatio. Omnis enim Enunciatio dicit ſic eſſe, ita rem ſe habere, hoc vel illud verum eſſe; hoc, inquam, quodammodo dicit, et in aequivalenti; hoc autem dicere, affirmare eſt. V.g. *Non ſto*, quamvis formaliter et expreſſe ſit Negatio, tamen dicit in aequivalenti, hoc ita eſſe, hoc verum eſſe, *Quod non ſtem*, atque adeo ſuo modo Affirmatio eſt. Simili ratione facile videbis, hanc: *Et ſto et loquor*, etiamſi componatur ex pluribus Affirmationibus, quo-



dammodo tamen unam Affirmationem esse. Cum ergo omnis Enunciatio dicat quodammodo: *Ita est*, si ita sit, vera est Enunciatio, si secus, falsa; adeo ut *Est* in Dicto, et *Est* in Re, verum faciant; sed *Est* in Dicto, et *Non est* in Re, falsum faciunt.

## CAPUT II.

*De Enunciatione Possibili et Impossibili.*

1. Enunciatio possibilis est, quae potest esse vera, sive interim sit vera, sive non. Unde Enunciatio Possibilis comprehendit sub se omnem Enunciationem veram, et insuper aliquam Falsam, nempe illam Falsam, quae vera est potest, v.g. hanc: *Carolus non est Rex*. Enunciatio Impossibilis est, quae non potest esse vera, atque ea comprehenditur sub Enunciatione Falsa; necessum est enim, eam Enunciationem esse falsam, quae non potest esse vera, quandoquidem Enunciatio debeat esse alterutrum, nempe verum vel falsum. Sed tamen non omnis Enunciatio falsa est Impossibilis, sed quaedam talis est Possibilis, ut mox ostendi. Exemplum Enunciationis Impossibilis est: *Duo et tria non sunt quinque*, *Petrus est bos*, etc.; haec enim et similia non possunt esse vera.

2. Enunciatio Possibilis dividitur in Necessariam et Contingentem. Enunciatio Necessaria est Enunciatio Possibilis, quae non potest esse falsa; ut *Duo et tria sunt quinque*, *Petrus est homo*, etc. Enunciatio Possibilis, quae potest esse falsa, ut *Carolus est rex*, *Carolus est exsul*, etc. Ex his patet, omnem Enunciationem aut Impossibilem aut Necessariam aut Contingentem esse; posita enim quacunque Enunciatione, vel illa Enunciatio potest esse vera, vel non potest esse vera (juxta Princip.: *Quodlibet est vel non est*); si non possit esse vera, est Impossibilis; si vero possit esse vera, vel insuper potest esse falsa, vel non potest esse falsa; si hoc fiat, Contingens; si illud, Necessaria erit.

3. Contingentia autem omnis eſt ex Tempore. Cum enim omnis Enunciatio quodammodo ſit Affirmatio, Affirmatio nunquam eſt Contingens, niſi fiat in tempore, id eſt, cum Adverbio temporis expreſſe vel implicate adhaerente Copulae. Quae vero extra tempus ſeu in aeternitate fiunt Affirmationes, omnes ſunt aut neceſſariae aut impoſſibiles; v. g.: *Carolus eſt homo*, hoc neceſſarium eſt; *Carolus eſt lapis*, hoc impoſſibile eſt; tandem *Carolus eſt rex*, hoc contingens eſt, quia in tempore praefenti ſit Affirmatio iſta. Quod ſi in hac poſtremâ ſine tempore volueris affirmare, impoſſibilem Affirmationem exhibebis. Siquidem *Carolus eſt rex*, abſolvendo, ut loquuntur, Verbum a tempore, tam eſt impoſſibilis quam illa: *Animal eſt homo*. Quam enim neceſſario animal non eſt homo, ſed indifferens ad hominem ac aliud quoddam animal, tam neceſſario Carolus, ſecundum ſe et extra tempus conſideratus, non eſt rex, ſed indifferens ad regiam ac alias vitae conditiones.

4. Neceſſitas autem videtur ex Eſſentiâ provenire. Affirmatio enim Eſſentialis, ſeu in qua Eſſentia affirmatur de ſuo Subjecto, ſemper eſt neceſſaria, et aliarum Enunciationum nulla neceſſaria eſt, niſi ex Affirmatione Eſſentiali ſequatur. Quinimo videmur Enunciationem aliquam pro Contingenti habere hoc ipſo, quo non poſſumus ipſam aut ejus Contradictoriam ex Eſſentia aliqua deducere; v. g. *Pluit* aut *Sudum eſt*, aut *Ille lapis cadit*, aut *Petrus ambulat*, etc. Ideo Contingentia dicere videmur, ideoque perſuaſi, illa ſic et aliter ſe habere poſſe, quia nec illas Enunciationes, nec earum Contradictorias deducere poſſumus ex aliqua Eſſentia. Similiter, qui in Geometricis minus verſatus fuerit, facile habebit pro Contingenti, ſi interſecantibus ſe duabus rectis lineis, angulos ad verticem aequales fieri judicio ſenſus deprehenderit (v. g. circumducendo circinum ex puncto interſectionis; videbit enim aequales portiones Circuli angulis oppoſitis ſubtendi); nam facile ſibi perſuadebit, interſectionem iſtam linearum ſic poſſe accommodari, ut anguli

non fiant aequales. Unde et tentabit aliter ac aliter illas lineas decussare; quod provenit ex ignorantia Demonstrationis; nam Geometra non habet hoc pro Contingenti, sed pro summe necessario; is enim novit hanc Propositionem: *Intersecantibus se duabus rectis, anguli ad verticem oppositi aequales sunt*, ex Essentia Lineae rectae derivare.

5. Ex quo etiam clare patet, Multa forte pro Contingentibus haberi a nobis, quae vel Impossibilia sint vel Necessaria. Solemus enim ad ferendum iudicium de Contingentia Enunciationis alicujus, ignorantia contenti esse, judicantes eam esse Contingentem, quando nec ipsam, nec ejus Contradictoriam ex Essentia novimus elicere; cum potius ex Scientia procedendum fuisset, qua certo sciremus, nec ipsam Enunciationem, nec ejus Contradictoriam ex Essentia deduci posse.

### CAPUT III.

#### *De Enunciatione Simplici et Composita.*

1. Enunciatio Simplex et Propositio idem sunt. Propositio autem comprehendit sub se Affirmationem et Negationem, ut initio hujus Libelli diximus. Hae non sunt aequae Simples; Affirmatio enim Negatione simplicior est, quia Negatio componitur ex Affirmatione et Adverbio negandi. Quia tamen neutra in ratione sua importat plures Enunciationes, hinc ambae Simples Enunciationes vocantur. Affirmatio enim unico simplicique Vero vel Falso contenta est; Negatio autem non superaddit ei aliud Verum Falsumve, sed Modum negandi, quo appposito adhuc remanere potest simplex Verum Falsumve, licet eo appposito non maneat idem verum vel falsum.

2. Et videntur quidem sola Affirmatio ac Negatio ut sic Simples Enunciationes esse; quia ut sic unico et simplici Vero vel Falso contentae sunt. In individuo autem non datur Enunciatio simplex, cum quaevis Enunciatio plura dicat, sive for-

maliter sive consequenter, sive expresse sive implicate; nam et dicit hoc quod formaliter dicit, et insuper in consequenti dicit se esse veram; et rursus quae hanc veram esse dixerit, etiam se veram esse dicit, idque in infinitum; adeo ut omnis Enunciatio dictione sit infinita, sicut Physici demonstrant, omne Corpus divisione infinitum esse. Ultra haec, quaevis Enunciatio adhuc varia dicit; v.g. illa Propositio: *Ens est ens*, quae quibusdam simplicissima videtur, hoc dicit: *Et hoc ens est ens, et illud ens est ens*, et sic in infinitum. Haec, quae forte simplicior quibusdam videbitur: *Petrus est petrus*, hoc in consequenti dicit: *Aliquis homo est petrus*; quod etiam disjunctione infinitum est, nempe: *Vel hic homo est petrus, vel iste homo est petrus, etc.*

3. Et quamvis hoc ita sit, ac nulla prorsus Enunciatio detur, in qua non lateant infinitae aliae Enunciationes; illa tamen passim censetur Enunciatio simplex, quae formaliter et expresse tantum praefert unam Enunciationem; ut *Sto*, item *Homo est animal*; illae enim ac similes formaliter unum tantum dicunt, quantumcunque multa dicant in consequenti. Enunciatio autem Composita censetur, quae expresse et formaliter plures Enunciationes ingerit, ut *Veni, vidi, vici*; ingerit enim tres ad minimum Enunciationes, idque ad oculum, expresse, et primâ fronte. Enunciationes Compositae ultimo resolvuntur in Simples; quamvis enim Enunciatio Composita possit habere partem aliquam, quae et ipsa rursus sit Enunciatio Composita (qualis est ista *Veni, vidi, vici*, in qua ista pars *Veni, vidi* rursus composita), tamen ultimo deveniendum est ad Enunciationes simplices.

4. Partes Enunciationis Compositae, item Membra, censentur illae Enunciationes, quas formaliter et expresse ingerit; ut in Composita jam dicta, tres partes sunt totidem Propositiones in illa contentae. Partes ergo Enunciationis Compositae non censentur quaevis quae in Enunciatione Composita reperiuntur, sed tantum Enunciationes quae expresse in illa ponuntur velut



ejus partes; Praedicata vero vel Subjecta istarum Enunciationum, nequaquam dicuntur Partes Enunciationis Compositae, quamvis latiori significatu revera sint partes ejus.

5. Pars Enunciationis Compositae vel est Proxima vel Remota. Pars Remota est pars partis; Pars Proxima est pars Enunciationis Compositae, sed non partis ejus. Ideoque Enunciationem Compositam semper ut bimembrem consideramus; v. g. istam: *Veni, vidi, vici*, sic considero, ut unum ejus Membrum sit *Veni*, alterum Membrum *Vidi, vici*, atque eâ consideratione ista Membra sunt partes proximae praedictae Enunciationis; *Vidi* autem et *Vici* singulae tantum sunt partes Remotae, quandoquidem sub ea consideratione tantum sint partes posterioris Membri seu partis.

6. Atque hinc etiam oritur Divisio Enunciationis Compositae in Primo et Secundo Compositam. Primo Composita est quae non habet Partes Remotas, seu cujus nulla Pars rursus est Enunciatio Composita; ut *Sto et loquor*; habet enim duas tantum Partes, easque proinde Proximas, ac nullas Remotas. Enunciatio autem Secundo Composita est, quae habet partes Remotas, seu cujus rursus pars aliqua est Enunciatio Composita; ut *Veni, vidi, vici*; item ista: *Omnis homo est animal, Petrus est homo, ergo Petrus est animal*; illa enim Enunciatio sic est Composita, ut Pars ejus, quae praecedit particulam *Ergo*, rursus sit Enunciatio Composita ex duabus aliis Enunciationibus.

#### CAPUT IV.

##### *De Enunciatione Copulativa et Disjunctiva.*

1. Quia Enunciatio Composita plures exhibet Enunciationes, quae Partes ejus dicuntur, hinc etiam Enunciationi Compositae adjacet Enumeratio, quâ Partes illae enumerentur; quae Enumeratio vel est Copulativa vel Disjunctiva. Enumeratio Copulativa fit mediante particula *Et*, constituitque Enunciationem

Copulativam; Enumeratio Disjunctiva fit mediante particulâ *Vel*, constituitque Enunciationem Disjunctivam. Aliter plura aliqua Enumerare non datur; atque ideo, cum plura numeramus, nec tamen disjungimus, hoc ipso satis copulasse videmur: ut hîc: *Veni, vidi, vici*, quod ideo idem est ac *Et veni, et vidi, et vici*.

2. Igitur Enunciatio Copulativa est, cujus Partes proximae Copulative enumerantur, ut *Sto et loquor*; et nempe Partes proximae, quia quomodo enumerentur Partes Remotae, non refert. Unde haec etiam est Copulativa: *Et vel sto vel non sto, et vel loquor vel non loquor*, licet partes ejus remotae non connectantur copulative. Enunciatio Disjunctiva est, cujus Partes Proximae disjunctive enumerantur, ut *Vel sto vel loquor*, imo etiam ista: *Vel et sto et loquor, vel aut non sto aut non loquor*, licet quaedam ejus partes remotae non enumerentur disjunctive sed copulative. Disjunctiva non est tam proprie Enunciatio Composita quam Copulativa; quia Disjunctiva non servat Partes suas integras et idem in ipsa valentes, quod alibi et seorsim posita valerent; siquidem qui dicit: *Sto vel loquor*, non dicit: *Sto*, quod tamen diceret, si partes illas extra Enunciationem Disjunctivam seorsim et per se efferret. Proinde Enunciatio Disjunctiva potius est Mixta Enunciatio quam Composita; partes enim in ipsa velut inter se miscentur et refringuntur, secus atque contingit in Copulativâ, quae partes suas illibatas integrasque conservat.

3. Particula *Et*, qua Partes proximae in Enunciatione Copulativa enumerantur, censetur Copula istius Enunciationis, et similiter particula *Vel* censetur Copula Enunciationis Disjunctivae. Sicut nimirum Verbum in Propositionibus est Copula, sic in Enunciationibus Compositis *Et* aut *Vel*, quo partes earum proximae connectuntur, censetur earum Copula. Extrema autem Enunciationum Compositarum sunt Partes earum proximae, inter quas illae particulae intercedunt. Solent autem Copulae

Compositarum non tantum interponi inter sua Extrema, sed et praeponi; ut *Et sto et loquor*, ubi *Et*, quod agit ibi Copulam, non tantum interjicitur inter ista Extrema, *Sto*, *Loquor*, sed etiam praeficitur.

4. Sed quid de Enunciatione Rationali, Causali, Condicionali, Relativa, etc.: nonne sunt etiam Compositae? Respondebo hic de Enunciatione Condicionali; de reliquis quid judicandum sit, patebit sequentibus Capp. Dico igitur, Enunciationem Condicionalem non esse proprie Compositam; primo, quia non servat Partes suas integras. Ut patet hîc: *Si sto, stare possum*; qui enim hoc dixerit, nec ideo se stare dicet, nec ideo dicet se posse stare, quod tamen diceret si partes illas alibi et seorsim efferret. Hinc igitur sequitur, Enunciationem Condicionalem non esse proprie Compositam, sed ad summum Mixtam esse, sicut dictum est de Enunciatione Disjunctiva. His accedit, quod Enunciatio Condicionalis habeat Copulam Impuram, imo nihil aliud directe insinuet quam Copulam; unde cum dico: *Si sto, stare possum*, non aliud dico quam: *Ex sto sequitur stare possum*, id est: *Stare possum est consequens ex sto*; quod sane non est aliud quam simpliciter affirmare. Subjectum enim ibi est *Stare possum*, Copula *Est*, Praedicatum *Consequens ex sto*, atque ideo nihil ibi observare est praeter simplicem Affirmationem.

5. Sed quidquid sit, et quamvis liquido mihi constet, Enunciationem Condicionalem (de Disjunctiva idem censeo) esse simplicem Enunciationem; habetur tamen passim a Logicis pro Enunciatione Composita; atque nos ipsi eandem inter Compositas recensemus par. 3. ubi de Argumen. Et Definitio Enunciationis Compositae pridem data non excludit Condicionalem; siquidem Enunciationem Compositam definivi Enunciationem expresse plures Enunciationes exhibentem; quod sane etiam praestat Enunciatio Condicionalis.

## CAPUT V.

*De Copulâ Grammaticali.*

1. Enunciationis Compositae velut anima quaedam est Copula Grammaticalis; habetque se in Enunciatione Composita sicut Verbum in Propositione. Copula Grammaticalis est particula, quae juncta Propositioni, sensum inficit, refarciendum appositione alterius Propositionis; ut particula *Et*. Sumptâ enim v.g. illâ Propositione: *Sto*, sensum perfectum habes; sed si ei praedictam particulam adjunxeris hoc modo: *Sto et*, inficitur sensus atque imperfectus redditur, ast adjunctâ altera Propositione, v. g. *Loquor*, sensus denuo perficitur, hoc modo: *Sto et loquor*. Simile quid facile observabis in illa particula: *Vel*, *Ergo*, *Si*, etc.

2. Sex igitur vel septem Copulas Grammaticales deprehendo. Copulativam, *Et*, Disjunctivam, *Vel*, Condicionalem, *Si*, Illativam, *Ergo*, Causalem, *Quia*, Similarem, *Sicut*, Temporalem, *Quando*; quarum tamen aliquae saepe sunt aequivalentes. Atque hinc totidem oriuntur species Enunciationum Compositarum iisdem nominibus gaudentium; nempe Enunciatio Copulativa, cujus Copula est *Et*, ut *Sto et Loquor*; Enunciatio Disjunctiva, cujus Copula est *Vel*, ut *Vel sto vel loquor*; Condicionalis, cujus Copula est *Si*, ut *Si sto, loquor* (quamvis haec falsa sit; quod equidem est impertinens ad Enunciationem hujus aut illius speciei); Illativa, cujus Copula est *Ergo*, ut *Sto, ergo stare possum*; Causalis, cujus Copula est *Quia*, ut *Quia curro, lassor*; Similaris, cujus Copula est *Sicut*, ut *Affirmatio est in Negatione, sicut navis est in naufragio*; Temporalis denique, cujus Copula est *Quando*, ut *Eclipsis fit, quando Terra interponitur inter Solem et Lunam*. Copula Grammaticalis censetur esse Copula hujus aut illius Enunciationis Compositae, quando intercedit inter partes proximas illius; quae enim tantum inter partes remotas intercedit (quod contingit in Secundo Compositis),



non cenfetur Copula ipfius Enunciationis, fed Partis ejus.

3. Inter hafce Copulas quaedam funt Purae, quaedam Impurae. Pura Copula eft, quae non aliud eft quam Copula Impura Copula eft, quae fic copulat, ut implicate etiam Propositionem aliquam contineat. Copulae purae funt folum *Et* et *Vel*. Reliquae omnes funt impurae et continent implicate aliquam Propositionem, adeoque non copulant tantum, fed ut plurimum etiam copulantur; ut *Ergo*, v. g. hic: *Sto, ergo loquor*; fenfus enim eft: *Et ſto et loquor, et ex ſto recte ſequitur loquor*, quae ultima Propofitio in fenfu, continetur implicate in Copula *Ergo* praecedentis Enunciationis. Idem apparet in Copula *Quia* hîc: *Quia curro, laſſor*, fenfus enim eft: *Et curro et laſſor, et curſus meus eſt cauſa laſſitudinis mea*. Ibi rurfum poſtrema Propofitio continetur in *Quia* praecedentis Cauſalis. Hoc autem ſpeciale eſt in Copula Condicionali, quod illa non tam partem aliquam contineat, quam integram Enunciationem Conditionalem, ita ut a partibus tantum determinetur. Ut ſatis patet ex dictis praeced. Cap. ſub finem.

4. Copulae Purae hoc habent peculiare, quod in quibuſdam aliis Notis Subjectum praecedere conſuetis includantur, ſcilicet in iſtis Notis: *Omnis, Nullus, Aliquis*, quia *Omnis* et *Nullus* includunt Copulam *Et*; *Aliquis* autem includit Copulam *Vel*. Atque ea eſt differentia inter *Omnis* et *Nullus*, quod *Omnis* includat *Et* ſimpliciter; *Nullus* autem includit *Neque*, quod eſt *Et non*. V. g. *Omnis homo eſt doctus*, id eſt, *Et Petrus eſt doctus et Paulus eſt doctus, etc.*, ubi illud *Et* expreſſe redditum in fenſu, implicate continebatur in Notâ *Omnis*, praefixâ Subjecto praecedentis Propositionis. *Nullus homo eſt doctus*, id eſt, *Et Petrus non eſt doctus, etc.* Vide ſupra de Acceptione. Hoc etiam peculiare eſt Copulis Puris, quod geminari ſaepe ſoleant, ac Extremis, quae connectunt, et praefigi, et ſimul etiam interponi; ut hîc: *Et ſto et loquor*, item *Vel ſto vel loquor*. Quod in aliis Copulis Grammaticalibus non habet locum, quae

vel praefiguntur tantum, vel tantum intercedunt inter Extrema sua; ut *Quia curro, lassor*, aut *Lassor quia curro*.

5. Et quidem naturalis locus Copulae est medius inter Extrema; atque inde etiam Copula dicta est, quia velut vinculum quoddam intercedat. Hinc et omnes Copulae Grammaticales illum locum admittunt, imo exigunt si sensum spectes. Sic v. g. Copula *Et* occupat hîc solum locum medium: *Sto et loquor*, Disjunctiva hîc: *Sto vel loquor*, Condicionalis hîc: *Stare possum, si sto*, Illativa hîc: *Sto, ergo stare possum*, Causalis hîc: *Lassor quia curro*, etc. Tres etiam sunt Copulae, quae medio loco astrictae sunt: *Et*, *Vel*, *Ergo*, quarum priores tamen per sui geminationem in anteriora diffundi possunt, postrema, tantum in medio consistit. Reliquae Copulae sinunt se antrorsum revelli; ut Condicionalis hîc: *Si sto, stare possum*, Causalis hîc: *Quia curro, lassor*, Temporalis hîc: *Quando curro, lassor*. Similaris autem non revellitur e medio, nisi relicto aliquo sui vestigio v. g.: *Sicut navis est in naufragio, sic Afirmatio est in Negatione*. Ibi vestigium *Sic* relinquitur in medio. Porro, cum Copulae sic revelluntur in anteriora, mutandus est ordo Extremorum; quod enim postremum erat inter Extrema, Copulâ locum medium occupante, id eâdem sursum retractâ, fit primum; ut in Exemplis propositis satis patet.

6. Fiunt autem illae Revulsiões Copularum, ut faciliior sit Contradictio. Si enim dixeris: *Quia curro, lassor*, facile formabitur Contradictoria: *Non quia curro, lassor*. Sed si dixeris: *Lassor quia curro*, non perinde expedita erit Contradictio; nam haec: *Lassor non quia curro* non est Contradictoria ejus, sed multo minus haec est Contradictoria ejus: *Non lassor quia curro*, nisi forte sumas Adverbium *Non*, ut cadat in totum (pro ut loqui solent), quod tamen difficultatem et obscuritatem parit in sensu. Hinc Enunciationi Rationali difficilis est Contradictio, et in eâ negandâ potius per partes procedimus, ut patet inter disputandum.

## CAPUT VI.

*De Enunciatione Formaliter, et Aequivalenter Copulativâ.*

1. Omnis Enunciatio quodammodo Aequivalenter Copulativa est. Continet enim quaevis Enunciatio per bonam Consequentiam plures imo infinitas Enunciationes, et eas Copulative continet hoc ipso, quo non disjungit illas; haec satis clara sunt ex ante dictis. Strictius fumo Enunciationem Aequivalenter Copulativam pro ea, quae ratione certae suae particulae praecise continet plures Enunciationes Copulative enumerandas; ut *Omne animal praeter hominem est irrationale*; continet enim, ratione istius particulae *Praeter*, tres Propositiones Copulative enumerandas, hoc modo: *Et homo est animal, et homo non est irrationalis, et omne animal distinctum ab homine est irrationale*. Strictissime capio Enunciationem Aequivalenter Copulativam pro illa Enunciatione Composita, quae ratione Copulae Impurae continet aliquam partem, cum reliquis suis partibus Copulative enumerandam; ut: *Sto, ergo stare possum*; haec enim ratione Copulae *Ergo* continet implicite istam partem: *Ex sto sequitur stare possum*, copulative enumerandam cum reliquis partibus hoc modo: *Et sto, et stare possum, et ex sto recte sequitur stare possum*.

2. Aequivalenter Copulativa sic sumpta comprehendit quatuor Species Enunciationis Compositae: Rationalem, Causalem, Similarem et Temporalem. Rationalis est, in quâ Copula *Ergo* continet aliquam partem, cum caeteris partibus Copulative enumerandam; ut *Sto, ergo stare possum*. Et Nota, Enunciationem Rationalem non coincidere cum Enunciatione Illativâ, sed esse quandam ejus Speciem; quia Enunciatio Illativa est cujus Copula est *Ergo*, adeoque comprehendit etiam sub se certam Condicionalem, v. g. hanc: *Si sto, ergo stare possum*, aut etiam: *Si sto, stare possum* (*ergo* enim in hac posteriori perinde ponitur implicite, sicut in priori expresse); etiamsi enim

Copula ibi ſit *Si*, adeoque Enunciatio ſit Condicionalis, tamen etiam Copula eſt *Ergo*, adeoque Enunciatio etiam eſt Illativa. Igitur Condicionalis Illativa non eſt Aequivalenter Copulativa; etſi enim Copula ejus implicate contineat aliquam Propoſitionem, non tamen haec Propoſitio cum aliis partibus Enunciationis Condicionalis copulative enumeranda venit. Siquidem ſenſus iſtius: *Si ſto, ſtare poſſum*, non eſt hic: *Et ſto et ſtare poſſum, et ex ſto ſequitur ſtare poſſum* (cum qui prius illud dicit, nec ſe ſtare, nec ſe poſſe ſtare dicat), ſed ſimpliciter ſenſus eſt: *Ex ſto ſequitur ſtare poſſum*.

3. Enunciatio igitur Illativa dividitur in Rationalem et Conditionalem Illativam; quae in eo differunt, quod illa ſit Aequivalenter Copulativa, haec minime: quia haec Aequivalenter non eſt niſi Enunciatio Simplex ſeu Propoſitio. Dico autem, Enunciationem Illativam dividi in Rationalem et Conditionalem (non ſimpliciter, at) Illativam; quia non omnis Enunciatio Condicionalis continetur ſub Illativa, ſed tantum illa Condicionalis, in qua Copula *Si* admittit conſortium Copulae *Ergo*. At Condicionalis, in qua Copula *Si* reſpuit conſortium Copulae *Ergo*, non eſt Illativa, ſed pure Condicionalis, ut: *Si bene ſtuderis, dabo tibi pulchrum equum*; ſenſus enim non permittit eam ſic efferri: *Si bene ſtuderis, ergo dabo tibi pulchrum equum*.

4. Enunciatio Cauſalis eſt Enunciatio Aequivalenter Copulativa, in qua Copula *Quia* implicate continet aliquam partem cum caeteris partibus Copulative enumerandam. Ut: *Quia curro, laſſor*; ibi enim Copula *Quia* implicat hanc Propoſitionem: *Curfus meus eſt cauſa laſſitudinis meae*, quae Propoſitio cum aliis praedictae Enunciationis Cauſalis Copulative enumeranda ſit hoc modo: *Et curro et laſſor et Curſus meus eſt cauſa laſſitudinis meae*. Simile quid facile deprehendes in Enunciatione Temporali et Similari; Prolixitatis evitandae cauſa ſuperſedeo.

5. Atque ita patet Categoria Enunciationis Compoſitae. Nempe



ea primo dividitur in Compositam stricte dictam et Mixtam. Composita stricte dicta est quae partes servat integras et idem in eâ, quod alibi et seorsim positae, valentes. Mixta est, quae partes suas confundit et refringit, ita ut non idem in ipsâ, quod extra ipsam et seorsim positae, valeant. Enunciatio Mixta dividitur in Disjunctivam et Condicionalem. Enunciatio stricte Composita coincidit cum Copulativâ late dictâ; dividiturque in Copulativam Formaliter, cujus nulla partium in Copula Grammaticali implicatur, et Aequivalenter Copulativam. Sub qua sunt Rationalis, Causalis, Similaris et Temporalis.

## CAPUT VII.

*De Enunciatione Relativa.*

1. Enunciatio Relativa ambigit quodammodo inter Enunciationem Simplicem et Compositam. Enunciatio Relativa est, in cujus Subjecto vel Praedicato reperitur particula *Qui*, insequente Verbo puro vel modificato; ut: *Petrus qui est doctus, est probus*; ibi particulam *Qui* insequitur Verbum purum. Item: *Petrus, qui non est doctus, est probus*; ubi particulam *Qui* insequitur Verbum modificatum Adverbio negandi, seu isto Modo: *Non*. Hoc Verbum, quod sic proxime sequitur particulam *Qui*, in Enunciatione Relativa, vocant Logici *Copulam implicationis*; ego malim dicere *Copulam relationis*, sequitur enim proxime particulam *Qui*, quae Relationem designat. Ultra Copulam implicationis agnoscunt in Enunciatione Relativa *Copulam principalem*; ego malim dicere *Copulam propositionis*, quia nempe partes principales Propositionis Relativae, Subjectum, inquam, et Praedicatum, integra conjungit; ut hîc: *Petrus, qui est doctus, est probus*; prius *Est* est Copula Relationis, posterius *Est* est Copula Propositionis.

2. Relativa, alia est relati Subjecti, alia relati Praedicati. Relati Subjecti est, in qua Copula Relationis continetur in

Subjecto, atque adeo Copula Relationis praecedat Copulam Propositionis; tales ſunt hactenus assignatae. Relativa relati Praedicati eſt, in qua Copula Relationis continetur in Praedicato; atque ea rarior eſt; ut: *Petrus eſt animal quod eſt rationale*. Aliter dividitur in expreſſe et implicite Relativam, pro ut ſcilicet Copulam Relationis expreſſe vel implicite involvit; haec enim etiam eſt Relativa: *Non-animal non poteſt eſſe homo*; etiamſi enim expreſſe non ſonet ibi nec particula *Qui*, nec Copula Relationis, implicite tamen ibi adſunt; ſenſus enim eſt: *Id quod non eſt animal, non poteſt eſſe homo*.

3. Propositionem implicite Relativam, in qua Copula Relationis afficitur Adverbio negandi *Non*, vocant Logici *Propositionem infinitam*; quales ſunt iſtae: *Non poteſt eſſe animal, Aliquod non brutum eſt homo, Aliquod non brutum non eſt homo*, dando hunc ſenſum, qui et obviuſ eſt in praedictis Propositionibus: *Id quod non eſt homo, poteſt eſſe animal, Aliqua res quae non eſt brutum, eſt homo, Aliqua res quae non eſt brutum, non eſt homo*. Ibi quidem priores Propositiones Infinitas dicunt; poſteriores vero, quae ſenſum earum exacte reddunt, non dicerent Infinitas; quod equidem ſcio ex quo eorum errore proveniat, et infra dicam, Cap. 11.

4. Quaestio jam ſit, An Enunciatio Relativa ſit Compoſita, an ſimplex. Reſpondeo: juxta definitionem Enunciationis Compoſitae ante datam (nempe: Enunciatio Compoſita eſt, in qua expreſſe plures exhibentur Enunciationes) Relativa inter Compoſitas recensenda non videtur; quia in ea non reperiuntur expreſſe plures Enunciationes, ſed una Enunciatio, imperfecto quopiam intercedente, diſtincta. Ut: *Petrus qui eſt doctus, eſt probus*, ubi habetur integra illa Enunciatio, *Petrus eſt probus*, eaque interpolatur circa Subjectum ſuum hoc imperfecto themate, *Qui eſt doctus*. Sunt qui definiant Enunciationem Compoſitam: *Cujus Copula eſt Copula Grammaticalis*; ſed nec juxta eos Enunciatio Relativa debet dici Compoſita, cum particula *Qui*

non fit Copula Grammaticalis; etiamsi enim addita Propositioni inficit sensum, is tamen non refarcitur subsequente Propositione, sed Copulâ cum Praedicato.

5. Hoc interim verum est, Enunciationem Relativam aequivalere Enunciationi Copulativae ex duabus Propositionibus, quarum una constat Copulâ Relationis, et altera Copulâ Propositionis. V. g.: *Petrus, qui est doctus, est probus*, id est: *Et Petrus est doctus et Petrus est probus*. Item: *Omne animal quod non est rationale, est brutum*, id est: *Quoddam animal non est rationale, et omne tale animal est brutum*, etc.

## C A P U T VIII.

### *De Propositione Quanta.*

1. Propositio Quanta est, quae constat Subjecto communius sumpto, id est sumpto pro pluribus laxè enumerandis. Dividiturque in Propositionem Universalem, quae constat Subjecto universaliter sumpto seu distributo, et Particularem, quae constat Subjecto particulariter sumpto; prioris generis est ista: *Omnis homo est doctus*, item ista: *Nullus homo est doctus*; posterioris generis est ista: *Aliquis homo est doctus*, item ista: *Aliquis homo non est doctus*. Adeo ut Quantitas Propositionis non sit aliud quam certa Acceptio Subjecti Propositionis, nempe Acceptio communior; ex quo et hoc sequitur, quod Quantitas non sit Affectio Propositionum, sed Terminorum, et nominatim Subjectorum.

2. Censentur autem Propositiones ejusdem Quantitatis esse, quae vel ambae sunt Universales, vel ambae sunt Particulares; ut istae: *Omnis homo est doctus*, *Nullus homo est doctus*, ejusdem Quantitatis sunt quia sunt ambae Universales; item istae sunt ejusdem Quantitatis: *Aliquis homo est doctus*, *Aliquis homo non est doctus*, quae sunt ambae Particulares. Propositiones diversae Quantitatis dicuntur, quarum una est Universalis et altera Par-

ticularis; ut utralibet duarum priorum ſumpta cum utrâlibet duarum poſteriorum. Caeterae Propoſitiones, licet non ſint ejusdem Quantitatis, non tamen proprie dicuntur diverſae Quantitatis; v. g. iſtae: *Omnis homo eſt doctus*, *Hic homo eſt doctus*, licet non ſint ejusdem Quantitatis, non ſunt tamen diverſae Quantitatis, cum poſterior earum nullius ſit Quantitatis.

3. Propoſitio Univerſalis vel eſt Affirmativa, ut *Omnis homo eſt doctus*, vel Negativa, ut *Nullus homo eſt doctus*; quamvis poſterior illa non ſit formaliter Negativa, ſed tantum aequivalenter, quod patebit infra. Similiter Propoſitio Particularis alia eſt Affirmativa, ut *Aliquis homo eſt doctus*, alia Negativa, ut *Aliquis homo non eſt doctus*. Et quidem in Univerſali Negativa utrumque Extremum diſtribuitur; in Univerſali Affirmativa ſolum ſubjectum diſtribuitur; in Particulari Negativa ſolum Praedicatum diſtribuitur; in Particulari Affirmativa neutrum Extremum diſtribuitur. Item in Particulari Affirmativa utrumque Extremum accipitur particulariter; in Particulari Negativa ſolum Subjectum accipitur particulariter; in Univerſali Affirmativa ſolum Praedicatum accipitur particulariter; in Univerſali Negativa neutrum Extremum accipitur particulariter. Hae Regulae diligentiffime ſunt obſervandae; ex iis enim ſtatim patebit, an in Argumento aliquo fiat proceſſus a non diſtributo ad diſtributum, qui proceſſus eſt Argumentorum velut quaedam Scylla. Supponunt autem hae Regulae Propoſitiones uſitatas et obvias.

4. Praeter Univerſalem et Particularem, omnes reliquae Propoſitiones dicuntur non-Quantae; et ſiquidem Subjectum accipiatur ſingulariter, Propoſitio dicitur Singularis; ut *Petrus eſt doctus*. Et pari licentiâ poſſemus Propoſitionem Logicam, Grammaticam, Quasi-univerſalem, et Quasi-particularem dicere, pro ut ſcilicet Subjectum ejus hac vel illâ Acceptione capitur. Sic iſta eſt Propoſitio Logica: *Mus ſubalternatur animali*, iſta eſt Propoſitio Grammatica: *Mus eſt tertiae declinationis*, etc. Sed



quid de Propositione Indefinita censemus? Haec non est aliud, quam Propositio Quanta, cujuscumque Subjecto nota Quantitatis non praefigitur expresse; ac proinde illa necessario vel Universalis est vel Particularis, ut non sit necesse Propositionem Indefinitam tamquam tertiam Speciem inter Quantas reponere. Propositio autem Indefinita, cum est Affirmativa, habet sensum propositionis Universalis; ut: *Animal est homo*; haec enim in obvio sensu est falsa; esset tamen vera si haberet sensum Propositionis Particularis. Si vero Propositio Indefinita fuerit Negativa, habet sensum Propositionis Particularis; ut *Animal non est homo*; haec enim vera est in obvio sensu (quia proxime praecedens falsa est), non foret autem vera si haberet sensum Propositionis Universalis.

5. Inquirendum restat, sitne Propositio Quanta revera Propositio, an non potius Enunciatio Composita. Respondeo: juxta eos qui distinguunt Propositionem et Enunciationem Compositam mere penes suas Copulas, Propositioni Verbalem et Enunciationi Compositae Grammaticalem Copulam addicentes, fatendum sane est, Propositiones Quantas non esse revera Propositiones, sed Enunciationes Compositas, Universalem quidem Copulativam, Particularem vero Disjunctivam. Copula enim Enunciationis Universalis continetur in Nota *Omnis* aut *Nullus*, Subjecto expresse vel implicite praefixa, quae Copula est *Et*. Similiter Copula Enunciationis Particularis continetur in *Aliquis*. Nulla autem ratione statui potest, Copulam istarum Enunciationum esse Copulam Verbalem, cum illa tantum sit Copula partium in ipsis, ut clarissime constat ex sensu; adeo ut *Est* in Propositione Quanta non sit aliud quam multiplex Copula partium; *Et* autem aut *Vel*, quod Notae Quantitatis includitur, sit Copula ipsius Propositionis Quantae, partes illas inter se connectens.

## CAPUT IX.

*De Propoſitionibus Inuſitatis et Inordinatis.*

1. Duorum generum Inuſitatas Propoſitiones deprehendo. Primi generis ſunt Quantæ conſtantes Praedicato ſingulariter ſumpto; ut: *Omnis homo eſt Petrus, Nullus bos eſt Petrus, Aliquis homo eſt Petrus, etc.* Huc etiam revocari poſſunt omnes Propoſitiones Quantæ, quarum Praedicata non accipiuntur Uniuerſaliter vel Particulariter, etiamſi etiam non accipiantur ſingulariter; ut: *Aliqua quatuor ſunt omnia elementa, Aliquod neceſſarium ad navigandum eſt aliqua navis, Aliquod Subalternum animalis eſt homo.* Siquidem Acceptio talis Praedicatorum æquiparatur Acceptioni Singulari.

2. Secundi generis Inuſitatae ſunt, quarum Praedicatis præfigitur proxime Nota Quantitatis; v. g.: *Petrus eſt omnis homo, Aliquod animal eſt omnis homo, Nullus homo eſt omne animal, etc.* Atque hujus generis Propoſitiones magis Inuſitatae ſunt quam Propoſitiones prioris generis. Propoſitiones Inuſitatas non ſuppono; cum enim nullius ferme ſint uſus in ſeriis Argumentationibus, multas tamen exceptiones et mutationes inducunt in Logicorum Regulas apud eos qui illas etiam in cenſum admittunt.

3. Propoſitio Inordinata eſt, in cujus expreſſione aliquid extra ordinem illum, quem ſenſus requirit, deturbatum eſt. Senſus autem Propoſitionis requirit Subjectum primo loco ſtare, ſuccedere Copulam cum præfixis Modis, ſi qui adſint, et tandem ultimo loco Praedicatum ſubſiſtere. Unde hæc Propoſitio eſt Inordinata: *Animal eſt homo*, ſi hic ei ſenſus reſervetur: *Homo eſt animal*, atque eo ſenſu vera eſt. Alias prior illa Propoſitio non eſt inordinata, ſi capiatur ut falſa, ut nempe Subjectum ejus ſit *Animal*, et Praedicatum ejus ſit *Homo* (quod pauci videntur advertiſſe); ſed eſt inordinata, quando *Animal*, etſi non exprimitur loco Praedicati, pro Praedicato tamen compu-

tatur in sensu, et similiter *Homo*, etsi non ponatur loco Subjecti, quoad expressionem, computatur tamen in sensu pro Subjecto. Propositionibus Inordinatis utimur saepe elegantiae causa: eo enim ventum est, ut quod distortum ac perversum est, festivum ac argutum videatur.

## CAPUT X.

*De Enunciatione Modali.*

1. Modus Logicus coincidit cum Adverbio stricte sumpto. Estque Dictio, quae sensu cohaeret cum Copula, aliter tamen cohaeret quam velut Extremum ejus. V. g. cum dico: *Petrus est homo*, ibi *Petrus* et *Homo* cohaerent cum Copula; non sunt tamen Modi Logici istius Copulae, quia cohaerent cum Copula tamquam Extrema Copulae. Sed si dixero: *Petrus necessario est homo*, ibi *Necessario* ita cohaeret quoad sensum cum Copula Verballi, ut tamen non cohaereat cum illa velut Extremum ejus; adeoque illa dictio *Necessario* est Modus Logicus. Tales Modi etiam sunt *Impossibiliter*, *Possibiliter*, *Contingenter*, *Fortitan*, *Verisimiliter*, *Certo*, et Modus frequentissimus, *Non*, etc.; hae enim omnes Dictiones possunt cohaerere quoad sensum cum Copulis aliter quam ut Extrema Copularum. *Celeriter* autem, *Sapienter*, *Docte*, *Valde*, *Nimis*, etc., non sunt Modi Logici, quia non cohaerent unquam cum Copulâ quoad sensum, sed tantum cum Extremo Copulae, nempe cum aliquo Adjectivo vel Participio. V. g.: *Petrus celeriter currit*; ibi *Celeriter* non cohaeret cum *Est*, incluso in *Currit*, sed cum *Currens*, quod ibidem includitur. Similiter in his: *Petrus sapienter agit*, *Valde garrulus est*, *Nimis levis*, etc., illa Adverbia Grammatica (non sunt enim Adverbia Logica) cohaerent cum Praedicatis istarum Propositionum, non cum Copulis.

2. His positis facile dicitur, quid sit Enunciatio Modalis; nempe Enunciatio cujus Copula afficitur Modo, seu cum cujus

Copula quoad ſenſum cohaeret aliquis Modus Logicus. Non cenſetur autem cohaerere Modus Logicus cum certâ Copulâ, niſi eam quoad ſenſum proxime praecedat. Sic iſtae ſunt Enunciationes Modales: *Petrus neceſſario eſt homo, Petrus poſſibiliter eſt rex, Arenae maris forſitan ſunt numero pari, etc.*, quia Copulas earum proxime praecedat Modus aliquis, tum quoad ſenſum, tum etiam (quod in Exemplis convenit) quoad expreſſionem. Hae vero non ſunt Modales: *Et contingenter ſto et contingenter ſedeo, Vel impoſſibiliter ſum homo vel impoſſibiliter ſum brutum, Si non poſſum ſtare non ſto*; licet enim in iis reperiuntur Modi, illi tamen non afficiunt earum Copulas, ſed Copulas partium. Hoc igitur diligenter curandum eſt in Modalibus Quantis ac Compoſitis, ut Modus cadat in earum Copulas Grammaticales, et eas ſenſu ac, quantum fieri poteſt, expreſſione proxime praecedat. Si enim afficiat in illis tantum Copulas Verbales, non efficiet Enunciationes Modales, cum illae ſint tantum Copulae partium, non vero Copulae iſtarum Quantarum aut Compoſitarum. Unde neque iſtae ſunt Enunciationes Modales: *Aliquod animal impoſſibiliter eſt homo, Omnis homo poſſibiliter eſt Romae*. Sic Modales facies: *Impoſſibiliter aliquod animal eſt homo, Poſſibiliter omnis homo eſt Romae*; jam enim Copulae iſtarum Quantarum afficiuntur Modo. Similiter et haec Compoſita non eſt Modalis: *Et impoſſibiliter ſto, et impoſſibiliter ſedeo* (eſtque falſa); ſic Modalem facies: *Impoſſibiliter et ſto et ſedeo*, quod jam verum eſt.

3. Enunciatio Modalis habet duas partes, Modum et Enunciationem Modificatam. Quid ſit Modus, dixi; Modificata eſt reſtantia Enunciationis Modalis, quae ſupereſt ablato ex ea Modo. V. g. haec eſt Enunciatio Modalis: *Petrus neceſſario eſt homo*; Modus in ea eſt *Neceſſario*, quo ablato, quod reſtat, eſt Enunciatio Modificata, nempe *Petrus eſt homo*. Quod ego *Modificatum* voco, Logici communiter vocant *dictum* Enunciationis Modalis; ſed nomenclaturam iſtam non fero. Etiamſi



enim non fit altercandum de nomine, et mihi etiam probetur ille Logicorum Verficulus: *Cum de re constat, non sit de nomine pugna*, ibi tamen nomenclatura nata est confusionem et perversum intellectum ingenerare; fane castiganda est. Nempe Modificata non dicitur semper ab Enunciatione Modali, imo vix unquam ab illa dicitur. V.g. *Petrus non est brutum, Petrus impossibiliter est brutum, Arenae maris forsitan sunt numero pari*, sunt Enunciationes Modales, et tamen non dicunt suas Modificatas; nec enim ibi dicitur Petrum esse brutum, aut Arenas maris esse numero pari, sed illud non esse, aut impossibile esse, hoc forsitan esse, seu dubium esse dicitur. Unde, si postea germano sensu dixerimus, Petrum non posse esse brutum, dicitur ab illa Enunciatione: *Petrus impossibiliter est brutum*, seu istud est Dictum hujus Enunciationis, oriatur ex Homonymo mala confusio.

4. Modi inventi sunt, ut de ipsis Enunciationibus possimus affirmare. Modus enim est velut Praedicatum, quod affirmatur de Modificata. Cum enim Modificata minus apta sit ut occupet locum Subjecti, subsequente aliâ Copulâ et Praedicato (velut ista locutio est incommoda: *Carolus est rex, est contingens*), hinc inventi sunt Modi, quibus appositis ad Copulam, de ipsâ Enunciatione affirmasse censetur, quod ejus Copulae adverbialiter affiximus. V.g. hanc Propositionem: *Carolus est rex*, contingentem esse, sic commode et breviter dicimus: *Carolus contingenter est rex*. Eundem in finem inventus videtur Modus Infinitivus apud Grammaticos, qui commodior adhuc fuisset, si per Casus Declinabilem fecissent, sicut reliqua nomina. Unde hoc pacto etiam satis commode de Enunciationibus affirmamus, v.g.: *Carolus esse regem est contingens, Carolus esse hominem oportet*. Et hinc adducor ut credam omnem eam Enunciationem esse Modalem, quae de alia Enunciatione affirmat; eo enim tantummodo spectant Modi, eo solum fine efformati sunt, ut de ipsis Enunciationibus commoda sit Affirmatio. Exterio-

tamen Formam considerando, quam Logici magis considerare solent, eas solummodo Modales esse dicerem, quarum Copula afficitur Adverbio. Ex quo etiam clare patet, cur istae non sint Modales: *Petrus sapienter agit, Eleganter scribit, etc.*; nihil enim ibi de Enunciationibus affirmatur, cum non sit sensus: *Petrus agit, est Enunciatio sapiens*, aut: *Petrus scribit, est Enunciatio elegans*. Hic vero: *Petrus necessario est homo, Petrus non est brutum*, sensus reddi potest: *Petrus est homo, est Enunciatio necessaria, Petrus est brutum, est Enunciatio falsa*; atque adeo ibi de ipsis Enunciationibus instituitur Affirmatio, et sic efficiuntur Modales.

5. Modalis sic realiter sumpta dividitur in Modalem de Modo nominali, de Modo verbali, de Modo adverbiali. De Modo Nominali sunt istae: *Carolus esse hominem est necessarium, Carolus esse regem est contingens, Esse exsulem est possibile, Bellaturum est incertum, Egere est falsum*; ibi enim Modi, qui de Modificatis affirmantur, exprimuntur nominaliter, nimirum ut Adjectiva. De Modo Verbali sunt istae: *An Carolus bellaturus sit dubitatur, Carolus potest esse exsul, Contingit Carolum esse regem, Oportet esse hominem*; ibi enim Modi cum Copulâ, mediante qua affirmantur, complicantur in verbis Grammaticis *Oportet, Contingit, etc.* De Modo Adverbiali sunt istae: *Carolus necessario est homo, Carolus contingenter est rex, Possibiliter est exul, Forfitan bellabit, Carolus non eget*. Atque hae postremi generis tantum sunt Modales proprie dictae et formaliter loquendo. Ex quibus Exemplis constat, subinde hujus aut illius Speciei Modalem suppetere, cum non suppetit Modalis alterius Speciei de eodem Modo. V. g. haec est Modalis de Modo Adverbiali: *Petrus non est doctus*, haec ei correspondet de Modo Nominali: *Petrus esse doctum est falsum*. At nulla ei correspondet de Modo verbali, penuriâ vocum; si enim esset Verbum Grammaticum, quod eodem modo diceret *Falsum esse*, sicut *Oportet* dicit *Necessum esse*, jam etiam haberemus Mo-

dalem de Modo Verballi correspondentem istis Modalibus de Modis Adverbiali et Nominali.

6. Ad veritatem Enunciationis Modalis requiritur et sufficit, ut Modificata sit talis, qualis est Modus, id est, ut Modus nominaliter expressus vere affirmetur de Modificata infinitive expressâ. V. g. ista est vera: *Petrus necessario est homo*, quia exprimit infinitive Modificatam hoc modo: *Petrum esse hominem*; de ea sic expressâ affirmatur Modus nominaliter expressus hoc modo: *Petrum esse hominem est necessarium*, atque ea Affirmatio est vera. Similiter et ista Modalis est vera: *Petrus non est brutum*. Exprime enim Modum nominaliter, habebis *Falsum* (siquidem *Non* et *Falso* idem sunt); exprime jam Modificatam per Infinitivum, habebis *Petrum esse brutum*; de hoc Infinitivo vere affirmatur iste Modus, hoc pacto: *Petrum esse brutum est falsum*. Ad Falsitatem Enunciationis Modalis requiritur et sufficit, ut Modificata non sit talis, qualis est Modus; quod facile intelligitur ex dictis in Simili.

7. Videntur porro omnes Propositiones Contingentes esse Modales; in illis enim semper adhaeret Copulae Adverbium temporis, non quidem semper expresse, semper tamen implicite. Ut *Currit*, id est: *Jam est currens*; item *Cucurrit*, id est: *Tunc est currens*, sumendo *Tunc* ut designet tempus praeteritum; et *Curret*, id est, *Tunc est currens*, sumendo *Tunc* ut designet tempus futurum. Imo cenfeo ego, omnes Propositiones Contingentes habere Copulam praesentis temporis; nam quod subinde Praeteritum vel Futurum in illis sonat, ad Praedicatum pertinet. V. g. *Petrus erit amans*, id est: *Petrus est amaturus*; item: *Petrus erit senex*, id est: *Petrus est seneciturus*, seu: *Petrus est erens senex*, item: *Petrus fuit puer*, id est: *Petrus est fuens puer*; ubi sumo mihi licentiam formandi participia, *Erens*, ab *Ero*, et *Fuens*, a *Fui*. Tantum enim sunt duae Copulae Verbales, Pura, quae Aeternitatis est, et ei analogae, Praesentis temporis. Sed quae hujusce generis subtiliora sunt, et mysterium videntur, alio a me opportunius reservantur.

## CAPUT XI.

*De Modo Negandi.*

1. Inter Modos uſu frequentiffimus eſt Modus ſeu Adverbium *Non*. Ideoque, cum caeteri omnes Modi ſint anonymi, hic ſolus accepit nomen, et *Negatio* paſſim vocatur. Sed nomen Negationis eſt aequivocum, nam aequivoce et Modum certum et certam Propoſitionem deſignat; haec enim Propoſitio: *Non ſto*, Negatio dicitur, ut pridem vidimus, et Modus ſeu Adverbium *Non*, in eadem Propoſitione repertum, etiam Negatio dicitur, ut jam inculcamus. Quae Diſtinctio bene notanda eſt, ne obtineat ille Logicorum Verſiculus: *Erroris mater fuit Aequivocatio ſemper*. Nos igitur hîc agemus de Negatione ſumptâ poſteriori modo, nempe pro Modo ſeu Adverbio *Non*, cui nominaliter correfpondet Modus *Falfum*, nam *Non ſto* et *Me ſtare falſum eſt* idem ſunt.

2. Negationi ſolenne eſt in aliquâ aliâ Dictione complicari; ut in *Neque*, quod idem eſt ac *Et non*, quia *Neque ſto neque ſedeo*, id eſt *Et non ſto et non ſedeo*; in *Niſi*, quod idem eſt ac *Si non*, quia *Niſi poſſum ſtare, non ſto*, id eſt *Si non poſſum ſtare, non ſto*; in *Nullus*, quod idem eſt ac *Neque* ſaepius repetitum, quia *Nullus homo eſt doctus*, id eſt *Neque Petrus eſt doctus neque Paulus etc.*; in *Nunquam*, quod idem eſt ac *Nullo tempore*; in *Impoſſibili*, quod idem eſt ac *Non poſſibile*; in *Indoctus*, quod quidem non ſimpliciter idem eſt quod *Non doctus* (menſa enim eſt non docta, ſed indoctam menſam dicere ridiculum eſt), ſed *Non doctus et tamen capax doctrinae*. Similiter *Non* includitur in iſtis: *Coecus, Surdus, Nudus, etc.*, quae paſſim privationes dicuntur.

3. Negatio dividitur etiam in Negantem et Inſinitantem. Negationem Inſinitantem video eſſe illam quae cadit in Copulam Relationis; ut hîc: *Non homo poteſt eſſe animal*, Negatio eſt



Infinisans; cadit enim in Copulam Relationis, cum hic sit sensus: *Id quod non est homo, potest esse animal*. Sed non agnoscunt Negationem, quae ponitur in posteriori Propositione, ut Infinitantem, at bene eam, quae ponitur in priori. Quod ex errore fit, quo existimant, Negationem Infinitantem cadere in Substantiva vel Adjectiva; quod est impossibile, cum Negatio sit Adverbium stricte dictum seu Modus Logicus, ac proinde non magis possit in Substantivum aliquod aut Adjectivum cadere, quam lapis in coelum; unicum quippe Centrum Modi est Copula.

4. Negatio Negans est Negatio cadens in Copulam distinctam a Copula Relationis; ut Negatio hîc: *Petrus non est doctus*, imo etiam hîc: *Petrus est non doctus*; revellenda enim est Negatio a Praedicato et praefigenda Copulae, ut patebit infra.

5. Sed dices: si Negatio non possit cadere nisi in Copulam, dic ergo in quam Copulam hîc cadit: *Adam potuit non peccare*; non potest enim ibi etiam revelli a Praedicato et praefigi Copulae, cum sensus non sit: *Adam non potuit peccare*. Respondeo, Enunciationem propositam esse Modalem de Modo Verbalis *Potest*, sic resolvendam in formaliter Modalem: *Adam possibiliter non peccavit*. Ibi clarum est, Negationem cadere in Copulam Verbalem inclusam in Verbo Grammatico *Peccavit*.

## CAPUT XII.

### *De Enunciatione Negativa.*

1. Enunciatio Negativa est species Enunciationis Modalis, inter Modales longe frequentissima; quippe quae non sit aliud quam Enunciatio cujus Copula afficitur Negatione; ut *Non fit*. Vocatur etiam Enunciatio Negans, quidam et *Negatam* vocant; sed postrema haec nomenclatura displicet. Negata enim potius sonat Modificatam Enunciationis Negativae; veluti cum dico:

*Non ſto*, Negativa ſeu Negans eſt quae ibi jacet; Negata autem eſt *Sto*, illa enim ibi negatur. Enunciationi Negativae correſpondet Enunciatio Affirmativa, Affirmans, imo etiam Affirmata (illa enim hîc ſunt idem: cum Enunciatio ſe affirmet, quando affirmat; non perinde tamen ſe negat, quando negat, ſed negat ſuam Modificatam). Eſt autem Enunciatio Affirmativa Modificata Enunciationis Negativae, ſeu id quod ablatâ Negatione reſtat ex Enunciatione Negativa; ſicut ex *Non ſto*, ablato *Non*, reſiduum eſt *Sto*. Imo etiam iſta eſt Affirmativa: *Petrus non non eſt doctus*, quia duae Negationes tollunt ſe mutuo, adeoque relinquunt Copulam liberam a Negatione; ut infra patebit.

2. Quod Enunciatio aliqua ſit Affirmans vel Negans, cenſetur ad Qualitatem ejus pertinere. Unde Enunciationes ejusdem Qualitatis dicuntur, quae ambae ſunt Affirmativae vel ambae Negativae; Diverſae autem Qualitatis cenſentur, quarum una Affirmat et altera Negat. Sic iſtae ſunt diverſae Qualitatis: *Sto*, *Non ſto*; hae autem ſunt ejusdem Qualitatis: *Sto*, *Loquor*, item iſtae: *Non ſto*, *Non loquor*.

3. Circa Compoſitas et Quantas diligenter obſervandum (quod in Modalibus ante generatim monui), ſi Negativas eas eſſe volueris, Modum praefigendum eſſe earum Copulae, id eſt Copulae Grammaticali patenti in Enunciationibus Compoſitis, et eidem Copulae Grammaticali contectae Notâ Quantitatis in Enunciationibus Quantis. Unde haec non eſt Negativa: *Non ſum homo et non ſum bos*; Negatio enim non cadit in Copulam ejus, ſed tantum in Copulas partium ejus. Imo ne quidem iſta eſt Negativa: *Neque ſum homo neque ſum bos*; eadem enim eſt cum priori, quandoquidem *Neque* idem ſit quod *Et non*. Sic igitur Negativam facies: *Non et homo ſum et bos ſum*; quae ſane non aequivalet prioribus, cum priores illae ſint falſae, haec autem vera ſit. Similiter nec iſta eſt Negativa: *Niſi ſtare poſſum, non ſto*; cum enim Copula ſit *Si*, Negatio incluſa in *Niſi* eam ſenſu non praecedat, ſed ſequitur hoc modo: *Si non*

*possum stare, non sto*; sic igitur efformabis Condicionalem Negativam: *Non si stare possum sto*. Idem esto iudicium de reliquis Compositis.

4. Et quidem circa Compositas Negativas aliquid viderunt Logici; circa Quantas Negativas non item. Unanimiter enim dicunt has esse Negativas: *Nullus homo est bos, Aliquis homo non est bos*, quae profecto sunt Affirmativae, cum Negatio non cadat in Copulam contentam in Non Quantitatis, sed retro in Copulas Verbales partium. Sensus enim prioris est: *Et Petrus non est bos, et Paulus non est bos, etc.*, et similis est sensus posterioris. In Excusationem eorum hoc comminiscabar, Tales Quantas, etiamsi Affirmativae sint, Negativis tamen aequipollere; quia *Nullus homo est bos* (quod patebit ex Schemate Reductionum) aequivalet huic: *Non aliquis homo est bos*, et *Aliquis homo non est bos* aequivalet huic: *Non omnis homo est bos*. Sed Excusationem hanc facile explodat solertior quispiam, et dicat, pari fundamento statuendum fore has etiam Negativas esse: *Omnis homo est bos, Aliquis homo est bos*; aequivalent enim etiam Negativis, prior quidem huic: *Non aliquis homo non est bos*, posterior illi: *Non nullus homo est bos*, quas quidem Negativas esse clarum est, cum Negatio cadat in earum Copulas *Et, Vel*, contentas in *Nullus, Aliquis*. Et quamvis sciolus aliquis putaret se rem restituisse, ingerendo Axioma: *Duplex Negatio facit Affirmationem*, adeoque contendendo jam proxime allegatas Propositiones non esse Negativas, sed Affirmativas; tamen hic nihil ad rem, et Axioma non militat in hoc casu. Tantum enim habet locum, quando duae Negationes se mutuo quoad sensum proxime sequuntur, ut infra patebit; quod non fit in casu posito; ibi enim inter Negationes illas, in eadem Propositione repertas, mediat aliquid quoad sensum, nempe Subjectum cum praefixa Nota Quantitatis. Unde fatendum est, proxime praedictas Propositiones absolute Negativas esse, et quidem ita Negativas, ut etiam partes earum sint Negativae.

Senſus enim prioris, nempe: *Non aliquis homo non eſt bos*, eſt hic: *Non vel hic homo non eſt bos, vel iſte homo non eſt bos etc.*; ſenſus autem poſterioris eſt hic: *Non et hic homo non eſt bos, et iſte homo non eſt bos etc.*

5. Cum igitur ad Negativas non ſufficiat quod Negativis aequivaleant, reſtat ut concedam, totam Logicorum Rempubicam, Copulam Verbalem Propoſitionibus Quantis contumaciter aſſerere. Cum enim Copulae Verbales hîc: *Nullus homo eſt bos, Aliquis homo non eſt bos*, Negatione afficiantur, conſequenter dicunt eas eſſe Negativas Enunciationes, quia apprehendunt Copulas Verbales etiam Quantarum Copulas eſſe, cum tamen tantum ſint Copulae partium earum. Nequit enim eſſe Copula alicujus Enunciationis, quod eſt Copula alicujus quod in iſta Enunciatione rurfum alteri copulatur, ſed hoc eſt Copula partis iſtius Enunciationis. Et inſuper haec eorum perſuaſio difficultatem et confuſionem invehit circa efformationem Contradictoriarum, quae tamen unum eſt ex Logicae capitibus. Contradictio enim fit per Ajentem ac Negantem; cum haec Ajat: *Omnis homo eſt bos*, ſi etiam iſta Neget: *Nullus homo eſt bos*, oportebit ibi Contradictorias agnoſcere; quod eſt abſurdum. Et quamvis ipſi jactent, Universali Affirmanti non quamlibet Negantem contradicere, ſed Negantem Particularem, tamen haec tantum Verba ſunt; conſtat vero, unius ac ejuſdem Affirmantis unam tantum ac ſimplicem Negantem eſſe.

6. Sed etiamſi haec ita ſunt, infra tamen Part. 3. ubi de Forma Argumenti tractabimus, obtemperandum erit Logicis, et ſtatuendum has ac ſimiles Quantas eſſe Negativas: *Nullus homo eſt bos, Aliquis homo non eſt bos*; ſine enim tali ſuppoſitione Forma Argumentorum recepto more tradi non poſſet. Supponemus igitur ibi, Copulas Quantarum Verbales eſſe; hic ab eo ſuppoſito tantisper liberi erimus.



## SECTIO II.

## De Affectionibus Enunciationum.

Affectiones Enunciationum quatuor potissimum invenio: nempe Reductionem, Similitudinem, Consequentiam, et Probationem. Agam hîc tantum de tribus prioribus; nam Probationem reservo in Partem 4. Sect. 2. tanquam Proprietatem Rationis.

## CAPUT I.

*De Reductione Enunciationum.*

I. Reductio ista est Enunciationis per aliam Enunciationem, ut aequivalentem, declaratio. Duæ in eam concurrunt Enunciationes: Reducta, quæ per aliam tamquam aequivalentem declaratur, et Reducens, quæ sic declarat. Hæ sunt Extrema Reductionis, et conjunguntur in Reductione mediante particulâ *Id est*, quæ obtinet vim Copulae in Reductione. V.g. hoc modo: *Solum animal sentit, id est: Et animal sentit, et nihil distinctum ab animali sentit*; ibi quidem Propositio, quæ præcedit particulam *Id est*, reducitur, estque Subjectum Reductionis; Copulativa vero eandem particulam infecuta reducit, et agit veluti Praedicatum Reductionis. Particula *Id est* habet se instar Copulae, importatque, Enunciationis per Enunciationem non simpliciter, sed per Enunciationem, ut aequivalentem ac quodammodo eandem, fieri declarationem. Et hinc Similitudo ac Probatio excluduntur; quas aliquando per æquivalens aliquod fieri nihil vetat, sed non fiunt per æquivalens qua tale; unde Probatio et Similitudo etiam diversas Copulas a Copula Reductionis fortiuntur.

2. Hinc igitur Capitalis Regula Reductionis eſt, *ut Reducta ac Reducens aequivaleant*. Cum autem impoſſibile ſit Verum ac Falfum aequivalere, ut infra demonſtro, hinc etiam malam eſſe Reductionem oſtenſum eſt hoc ipſo, quo Extremorum ejus unum verum, alterum falſum eſſe demonſtratur, idque vel in ſe vel in ſimili. Unde non valet iſta Reductio: *Petrus eſt brutum non album, id eſt, Petrus non eſt brutum album*, quia Reducens eſt vera, et Reducta falſa; nec iſta Reductio valet: *Bos eſt animal non rationale, id eſt, bos non eſt animal rationale*, quia licet ibi Reducta et Reducens verae ſint, tamen in ſimili ante una earum vera, et altera falſa erat.

3. Reductionis quatuor ſpecies eſſe videntur: Expoſitio, Contractio, Reformatio, et Refumptio. Expoſitio eſt Reductio in qua Reducens explicat Reductam. Explicare eſt ſeorſim et ſigillatim plura proponere, quae alibi conjunctim et ſimul ingeruntur. V. g. *Ego nunc ſum ſtans* explicat *Sto*; cum enim *Sto* Subjectum, Praedicatum, Copulam, et Modum temporis praefentis cohaerentem Copulae, omnia ſimul et ſemel oggerat, prior illa Propoſitio eadem illa ſigillatim perhibet, unum ante, et alterum poſt. Adeoque hoc eſt Exemplum Expoſitionis: *Sto, id eſt, ego nunc ſum ſtans*.

4. Contractio et Reductio, in qua Reducens conſtringit Reductam. Ea enim, quae nimis laxa ſunt ac diſfuſa, ſubinde hoc ipſo ſunt obſcuriora, et conſequenter compendio clareſcunt, et ſui coadunatione fortius feriunt ſenſum. Hujus generis Reductio ſtatui poteſt iſta: *Ex iſta enunciatione: ego nunc ſum ſtans, ſequitur iſta enunciatio: ego nunc ſum exiſtens; id eſt, ex ſto ſequitur ſum*. Huc ſpectant Argumenta Poëmatum et Oratorum, Tituli et Summaria Capitum, quae unusquiſque videt magnam lucem adferre ſuis Subjectis. Et quamvis haec ita ſint, judico tamen, hanc ſecundam Speciem Reductionis magis ad Memoriam facere quam ad Intellectum. Intellectus enim magis juvatur Expoſitione, utpote cui proprium ſit melius faciliuſque

plura figillatim, quam conjunctim objecta percipere; Memoria vero Compendiis et Summariis, velut in unum collectis viribus magis roboratur.

5. Reformatio est Reductio collapsum ordinem restituens. Nempe Reducta continet expressionem non eo ordine digestam, quam Sensus requirit, Reducens vero ordinem illum restituit. V.g.: *Non est e terris mollis ad astra via, id est, via e terris ad astra non est mollis.* Sensus enim Propositionis requirit, Subjectum primo loco, Copulam cum suis Modis secundo, et tertio loco Praedicatum reponi; quo quidem ordine hîc reponuntur in Reducente, cum extra istum ordinem deturbata legerentur in Reducta.

6. Resumptio est Reductio, in qua Reducta Sermonem exoletum continet, aut aliter minus usitatum vel notum, Reducens vero reponit communem sermonem; ut: *Petrus est bovinator, id est, Petrus est derisor;* item: *Prata rident, id est, prata sunt amoena.* Huc spectat etiam Interpretatio, qua quod uno idiomate dictum est, in aliud idioma transferimus.

## C A P U T II.

### *De Reductione penes Negationes.*

1. Reductio speciatim sumpta distinguitur contra Expositionem; comprehenditque sub se tres posteriores Species: Contractionem, Reformationem et Resumptionem; iisque Logica potissimum occupatur circa Reductiones Negatarum. Nam Regula Logices est, Negationes non finire, at, quantum fieri potest, ad Affirmationem reducere; unde juxta hanc Regulam non finimus inter Enunciationes Compositas ullam Negativam, quam non illico reducamus ad Affirmativam aequivalentem. V.g.: *Non et sto et loquor*, quae est Copulativa Negativa, reducitur ad hanc: *Vel non sto, vel non loquor*, quae est Dif-

junctioniva Affirmativa, quamvis constet ex partibus Negativis. Et ista: *Non vel sto, vel loquor*, quae est Disjunctiva Negativa, reducitur ad hanc: *Et non sto, et non loquor*, quae est Copulativa Affirmativa ex partibus Negativis. Eâdem de causâ Quantas Negativas non sinimus, sed reducimus ad Affirmativas; ut: *Non omne animal est homo, id est, aliquod animal non est homo*; etiam si etiam Reducens ibi habeatur ut Negativa juxta communem apprehensionem, ut supra notavi.

2. Circa Contractionem in Negativis occurrit istud Axioma: Duplex Negatio facit Affirmationem. Cujus hic est sensus: Duae Negationes (et per consequens, quotquot numero pari) se mutuo quoad sensum proxime sequentes, se mutuo tollunt, et perinde est ac si nulla Negatio fuisset posita. Juxta hanc Regulam procedit ista Reductio: *Petrus non non est doctus*, id est, *Petrus est doctus*. Dixi: se mutuo proxime sequentes quoad sensum, quia Negationes se mutuo, aliquo intercedente sequentes, non tollunt se mutuo, nisi cum juxta alias Regulas eo redigi possunt, ut se invicem proxime sequantur; tunc enim, postquam eo redactae sunt, se mutuo etiam tollunt. Sic v. g. hîc: *Petrus, qui non est doctus, non est etiam probus*, duae Negationes non faciunt Affirmationem, nec licet hunc sensum reddere: *Petrus, qui est doctus, est etiam probus*; etiam si enim duae Negationes ibi reperirentur, non sequebantur tamen se invicem quoad sensum, nisi aliquo interjecto. Sic neque Negationes hîc repertae se mutuo simpliciter tollunt: *Petrus non necessario non est doctus*; sed tamen hae tollunt se mutuo, si primum eo fuerint redactae, ut se invicem proxime sequantur; nimirum si *Non necessario* juxta Schema subjicendum reducatur ad *Possibiliter non*, et adjectâ alterâ Negatione, quae postponebatur Modo *Necessario*, fiat hic sensus: *Petrus possibiliter non non est doctus*; ubi jam Negationes se mutuo tollunt, adeoque prima Propositio mediate huc reducitur: *Petrus possibiliter est doctus*.



3. Ex quo jam etiam patet, quod duae Negationes, quarum una est Negans et altera Infinitans, nunquam se mutuo tollant seu nunquam faciant Affirmationem; quia nunquam se mutuo proxime sequuntur quoad sensum, cum cadant in diversas Copulas. Esto quod se invicem subinde quoad Expressiōnem proxime sequantur; v. g. hīc: *Non non-animal potest esse homo*, sumendo priorem Negationem ut Negantem, et posteriorem ut Infinitantem; quia tunc sensus est: *Id quod non est animal, non potest esse homo*, adeoque tantum intercedente aliquo quoad sensum, sequuntur se mutuo Negationes istae.

4. Reformatione utimur circa Negationes; cum Negatio aliqua praecedit integrum Praedicatum, illam revellimus a Praedicato et praefigimus Copulae. V. g. *Petrus est non doctus* huc per Reformationem reducitur: *Petrus non est doctus*. Dixi: cum Negatio praecedit integrum Praedicatum, quia cum Negatio tantum praecedit aliquam partem Praedicati, non revellimus eam modo jam dicto, sed apponimus ei Copulam Implicationis. V. g. *Petrus est brutum non album* non potest huc reduci: *Petrus non est brutum album*, sed huc: *Petrus est brutum, quod non est album*.

5. Resumptione circa Negationes praecipue utimur juxta Schema subjiciendum, quamvis juxta ipsum contingat subinde Reductio secundum Contractionem aut Reformationem.

### C A P U T III.

#### *Continet Schema Reductionum.*

1. Schema jam pridem machinatus sum quoddam, Reductionibus plerisque, quae circa Negationes instituuntur, peropportunum, ex quo primo statim intuitu vides, quo unumquodque hujus generis reducendum sit. Atque ita se habet:

		Quantitas		
		Quantitas Universalis		
Qualitas	Qualitas Affirmativa	Omnis	post	
		Necessario	-----	
		Semper	-----	
		Et	post	
	Qualitas Negativa	Nullus		
		Impossibiliter		
		Nunquam		
		Neque		
Qualitas	Qualitas Affirmativa	prae et post		
		prae		
		post		
		prae et post		
Qualitas	Qualitas Negativa	prae et post		
		prae		
		post		
		prae et post		
		Quantitas Particularis		
		Quantitas		
Qualitas	Qualitas Affirmativa	Aliquis	post	
		Possibiliter	-----	
		Aliquando	-----	
		Vel	post	
Qualitas	Qualitas Negativa	Aliquis non		
		Possibiliter non		
		Aliquando non		
		Vel non		

Hocce Schema est; ſed jam etiam Clavem ejus accipe, ſine qua haec tota Forma ſit inutilis et clauſa:

*Post Qualem; prae et poſt Quantum; prae mutat utrumque.*

Conſtat clavis iſta, Memoriae et Compendii cauſa in Verſiculum redacta, tribus partibus, quarum explicatio haec eſt.

2. *Post Qualem*, ſeu Qualitatem (ſupple) *mutat*; id eſt: ſumpto aliquo ex ſedecim vocabulis hujus Schematis, ſi unam Negationem ei poſtpoſueris, fiet compoſitum ex iſto vocabulo et Negatione poſtpoſita aequivalens Vocabulo oppoſitae Qualitatis in Schemate (habentur autem vocabula oppoſitae Qualitatis dextrorſum et ſiniſtrorſum). V. g. ſumpto illo vocabulo: *Omnis*, ſi ei unam Negationem poſtpoſueris, habebis compoſitum *Omnis non*, quod compoſitum aequivalet vocabulo conſiſtenti ſub oppoſita Qualitate cum vocabulo *Omnis*; aequivalebit ergo vocabulo *Nullus*; unde *Omnis homo non eſt doctus* huc reducitur: *Nullus homo eſt doctus*. Si jam vice verſa ſumpſeris tibi Vocabulum *Nullus*, eique unam ſaltem Negationem poſtpoſueris, fiet Compoſitum *Nullus non*, quod juxta hanc primam partem Verſiculi, aequivalebit vocabulo oppoſitae qualitatis cum *Nullus*,

id est, aequivalebit vocabulo *Omnis*. Adeoque *Nullus homo non est doctus*, huc reducitur: *Omnis homo est doctus*. Eodem modo *Neccessario non* aequivalet *Impossibiliter*, et *Petrus neccessario non est brutum* id est, *Petrus impossibiliter est brutum*; et vice versâ, *Impossibiliter non* idem est ac *Neccessario*, et *Petrus impossibiliter non est homo* idem est ac *Petrus neccessario est homo*. Item *Semper non* idem est quod *Nunquam*, et *Nunquam non* idem est quod *Semper*. Item *Et non* idem est quod *Neque*, nam *Et non sto et non sedeo* perinde est ac *Neque sto neque sedeo* et *Neque non* idem est quod *Et*, nam *Neque non sto neque non sedeo*, id est, *et sto et sedeo*.

3. Atque ita se res habet in Vocabulis supernis. In infernis autem obtinet quidem etiam prima pars Verficuli, sed nullum ibi effectum notatu dignum depromit. Nam si vocabulis infernis ac dexteris (scilicet vocabulis *Aliquis*, *Possibiliter*, *Aliquando*, *Vel*) unica Negatio postponatur, mutantur profecto in vocabula inferna sinistra; sed nulla Reductio est, cum illa sinistra vocabula nihil aliud sint quam expresse composita ex dexteris vocabulis et subsequente Negatione. Similiter si Vocabulis infernis et sinistris unicam Negationem postposueris, mutantur quidem in Vocabula inferna dextera, sed sine ambage Schematis et Clavis, at aperte et regiâ viâ, juxta Axioma: *Duplex Negatio facit Affirmationem*.

4. Secunda pars Clavis erat ista: *Prae et post Quantum*, seu Quantitatem (supple) *mutat*. Sensus est: si Vocabulo hujus Schematis duas Negationes apposueris, unam ante Vocabulam et alteram post, Compositum ex Vocabulo et istis Negationibus aequivalebit Vocabulo oppositae Quantitatis in Schemate (vocabula autem oppositae Quantitatis in Schemate sursum ac deorsum habentur). V. g. sumpto illo Vocabulo *Omnis*, si ipsum inter duas Negationes interjeceris, habebis *Non omnis non*, quod aequivalet Vocabulo *Aliquis*, et proinde *Non omnis homo non est doctus*, id est, *aliquis homo est doctus*. Eâdem ratione *Non*

*aliquis non* idem eſt quod *Omnis*. Item *Non neceſſario non* idem eſt quod *Poſſibiliter*, et *Non poſſibiliter non* idem quod *Neceſſario*. Et porro ſic pergendo ſurſum deorſumque, non tantum in Vocabulis dexteri lateris, ſed etiam ſiniſtri; quia *Non nullus non* idem eſt quod *Aliquis non*, et *Non aliquis non non* idem eſt quod *Nullus*. Et ſic deinceps pergendo. Haec pars eſt quidem difficilior intellectu, quam pars prima vel pars tertia, ideoque ſola primâ et tertiâ parte Verſiculi poteramus eſſe contenti; haec tamen ſecunda pars ſaltem pro Memoriâ eſt.

5. Tertia pars Verſiculi: *Prae mutat utrumque*, ſcilicet Quantum et Quale ſeu Quantitatem et Qualitatem. Id eſt: ſi Vocabulo hujus Schematis unicam Negationem praepoſueris, Compoſitum ex Vocabulo et iſta Negatione, aequivalebit Vocabulo oppoſitae quantitatis qualitatiſque (habentur autem vocabula quantitate ſimul ac qualitate differentia in angulis oppoſitis ſecundum Diametros Schematis). V. g. ſumpto Vocabulo *Omnis*, unâ Negatione Praefixâ, habes *Non omnis*, quod aequivalet Vocabulo *Aliquis non*, quia *Omnis* et *Aliquis non* diſtant inter ſe Diametro Schematis. Itaque *Non omnis homo eſt doctus*, id eſt, *aliquis homo non eſt doctus*. Item ſumpto Vocabulo *Aliquis non*, praefixâ ei Negatione, habes *Non aliquis non*, quod idem eſt ac *Omnis*. Et ſic porro pergendo non tantum per Diametrum vergentem ab angulo ſuperno dextero in angulum infernum ſiniſtrum, ſed etiam per Diametrum quae hanc decuſſat, vergitque a ſiniſtro ſuperno in dexterum infernum; aequivalent enim pari pacto *Non nullus* et *Aliquis* et contra *Non aliquis* ac *Nullus*, et ſic porro.

6. Poſſumus autem expedire ſufficienter has Reductiones juxta primam et tertiam partem Clavis (omiffâ ſcilicet ſecundâ parte, quae intellectu difficilior eſt), coöperante tamen ſubinde iſto Axiomate: *Duplex negatio etc.* V. g. *Non omnis non* ſic reducâ: ſumam ex iſto Compoſito partem, *Non omnis*, et alteram Negationem, quae ſequatur, reſervabo ſeorſim, ut ſumam eam



et apponam, cum tempus erit. Igitur, *Non omnis* idem est quod *Aliquis non*, juxta tertiam partem Clavis; fumo jam Negationem posteriorem quam reservaveram, et nanciscor *Aliquis non non*; expungo igitur utramque Negationem, juxta Regulam: *Duplex negatio etc.*, et remanet *Aliquis*. Adeoque eodem recidit Reductio, quo recidisset, si facta fuisset per secundam partem Clavis. Aliter: ex *Non omnis non* capio illam partem *Omnis non*; hoc juxta primam partem Clavis, idem est quod *Nullus*. Jam praefigo Negationem, quam reservaveram, et habeo *Non nullus*, quod juxta tertiam partem Clavis idem est quod *Aliquis*.

7. Notandum aliquid circa illa vocabula Schematis: *Et, Vel*, et eorum Opposita. Imprimis censetur illis unica Negatio postponi, etiam tunc, cum duplex Negatio postponitur hoc pacto, ut in unâ earum partium, quas connectunt, una, et in alterâ, altera Negatio resideat. V.g.: *Non sto et non sedeo*; hîc censetur Vocabulum *Et* comparere cum unica Negatione postpositâ, atque adeo juxta primam partem Clavis huc reducitur: *Neque sto neque sedeo*. Secundo non censetur illis vocabulis postponi Negatio, nisi immediate postponatur, ita ut Negatio cadat in Copulas partium, nec sufficiat eam cadere in partes partium. Unde cum vocabula ista connectunt Propositiones Quantas, non censetur Negatio vocabulis postponi, nisi cadat in Copulas Quantarum, seu nisi sensu praecedat illas Notas: *Omnis, aliquis, etc.* Subjectis Quantarum praefixas. Quapropter hîc: *Et aliquis homo non est doctus, et aliquis homo non est probus*, non censetur vocabulum *Et* reperiri cum Negatione postpositâ, juxta sensum Clavis, adeoque non licet juxta primam partem Clavis praedictam Enunciationem huc reducere: *Neque aliquis homo est doctus, neque aliquis homo est probus*; siquidem Reducens est falsa, Reductâ verâ. Sed si ita dicatur: *Et non aliquis homo est doctus, et non aliquis homo est probus*, jam licebit eo reducere; quia jam Negatio proxime seu immediate sequitur

vocabulum *Et*. Eâdem de cauſâ *Non et omnis homo eſt doctus, et omnis homo eſt probus* non poteſt huc reduci: *Vel omnis homo eſt doctus, vel omnis homo non eſt probus*; ſiquidem Reductâ verâ, Reducens eſt falſa; ſed huc: *Vel non omnis homo eſt doctus vel non omnis homo eſt probus*, quae ulterius, Reductione concernente Vocabulum *Non omnis*, huc reducit: *Vel aliquis homo non eſt doctus, vel aliquis homo non eſt probus*.

## CAPUT IV.

*De Speciebus Expoſitionum.*

1. Primo Exponimus illas Propoſitiones, in quibus Extrema cum Copulâ ac Modo omnia ſimul, aut eorum aliqua, complicantur in unam dictionem; eaſque reducimus ad Propoſitiones eadem haec diſerte et expreſſe reddentes. Ut: *Sto, id eſt, ego nunc ſum ſtans*; item: *Ego ſto, id eſt, ego nunc ſum ſtans*, etc.

2. Secundo Exponimus Propoſitiones Quantas per Copulativas aut Diſjunctivas aequivalentes; ut: *Omnis homo eſt doctus, id eſt, et Petrus eſt doctus, et Paulus eſt doctus, et porro*. Huc referri poteſt omnis Expoſitio, quae ſit circa Acceptiones Communes; ut: *Omnia Elementa ſunt quatuor, id eſt, et ignis et aër et aqua et terra ſunt quatuor, etc.*

3. Tertio Exponimus per Definitionem, nempe loco Definiti in Expoſita, ponendo Definitionem ejus in Exponente; ut: *Homo eſt Eſſentia Petri, id eſt, homo eſt tale Praedicatum de Petro, ut cum de ipſo affirmatur, praecedere debeat ex parte Subjecti antequam veniat ad locum Praedicati*.

4. Quarto Exponimus Excludentes, quae nempe conſtant illâ particulâ: *Solus*, aut *Tantum*. Et quae quidem conſtant particulâ *Tantum*, excludunt a Praedicato; ut: *Petrus tantum ſtudet*, quae ſic exponitur: *Petrus ſtudet et Petrus nihil aliud agit (quantum ſcilicet ſpectat ad actiones ex propoſito factas)*.

Quae vero constant particulâ *Solus*, excludunt a Subjecto; ut: *Solum animal sentit, id est, animal sentit et nihil distinctum ab animali sentit.* Huc etiam spectant illae Propositiones, quae constant particula *Unicus*, nam *Unicus* idem est quod *Quidam* *isque solus*; v. g. *Unicus catellus est domi meae, id est, Quidam catellus est domi meae, isque solus (quantum scilicet ad canes) est domi meae.* Ex quo patet, Propositiones excludentes, quantumcunque videantur Affirmativae, continere in se semper aliquam Negationem.

5. Quinto Exponimus Excipientes, quae nempe constant illâ particulâ: *Praeter*; quae rursus Affirmativae sunt vel Negativae. Affirmativa v. g. est ista: *Omne animal praeter hominem est irrationale*, quae sic exponitur: *Et homo est animal, et homo non est irrationalis, et omne animal distinctum ab homine est irrationale.* Negativa est v. g. ista: *Nullum animal praeter hominem est rationale*, quae sic exponitur: *Et homo est animal, et homo est rationalis, et nullum animal distinctum ab homine est rationale.*

6. Sexto Exponimus Comparativas, in quibus nempe reperitur vox Comparativi gradus. Atque ea proprie sumpta sic exponitur: *Silex est durior latere, id est, silex est durus, et later est durus, et silex superat laterem in duritie.* Improperie autem sumpta, aliquando sic exponitur: *Furtum est melius homicidio, id est, furtum est minus malum quam homicidium*; interdum sic: *Melius est pati scelus quam facere, id est, pati scelus non est malum, et facere scelus est malum.*

7. Septimo Exponimus Enunciationes, in quibus vox aliqua Superlativi gradus invenitur. Ea dum proprie capitur, sic procedit Expositio: *Adamus est durissimus inter lapides, id est, adamus est durus, et sunt alii lapides duri, ac inter eos quidam aliis duriores, sed hos omnes in duritie superat adamus.*

8. Octavo assignant multi inter Exponendas, illas Propositiones, in quibus reperitur particula *Qua, Quatenus, Ut, In*



*quantum, etc.*, quas vocant *Reduplicantes*; v. g. *Homo non quia homo cadit, Homo quatenus gravis est cadit, Homo ut homo ratiocinatur, etc.* Sed falsum est, Propositiones illas ratione istarum particularum exponendas esse; important enim ratione istarum particularum Conceptum praecisivum ut vocant, qui est res nobis per Experientiam et Conscientiam, qua ejus in nobis conscii sumus, quam clarissima. Atque proprius istius Conceptus Character et Nota est particula Reduplicans, v. g. *Quatenus, In quantum, etc.*; ita ut quoad illam particulam Propositio Reduplicans sit tam clara, ut declarari amplius non possit. Vide de his ac similibus infra Part. 4. Sect. 1. cap. 6.

9. Atque ita obiter et dumtaxat in Exemplis percurramus aliquot Species Expositionum. Non est haec res tam abjecta quam vulgo aestimetur; imo Expositio Enunciationum est velut species quaedam Definitionis, adeoque spectare eam censeo ad Primarium Objectum Logices. De hac ego aliquid, de qua plerique nihil; potiora reservavi alio.

## CAPUT V.

### *De Assimilatione.*

1. Assimilatio est unius Enunciationis per aliam, tamquam Similitudinem suam, declaratio. Quid sit Similitudo, non teneor dicere; res exemplo fatis innotescit. Ad Assimilationem concurrunt duae Enunciationes tamquam ejus Extrema: Assimilans et Assimilata. Haec est Subjectum Assimilationis, illa velut Praedicatum; Copula est ista particula: *Sicut*. Ut in hac Assimilatione: *Affirmatio est in Negatione, sicut navis est in naufragio*, Subjectum Assimilationis seu Assimilata est *Affirmatio est in Negatione*, Assimilans est ista: *Navis est in naufragio*. Assimilata quidem sensu praecedit Assimilantem; sed in Rhetorum suggestu frequenter invertitur ille ordo, et Assimilans praecedit Assimilatam, et tunc dupla connexione colligantur,



*Sicut* praecedente et *Sic* interjecto; v. g. *Sicut naufragium non potest esse sine navi, sic Negatio non potest esse sine Affirmatione.*

2. Assimilatio nonnihil deducta vocatur *Allegoria*; v. g. *Sicut in Naufragio necessario praesupponitur navis, sic et in Negatione Affirmatio; at in naufragio perit navis, et suo modo in Negatione perit Affirmatio, velut eversa per Adverbium negandi.* Latius adhuc, et ultra quam res postulet, nimirum animi gratiâ, deducta Assimilatio, induit naturam Fabulae. Veluti, si quis in Negatione consideret Affirmationem ut navim, in qua Subiectum sit prora, Praedicatum puppis, Verbum malus, Adverbium autem negandi consideretur velut procella illisa malo eumque diffringens, is Fabulam fecisse videbitur.

3. Proprietas Assimilationis est: Omnis Similitudo claudicat, Et primo quidem vehementer luxata Similitudo, quod, cum divaricatis quasi cruribus in Assimilatâ consistat, in illâ proprie quidem, genuine et regie se habeat, in hac vero impedita, accommodata, et solummodo cum proportionem procedat. V. g.: *Sicut qui a somno excitat, non largitur sensum, sed tantum solvit retinaculum sensus; sic qui docet non infundit Scientiam, sed tantum aufert impedimenta sciendi; Atqui qui a somno excitat, levi stipendio contentus est pro istâ operâ, ergo simili stipendio contentus sit qui docet.* Ingens Rationis, cum manca Similitudine cujus humeris infederat, lapsus. Ad haec in eo non nulla quoque Similitudinis Claudicatio est, quod quae secundum proprium sermonem in Assimilante reperiuntur, non semper, ne quidem servatâ proportionem, transferri possint aut debeant in Assimilatam. Sic persistendo in Fabulâ ante positâ, in qua Affirmatio navis erat, difficulter forte Nauclerum et Remiges, et Mare, per quod fertur ista Navis, aliaque his, proportionem servatâ, similia reperies. Qui interim in his inveniendis facilius est, is bonus Poëta est, etiamsi forte non tam apte faciat Versus seu Carmina.

## CAPUT VI.

*De Conſequentiâ.*

1. Quid ſit Conſequentia, non debet dici niſi per Exemplum. Hic igitur Conſequentiam audis: *Sto, ergo ſtare poſſum*; et audis eam præcipue in *Ergo*; hic enim ejus character eſt, ſicut *Non* eſt character Negationis, et *Eſt* eſt character Affirmationis, etc. Ex Conſequentiâ duo Surculi naſcuntur: id quod ſequitur (vocaturque *Conſequens*, item *Concluſio*), et id ex quo aliquid ſequitur (vocaturque *Antecedens*). Sic in iſta Conſequentia: *Sto, ergo ſtare poſſum*, Antecedens quidem eſt *Sto*, ex eo enim ſequitur altera Propoſitio; Conſequens eſt *ſtare poſſum*, hoc enim ſequitur ex priori illa Propoſitione.

2. Conſequentia Analogiam habet cum Continentiâ, qua quid ſe aut ſuam partem continere dicitur. Sicut Numerus ternarius continet tres unitates ſimul, et earum ſingulas, ſic etiam Antecedens quodammodo continet in ſe ſuum Conſequens; videmus enim in *Sto* quodammodo contineri *ſtare poſſum*, ita ut qui primum dixerit, etiam poſterius hoc fateri videatur. Continet autem ſe ipſam quævis Enunciatio, ſe ipſam dicendo; ſic et continet aliud quodcumque ſuum Conſequens, ipſum nempe dicendo. Illa enim Enunciatio: *Sto*, dicit, *Me ſtare*, id eſt, ſe ipſam dicit, et hoc ipſo dicit etiam, *Me ſtare poſſe*, quod eſt aliud Conſequens ab ipſa. Adeo ut Conſequentia ſit dictio, qua una Enunciatio dicit aliam Enunciationem, ſeu qua una Enunciatio dicit totum hoc quod dicitur ab alia Enunciatione; ſed Conſequentia ſic ſumpta reſpicit principaliter Antecedens, illud enim dicit ſuum Conſequens, ſeu ſuam Concluſionem, cum interim Conſequentia iſto nomine *Conſequentia* prolata reſpiciat Conſequens; hoc enim eſt quod ſequitur ex Antecedente.

3. Hinc patet, quod Antecedens dicat ſuum Conſequens eſſe verum. Cum enim Conſequens ſit Enunciatio, proſecto Con-

sequens dicit se esse verum, ut ante demonstravi; si porro Antecedens dicat totum hoc, quod dicitur a Consequente, necessum est ut Antecedens etiam hoc dicat, Consequens suum esse verum.

4. Sed dices: si Consequentia non sit aliud quam Continentia, qua una Enunciatio in se continet aliam Enunciationem, debet ista Consequentia valere: *Petrus est homo vel Petrus est brutum, ergo Petrus est brutum* (cum tamen ista Consequentia sit omnino nulla); in priori enim Enunciatione, nempe quae praecedit particulam *Ergo*, continetur posterior Enunciatio, tamquam Pars in toto, ut patet ad oculum. Respondeo, Consequentiam esse veram Continentiam, qua nempe Enunciatio Enunciationem illibatam et integram continet, idem prorsus valentem, quod alibi et seorsim posita valeret. Jam autem Enunciatio Disjunctiva non continet tali pacto suas partes, ut pridem monui. Quia vero Enunciatio Copulativa continet suas partes illibatas et non fractas, hinc ex Copulativa etiam quaelibet ejus pars sequitur; v. g.: *Sto et loquor, ergo sto*, item, *ergo loquor*, bonae Consequentiae sunt.

5. Hactenus de Consequentia Necessaria, quae sola vera et proprie dicta Consequentia est. Praeter quam tamen agnoscunt communiter etiam Consequentiam Contingentem, quae non est Consequentia, sed dumtaxat quoddam ejus simulacrum; qualis hic sonat: *Ditescit, ergo superbiet*, item, *Erubuit*, aut, *Expalluit, ergo est sibi male conscius, etc.* Et sicut Consequentia proprie dicta est dictio qua una Enunciatio dicit aliam Enunciationem esse veram absolute, sic Consequentia Contingens est dictio, qua una Enunciatio aliam Enunciationem dumtaxat verisimilem esse dicit; sicut *Ditescit* dicit, verisimile esse quod *Superbiet*, et *Nubes densae supra nos coeuntes* dicunt, verisimile esse quod *Sequetur pluvia*. Hae igitur et similes non sunt verae Consequentiae, nec fortiuntur Proprietates verae Consequentiae; sicut Accidens stricte dictum non est verum Praedicatum.

6. Nota, ad Contingentiam Consequentiae impertinentem esse



Contingentiam Extremorum; haec enim Consequentia est necessaria: *Sto, ergo non sedeo*, et tamen ambo ejus Extrema, Antecedens inquam et Consequens, sunt tantum Contingentia.

## CAPUT VII.

### *De Proprietatibus Consequentiae.*

1. Prima Proprietas: Ex vero nil nisi verum; id est, ex vero Antecedente non potest sequi ullum Consequens, nisi et ipsum verum sit. Si enim ex vero Antecedente sequeretur Consequens non verum, diceret ergo verum Antecedens, id esse verum, quod non est verum; quod est impossibile; quod enim verum est, non potest dicere aliquid ita esse, quod tamen non ita sit.

2. Secunda Proprietas: Falsum non nisi ex falso, id est, Falsum Consequens non potest sequi nisi ex falso Antecedente. Antecedens enim tale dicit, Consequens suum verum esse; cum tamen ex supposito falsum sit Consequens, adeoque Antecedens ipsum est falsum. Quod enim dicit aliquid ita esse, cum tamen non ita sit, id falsum esse necessum est.

3. Tertia Proprietas: Verum ex quolibet, id est, verum Consequens sequi potest tum ex vero, tum ex falso Antecedente. V. g. *Sum homo, ergo sum animal*; hîc verum Consequens sequitur ex vero Antecedente. *Sum bos, ergo sum animal*; hîc verum Consequens sequitur ex falso Antecedente. Atque sic sufficienter demonstratum est hoc Theorema; cum enim Potentiam aliquam ponat, illa sufficienter demonstratur per unum ejus Actum.

4. Quarta Proprietas: Ex falso quidlibet, id est, ex falso Antecedente, sequi potest tum verum Consequens, tum falsum. V. g. *Sum bos, ergo sum bestia*; ibi ex falso Antecedente sequitur falsum Consequens. *Sum bos, ergo sum animal*; ibi ex falso Antecedente sequitur verum Consequens.



5. Quinta Proprietas: Ex Necessario nil nisi necessarium, id est, ex Antecedente necessario non potest sequi Consequens, nisi et ipsum pariter necessarium sit. Si enim Consequens non foret necessarium, ergo (cum Consequens sit Enunciatio) erit Impossibile vel Contingens (sicut demonstratur hac Parte 2. Sect. 1. cap. 2. n. 2.). Si Impossibile, jam ex vero sequetur Falsum. Necessarium enim est verum, et Impossibile est falsum, ut patet ex eorum definitionibus. Non potest etiam ex Antecedente necessario sequi Consequens Contingens; quia Contingens potest esse falsum; eo ipso igitur Antecedens ejus posset esse falsum (quia falsum non nisi ex falso); quod est absurdum, cum Antecedens supponatur esse necessarium.

6. Sed dices: Recte sequitur: *Petrus est homo, ergo Petrus aliquando ridet*, ex Necessario Contingens. Respondeo: Consequentia quae ibi importatur est Contingens; de qua nos hic non loquimur, at solum de Consequentia proprie dictâ seu Necessariâ, quae nempe est dictio, qua una Enunciatio aliam Enunciationem dicat; Impossibile autem est ut Necessarium dicat aliquid Contingens. Iterum dices: Sequitur per Consequentiam Syllogisticam adeoque necessariam: *Omnis homo albus est albus, omnis homo albus est homo, ergo quidam homo est albus*. Ibi Antecedens est necessarium, utpote adaequate conflatum ex duabus Praemissis essentialibus, et tamen Conclusio est contingens. Respondeo: In isto Syllogismo sunt quatuor Termini. *Albus* enim, prout affirmatur in Antecedente, et prout affirmatur in Consequente, non est idem Terminus; in Antecedente enim affirmatur absolute, in Consequente cum Adverbio Temporis praesentis; quod licet Copulae praefigatur, tamen Copula, cum suis Modis quibus afficitur, reducenda est ad Praedicatum. Simile vitium hîc committitur: *Petrus possibiliter est albus, Petrus est homo, ergo quidam homo est albus*, ubi rursus Antecedens est Necessarium et Consequens Contingens.

7. Sexta Proprietas: Ex Contingenti Necessarium atque Con-

tingens, sed non Impossibile. Prima pars demonstratur, quia sequitur *Sto, ergo stare possum*, ex Contingenti Necessarium. Secunda pars demonstratur, quia sequitur *Sto, ergo non sedeo*, ex Contingenti Contingens. Tertia pars demonstratur, quia si ex Contingenti sequeretur Impossibile, jam Contingens diceret id esse verum, quod est Impossibile, quod fieri nequit, cum sic ipsum Contingens etiam esset Impossibile. Quod enim dicit verum esse, quod verum esse non potest, profecto nec ipsum verum esse potest.

8. Septima Proprietas: Ex Impossibili quilibet, id est, ex Impossibili et Impossibile, et Necessarium, et Contingens sequi potest. V. g. hoc est Impossibile: *Sum bos*; ex quo sequitur hoc Impossibile: *Sum bestia*; sequitur hoc Contingens: *Non sum Logicus*; sequitur tandem hoc Necessarium: *Non sum lapis*.

9. Octava Proprietas: Necessarium ex quolibet; nempe ex Necessario, ut: *Sum homo, ergo sum animal*; ex Impossibili, ut: *Sum bos, ergo sum animal*; ex Contingenti, ut: *Sto, ergo sum animal*.

10. Nona Proprietas: Contingens ex Contingenti atque Impossibili, sed non ex Necessario. Contingens ex Contingenti: *Sto, ergo non sedeo*; Contingens ex Impossibili: *Non sum animal, ergo non sedeo*.

11. Decima Proprietas: Impossibile non nisi ex Impossibili. Non enim ex Necessario, quia *ex Necessario nil nisi Necessarium*, ut habet quinta Proprietas; non ex Contingenti, quia *ex Contingenti Contingens ac Necessarium sed non Impossibile*, ut habet sexta Proprietas.

## CAPUT VIII.

### *Tertium Quadratum Logicum.*

1. Primum Axioma: Ex quo sequitur Antecedens, ex eodem sequitur et Consequens. Antecedens enim quoad Sequelam continet in se suum Consequens; si rursus ipsum Antecedens

quoad Sequelam contineatur in aliquo, necessum est etiam Consequens in illo contineri. Quia in quo Continens, in eo continetur et Contentum; ut quia dolium continetur in cella, hinc etiam vinum dolio contentum continetur in cella.

2. Secundum Axioma: Ex quo non sequitur Consequens, ex eodem nec Antecedens. Si enim Antecedens sequeretur ex illo, jam etiam Consequens ex eodem sequeretur juxta Primum Axioma; sed falsum est, ex supposito, quod Consequens ex illo sequatur, ergo etiam falsum est quod Antecedens ex illo sequatur, quia Falsum non nisi ex falso.

3. Tertium Axioma: Quod sequitur ad Consequens, sequitur ad Antecedens; quia quod continetur in Contento, continetur etiam in Continente.

4. Quartum Axioma: Quod non sequitur ad Antecedens, non sequitur etiam ad Consequens. Si enim sequeretur ad Consequens, jam etiam sequeretur ad Antecedens juxta Tertium Axioma.

5. Possumus in gratiam Tironum haec Axiomata Exemplis incorporare et velut tactui subicere. Sint tres istae Enunciationes: 1. *Sto*, 2. *Stare possum*, 3. *Sum animal*. Considera secundam, nempe *Stare possum*; haec est Antecedens, et tertia, nempe *Sum animal*, est ejus Consequens; at quia Antecedens illud sequitur ex primâ, nempe ex *Sto*, hinc etiam ex primâ illâ sequitur Consequens; nam recte sequitur *Sto*, ergo *sum animal*. Rursum 1., *Sto*, est Antecedens et 2., *Stare possum*, est ejus Consequens, et 3., *Sum animal*, recte sequitur ad 2. (Consequens); proinde etiam sequitur ad 1. (Antecedens). Atque ita duo Axiomata Affirmativa in Exemplis posita fuerunt. Rursum quia 2., *Stare possum*, est Consequens ad 1., *Sto*, atque 2. (Consequens) non sequitur ex 3. (non enim sequitur *Sum animal*, ergo *stare possum*), hinc etiam Antecedens 1., *Sto*, non sequitur ex 3.; nec enim sequetur *Sum animal*, ergo *sto*. Et sic Secundum Axioma in Exemplo positum est. Rursum quia 1.,



*ſto*, non ſequitur ad Antecedens 2., *ſtare poſſum*, hinc etiam non ſequitur ad 3., quod eſt Conſequens ejus. Atque ita denique Quartum Axioma Exemplo inveſtitum eſt.

6. Hoc Quadratum analogum eſt cum Primo Quadrato; fundatur enim hoc Quadratum in Continentia, qua Antecedens continet ſuum Conſequens penes Illationem ſeu Conſequentiam, ſicut Primum Quadratum fundatur in Continentia, qua Praedicatum continet ſe in ſuum Subjectum quoad Affirmationem. Praedicatum continet ſuum Subjectum in genere Totius Potentialis; Antecedens vero continet ſuam Concluſionem in genere Totius Actualis; quotquot enim in Antecedente ſunt Concluſiones, continentur in illo penes *Et*, ſeu Copulative; Subjecta vero continentur in Praedicato penes *Vel*, ſeu Diſjunctive.

## CAPUT IX.

### *De Comparatione Enunciationum.*

1. Enunciationes quoad Conſequentiam inter ſe comparantur, vel tamquam ipſa Extrema Conſequentiae (et hinc reſultant Enunciationes Convertibiles ac Subalternae), vel tamquam unum Extremum et Contradictorium alterius Extremi (et hinc nanciſcimus Contrarias ac Subcontrarias). Atque adeo haec poſterior Comparatio ſupponit Contradictorias. Tandem his accedunt Diſparatae, quae ſcilicet extra Comparationem ſunt.

2. Enunciationes Convertibiles (quae etiam Aequivalentes dicuntur) ſunt Enunciationes quae ſe mutuo inferunt, ſeu ex earum una ſequitur altera, et contra. Ut: *Non neceſſario ſto*, *Poſſibiliter non ſto*; recte enim ſequitur *Non neceſſario ſto*, ergo *poſſibiliter non ſto*, et contra etiam ſequitur *Poſſibiliter non ſto*, ergo *non neceſſario ſto*. Et paſſim hujus generis quamplurimas videre poteſ, ubi de Reductione et Expoſitione egimus; Reducens enim et Reducta ſemper aequivalent.

3. Enunciationes Subalternae ſunt, quarum una infert alteram,



sed non contra. Ut: *Sto, Stare possum*; recte enim sequitur *Sto, ergo stare possum*, sed non sequitur vice versâ *Stare possum, ergo sto*. Inter subalternas Enunciationes una dicitur Subalternans, altera Subalternata. Subalternans est quae infert eam ad quam comparatur, sed ab ea non infertur, ut Enunciatio *Sto*, respectu Enunciationis *Stare possum*. Subalternata vero dicitur quae infertur ab aliâ Enunciatione, ad quam comparatur, sed eam non infert, ut *Stare possum* respectu *Sto*.

4. Enunciationes Contradictoriae sunt Enunciatio Negans et ejus Modificata seu ejus Negata; ut *Non sto, Sto*; item *Omnis homo est doctus, Non omnis homo est doctus*. Istaе vero: *Omnis homo est doctus, Aliquis homo non est doctus*, sunt aequivalenter Contradictoriae, non vero formaliter; posterior enim non negat priorem formaliter, seu prior non est Modificata posterioris, quamvis ei aequivaleat juxta Schema Reductionum. Interim quae aequivalenter contradicunt, passim habentur pro absolute Contradictoriis. Hae vero non contradicunt: *Omnis homo est doctus* et *Nullus homo est doctus*; nec istae: *Aliquis homo est doctus* et *Aliquis homo non est doctus*; quia non habent se ut Negans et Negata, cum neutra in istis combinationibus sit Negans, ut nuper ostendebam praeced. Sect. cap. 12. n. 4. et 5.

5. Enunciationes Contrariae sunt Subalternans et Contradictoria Subalternatae ejus. V. g. hae sunt Subalternae: *Sto, Stare possum*; capio Subalternantem, nempe *Sto*, et capio Contradictoriam Subalternatae, nempe *Non possum stare*, et nanciscor has Contrarias: *Sto, Non possum stare*.

6. Enunciationes Subcontrariae sunt Subalternata et Contradictoria Subalternantis ejus. V. g. hae sunt Subalternae: *Sto, Stare possum*; capio Subalternatam, nempe *Stare possum*, et Contradictoriam Subalternantis, nempe *Non sto*, habeoque has Subcontrarias: *Stare possum, Non sto*.

7. In Communi Doctrina non nominantur Contrariae, nisi penes *Omnis* et *Nullus*, nec Subcontrariae, nisi penes *Aliquis*

et *Aliquis non*, nec Subalternae, nisi penes *Omnis* et *Aliquis*, aut *Nullus* et *Aliquis non*. Ego quidem eas etiam agnosco; nam hae Subalternae sunt: *Omnis homo est doctus*, *Aliquis homo est doctus*, cum prior inferat posteriorem, et non contra. Hae sunt Contrariae: *Omnis homo est doctus*, *Nullus homo est doctus*, cum prior sit Subalternans et posterior sit Contradictoria (saltem aequivalenter) Subalternatae ejus. Hae tandem sunt Subcontrariae: *Aliquis homo est doctus*, *Aliquis homo non est doctus*; quia prior est Subalternata et posterior est Contradictoria Subalternantis in Aequivalenti. Sed malui hasce Species Comparationum penes nucleum, quam penes corticem aestimare, penes intimam naturam, quam penes extimum aliquem apparatus; quod cum facio, quamplurimas sub speciebus illis detego, quae, secundum frontem judicando, ad Species illas pertinere non viderentur.

8. Enunciationes Disparatae sunt, quae nihil horum sunt: neque convertuntur, neque subalternae sunt, neque contradictoriae, nec contrariae, nec subcontrariae. Ut, *Sto*, *Loquor*; cum enim neutra inferat alteram, non possunt esse Convertibiles aut Subalternae; cum neutra sit negans, non possunt esse Contradictoriae; sed nec aequivalent Contradictoriis, neque Contrariae sunt, neque Subcontrariae, ut magis patebit ex Legibus jamjam dictandis.

9. Nota autem, has omnes Species vicissim dici; id est, quando haec Enunciatio dicitur convertibilis cum illa, etiam illa dicitur convertibilis cum priori. Et potissimum oportet hoc infixum habere circa Contradictorias; non enim Negans Negatae tantum contradicit, sed et Negata Neganti. Quoad Subalternas est aliqua disparitas; nam Subalterna quidem vicissim dicitur, sed Subalternans non dicitur vicissim, sicut neque Subalternata vicissim dicitur; cum enim haec Enunciatio est Subalternans illius, non illa vicissim est Subalternans hujus, sed Subalternata. Similia dicenda sunt de Subalternata.

## CAPUT X.

*Leges harum Comparationum.*

1. Lex Convertibilium : Convertibiles possunt esse simul verae, possunt esse simul falsae ; sed una earum non potest esse vera, alterâ falsâ. Prima pars Legis probatur, quia hae sunt Convertibiles : *Non necessario sto, Possibiliter non sto*, atque sunt ambae verae. Secunda pars Legis demonstratur, quia hae sunt Convertibiles : *Necessario sto, Impossibiliter non sto*, atque sunt ambae falsae. Postrema pars Legis demonstratur, quia Convertibiles inferunt se mutuo ; si ergo una earum esset vera, alterâ falsâ, ex illâ verâ sequeretur haec falsa ; quod est contra Primam Proprietatem Consequentiae.

2. Lex Subalternarum : Subalternae possunt esse simul verae, possunt esse simul falsae, potest Subalternans esse falsa, Subalternatâ verâ, sed non contra. Prima pars Legis probatur, quia hae sunt Subalternae : *Sum homo, sum animal*, atque sunt ambae verae. Secunda pars Legis probatur, quia hae sunt Subalternae : *Sum bos, sum bestia*, atque sunt ambae falsae. Probatur Tertia pars Legis, quia hae sunt Subalternae : *Sum bos, sum animal*, atque Subalternans est falsa, Subalternatâ verâ. Probatur ultima pars Legis, quia si Subalternans esset vera, Subalternatâ falsâ, ex Vero sequeretur Falsum ; Subalternans enim infert Subalternatam.

3. Legi Contradictoriarum hoc Theorema praemitti debet : Enunciatio Negans de suâ Negatâ dicit, quod sit falsa, atque hoc solum dicit. Enunciatio enim Modalis nihil aliud facit quam Modum suum tribuere suae Modificatae ; Modus autem Enunciationis Negantis est *Non* seu *Falso*, igitur Enunciatio Negans nihil aliud dicit quam, Negatam seu Modificatam suam non esse seu falsam esse. Hinc jam clare intelligitur Lex Contradictoriarum : *Contradictoriae non possunt esse simul verae, non possunt esse simul falsae ; altera tamen earum est vera, altera falsa.*



Probatur Prima pars Legis, quia si Contradictoriae essent simul verae, Negans inter illas deberet esse vera, ergo deberet hoc esse, quod esse dicit; dicit autem, Modificatam suam esse falsam; igitur illa deberet esse falsa; et consequenter duae Contradictoriae non erunt simul verae, sed una earum, nempe Modificata, erit falsa. Probatur Secunda pars Legis, quia si Contradictoriae essent simul falsae, Negans inter illas erit falsa; debet ergo aliquid eorum quae dicit, non esse; atqui hoc solum dicit, Modificatam suam esse falsam; hoc proinde non erit; adeoque rursum duae Contradictoriae non erunt simul falsae, quia Negante falsâ Modificata ejus non erit falsâ. Probatur Tertia pars Legis, quia cum Contradictoriae sint Enunciationes, necessum est eas aut veras aut falsas esse; ambae non possunt esse verae, ambae non possunt esse falsae; hoc unicum igitur relinquitur, ut una earum sit vera, et altera falsâ. Hujus Legis Corollarium est: Si una Contradict. sit vera, altera erit falsâ; item, Si una Contradict. sit falsâ, altera erit vera. Si enim unâ verâ, altera non esset falsâ, esset ergo altera illa etiam vera (cum enim sit Enunciatio, debet esse vera vel falsâ, per definit. Enunciat.); erunt ergo duae Contradictoriae verae, quod est contra primam partem Legis. Rursum, si unâ Contradict. falsâ, altera non esset vera, esset ergo altera illa etiam falsâ; quod est contra secundam partem Legis.

4. Lex Contrariarum: Contrariae possunt esse simul falsae, potest earum una esse vera, alterâ falsâ; sed non possunt esse simul verae. Prima pars Legis demonstratur: hae sunt Subalternae: *Sum bos*, *Non sum mus*; prior quidem Subalternans, posterior vero Subalternata; fume ergo tibi istam Subalternantem, scilicet *Sum bos*, et Contradictoriam Subalternatae, nempe *Sum mus*, et habebis duas Contrarias, easque simul falsas, ut per se pater. Probatur Secunda pars Legis: hae sunt Subalternae: *Sum homo*, *sum animal*; prior rursum Subalternans, posterior Subalternata; fume igitur tibi Subalternantem, *Sum homo*, et



Contradictoriam Subalternatae, scilicet *Non sum animal*; ecce sunt Contrariae per Definitionem, et prior earum est vera, posterior autem falsa. Probatur denique Tertia pars Legis, quia si Contrariae essent simul verae, etiam Contradictoriae essent simul verae. Si enim Contrariae sint simul verae, ergo Subalternans et Contradictoria Subalternatae sunt simul verae; sed si Subalternans est vera, etiam Subalternata est vera (per Legem Subalternarum, et praecipue per postremam partem); ergo Contradictoriae erunt simul verae, nempe Subalternata et ejus Contradictoria.

5. Lex Subcontrariarum: Subcontrariae possunt esse simul verae, potest una earum esse vera, altera falsa; sed non possunt esse simul falsae. Probatur Prima pars Legis: hae sunt Subalternae: *Sum bos, sum animal*; cape Subalternatam, nempe *Sum animal*, et Contradictoriam Subalternantis, nempe *Non sum bos*, et habes (juxta definit. Subcon.) duas Subcontrarias, easque simul veras, ut perspicuum est. Probatur Secunda pars Legis: hae sunt Subalternae: *Sum homo, sum animal*; cape posteriorem cum Contradictoria prioris, et habebis duas Subcontrarias, unam veram, alteram falsam. Probatur Postrema pars Legis, quia si Subcontrariae essent simul falsae, etiam Contradictoriae essent simul falsae. Si enim Subcontrariae essent simul falsae, ergo Subalternata et Contradictoria Subalternantis erunt simul falsae; sed si Subalternata sit falsa, etiam Subalternans erit falsa (per Legem Subalter., et praecipue per ultimam Part.); ergo duae Contradictoriae erunt simul falsae, nempe Subalternans et ejus Contradictoria, quod est impossibile; adeoque et impossibile est, ex quo hoc sequitur, juxta 2. Propriet. Conf.

6. Lex Disparatarum exlex est. Nam possunt quidlibet; possunt esse simul verae, possunt esse simul falsae, et utralibet earum potest esse vera, altera falsa. Exemplum habes in *Sto et Loquor*. Quando autem duae Enunciationes possunt esse simul verae, hoc ipso certum est, eas non esse Contradictorias, nec

etiam Contrarias. Cum poſſunt eſſe ſimul falſae, hoc ipſo certum eſt, non eſſe Contradictorias nec Subcontrarias. Cum una earum poteſt eſſe vera, alterâ falſâ, hoc ipſo certum eſt eas non eſſe Convertibiles. Et cum utralibet earum poteſt eſſe vera, alterâ falſâ, hoc ipſo certum eſt, eas non eſſe Subalternas. Recte enim ſequitur: *Sunt Contrariae aut ſunt Contradictoriae, ergo non ſunt ſimul verae* (ut patet ex Legibus Contra. et Contradict.); ergo per Converſionem Soriticam etiam ſequitur: *Sunt ſimul verae, ergo non ſunt Contrariae aut Contradictoriae*. Eodem pacto reliqua demonſtrantur.

## CAPUT XI.

*Quartum Quadratum Logicum.*

I. Antequam veniamus ad hoc quartum Quadratum, prae-mittenda fuerint duo Theoremata, et unum Poſtulatam. Ac primo quidem hoc poſtulo: Detur, Convertibiles ſeu Aequivalentes Enunciationes pro iisdem habere. Nempe quoad Conſequentiam idem continent, quia ſe mutuo continent, adeoque quoad Conſequentiam merito conceduntur eſſe eadem. Et tota natura Enunciationis conſiſtit in *Dicere*; idem autem dicunt Convertibiles; una enim dicit totum hoc quod dicit altera, et contra, eo ipſo quo ſe mutuo inferunt. Vide ſupra de Conſeq. cap. 6. Sequuntur jam duo Theoremata, quorum hoc primum eſt: Enunciatio quaecunque, et illa Enunciatio vera, idem ſunt; inquam, Enunciatio aliqua, et alia Enunciatio, quae hanc Enunciationem veram eſſe dixerit, idem ſunt. Sic aequivalent et (juxta Poſtulatam) idem ſunt *Sto* et *Me ſtare verum eſt*; recte enim ſequitur: *Sto, ergo verum eſt me ſtare*, et contra: *Verum eſt me ſtare, ergo ſto*. Atque quod iſto Theoremate perhibetur, tam exiſtimo clarum eſſe, ut aliter quam Exemplo demonſtrare neceſſum non judicem. Secundum Theorema: Contradictoria alicujus Enunciationis, et illa Enunciatio falſa,

idem sunt; inquam, Contradictoria alicujus Enunciationis, et Enunciatio, quae hanc Enunciationem falsam esse dixerit, idem sunt. Demonstratio. Sint A, B Contradictoriae. Dico quod A falsum aequivaleat, seu (per Postul.) idem sit cum B; quia si A sit falsum, B erit verum (juxta Corollarium Leg. Contradict.); sed B verum idem est quod B (juxta praec. Theorema); ergo ex A falso sequitur B. Ulterius, si B sit verum, A erit falsum (juxta Corollar. Leg. Contradict.); sed B verum idem est quod B (juxta praeced. Theorem.); ergo ex B etiam sequitur A falsum. Ergo A falsum et B simpliciter inferunt se mutuo, ergo sunt Convertibilia. Simili pacto demonstrabis, quod B falsum et A simpliciter aequivaleant. Igitur Contradict. alicujus Enunciat., et illa Enunciat. etc., quod erat demonstrandum.

2. Sequitur jam Quartum Quadratum; atque in eo Primum Axioma: Si ex una Enunciatione sequatur alia Enunciatio, ex Contradictoria posterioris sequetur Contradictoria prioris. Demonstratio. Sint Enunciationes A, B, et earum Contradictoriae C, D, sic ut C contradicat ipsi A, et D contradicat ipsi B, et ex A sequatur B. Dico quod ex D etiam sequatur C. Cum enim ex A sequatur B, ex falso B sequetur falsum A (juxta 2. Propriet. Conseq. *Falsum non nisi ex falso*). Atqui B falsum idem est quod D (juxta 2. Theorem.), et A falsum idem est quod C (juxta idem); ergo ex D sequetur C. Quod erat demonstrandum. Argumenta, quae juxta hoc Axioma procedunt, voco Conversiones Soriticas aut Complexas, et simpliciter aliquando Conversiones. Etiam si enim Logici nomine Conversionis soleant intelligere Conversionem in Terminis, tamen haec non tantopere usui est, quam ista nostra Conversio. Talis Conversio hîc habetur: *Si sto, stare possum; ergo si non possum stare, non sto*; ibi enim ex eo, quod ex una Enunciatione sequatur alia, infertur, ex Contradictoria hujus etiam sequi Contradictoriam illius.



3. Secundum Axioma: Si ex Contradictoria alicujus Enunciationis non ſequatur Contradictoria alterius Enunciationis, etiam ex altera illa Enunciatione non ſequetur prior Enunciatio. Demonſtro hoc Axioma ex Primo et per Primum Axioma; ſequitur enim ex Primo Axiomate per Converſionem, hoc modo: *Si ex una Enunciatione ſequatur alia, ex Contradictoria poſterioris ſequetur Contradictoria prioris; ergo ſi ex Contradictoria poſterioris non ſequatur Contradictoria prioris, ex priori non ſequetur poſterior*; ſeu breviter: *Si ex A ſequatur B, ex falſo B ſequetur falſum A, ergo ſi ex falſo B non ſequatur falſum A, ex A etiam non ſequetur B*. Rarus eſt hic modus demonſtrandi, nempe ex et per idem. Antecedens enim hujus Demonſtrationis eſt Primum Axioma, atque idem eſt tota ratio et totum Fundamentum Conſequentiae ejusdem demonſtrationis. Sed et hoc notatu dignum eſt, quod rurfum ex Secundo Axiomate ſequatur Primum, idque Per Primum. Hoc enim Secundum Axioma eſt tale Argumentum: *Si ex Contradict. alicujus Enunciationis non ſequatur Contradict. alterius Enunciat., ex altera illa Enunciatione non ſequetur prior Enunciatio*; infer per Converſionem: *Ergo ſi ex altera ſequatur haec, ex Contradictoria hujus ſequetur Contradictoria illius*; quod eſt Primum Axioma. Ex quo etiam patet, Primum et Secundum Axioma Convertibilia eſſe, et per conſequens juxta Poſtulationem eſſe eadem.

4. Tertium Axioma: Si ex Contradictoria alicujus Enunciationis ſequatur Contradictoria alterius Enunciationis, ex altera illa Enunciatione ſequetur prior Enunciatio. Demonſtro: A contradicat ipſi B, et C contradicat ipſi D, atque ex A ſequatur C. Dico, quod ex D ſequatur B; quoniam enim ex A ſequitur C, hinc ex Contradictoria ipſius C, nempe ex D (Contradictoria enim viciffim dicitur, ut pridem monui), ſequetur Contradictoria ipſius A, nempe B (juxta Primum Axioma); quod erat demonſtrandum. Nota bene, quod Contradictoria viciffim dicatur, et videbis Tertium Axioma aequivalere Primo.



5. Quartum Axioma: Si ex una Enunciatione non sequatur alia quaedam Enunciatio, ex Contradictoria posterioris non sequetur etiam Contradictoria prioris. Sequitur hoc Axioma per Conversionem ex tertio Axiomate hoc modo: *Si ex Contradict. ipsius A sequatur Contradict. ipsius B, ex B sequetur A; ergo si ex B non sequatur A, ex Contradict. ipsius A non sequetur Contradict. ipsius B.* Unde et vicissim hoc Quartum Axioma infert Tertium, quia Extrema Conversionis (Antecedens inquam et Consequens ejus) convertuntur seu aequivalent; unde et patet, omnia Axiomata hujus Quadrati inter se aequivalere. Est autem hoc quartum Quadratum praecipuum inter Quadrata Logica, et reliquorum omnium Seminarium, imo et sui ipsius; per primum suum Axioma feminat reliqua Axiomata in ipso comprehensa.


## CAPUT XII.

*Schema Comparationis.*

1. Praemitti decet hoc Theorema: Contradictoriae Subalternarum etiam sunt Subalternae, sed inverso ordine; nempe Contradictoria Subalternantis subalternatur, et Contradictoria Subalternatae subalternat. Demonstro: Sit A Subalternans, B sit ejus Subalternata, C sit Contradictoria Subalternantis, et D sit Contradictoria Subalternatae. Dico, D, C etiam Subalternas esse, et D quidem subalternare, C vero subalternari. Nam cum ex A sequatur B (per definitionem Subalternantis), ex Contradictoria ipsius B, quae est D, debet sequi Contradictoria ipsius A, quae est C (per primum Axioma quarti Quadrati). Ulterius: ex B non sequitur A (per definitionem Subalternatae), igitur ex Contradictoria ipsius A, seu ex C, non sequitur Contradictoria ipsius B, seu D (per quartum Axioma quarti Quadrati). Igitur ex D sequitur C, at ex C non sequitur D; igitur D, C sunt Subalternae,

D quidem Subalternans, C vëro Subalternata (per definitionem Subalter.); quod erat demonſtrandum.

2. His poſitis erit expedita conſtructio alicujus Schematis, in quo Subalternas, Contrarias, Subcontrarias et Contradictorias nullo negotio invenies. Sume tibi Quadratum. In dextero ejus latere pone duas Subalternas eo ordine, ut Subalternans ſit ſupra, et Subalternata ſit infra. Forma duas earum Contradictorias, ac pone in finiſtro latere, ſed inverſo ordine, Contradictoriam Subalternatae ſupra, et Contradictoriam Subalternantis infra; hic iterum habebis duas Subalternas, Subalternantem quidem ſupra et Subalternatam infra (juxta Theorema mox propoſitum). In ſuperiori autem Coſta hujus Quadrati habebis Contrarias, nempe (per conſtructionem) habebis Subalternantem et Contradictoriam Subalternatae ejus, quae ſunt Contrariae (per definit. Contrar.). In inferiori Coſta habebis Subcontrarias; ibi enim habebis Subalternatam et Contradictoriam Subalternantis. In angulis autem per diametrum oppoſitis, habebis Contradictorias:



3. Radix hujus Schematis ſunt Subalternae in dextero latere, nempe *Sto*, *Stare queo*; harum Contradictoriae ponuntur in finiſtro latere inverſo ordine: *Nequeo ſtare* et *Non ſto*, atque ita rurfum habentur Subalternae, Contrariae autem ſupra,

Subcontrariae infra, et Contradictoriae per diametrum. Unde vides quod in tali Schemate semper occurrunt duae combinationes Subalternarum, duae combinationes Contradictoriarum, una combinatio Contrariarum et una Subcontrariarum. Et quidem ad inveniendum Contrarias et Subcontrarias videtur tale Schema principaliter institutum; nam Subalternas oportet praevis ad manum habere antequam ad constructionem Schematis te accingas, nisi quod tamen unam novam combinationem Subalternarum deprehendas in Schemate ortam ex ea quam sumpseras. Contradictoriae etiam supponuntur ad constructionem Schematis, et non proprie per ipsum Schema deprehenduntur. Servit igitur Schema multiplicationi Subalternarum et inventioni Contrariarum ac Subcontrariarum.

4. Nota, quod si pro Radice sumpseris Subalternas veras (v. g. has: *Sum homo, sum animal*), haec orientur: in dextero latere Subalternae verae, nempe ipsa Radix; in sinistro latere Subalternae falsae, utpote Contradictoriae verarum; in superna costa Contrariae, una vera altera falsa, vera quidem dexterorsum, falsa autem laevorsum; in inferna costa Subcontrariae, una vera et altera falsa, similiter sitae. Si sumpseris Subalternas falsas, v. g. has: *Sum bos, sum brutum*, habebis in sinistro latere Subalternas veras; inferne vero ac superne eadem quae ante, sed situ in dexteram laevamque converso; quae enim ibi a dexteris, hinc a sinistris, et contra. Denique si sumpseris Subalternas unam veram et alteram falsam, in sinistro quidem latere similes Subalternas invenies; superne vero Contrarias falsas, et inferne Subcontrarias veras. Oportet enim inter Subalternas quarum una vera est, altera falsa, veram quidem Subalternari, falsam autem Subalternare, ut patet ex Lege Subal.

5. Patet etiam ex hoc Schemate, Contradictorias Contrariarum Subcontrariari, et Contradictorias Subcontrariarum Contrariari. Quod et ex earum definitionibus demonstrari potest; cum enim Contrariae sint Subalternans et Contradictoria Subalternatae,

si harum Contradictorias tibi sumptferis, habebis Contradictoriam Subalternantis et Subalternatam, quae (per definit. Subcont.) sunt Subcontrariae. Similiter cum Subcontrariae sint Subalternata et Contradictoria Subalternantis, si sumptferis tibi earum Contradictorias, habebis Contradictoriam Subalternatae et Subalternantem, quae sunt Contrariae. Habitis proinde Contrariis, nullo negotio evenient Subcontrariae, formando tantum earum Contradictorias. Ac similiter ex Subcontrariis nullo negotio habebimus Contrarias.

---



---

## PARS III.

### SECTIO I.

#### De Argumentis.

De Argumentis agitur in Logicâ propter Rationem, quae est Quartum Instrumentum. Ratio enim cum Ratâ solet in Argumentum redigi, et Rationem Argumentando solemus invenire. Atque adeo Argumentum etiam Ratiocinatio vocari solet.

#### CAPUT I.

##### *De Argumento in genere.*

I. Argumentum abstractim sumptum idem est quod Consequentia. Sic subinde dicimus, *Possum stare, ergo sto* nullum Argumentum esse; dicere volumus, nullam esse Consequentiam. Alioqui ibi etiam esse Argumentum, alio sensu intellectum, non solemus diffiteri, dicentes v. g. inter disputandum, si quis hoc proposuerit: *Sic Argumentatur N.* Et alioqui nunquam liceret *Argumentum* vocare inter disputandum, cujus consequentiam negare constituissemus. Et quamvis forte non ineptum sit dicere, haec Argumenta, quorum inter disputandum negamus consequentiam, non agnosci a nobis ut Argumenta, sed ut praetensa Argumenta, adeoque vocari a nobis *Argumenta*, quia ut talia obstrudantur ab Oppugnante, non vero quia sint talia; nos tamen hac Parte tam de Praetensis illis, quam Veris

Argumentis agere debemus; unde, cum fieri possit, praestat ambo communi Definitione complecti.

2. Argumentum itaque est Enunciatio Illativa Affirmativa. Illativa Enunciatio est, in qua inter duas alias Enunciationes intercipitur Nota *Ergo*. Atque adeo Extrema Enunciationis Illativae, et per consequens Argumenti, sunt duae quaeque Enunciationes; Copula autem, quae et *Nota Illativa* vocatur, est *Ergo*. Unde haec est Enunciatio Illativa: *Sto, ergo stare possum*; ibi enim inter duas illas Enunciationes, *Sto, stare possum*, tamquam inter Extrema, interjicitur *Ergo* tamquam Copula. Imo etiam ista est Enunciatio Illativa: *Si sto, stare possum*; licet enim expresse ibi non intercedat *Ergo* inter Enunciationes, at implicite intercedit; sensus enim est: *Si sto, ergo stare possum*. Non sufficit autem ad Argumentum, quod sit Enunciatio Illativa; insuper debet esse Enunciatio Affirmans. Unde istud non est Argumentum: *Non si stare possum, ergo sto*; Argumentantes enim dicere debemus hoc ex illo sequi, cum ibi dicatur non sequi. Quinimo hoc non est Argumentum: *Sto, non ergo loquor*, etiamsi sit Enunciatio Affirmativa, quatenus Copulativa; sic enim resolvitur: *Et sto, et inde non sequitur me loqui*, ubi Copula *Et* intacta est a Negatione, adeoque efficitur Copulativa Affirmans. Est tamen Negativa, quatenus Illativa, cum eatenus Copula ejus sit *Ergo*, quae ibi a Negatione non est immunis.

## CAPUT II.

### *De Antecedente et Consequente.*

1. Extrema Argumenti vocantur Antecedens et Consequens. Antecedens est illud Extremum, quod sensu praecedit Copulam Argumenti; Consequens (quod et Conclusio dicitur) est illud Extremum, quod sensu sequitur Copulam Argumenti. Ut in hoc Argumento: *Sto, ergo stare possum*, Antecedens est *Sto*,

Consequens est *Stare possum*. Hîc similiter: *Sto, ergo loquor*, Antecedens est *Sto*, Consequens est *Loquor*. Unde differunt Antecedens et Consequens relata ad Consequentiam, et relata ad Argumentum; cum enim ibi sit Argumentum, utique Antecedens et Consequens Argumenti etiam adsunt; sed cum ibi nulla Consequentia sit, etiam nullae ejus adsunt affectiones, nec Antecedens nec Consequens talia ibi sunt. Oportet vero integrum hoc, quod sensu praecedat Copulam Argumenti, vocare Antecedens, non vero priorem partem tantum. Unde hîc: *Sto et loquor, ergo aliquis stans loquitur*, non oportet pro Antecedente *Sto* assignare, sed totum hoc: *Sto et loquor*; hoc enim totum praecedat Copulam Argumenti. Simile quid dic de Consequente.

2. Antecedens itemque Consequens dividitur in Simplex et Complexum. Antecedens simplex est, quod est Enunciatio simplex, ut Antecedens hujus Argumenti: *Sto, ergo stare possum*; imo etiam Antecedens hujus: *Si sto, stare possum; ergo si non possum stare, non sto*; etiamsi enim Enunciatio Condicionalis passim inter Compositas recensetur, non putatur tamen se solâ constituere Antecedens Complexum, quod etiam signum est, eam non esse vere compositam, ut pridem dixi. Eadem dic de Consequente simplici. Antecedens Complexum est, quod est Enunciatio composita; atque adeo vel Copulativum est, ut hîc: *Sto et loquor, ergo aliquis stans loquitur*, vel Disjunctivum, ut hîc: *Vel non sto vel non loquor, ergo non loquor stans*. Et Copulativum quidem Antecedens magis proprie Complexum est; habetque hoc speciale, quod ad ejus partes seorsim aliquid responderi possit, ab eo qui Disputationem sustinet, negando scilicet vel concedendo; ubi Antecedens Disjunctivum hoc commune habet cum Antecedente Incomplexo, quod ipsum totum et per se primo concedendum vel negandum sit, nullâ circa partes ejus versante responsione.

3. Partes in Antecedente Complexo vocantur *Praemissae*; in

Conſequentē Complexo eodem tenore vocentur *Submiſſae*. V. g. in hoc Argumento: *Sto et loquor, ergo quidam ſtans loquitur*, Praemiſſae ſunt *Sto, loquor*; in hoc autem: *Nemo ſtans loquitur, ergo vel non ſto, vel non loquor*, Submiſſae ſunt *Non ſto, non loquor*. Praemiſſae ſunt aequales vel inaequales. Aequales ſunt, quarum neutra ſeorſim ſufficit inferendae Concluſioni, vel utraque in ſolidum ſufficit; ut hîc: *Sto et loquor, ergo quidam ſtans loquitur*, Praemiſſae ſunt aequales, quia licet ambae ſimul et conjunctae inferant Concluſionem, neutra tamen ſeorſim hoc poteſt. Hîc item Praemiſſae ſunt aequales: *Omnis homo eſt animal, Petrus eſt homo, ergo Petrus eſt animal*, quia ambae ſeorſim et ſingulae ex aequo inferunt Concluſionem. Inaequales Praemiſſae ſunt quarum una ſeorſim infert Concluſionem, alterâ tantum applicante Antecedens ad Concluſionem; ut hîc: *Omnis homo eſt bos, Petrus eſt homo, ergo Petrus eſt bos*; ibi enim ſola prior Praemiſſa infert Concluſionem, poſterior tantum applicat priorem Praemiſſam ad Concluſionem.

4. Inter Praemiſſas inaequales una eſt Major, et altera Minor. Major eſt illa inaequalium Praemiſſarum, quae ſola infert Concluſionem. Minor eſt illa inaequalium Praemiſſarum, quae Concluſionem quidem non infert, ſed tantum applicat Antecedens ad Conſequens. Inter aequales autem Praemiſſas neutra Major, neutra Minor; altera tamen Prior, altera Poſterior eſt; ſubinde quidem ex convenientiâ aliquâ, et quia melius ſic congruat, ſubinde autem mere ex arbitrio, et quia ſic placet ei qui Argumentum proponit. Et quamvis haec ita ſint, uſus tamen obtinuit in omni Argumento Formali, quod paſſim Syllogiſmus vocatur, ſive Categoricalis ſit Syllogiſmus (id eſt proprie dictus Syllogiſmus) ſeu Hypotheticus, ſeu Diſjunctivus, Majorem et Minorem dicere, Majorem quidem Praemiſſam illam, quae in Antecedente Verbotenus praecedat, Minorem vero, quae ſequitur; quamvis plerumque aut valde ſaepe ſint aequales iſtae Praemiſſae.



## CAPUT III.

*De Argumento Rationali et Condicionali.*

1. Argumentum Condicionale est, in quo non asseritur Antecedens, sed tantum supponitur. Ut: *Si sto, stare possum*, ibi enim non assero, me stare. Unde et perinde verum hoc est, five stem five non stem. Argumentum Rationale est, in quo asseritur Antecedens. Ut: *Sto, ergo stare possum*, ibi enim assero, me stare, et non totum hoc verum erit, five non totum concedendum, casu quo fedeam; tunc enim negandum fuerit Antecedens. Unde qui Disputationem sustinet, ad nullam partem Argumenti Condicionalis respondet, sed ipsum totum ad instar Simplicis alicujus Propositionis concedit vel negat; in Argumento autem Rationali ad minimum duabis partibus respondendum habet, Antecedenti nempe et Copulae Argumenti, quibus singulis concedendo vel negando respondet.

2. Non omnis Enunciatio Condicionalis est Argumentum Condicionale; datur enim Condicionalis Negativa (ut: *Non si sto, stare possum*), cum Argumentum debet esse Enunciatio Affirmativa. Datur et Condicionalis non Illativa (ut: *Si bene studueris, dabo tibi novas vestes*); Argumentum autem debet esse Illativa Enunciatio. Omne tamen Argumentum Condicionale est Enunciatio Condicionalis, etiamsi subinde non expresse contineat Notam Condicionalem *Si*; quod contingit in Argumento ad-hominem, ut vocant, in quo Sententiam alicujus loco Antecedentis assumimus, et absurdum ex ea concludimus ad confutandum istam Sententiam, juxta Reg. *Falsum non nisi ex falso*.

## CAPUT IV.

*De Argumento Bono et Malo.*

1. Argumentum etiam dividitur in Argumentum bonae Consequentiae et Argumentum malae Consequentiae. Argumentum

bonae Conſequentiae eſt Argumentum cujus Copula ſignificat Conſequentiam quae ſubeſt; ut *Sto, ergo ſtare poſſum*. Argumentum malae Conſequentiae eſt, cujus Copula ſignificat Conſequentiam quae non ſubeſt; ut *Stare poſſum, ergo ſto*. Vocant hoc *Malum Argumentum*, et iſtud *Bonum*, quae nomenclatura probari vel improbari poteſt, juxta ea quae dicta ſunt Cap. 1. Interim Nomina iſta, quae uſus invexit, non reſpuemus; adeoque paſſim Bonum Argumentum dicemus quod Bonae Conſequentiae eſt, et Malum, quod Malae; licet tam hoc quam illud dici debeat Bonum Argumentum juxta definitionem Argumenti assignatam Cap. 1.

2. Argumentum Malum aliquando ſplendide Malum eſt, quando nempe habet Antecedens verum, Conſequente falſo; tale enim Argumentum directe nititur contra Capitalia Principia Logices: *Ex vero nil niſi verum* et *Falſum non niſi ex falſo*. Et quia ſplendide Mala ſunt iſta Argumenta, et aperte peccant, hinc in ſequentibus vocantur nobis *Impudentiae*; penes quas aeſtimantur omnia Argumenta Logica, utpote quae in Affecti-  
onibus Logicis, in quibus ipſa ſunt poſita, nullam poni ſinunt Impudentiam, id eſt nullum Argumentum, quod habeat Antecedens verum, Conſequente falſo, ut infra patebit.

3. Argumentum Malum patitur omnes differentias Extremorum. Poteſt enim Malum Argumentum 1. habere Extrema vera; quale eſt iſtud: *Sum animal, ergo ſum homo*. Poteſt 2. habere Extrema falſa; quale eſt iſtud: *Sum bos, ergo ſum lapis*. Poteſt 3. habere Antecedens falſum, Conſequente vero; quale eſt iſtud: *Sum bos, ergo ſum homo*. Poteſt 4. habere Antecedens verum, Conſequente falſo; quo ſpectant omnes Impudentiae, v. g.: *Sum homo, ergo ſum bos*. Argumentum Bonum autem tantum tres differentias Extremorum admittet. Poteſt enim Bonum Argumentum 1. habere Extrema vera; quale eſt iſtud: *Sum homo, ergo ſum animal*. Poteſt 2. habere Extrema falſa; quale eſt iſtud: *Sum bos, ergo ſum brutum*. Poteſt 3.

habere Antecedens falsum, Consequente vero; quale est istud: *Sum bos, ergo sum animal*. Sed Bonum Argumentum non patitur quartam differentiam, seu nullam intra suos fines Impudentiam admittit.

4. Bonum Argumentum distinguitur in Necessarium et Contingens, quod penes Consequentiam, quam Copula significat, dijudicandum est. De his supra.

### C A P U T V.

#### *De Argumento Primo et Secundo.*

1. Primum argumentum voco, quod non argumentatur ex alio Argumento, seu quod non praesupponit aliud Argumentum tamquam Antecedens suum aut Praemissam; ut *Sto, ergo stare possum*. Secundum Argumentum dico, quod ex Argumento argumentatur, id est, praesupponit aliud Argumentum tamquam Antecedens vel Praemissam; ut *Si sto, stare possum; ergo si non possum stare, non sto*; ibi enim Antecedens est hoc Argumentum Condicionale: *Si sto, stare possum*. Non requiro autem ad Argumentum Secundum, ut integrum ejus Antecedens sit Argumentum; sed sufficere mihi videtur, si vel una ejus Praemissa fuerit Argumentatio. Quapropter Syllogismos Hypotheticos etiam inter Argumenta Secunda recenseo, veluti: *Si sto, stare possum; sed sto; ergo stare possum*; item: *Si sto, stare possum; sed non possum stare, ergo non sto*; ibi Argumentum illud Condicionale, *Si sto, stare possum*, tantum obtinet locum Praemissae, non autem integri Antecedentis.

2. Argumenta quae ex Antecedente Necessario procedunt, etiam si saepe communi apprehensione et externo apparatu videantur Prima, facile tamen possunt considerari ut Secunda; quia omnes Propositiones Necessariae admittunt sensum Condicionalem. Ut *Duo et tria sunt quinque* admittit hunc sensum: *Si sunt duo et tria, ergo sunt quinque*; item *Totum est majus*

*suâ parte*, id est, *Si sit totum, ergo est majus suâ parte, etc.* Unde etiam *Petrus est homo, ergo Petrus est animal* potest considerari tamquam Argumentum Secundum, hoc modo: *Si quid sit Petrus, id etiam est homo; ergo si quid sit Petrus, id etiam est animal.* Si igitur isti considerationi fraenum laxare voluerimus, sola Argumenta quae ex Antecedente Contingenti procedunt, poterunt esse Prima; ut *Sto, ergo stare possum*; quia v.g. *Sto* non admittit sensum condicionalem, cum nullo modo possit exponi: *Sto, id est, si sum ego, ergo sum stans*; exponens enim ibi est impossibilis, cum exposita saepe sit vera.

3. Sed temperandum est isti Considerationi, et Propositiones necessariae etiam ut Propositiones cogitandae, et non tantum ut Argumenta, sicut exterior earum apparatus et forma postulant. Quo servato, inter Argumenta Prima recensebimus Repetitionem, Subalternationem, Conversionem, Syllogismum, Argumentum a divisis ad conjuncta, Argumentum a conjunctis ad divisa, et omnia Argumenta Topica, id est uno verbo omnia Argumenta in Terminis; at insuper etiam quaedam in Enunciationibus, nimirum Subalternationem Complexam et omnes ferme Syllogismos Disjunctivos. At inter Argumenta Secunda recensebimus Syllogismum Hypotheticum utrumque, Directum nempe et Indirectum, Soritem, Conversionesque Soriticas et Enthymemata Soritica. Circa quae duo posteriora aliqua difficultas est, cum procedunt ex Antecedente Negativo. Et quamvis eo casu non sint Argumenta Secunda, cum tunc non Argumententur ex Argumentatione, seu Enunciatione Illativâ Affirmante, sed ex Enunciatione Illativâ Negante; tamen ad Argumenta Secunda commode revocantur, ne a consortibus suis, quae ex Antecedente Affirmativo procedunt, separentur.

## CAPUT VI.

### *De Argumento Praegnante et Puro.*

1. Argumentum Praegnans est, inter cujus Extrema implicite



mediat Enunciatio, tamquam Consequens Antecedentis et Antecedens Consequentis istius Argumenti. Et hinc illam Enunciationem, quae sic illative seu penes Illationem mediat inter Antecedens et Consequens Argumenti Praegnantis, *Elisam* vocare possumus. V. g. hoc Argumentum Praegnans est: *Omnis homo est animal, ergo aliquod animal est homo*; ibi enim haec eliditur: *Aliquis homo est animal*; ibi enim haec cum utroque Extremo praedicti Argumenti illative seu mediante Copulâ *Ergo* cohaeret, cum Antecedente tamquam Consequens et cum Consequente tamquam Antecedens, hoc modo: *Omnis homo est animal, ergo aliquis homo est animal*, et: *Aliquis homo est animal, ergo aliquod animal est homo*. Ex quo etiam patet, Argumentum Praegnans implicite continere plura Argumenta, in quae resolvi possit; sicut hoc Argumentum Praegnans: *Omnis homo est animal, ergo aliquod animal est homo*, virtualiter seu implicite continet hanc Subalternationem: *Omnis homo est animal, ergo aliquis homo est animal*, et hanc puram Conversionem: *Aliquis homo est animal, ergo aliquod animal est homo*. Atque ex hac Proprietate Argumenti Praegnantis nomen ei feci.

2. Argumenta, in quae resolvitur Argumentum Praegnans, possunt vocari *Intrusa*, et ipsum Argumentum Praegnans horum respectu vocari potest *Recipiens*. Specialiter vero illud Argumentum Intrusum dici meretur, quod est disparis naturae a Recipiente. Sic in Argumentum Praegnans mox propositum intrusa sunt duo Argumenta, nimirum una Subalternatio, et una Pura Conversio; sed prior magis et Specialius intrusa censetur, posterior enim participat in natura cum ipso Argumento Praegnante, utpote quod etiam Conversio quaedam sit. Et hinc etiam Argumenta quaedam *Communiter Intrusa* dici possunt, quae nempe ex genere suo talia sunt, ut promiscue alterius speciei Argumentis intrudantur. Talia Argumenta sunt Subalternatio et Conversio; haec enim passim in multis aliarum Specierum Argumentis, praecipue in Syllogifinis et Argumentis

Topicis infarciuntur. Subalternatio etiam in Converſionem intrudi poteſt, ſed Converſio non poteſt intrudi in Subalternationem, ut ſtatim patebit ex earum Definitionibus.

3. Argumentum Praegnans non ſemper duobus modo, ſed ſubinde etiam pluribus Argumentis Intruſis turget. Ut hic Syllogiſmus: *Omnis homo eſt animal, omne rationale eſt homo; ergo aliquod animal eſt rationale*, puro Syllogiſmo et inſuper Subalternatione ac Converſione praegnans, ſic reſolvendus: *Omnis homo eſt animal, omne rationale eſt homo; ergo omne rationale eſt animal* (ubi purus Syllogiſmus, juxta Axioma: Quod dicitur de Praedicato, dicitur de Subſpecto, procedens); item *Omne rationale eſt animal, ergo aliquod rationale eſt animal* (ubi Subalternatio); item *Aliquod rationale eſt animal, ergo aliquod animal eſt rationale* (ibi pura Converſio). Ita ut primus ille Syllogiſmus duas Eliſas habeat, nempe *Omne rationale eſt animal* et *Aliquod rationale eſt animal*.

4. Argumentum Purum eſt, inter cujus Extrema non interjicitur implicate aliqua Enunciatio tamquam Conſequens Antecedentis et Antecedens Conſequentis. Sed difficultas, num tale detur aliquod Argumentum; Antecedens enim ſemper habet plures, imo infinitas Enunciationes ſecum Convertibiles, quarum proinde aliqua inter Antecedens et Conſequens cujuſcunque Argumenti intercedere poterit penes Illationem; nam inferetur ab Antecedente tamquam Convertibili, et inferet Concluſionem tam bene quam ea inferatur ab Antecedente; quod enim ſequitur ex una Convertibilium, etiam ex altera ſequitur. Reſpond. Verum eſt, nullum dari Argumentum quod ſit absolute purum, ut Ratio allegata convincit; ſed ſaltem dantur Argumenta Logica pura, id eſt, talia Argumenta Logica, in quae nullum aliud Argumentum Logicum intruſum ſit; atque haec intelligemus nomine Argumenti Puri ſimpliciter poſito. Quid ſint Argumenta Logica, dicetur infra cap. II.

5. Inter Argumenta Pura,<sup>2</sup> ſic aeſtimando, primo loco occurrit

Repetitio. Estque Argumentum cum unica Propositione, id est, una eademque Propositio obtinet locum Antecedentis et locum Consequentis in illo; ut *Sto, ergo Sto*. Vocatur vulgo Argumentum Fatuum, iniquo nomine; est enim Argumentum optimum, et quo nullum melius vel cogitatione fingi possit. Sed percepi mentem non recte loquentium; *Fatuam Probationem* volunt dicere. Argumenta enim non ex Argumentorum natura metiuntur, sed ex fine, quem sibi discentes praestituunt, Disputatione et victoriâ; et sane nemo tam fatuus est, qui ineptum esse non videat, tales Argumentationes ad probandum vel confutandum assumere.

6. Hanc gradu proximo insequitur Subalternatio; quae est Argumentum cum duabus Propositionibus solâ quantitate distinctis. Nimirum Antecedens et Consequens habent se tamquam Propositio Universalis et Propositio Particularis, quoad caetera coincidunt; ut: *Omnis homo est animal, ergo aliquis homo est animal*, imo: *Aliquod animal est homo, ergo omne animal est homo*. Nondum enim ago de Subalternatione Formali seu Formaliter bonâ. Subalternatio non est ex toto suo genere bonum Argumentum; atque in eo distinguitur a Repetitione, quae ex toto suo genere necessariae Consequentiae est; ejus enim Fundamentum Primum est et inconcussum: *Necessario quidlibet si est, est*. Quod alii sic efferunt: *Quidlibet dum est, necessario est*; non satis accurate ad normam Logicam, et falsum sonat, nisi benigne interpreteris. Quamvis interim Subalternatio non sit ex toto suo genere bonum Argumentum, parvo tamen impendio, servato exiguo ritu et Formâ asseritur in bonum Argumentum; nimirum ille modo situs inter Extrema fervetur, ut Universalis Propositio praecedat Particularem. Subalternatio saltem Repetitione impraegnata videtur; non est enim aliud Argumentum Logicum, quod in eam intrudi posse videatur. Sed cuicumque Argumento intrusa sit Repetitio, nunquam exsolvitur, quia hoc usum non habet; ideoque in Disciplinis Fatuum esset hoc agere.

7. Subalternationi succedit Conversio. Estque Argumentum cum duabus Propositionibus eorundem Terminorum, sed inverforum: ut *Homo est animal, ergo animal est homo*. Non ago adhuc de Conversione Formali seu formaliter bonâ, sed agam de illa Sect. 2. Conversio non est ex toto suo genere bonum Argumentum, in eoque convenit cum Subalternatione; differt vero, quod plus Formae servandum sit in Conversione, ut ab omni vitio vindicetur, quam in Subalternatione, ut patebit sequ. Sectione. Conversio tantum admittit Subalternationem; nullum aliud Argumentum ei intrudi potest.

8. Quarto loco succedunt reliqua Argumenta Logica, Syllogismi, Argumenta Topica etc., quae tum a Subalternatione, tum a Conversione iniri possunt, imo subinde ab utraque simul. Porro: Curanda nobis tantummodo sunt Argumenta Pura; quia Praegnant Argumentationes hoc ipso satis accuratae videbuntur, si Argumentis Puris, in quae resolvuntur, satis prospectum fuerit; tantum opus erit industriâ et artificio resolvendi, sicubi Praegnant Argumentationes occurrerint.

## CAPUT VII.

### *De Enthymemate.*

1. Atque sic obiter actum est de simplicioribus Argumentis, Repetitione, Conversione, Subalternatione; ordini isti insistentibus, post ista occurrit Enthymema. Enthymema est Argumentum cum tribus Terminis dispersis per duas Propositiones. Argumentum, inquam, sive Bonum sive Malum, quia non minus Mala quam Bona Argumenta possunt esse bona Enthymemata; velut istud est bonum Enthymema: *Petrus est homo, ergo Petrus est bos*. Dispergi dico Terminos per aliquas Propositiones, quando sic ponuntur isti Termini in istis Propositionibus, ut nullus eorum bis occurrat in eadem Propositione.



2. Quia in Enthymemate sunt duae Propositiones, hinc in Enthymemate sunt quatuor loca Terminorum; in qualibet enim Propositione duo loca Terminorum reperiuntur, nempe locus Subjecti et locus Praedicati. Cum igitur in Enthymemate, implendis quatuor locis Terminorum, tantum suppetant tres Termini, necessum est unum istorum Terminorum bis poni in Enthymemate. Atque is Terminus Communis dicitur; ponitur autem et in Antecedente et in Consequente; non potest enim in solo Antecedente bis poni, aut in solo Consequente, quia sic Termini non essent dispersi in Enthymemate. Cum igitur Terminus Communis ponatur in Antecedente et in Consequente simul, necessum est, ut duo reliqui Termini, unus in Antecedente tantum, alter in Consequente tantum ponatur. Et qui in Antecedente tantum ponitur, vocatur Terminus Inferens; qui in Consequente tantum, dicitur Terminus Illatus; v. g. in praedicto Enthymemate Terminus Inferens est *Homo*, Terminus Illatus est *Bos*, Terminus Communis est *Petrus*. Ex quo etiam patet, in solo Enthymemate reperiri illas Terminorum differentias, extra vero Enthymema, nec Terminum Inferentem qua talem, nec Illatum, nec Communem reperiri.

3. Enthymema dicitur procedere ex parte Subjecti, quando Terminus Inferens in Antecedente et Terminus Illatus in Consequente, ambo ponuntur loco Subjecti; eoque casu Terminus Communis bis ponitur loco Praedicati. Sic istud Enthymema procedit ex parte Subjecti: *Animal sentit, ergo bos sentit*. Enthymema dicitur procedere ex parte Praedicati, quando ambo illi Termini, Inferens inquam et Illatus, ponuntur ex parte Praedicati; atque eo casu Terminus Communis bis ponitur loco Subjecti. Sic procedit istud Enthymema: *Bos sentit, ergo bos est animal*. Quando vero Inferens ponitur loco Subjecti in Antecedente et Illatus loco Praedicati in Consequente, aut contra (quo casu Terminus Communis semel ponitur loco Subjecti, et semel loco Praedicati), non est Purum Argumen-

tum, ſed Praegnans, in aliud Purum Enthymema ac Converſionem reſolvendum; ut hoc: *Bos ſentit, ergo aliquod animal eſt bos*; quod ſic reſolvitur: *Bos ſentit, ergo bos eſt animal* (ubi Purum Enthymema), et: *Bos eſt animal, ergo aliquod animal eſt bos* (ubi Converſio; quae tamen non eſt pura ſed Subalternatione infarta, ſic reſolvenda: *Bos eſt animal*, ſeu, quod idem eſt, *Omnis bos\* eſt animal, ergo quidam bos eſt animal*, ubi Subalternatio, et *Quidam bos eſt animal, ergo quoddam animal eſt bos*, ubi pura Converſio eſt). Fuit igitur Enthymema a Praedicato ad Subjectum; ponatur jam Enthymema a Subjecto ad Praedicatum. V. g.: *Nullum brutum eſt homo, ergo nullus homo eſt bos*; quod ſic reſolvitur: *Nullum brutum eſt homo, ergo nullus homo eſt brutum* (ibi pura Converſio), et *Nullus homo eſt brutum, ergo nullus homo eſt bos* (ubi purum Enthymema). Sed juxta Reg. praeced. cap. n. ult. traditam de duabus iſtis ſpeciebus Enthymematis curandum non eſt, niſi ut ſcite reſolvantur, ſi incidant; tantum ergo curanda ſunt Enthymemata Pura, quae ſunt vel ex parte Subjecti vel ex parte Praedicati.

4. Supplementum etiam circa Enthymema conſiderandum eſt. Supplementum Enthymematis voco Propositionem conſtante Termino Inferente et Termino Illato Enthymematis, tamquam ſuis Extremis. V. g. poſito hoc Enthymemate: *Petrus eſt homo, ergo Petrus eſt bos*, Supplementum ejus eſt iſta Propoſitio: *Homo eſt bos*; illa enim componitur ex Inferente et Illato Enthymematis tamquam Subjecto et Praedicato. Imo etiam illa: *Bos eſt homo*; non refert enim ad Supplementum an Inferens obtineat in eo locum Subjecti, Illato tenente locum Praedicati, an contra. Imo etiam iſta: *Homo non eſt bos*, aut: *Bos non eſt homo*; non refert enim etiam ad Supplementum, an affirmativum ſit an negativum. Unde et Supplementum Enthymematis dividi poteſt in Affirmativum et Negativum, itemque in Rectum et Inverſum. Rectum vocabo illud Supplementum, in quo Inferens obtinet locum Subjecti et Illatus locum Praedicati. Inverſum

Supplementum vocabo, in quo vice versâ Illatus obtinet locum Subjecti, Inferens locum Praedicati.

5. Quando Enthymema est bonum Argumentum Logicum, tunc vocatur Argumentum Topicum, et a quibusdam Argumentum Materiale; de quo infra.

## CAPUT VIII.

*De Syllogismo materialiter considerato.*

1. Egi de Conversione et Subalternatione materialiter spectatis, id est spectatis independenter ab illo apparatu, qui eis tutam praestare posset Consequentiam. Egi etiam de Argumento Topico sic spectato, quodque ibi commodum accidebat, sub nomine Enthymematis. Ordo postulat, ut de Syllogismo nunc dicam, sed materialiter considerato, praescindendo scilicet ab illa Forma, quae ei sufficit ad bonitatem Consequentiae, et a qua Argumentum Formale dicitur, quando in famosa sua significatione sumitur. Syllogismus igitur sic consideratus est Enthymema cum Supplemento praemisso, id est Argumentum compositum ex Enthymemate et Supplemento ejusdem Enthymematis, ita apposito ad Antecedens Enthymematis, ut Supplementum ac Antecedens constituent duas Praemissas in Argumento isto composito. Sic v. g. sumpto hoc Enthymemate: *Petrus est homo, ergo Petrus est bos*, et sumpto Supplemento ejus, v. g. *Homo est bos*, eoque sic apposito ad Antecedens Enthymematis, ut praecedat pariter Notam Illativam (ita enim fiet Praemissa), v. g. hoc modo: *Homo est bos, Petrus est homo, ergo Petrus est bos*, habebis hoc ipso Syllogismum, ut ibi positus est. Perinde autem est an Supplementum praeficias Antecedenti Enthymematis, an postponas, modo tamen praefigas Copulae seu Notae *Ergo*; alioqui enim non esset Supplementum praemissum, ut Definitio requirit, sed Supplementum submissum; vide cap. 2.

2. Ex his patet, 1. in Syllogismo tres Propositiones reperiri,

duas nimirum, quae erant in Enthymemate, et tertiam, quae supervenit tamquam Supplementum; harum duas, nimirum Antecedens Enthymematis et Supplementum, constituere Antecedens Syllogismi; tertiam vero, nempe Conclusionem Enthymematis, etiam remanere Conclusionem in Syllogismo; insuper, duas illas Propositiones, quae constituunt Antecedens, esse Praemissas. Ac eam quae primo loco ponitur, Majorem, quae secundo loco, Minorem dicere usu receptum est (quid autem hic Ratio requirat, videre potes supra cap. 2.). Patet 2., in Syllogismo tres tantum Terminos reperiri; tres enim tantum fuerant in Enthymemate, et Supplementum non adduxit novum Terminum, cum illud adaequate componi debeat ex Termino Inferente et Termino Illato ipsius Enthymematis. Patet 3., tres illos Terminos dispergi in Syllogismo, seu nullum eorum bis occurrere in eadem Propositione; fuerunt enim dispersi in Enthymemate, et nullus eorum colligitur in Supplemento, utpote quod ex duobus distinctis Terminis concinnandum sit. Patet 4., singulos istorum Terminorum bis poni in Syllogismo. Terminus enim Communis in Enthymemate bis ponebatur, Terminus vero Inferens et Terminus Illatus singuli semel ponebantur in Enthymemate; hi vero repetuntur in Supplemento, adeoque et illi bis ponuntur in Syllogismo. Patet 5., Terminum Inferentem Enthymematis bis poni in Antecedente Syllogismi; semel enim ponebatur in Antecedenti Enthymematis, et semel adhuc ponitur in Supplemento, ergo bis ponitur in Antecedente Syllogismi, utpote quod ex Antecedente Enthymematis et Supplemento tamquam duabus suis Praemissis conflatum sit. Duo autem reliqui Termini Enthymematis, nempe Terminis Communis et Terminus Illatus, ponuntur pariter in Antecedente ac Consequente Syllogismi. Terminus enim Communis ponebatur in Antecedente pariter ac Consequente Enthymematis; jam autem Consequens Enthymematis adhuc manet Consequens in Syllogismo, et Antecedens Enthymematis ponitur



in Antecedente Syllogismi tamquam praemissa; et sic demonstratum est, Terminum Communem Enthymematis poni in Antecedente ac Consequente Syllogismi. Idem demonstratur de Termino Illato; Illatus enim ponebatur in Conclusionem Enthymematis, quae etiamnum est Conclusio Syllogismi ex Enthymemate nati, et insuper Terminus Illatus ponitur in Supplemento, quod est in Antecedente Syllogismi tamquam Praemissa.

3. Enthymema dicitur reduci ad Syllogismum, quando Supplemento praemisso adaugetur; ut hoc Enthymema: *Petrus est homo, ergo Petrus est animal*, si Supplementum ejus, v. g. *Homo est animal*, apposueris Antecedenti ejus, dicitur reduci ad hunc v. g. Syllogismum: *Petrus est homo, et homo est animal, ergo Petrus est animal*. Et quando Enthymema jam reductum est ad Syllogismum, Termini ejus acquirunt nova nomina. Et Terminus quidem Inferens jam incipit vocari *Medius* aut *Medium*; Communis vero et Illatus ambo vocantur *Extremitates*; ut in praedicto Syllogismo Medium est *Homo*, Extremitates sunt *Petrus* et *Animal*. Adeo ut Medium, dum construendus jam Syllogismus est, definiri possit: Terminus Inferens Enthymematis, quod Supplemento praemisso adaugetur; constructo autem jam Syllogismo definitur Medium: Terminus qui in Antecedente Syllogismi bis ponitur. Et similiter Extremitas, Syllogismo construendo, est Terminus Communis aut Illatus Enthymematis quod Supplemento praemisso adaugetur; Syllogismo jam constructo, est Terminus qui ponitur in Antecedente pariter ac Consequente Syllogismi.

4. Si Medium bis ponatur loco Subjecti, Syllogismus dicitur positus in tertiâ Figurâ, hoc modo: *Homo est animal, et homo est Petrus, ergo Petrus est animal*. Si vero Medium bis ponatur loco Praedicati, Syllogismus dicitur positus in secundâ Figurâ, hoc modo: *Animal est homo, et Petrus est homo, ergo Petrus est animal*. Si autem Medium semel ponatur loco Subjecti et semel loco Praedicati, Syllogismus dicitur positus in primâ

Figurâ; ut: *Homo eſt animal, Petrus eſt homo, ergo Petrus eſt animal*. Et ſi quidem primo occupet locum Subjecti, ac deinde locum Praedicati (ut contingit in Exemplo proxime allegato), Syllogiſmus dicitur poſitus in prima Figura Ordinaria; ſi vero vice verſâ fiat, et Medium primo obtineat locum Praedicati, ac deinde locum Subjecti, Syllogiſmus dicitur poſitus in primâ Figurâ Extraordinariâ, quam aliqui etiam Galenicam vocant, hoc modo: *Petrus eſt homo, et homo eſt animal, ergo Petrus eſt animal*. Ex quo patet, ſolâ tranſpoſitione Praemiſſarum Syllogiſmum mutari e Primâ Figurâ Ordinariâ in primam Figuram Extraordinariam, et contra. Sicut et e primâ Figurâ in Secundam aut Tertiam vel contra mutatur ſolâ Converſione unius vel utriuſque Praemiſſae. Non omnes Syllogiſmi quos adduxi, aut quos adducendos deſignavi, ſunt formaliter boni; ſed prae-monui, et rurſum moneo, et Titulus hujus capituli mecum monet, necdum agere me hic de Syllogiſmo famoſe dicto, qui ſit Argumentum Formale, habeatque Conſequentiam perpetuo bonam vi ſuae Formae, ſed via generationis procedentem ſpectare me Syllogiſmum rudem et informem, ex Enthymemate jamjam naſcentem, quem deinde perpoliam er formem.

5. Quid ſit Extremitas in Syllogiſmo, dixi num. 3. Illa dividitur in Majorem et Minorem Extremitatem. Major Extremitas eſt, quae in Majori Praemiſſâ ponitur, ſeu quae ante aliam Extremitatem occurrit in Syllogiſmo. Minor Extremitas eſt, quae in Minori Praemiſſâ reperitur, ſeu quae poſt aliam occurrit in Syllogiſmo. Ut in iſto Syllogiſmo: *Homo eſt animal, Petrus eſt homo, ergo Petrus eſt animal*, Major Extremitas eſt *Animal*, Minor Extremitas eſt *Petrus*. Unde, ſi in Reductione Enthymematis Supplementum Enthymematis praefigas Antecedenti Enthymematis, Terminus Illatus Enthymematis fiet Major Extremitas in Syllogiſmo nato ex iſto Enthymemate, adeoque eo caſu Terminus Communis fiet Minor Extremitas. Si vero Supplementum poſtponas Antecedenti Enthymematis, Terminus

Communis fiet Major Extremitas; ille enim est in Antecedente Enthymematis, adeoque occurret in Antecedente Syllogismi ante Terminum Illatum, utpote qui tantum comparet in Supplemento.

6. Cum vero Major Extremitas in Conclusionem Syllogismi ponitur loco Praedicati, Syllogismus dicitur Directus, qualis est Syllogismus proxime allegatus. Si vero Minor Extremitas in Consequente Syllogismi obtineat Locum Praedicati, Syllogismus dicitur Indirectus, ut iste: *Petrus est homo, et homo est animal, ergo Petrus est animal*. Unde Syllogismus e Directo in Indirectum et contra mutatur vel transpositione Praemissarum, vel Conversione Conclusionis.

## CAPUT IX.

*De Affectionibus Logicis Argumentorum.*

1. Affectiones Logicae Argumenta concernentes sunt variae. Prima Affectio est Numerus Terminorum ingredientium Argumentum; v. g. proposito hoc Argumento: *Petrus est homo, ergo Petrus non est brutum*, ad primam ejus Affectionem spectat ternarius numerus Terminorum; sunt enim in isto Enthymemate tres praecise Termini: *Petrus, Homo, Brutum*. Secunda Affectio est Acceptio Terminorum ingredientium Argumentum; sic in Proposito Argumento ad secundam Affectionem spectat Acceptio Singularis primi Termini, Acceptio Particularis secundi Termini, et Distributio tertii Termini. Tertia Affectio est Situs ac ordo Terminorum, juxta quem unus ante, alter post, unus loco Praedicati, alter loco Subjecti reponitur. Et ad tertiam Affectionem in proposito Argumento spectat is ordo, ut primo quidem, et loco Subjecti, occurrat Terminus singulariter sumptus, secundo, et loco Praedicati, Terminus particulariter sumptus, tertio, et loco etiam Praedicati, Terminus distributus. Quarta Affectio est Numerus positionum, juxta quem Termini

in Argumento semel, bis, aut saepius ponuntur; et ad hanc Affectionem in praedicto Argumento spectat bina Termini singulariter sumpti in loco Subjecti positio, singulares autem reliquorum Terminorum positiones loco Praedicati. Atque haec quatuor Puncta, quae jam recensui, constituunt Formam Terminorum in Argumento, seu Formam Terminos principaliter concernentem. Adeo ut Forma Terminorum in Argumento non sit aliud quam Complexio horum quatuor Punctorum: 1. Numerus Terminorum, 2. Acceptio eorundem, 3. Situs seu Ordo, 4. Numerus situum seu positionum.

2. Ultra has Affectiones dantur quatuor aliae, quae constituunt Formam Enunciationum ingredientium Argumentum. Quarum Prima est Numerus Enunciationum ingredientium Argumentum (sub numero etiam comprehendo speciem). Atque adeo in eodem illo Argumento ad Primam Affectionem spectat ternarius numerus Enunciationum, quarum duae sint Propositiones, et tertia sit Enunciatio Illativa ex Propositionibus illis tamquam Extremis suis conflata. Secunda Affectio est Qualitas Enunciationum ingredientium Argumentum. Atque adeo ad hanc Affectionem in praedicto Argumento spectat, ut Enunciatio Illativa sit etiam Affirmativa, una autem Propositionum sit Affirmativa et altera Negativa. Tertia Affectio est Situs seu Ordo Enunciationum ingredientium; penes quem in praedicto Argumento Propositio Affirmativa est prima, ac obtinet locum Antecedentis, secunda est Propositio Negativa, ac obtinet locum Consequentis, tertia est Enunciatio Illativa ex illis mediante Copulâ Illativâ confurgens. Quarta Affectio est Numerus Situum seu positionum ipsarum Enunciationum in Argumento; qui in praedicto Argumento singularis est; singulae enim Enunciationes praedictum Argumentum ingredientibus tantum semel ponuntur in ipso Argumento. In hoc autem: *Si sto, stare possum, sed sto, ergo stare possum*, binarius est numerus positionum in singulis Propositionibus. Haec igitur quatuor Puncta constituunt



Formam Enunciationum; Octo autem puncta, quae praecefferunt, constituunt Integram Formam Argumenti.

3. Ultra Formam Argumenti superest Nona Affectio, quae vocatur Materia Argumenti Terminos concernens. Atque non est aliud quam habitudo Termini Inferentis ad Illatum, qua se habet ad illum certo modo quoad Praedicationem; ut Materia praedicti Argumenti est habitudo qua Inferens *Homo* et Illatus *Brutum* se habent ut Repugnantia. Ex quo etiam patet, Materiam Terminos concernentem duntaxat habere locum in Enthymemate; quia in illo solum Inferens et Illatus sunt. Patet insuper, Materiam hanc esse quintuplicem: quinque enim praecise modis unus Terminus habere se potest ad alterum penes Praedicationem, ut Parte prima Sect. 2. c. 1. hujus Libelli demonstratur.

4. Decima tandem et ultima Affectio Logica Argumentorum est Materia Enunciationes concernens. De qua commodius dicam infra Sect. 3., ubi de Enthymemate Soritico. Sicut enim Materia Terminorum tantum cadit in Enthymema proprie dictum, quod distinctionis ergo vocare possumus Enthymema Categoricum, sic Materia Enunciationes concernens tantum cadit in Enthymema Soriticum, ut ibi patebit.

## C A P U T X.

### *De Argumento Uniformi et Biformi.*

1. Argumentum Uniforme est, cujus Antecedens et Consequens sunt ejusdem Qualitatis, id est, ambo sunt Affirmativa vel ambo sunt Negativa. Unde Argumentum Uniforme dividitur in Argumentum Affirmativum, cujus Extrema, Antecedens inquam et Consequens, Affirmativa sunt, ut *Sto, ergo stare possum*, et Negativum, cujus Extrema Negativa sunt, ut *Non possum stare, ergo non sto*. Ex quo patet, Argumentum non dici Affirmativum vel Negativum secundum se, sed se-

cundum sua Extrema; secundum se enim omne penitus Argumentum est affirmativum, cum omne Argumentum debeat esse Enunciatio Illativa Affirmativa, sicut jubet Definitio Argumenti, sed Affirmativum specialiter dicitur ab Extremis suis Affirmativis; sicut et simili tantum modo Negativum dicitur.

2. Argumentum Biforme est, cujus Extrema sunt diversae Qualitatis, unum scilicet Affirmativum et alterum Negativum est; ut *Sto, ergo non sedeo*. Dividiturque in Difforme et Deforme. Difforme voco, quod habet Antecedens Affirmativum et Consequens Negativum, quale est Argumentum jam proxime allegatum. Argumentum Deforme voco, quod vice versâ habet Antecedens Negativum et Consequens Affirmativum, quale est istud: *Non sto, ergo sedeo*. Quamvis hoc sit Malum Argumentum; impertinens enim est ad Argumenta Uniformia ac Biformia, sintne Bona an Mala. Quinimo inter Argumenta Logica Deforme plerumque vitiosum est defectu debitae Formae; atque ideo *Deforme* vocavi. Interim absolute potest dari Argumentum Deforme, quod sit Bonum; v. g. istud: *Corpus non est penetrabile, ergo corpus est palpabile*, quod esse bonum Argumentum, demonstrari debet in Physica, et aliquatenus colligere potes ex iis quae dicuntur Parte 1. Sect. 1. cap. 9.

3. Hae species Argumentorum satis clarae sunt, quamdiu versamur in Argumentis habentibus Extrema Simplicia; in illis enim Antecedens Affirmativum dicitur, si fuerit Enunciatio Affirmativa, et Negativum, si Negativa. Et similiter censendum de Consequente. Non perinde res se habet in Argumentis habentibus Extrema vel alterum Extremorum Complexum; Antecedens enim Complexum non penes se, sed penes suas Praemissas, Affirmativum dicitur, ita ut Antecedens Complexum non dicatur Affirmativum, nisi ambae ejus Praemissae fuerint Affirmativae; Negativum vero dicitur etiam cum una ejus Praemissa fuerit Negativa. Sic Antecedens hujus: *Petrus est animal, et Petrus non est bos, ergo quoddam animal non est bos,*

Negativum est, licet sit Affirmativum secundum se, et ut quaedam Enunciatio est. Contingit ergo Antecedens Affirmativum esse in ratione Enunciationis, et tamen Negativum esse in ratione Antecedentis. Similia etiam dici debent de Consequente Complexo.

4. Sed quid si ipsum Antecedens Complexum secundum se fuerit Negativum? Respondeo: Copulativas aut Disjunctivas Negativas non sinimus, sed reducimus ad Affirmativas juxta Reg. traditam par. 2. Igitur juxta hoc praescriptum, Antecedens, quod v. g. erit Enunciatio Copulativa Negativa, reducemus per Schema, ibid. cap. 3., ad Disjunctivam Affirmativam; atque eâ Reductione peractâ, penes Praemissas ejus aestimabimus, sitne dicendum Antecedens Affirmativum an Negativum. Similia dic de Consequente.

## CAPUT XI.

### *De Argumento Logico et Physico.*

1. Argumentum Bonum seu Necessarium dividitur in Argumentum Logicum et Argumentum Physicum. Argumentum Logicum est Argumentum ita Bonum, ut in Affectionibus Logicis illius non possit poni Impudentia; ut: *Omnis homo est animal, ergo aliquis homo est animal*. Consideratâ enim integrâ Formâ istius Argumenti, id est octo prioribus Punctis inter Affectiones Logicas (nam duo posteriora Puncta non possunt habere locum in illo, cum non sit Enthymema, nec Categoricum, nec Soriticum), impossibile deprehendes in istâ Formâ ponere Impudentiam aliquam, seu Antecedens verum Consequente falso. Licet enim haec sit Impudentia: *Omnis homo est animal, ergo aliquis lapis est animal*, tamen haec non ponitur in Formâ prioris Argumenti; deficit enim clare in primo puncto, nempe in Numero Terminorum, cum in Impudentiâ sint tres Termini, et in Argumento priori tantum duo. Item licet ista sit Im-

puſſentia: *Omnis homo eſt animal, ergo aliquis homo non eſt animal*, tamen haec Impuſſentia deficit ab Argumento primum poſito in ſexto puncto Formae, nempe in Qualitate Enunciationum; ibi enim omnes Enunciationes Argumentum ingredientes erant Affirmativae, impuſſentiam autem hanc ingreditur una Propoſitio Negativa. Et ſic quidquid agas, quoquo te veritas, in Formâ iſtius primi Argumenti non pones Impuſſentiam, non dabis Antecedens verum Conſequentem falſo.

2. Argumentum Phyſicum eſt Argumentum ita bonum, ut in ejus Affectionibus Logicis, quotquot in illo conſiderari poſſunt, ponatur Impuſſentia; ut: *Hic Triangulus eſt aequiangulus* (id eſt, habet omnes angulos ſuos aequales inter ſe), *ergo hic Triangulus eſt aequilaterus*. Hoc enim Argumentum ſine dubio Bonum eſt; ſed conſideratis in ipſo novem prioribus Affectionibus Logicis (decima enim in ipſum non cadit), in iſdem illis Affectionibus ponetur Impuſſentia. V. g.: *Hic homo eſt bipes, ergo hic homo eſt brutum*; hîc enim eſt eadem Forma quae ibi, idem numerus Terminorum, nempe ternarius, eadem Acceptio, etc.; hîc etiam eſt eadem Materia, nam Inferens et Illatus diſparati ſunt in hac Impuſſentia. Sic et diſparati ſunt in Argumento prius poſito; nam *Aequilaterum* et *Aequiangulum* diſparata ſunt, aequae ac *Brutum* et *Bipes*; concordant enim in *Quadrato*, et utrimque diſcordant in *Rhombo* ac *Figura altera parte longiori*. Poſſeſt tamen hoc Argumentum (et id fere ſemper obtinet in Argumentis Phyſicis) reduci ad Argumentum Logicum, hoc modo: *Hic Triangulus eſt Triangulus aequiangulus, ergo hic Triangulus eſt Triangulus aequilaterus*; jam enim eſt Argumentum a Convertibilibus, cum Inferens et Illatus jam convertantur.

3. Unde Argumentum Phyſicum commodius ſumi poſſet pro Argumento, in quo Affectiones Logicae non conſiderantur, etiamſi forte adſint, et juxta illas etiam bonitas ejus aeſtimari poſſet. Sic hoc poſſeſt dici Argumentum Phyſicum: *Corpus eſt*



*extensum, ergo corpus est divisibile*; etsi enim hoc sit Argumentum a Convertibilibus, tamen ista habitudo Inferentis ad Illatum non consideratur in isto Argumento, sed admittitur tamquam bonum independenter a tali consideratione; mere scilicet ex eo, quod Conclusionem in Antecedente clare deprehendamus. Sic etiam Regulae Argumentorum in Logica, quas *Maximas* vocare solent, sunt Argumenta Condicionalia, et bonitas Consequentiae aestimari in illis posset penes Affectiões Logicas; non est tamen penes eas aestimanda, cum illae tamquam directrices praecedant. Veluti: *Quod dicitur de Praedicato, dicitur etiam de Subjecto*, est Argumentum a Specie ad Genus, sic digestum: *Si quidpiam, puta A, est dictum de Praedicato, idem A erit dictum de Subjecto*; quia *Dictum de Praedicato* est Species seu Terminus Subalternatus, et *Dictum de Subjecto* est Genus seu Terminus Subalternans; omne enim Dictum de Subalternante est Dictum de Subalternato, sed non contra.

4. Ex quo patet, Argumenta Physica Priora Logicis esse; Argumenta tamen Logica, ubi Physica praecefferint, magnum gradum facere et negotium Scientificum valde promovere possunt, idque cum compendio et facilitate. Etiam si enim pluscula sint Puncta, ad quae attendendum est in Argumentis Logicis, idque Tironibus difficile videatur, tamen certo numero, nempe denario, comprehenduntur; unde usu ac exercitio facillimum redditur negotium, nam longe facilius est Memoriam (quod in Argumentis Logicis obtinet) quam Intellectu (quod in Physicis) semper uti. Hoc videas licet in Legentibus, Scribentibus et Cytharâ canentibus; etiam si enim v. g. non exiguo labore characteres hosce formare didicerimus pueri, postea tamen oscitantes aliudque saepe versantes in animo excipimus scripto quod alius dictat, de characteribus ipsis, quantum deprehendere possumus, nihil solliciti, vix quidquam cogitantes.

## CAPUT XII.

*Regulae Argumenti Logici.*

1. Prima Regula: In Argumento Logico Terminus aliquis recurrit et in Antecedente pariter ac Consequente ponitur. Est haec Proprietas omnis fere Argumenti Boni, etiam Physici, quia omne propemodum Argumentum Bonum nititur aliquo diffuso per Antecedens et Consequens. Et quidem in Argumento Topico unicus est Terminus, qui Antecedens simul ac Consequens ingreditur; in Syllogismo duo, in Conversione ac Subalternatione omnes, qui tamen ibidem tantum sunt duo. In Argumentis-in-Enunciationibus integra aliqua Enunciatio, quae fuerat in Antecedente, repetitur in Consequente, vel in se vel in suâ Contradictoriâ, adeoque etiam Terminus, imo Termini ibi recurrunt. Et quidem in Subalternatione Complexâ, in Syllogismo Disjunctivo, Hypothetico directo, Sorite, Argumento Materiali Complexo, aliqua Enunciatio secundum se recurrit in Antecedente ac Consequente; in Conversione autem Complexâ, ac Hypothetico indirecto, Enunciatio, quae secundum se posita fuerat in Antecedente, secundum suam Contradictoriam recurrit in Consequente; quae melius patebunt infra, ubi de Argumentis illis agetur.

2. Secunda Regula: Cavendum, ne Terminus aliquis, sub eodem officio recurrens in Argumento, accipiat aequivoce. Ratio est, quia ad omne Argumentum Logicum in Terminis spectat Numerus Terminorum certus et definitus, tamquam prima Affectio Logica illius; Terminus autem sub eodem officio recurrens unus esse debet; si vero accipiat aequivoce, fit duo Termini, juxta definitionem Homonymi seu Aequivoci. Neglectu hujus Regulae vitatur iste Syllogismus: *Omnis Gallus est avis, Ludovicus est Gallus, ergo Ludovicus est avis*. Plura hujus farinae vide sis Part. 1. Sect. 2. cap. 7. Etiam si haec Regula primario concernat Argumentum-in-Terminis, secundario

tamen etiam derivatur in Argumentum-in-Enunciationibus; et defectu hujus peccat iste Hypotheticus: *Si Petrus est animal, Petrus sentit; sed Petrus non sentit* (quia v. g. profunde dormit), *Ergo Petrus non est animal.*

3. Tertia Regula: *Non licet procedere a non distributo ad distributum*; id est, si Terminus, in Antecedente pariter ac Consequente positus, distribuatur in Consequente, is etiam distribui debet in Antecedente. Ratio Regulae est, quia Terminus distributus est *Omnis* aut *Nullus*, idem vero non distributus seu particulariter sumptus est *Aliquis* aut *Aliquis non*; jam vero haec bona Consequentia est: *Omnis, ergo aliquis*, item, *Nullus, ergo aliquis non*; at haec nulla Consequentia est: *Aliquis, ergo omnis*, aut, *Aliquis non, ergo nullus*. Contra hanc Regulam peccant ista Argumenta: *Omnis homo est animal, nullum brutum est homo, ergo nullum brutum est animal*; item: *Aliquod animal non est homo, ergo aliquis homo non est animal*; item: *Omnis homo est animal, ergo nullum brutum est animal*. In omnibus enim his Argumentis, quorum primum Syllogismum, secundum Conversionem, tertium Argumentum Topicum mentitur, fit processus a non distributo ad distributum ex parte Termini *Animal*; is enim Terminus in Antecedente non distribuitur, distribuitur vero in Consequente praedictorum Argumentorum.

4. Sed, dices, hoc Argumentum valet: *Aliquis homo est doctus, omnis homo est animal, ergo aliquod animal est doctum*, et tamen proceditur a non distributo ad distributum ex parte Termini *Homo*; is enim distribuitur in Minori, et ante tamen non distribuitur in Majori. Respondeo: memineris, quid in explanatione Regulae dixerim. Processus a non distributo ad distributum, quem vetat Regula, non committitur nisi in Termino diffuso per Antecedens et Consequens; in illo solo locum habet Ratio Regulae, quae subjungitur. Nota: licet non possimus procedere a non distributo ad distributum, possumus tamen

vice verſâ; unde valet: *Omnis homo eſt animal, omne rationale eſt homo, ergo aliquod animal eſt rationale*, ubi proceditur a Terminò *Rationale*, diſtributo in Antecedente, ad eundem non diſtributum in Conſequentē.

5. Quarta Regula: Argumentum Logicum non poteſt eſſe Deforme; id eſt, Non poteſt, Antecedente Negativo, concludere Conſequens Affirmativum. Unde non valet: *Petrus non eſt lapis, ergo Petrus eſt lignum*, nec hoc melius illo eſt: *Petrus non eſt brutum, ergo Petrus eſt homo*; licet enim hîc Extrema vera ſint, tamen in ejus Affectionibus Logicis habitat prior Impudentia, quae ex vero falſum concludebat. Haec Regula plene obtinet in Argumento-in-Terminis; in Argumento-in-Enunciationibus Exceptionem aliquam patitur, idque in Syllogiſmo Diſjunctivo, Hypothetico utroque, et Subalternatione Complexa. Hic enim eſt Syllogiſmus diſjunctivus: *Vel ſto, vel ſedeo; ſed non ſto, ergo ſedeo*; ubi Antecedens eſt Negativum (unâ Praemiſſâ negativâ, nempe *Non ſto*), Conſequens tamen Affirmativum eſt, nempe *Sedeo*. Idem patet in hoc Hypothetico directo: *Si non ſto, ſedeo; ſed non ſto, ergo ſedeo*, in hoc Indirecto: *Si non ſto, ſedeo; ſed non ſedeo, ergo ſto*, etc. Poſtrema haec Regula, ſicut et prima, non facile demonſtratur a priori, ſed perſpectis ſingulis Argumentis in ſpecie, colligitur a poſteriori.

## SECTIO II.

### De Argumento-in-Terminis.

Argumentum-in-Terminis eſt Argumentum, cujus Conſequentiae bonitas penes Affectiones Terminorum aeſtimatur; non quaſi penes Affectiones Enunciationum non aeſtimetur (quia ex his etiam penditur Argumentum-in-Terminis), ſed faltem quod ſecundum Affectiones Terminorum aeſtimetur. In



quo distinguitur ab Argumento-in-Enunciationibus, quod ex Terminis non metimur, nisi quatenus aliquando varietas in Affectionibus Terminorum inducit aliquam mutationem circa Affectiones Enunciationum.

## CAPUT I.

*De Argumento-Formali-in-Terminis.*

1. Argumentum-in-Terminis dividitur in Formale et Materiale. Agam primâ parte hujus Sectionis de Argumentis-Formalibus-in-Terminis. Argumentum Formale-in-Terminis est Argumentum Bonum in cujus integra Forma non ponitur Impudentia; ut: *Omnis homo est animal, Petrus est homo, ergo Petrus est animal.* Servatis enim octo punctis Formae, quae in isto Argumento reperiuntur, et aliis quibuscunque neglectis, semper habebis Argumentum Bonum, nunquam habebis Antecedens verum Consequente falso. Unde Argumentum Formale est bonum, et ita ut vi solius suae Formae sit bonum; quapropter non sufficit ad Argumentum Formale, quod bonum sit, sed debet bonitatem suam soli Formae acceptam referre. Unde hoc quidem est bonum Argumentum: *Sto, ergo stare possum,* sed non est Argumentum Formale, quia bonitatem suam non debet soli Formae; quandoquidem in integrâ ejus Formâ facile ponatur Impudentia, v. g. haec: *Sto, ergo sedeo;* est enim ejusdem penitus Formae cum praecedenti Argumento; sicut enim in isto sunt tres praecise Termini, *Ego, stans, Potens stare,* sic et in hac Impudentia praecise tres Termini sunt, *Ego, Stans, Sedens;* qualis ibi Acceptio Terminorum, talis et hîc, et sic porro per reliqua puncta Formae discurrendo, invenies eandem integram Formam in hac Impudentia, quae fuerat in Praecedenti Argumento.

2. Etiam si octo puncta debeant concurrere ad integram Formam Argumenti, quaedam tamen in his eminent, ideoque

*Cardines Formae*, aut *Cardinalia Puncta*, dici merentur. Et sunt duo, nempe *Acceptio Terminorum* et *Qualitas Enunciationum*; quorum proinde respectu reliqua sex *Puncta Secundaria* vocabuntur. Ratio hujus fortis est, quia sex illa Puncta, quae secundaria dixi, requiruntur ad Speciem Argumenti, seu ut Argumentum sit in certa Specie, puta Syllogismi, Conversionis, Enthymematis, etc.; a duobus autem Punctis, quae cardinalia vocavi, quando jam in Specie sua constitutum est Argumentum, pendet adhuc bonitas aut malitia Consequentiae. Prius autem est esse Argumentum, item esse Argumentum in hac vel illa Specie, quam bonam aut malam Consequentiam praeferre. Proinde sex illa puncta secundaria trahunt aliquid velut ex colluvione Materiae, cujus est, Formam praecedere in Composito; cum Formae sit, ultimo advenire et complere; Cardinalia autem Puncta sunt purae Formae, quia non concurrunt ad Speciem Argumenti, sed mere ad bonitatem aut malitiam Argumenti. Hinc etiam materialiter Syllogismum considerare videbamus, quamdiu illum penes puncta secundaria tantum considerabamus. Hoc igitur satagere debemus, Speciem quidem ut largiamur Argumento cuicunque penes sex puncta secundaria, quod est Argumentum illud materialiter considerare; deinde vero necessitatem Consequentiae conciliemus a duobus punctis Cardinalibus rite ei subministratis, quod est Argumentum in plena Forma constituere, seu Argumentum Formale ex illo facere.

3. Notandum circa primam Speciem Argumenti Logici, nempe Repetitionem, eam non expectare bonitatem Consequentiae a Cardinalibus punctis; sed quasi ante adventum eorum, hoc ipso, quo fortitur Speciem a Punctis Secundariis, praefertim a Numero et Situ Enunciationum, etiam fortiri necessitatem Consequentiae; ideoque esse bonum Argumentum ex Specie seu ex toto suo Genere. Caetera vero Argumenta Logica, Subalternatio, Conversio, Enthymema, Syllogismus, etc., in

ista quidem specie poni, sed bona Argumenta esse omnesque a sua Forma Impudentias depellere non possunt, antequam iis bene de Punctis Cardinalibus prospectum sit.

4. Regula Argumenti Formalis: Argumentum Formale non potest esse biforme, seu non potest habere Antecedens et Consequens diversae Qualitatis, unum nempe Affirmativum et alterum Negativum. Quamcunque enim rationem ineas cum reliquis punctis Formae; si talem feceris Qualitatem, semper Forma tui Argumenti Impudentiam intra se admittet, seu in eadem Formâ dabitur Antecedens verum Consequente falso. V. g. hoc quidem est Argumentum bonum: *Petrus est homo, ergo Petrus non est bos*; sed non Formale, nam in Formâ ejus ponitur ista Impudentia: *Petrus est homo, ergo Petrus non est animal*. Ex quo patet, hanc Regulam non coincidere cum ultimâ Regulâ Argumenti Logici assignatâ Sect. praeced. cap. ult. Illa enim Deforme Argumentum proscribit; haec vero tam Difforme quam Deforme. Argumentum enim Difforme potest esse bonum Argumentum Logicum (adeoque per Regulas istius Argumenti proscribendum non erat), sed nunquam potest esse Argumentum Formale.

## C A P U T II.

### *Quintum Quadratum Logicum.*

1. Prima Axioma: Quod dicitur de certo Termino distributo, dicitur de eodem Termino particulariter sumpto. Ratio hujus Axiomatis est admodum manifesta; nempe Terminus distributus est *Omnis*, Terminus autem particulariter sumptus est *Aliquis*; jam autem necessaria et clarissima Sequela: *Omnis, ergo Aliquis*; quando scilicet eisdem haec tangunt, ut Axioma requirit. Poterat hoc Axioma etiam sic efferri: Quod dicitur de Subjecto, dicitur de eodem Subjecto particulariter sumpto. Modo scilicet ponatur Subjectum capax Acceptionis Particularis; quod enim simpliciter

dicatur de Subjecto Communi, seu capaci Acceptationis communis, hoc de illo Subjecto distributo dici censetur.

2. Secundum Axioma: Quod negatur de Termino distributo, negatur de eodem Termino particulariter sumpto. Est hoc Axioma Soritice-Conversum prioris, hoc modo: *Si quid dicatur de Termino distributo, id etiam dicitur de Termino particulariter sumpto; ergo si non dicatur de Termino particulariter sumpto, non dicetur etiam de Termino distributo*; quia non dici de Termino particulariter sumpto idem est ac negari de Termino distributo, et non dici de Termino distributo idem est ac negari de Termino particulariter sumpto (dummodo scilicet inter Terminos Communes versetur, quod clare prae se fert Antecedens hujus Conversionis), sicut paulo post demonstrabo.

3. Antequam tertium Axioma prodeat, via munienda est quibusdam Theorematis. Primum Theorema: Terminus, qui de alio Termino particulariter sumpto dicitur, concordat cum alio illo Termino. Demonstr. Sint Termini A, B, atque B dicatur de A particulariter sumpto. Dico, quod B concordet cum A. Si enim B non concordet cum A, ergo nec A concordat cum B (Concordia enim est mutua, nec potest unus Terminus cum alio concordare, nisi alius vicissim concordet cum priori, *Parte 1. Sect. 2. cap. 1. n. 2.*). Ergo A, B sunt Termini Repugnantes, et nihil est quod utriusque eorum sit Subjectum. Igitur pro quocunque suo Subjecto capiatur A, non poterit B affirmari de A (B enim non potest affirmari nisi de suo subjecto, *per definit. Subjecti*). Igitur non poterit B affirmari de A particulariter sumpto (quia, dum A particulariter sumitur, pro Subjecto suo sumitur, *per definit. Accept. particul.*), quod est contra suppositionem; supponebatur enim quod B affirmaretur de A particulariter sumpto.

4. Si convertamus hoc Theorema Soritice, consequemur et alterum: Terminus qui non concordat cum alio aliquo Termino, non affirmatur de illo particulariter sumpto. Ex quo sequitur



quod Termini Repugnantes non possint se habere ut Subjectum et Praedicatum; non tantum simpliciter, quod satis demonstratum est Parte 1. Sect. 2. cap. 2. n. 2., sed ne quidem in Affirmatione Particulari, in qua Subjecto expresse vel implicate aliquid additur.

5. Tertium Theorema: Terminus qui concordat cum alio Termino, aut dicitur de illo, aut saltem dicitur de illo particulariter sumpto (oportet autem Adjectivum et Adjectivum Substantivatum pro iisdem habere). Demonstr. Sint Termini A, B, et B concordet cum A. Dico, quod aut B dicatur de A, aut B dicatur de A particulariter sumpto. Quia enim B concordat cum A, necessum est, idem aliquod utriusque Subjectum esse (*per defin. concord.*), v. g. C. Igitur vel A discordat insuper a B vel non. Si non discordat, ergo vel A Subalternatur ipsi B vel A Convertitur cum B, adeoque B affirmabitur de A (*Parte 1. Sect. 2. cap. 2. n. 9.*). Si autem A discordat a B, dicamus igitur quod discordet in D; verum igitur erit: *Vel C est B vel D est B*, (C enim est B, cum C supponatur esse Subjectum ipsius B); igitur cum A sumetur pro C, D sic enumerandis, vera erit Affirmatio, in qua B dicitur de A, id est (*per defin. Accept particul.*), B affirmabitur de A particulariter sumpto. Quod erat demonstrandum.

6. Si convertamus Tertium Theorema, exsurget hoc: Terminus qui nec dicitur, nec particulariter dicitur de alio Termino, non concordat cum alio Termino, id est, repugnat cum illo.

7. Prodeat jam Tertium Axioma hujus Quadrati: Si inter Terminos Communes unus dicatur de altero particulariter sumpto, alter vicissim dicetur de priori particulariter sumpto. Demonstr. Sint Termini Communes A, B, atque B dicatur de A particulariter sumpto. Dico, quod vicissim A dicatur de B particulariter sumpto. Quoniam enim B dicitur de A particulariter sumpto, necessum est ut B concordet cum A (*juxta*

*primum Theorema hoc cap.*); ergo etiam A concordat cum B (Concordia enim eſt mutua; *Parte 1. Sect. 2 cap. 1. n. 2.*); ergo A dicitur, aut particulariter dicitur de B (*per tertium Theor. hoc cap.*). Sed ſi A dicatur de B (cum B ex ſuppoſito ſit Terminus Communis), etiam A dicetur de B particulariter ſumpto (*per primum Axioma hujus Quadrati*). Igitur ſimpliciter loquendo, A dicetur de B particulariter ſumpto. Quod erat demonſtrandum.

8. Nota, quodſi Terminus affirmetur de Termino particulariter ſumpto, adhuc tamen non eſſe neceſſarium, ut hic viciffim affirmetur de illo particulariter ſumpto, niſi ambo Termini Communes et communius ſumpti ſupponantur. Quod et ſupponendum eſt ut Propositiones uſitatas nanciſcamur, quas equidem ſolas ſupponimus; inuſitatas enim a conſideratione noſtra ſecluſimus *Part. 2. Sect. 1. cap. 9.* Igitur etſi *Petrus* in Propositione Inuſitata dicatur de *Homine* particulariter ſumpto, non ſequitur quod *Homo* viciffim dicatur de *Petro* particulariter ſumpto, utpote qui ſit incapax Acceptionis Particularis. Similiter *Navis* in Propositione Inuſitata dicitur de *Neceſſario-ad-navigandum* particulariter ſumpto; ſed tamen non contra; quia *Navis* ibi eſt incapax Acceptionis Particularis; et cum alibi particulariter capitur, non eſt idem Terminus, ut videre poteſ *Parte 1. Sect. 2. cap. 7. n. 7.*

9. Quartum Axioma: Si inter Terminos Communes unus negetur de altero diſtributo, viciffim negabitur de priori diſtributo. Eſt hoc Soritice Converſum tertii Axiomatis, hoc modo: *Si A dicitur de B particulariter ſumpto, etiam B dicitur de A particulariter ſumpto; ergo ſi B non dicatur de A particulariter ſumpto, nec A dicetur de B particulariter ſumpto;* quia non dici de Termino particulariter ſumpto idem eſt ac negari de Termino diſtributo (quando ſcilicet verſamur inter Terminos Communes, Communius ſumptos, quod Axioma ſupponit); quod quibuſdam interjectis demonſtrabimus.

10. Sit igitur Quintum in hoc cap. Theorema: Si Terminus affirmetur de Termino, non negabitur de illo. Demonst. Sint Termini A, B, et B affirmetur de A. Dico, quod B non negetur de A. Quia enim B affirmatur de A (ex supposito), hinc A est B. Si jam etiam B negetur de A, igitur A non est B; quod est impossibile, cum impossibile sit idem simul esse et non esse.

11. Convertamus Soritice, et consequemur Sextum Axioma: Si Terminus negetur de Termino, non affirmabitur de illo. Quod hoc ipso satis demonstratum est, quo per Conversionem sequitur ex priori.

12. Septimum Theorema: Si Terminus non affirmetur de Termino, negabitur de illo (oportet autem Adjectivum et Adjectivum Substantivatum pro iisdem habere). Demonst. Sint Termini A, B, atque B non affirmetur de A. Dico, quod B negetur de A. Cum enim B non affirmetur de A, igitur A non est B; hoc autem est, B negari de A; quod erat demonstrandum.

13. Octavum Theorema habemus ex Septimo per Conversionem, nempe: Si Terminus non negetur de Termino, affirmabitur de illo.

14. Ex his patet, quod inter Terminos versanti idem sit dicere *Non affirmatur* et *Negatur*; item etiam idem sit dicere *Non negatur* et *Affirmatur*. Demonstratum enim jam est, illa convertibilia esse seu se mutuo inferre. Ex quo etiam hoc patet, quod in Primo Quadrato Logico, *Parte I. Sect. I. cap. 3.*, Axiomata negativa possint sic efferri: Secundum quidem, quod habetur *loco citato*, num. 3.: Quod negatur de Subjecto, negatur de Praedicato; Quartum autem, quod habetur n. 5.: De quo negatur Praedicatum, de eo negatur et Subjectum.

15. Nonum Theorema: Quod non dicitur de Termino distributo, negatur de eodem Termino particulariter sumpto (oportet autem Terminos Communes intelligere). Demonst.

Quia Terminus distributus est *Omnis*; si ergo quidpiam non dicatur de *Omni*, ergo de Aliquo non dicetur (*Parte 2. Sect. 2. cap. 3. n. 5.*), ergo de Aliquo negabitur; de quo enim non dicitur, de eo negatur (*per 7. Theor. hoc cap.*). Si negetur de Aliquo, ergo negatur de Termino particulariter sumpto; Terminus enim particulariter sumptus non est aliud quam *Aliquis*.

16. Decimum: Quod non negatur de Termino particulariter sumpto, hoc dicitur de ipso distributo. Est Soritice conversum praecedentis; ideoque hîc etiam supponendi sunt Termini Communes, de quibus agat Axioma.

17. Undecimum Theorema: Quod non dicitur de Termino particulariter sumpto, negatur de eodem distributo. Si enim non dicatur de particulariter sumpto, non dicitur de *Aliquo*, id est (*per Schema Reductionum Part. 2. Sect. 2. cap. 3. n. 4.*), de Nullo dicitur; id rursum est (*per Theor. 7. hoc cap.*), de *Omni* negatur; id denique est, de Termino distributo negatur.

18. Duodecimum: Quod non negatur de Termino distributo, id dicitur de illo particulariter sumpto.

19. Decimum tertium: Quod negatur de Termino particulariter sumpto, non dicitur de ipso distributo. Est hoc inversum noni Theorematis. Et Demonstr. Terminus particulariter sumptus est *Aliquis*, (ibi enim est Character et velut Definitio Termini particulariter sumpti); si igitur quidpiam negetur de Aliquo, ergo de Aliquo non dicetur (de quo enim negatur, de eo non dicitur, *per Theor. 6. hoc cap.*). Si de Aliquo non dicatur, ergo (*per Schema Reductionum*) non dicitur de *Omni*; ergo non dicitur de Termino distributo. Quod erat demonstrandum.

20. Praecedens Theorema Soritice-Conversum exhibet hoc: Quod dicitur de Termino distributo, non negatur de eo particulariter sumpto. Quod est Inversum Decimi Theorematis.

21. Decimum Quintum: Quod negatur de Termino distributo, non dicitur de eo particulariter sumpto. Est hoc Inversum Undecimi. Et Demonstr. Quod negatur de Termino distributo,



negatur de *Omni*, ergo de *Nullo* dicitur; ergo non dicitur de *Aliquo*, seu non dicitur de ipso particulariter sumpto. Quod erat demonstrandum.

22. Theorema istud Soritice-Conversum praestat hoc in ordine Decimum sextum: Quod dicitur de *Termino* particulariter sumpto, non negatur de ipso distributo.

23. Ex his patet, quod inter *Terminos Communes* versanti idem sit *Non dici de distributo* et *Negari de particulariter sumpto* (hoc praesertim patet ex Theor. 9 et 13.), item *Non dici de particulariter sumpto* et *Negari de distributo* (hoc praesertim patet ex Theor. 11. et 15., ibi enim ostenduntur ista esse Convertibilia). Atque adeo ex his jam patet etiam, quomodo Axiomata Negativa in Secundo Quadrato itemque in hoc Quinto Quadrato legitime cohaereant cum Affirmativis per Conversiones Soriticas.

### CAPUT III.

#### *De Subalternatione Formali.*

1. Si Subalternationem tantum penes sex puncta secundaria Formae instruere voluerimus, vix Speciem aliquam ei dare poterimus; nam *Quantitas Propositionum*, unde maxime Speciem suam sumit, spectat ad puncta cardinalia Formae, quippe quae non sit aliud quam *Acceptio certa Subjecti*. Omiffa igitur ambage definitur Subalternatio: Argumentum cum duabus Propositionibus sola *Quantitate distinctis*, *Universali praecedente* et *Particulari sequente*.

2. Subalternatio dividitur in *Affirmativam* et *Negativam*. *Affirmativa* est v. g. ista: *Omnis homo est animal, ergo aliquis homo est animal*. Fundamentum Subalternationis Affirmativae est *Primum Axioma Quinti Quadr.* *Negativa Subalternatio* est v. g. ista: *Nullus homo est animal, ergo aliquis homo non est animal*. Fundamentum ejus est 2. Axio. 5. Quadr. Unde Sub-

alternatio Affirmativa et Negativa ſibi mutuo reſpondent per Converſionem Soriticam, hoc modo: *Si omnis eſt etc., aliquis eſt etc.; ergo ſi non aliquis, id eſt, nullus eſt etc., non omnis, id eſt, aliquis non eſt etc.*

3. Subalternatio biformis non poteſt dari; non Deformis, quae nempe ex Antecedente negativo concluderet Conſequens Affirmativum, quia illa proſcribitur per 15. Theorem. praeced. cap.; non Difformis, quae vice verſâ ex Antecedente Affirmativo concluderet negative, quia illa proſcribitur per 14. Theor. praeced. cap.

## C A P U T I V.

### *De Converſione Formali.*

1. Converſioni facile damus Speciem ex ſex punctis ſecundariis, et dedimus praeced. Sect. cap. 6. A punctis cardinalibus aſſeritur ei bonitas Conſequentiae, hoc pacto ſubminiſtratis, ut Qualitas quidem in ea talis ſit, juxta quam Antecedens et Conſequens ambo ſint Affirmativa, vel ambo Negativa; Acceptio autem Terminorum talis, quae excludat proceſſum a non diſtributo ad diſtributum. Sic enim parata Converſio non poteſt unquam Antecedente vero falſum Conſequens concludere. Igitur Converſio Formalis definitur: Converſio uniformis ſine proceſſu a non diſtributo ad diſtributum; ut *Aliquod brutum eſt bipes, ergo aliquod bipes eſt brutum.*

2. Converſio igitur non poteſt eſſe Biformis. Imprimis non Deformis, quia admitteret in ſua Forma Impudentiam circa Terminos Repugnantes; hi enim de ſe mutuo negantur tum univerſaliter tum particulariter; et tamen neuter affirmatur de altero, ne quidem particulariter. Unde non valet iſta Converſio: *Aliquod brutum non eſt bipes, aliquod bipes eſt brutum;* etiamſi enim iſta non ſit Impudentia, tamen in integra ejus forma facile ponitur Impudentia, v. g. *Aliquod brutum non eſt*

*homo, ergo aliquis homo est brutum.* Similiter Conversio non potest esse Difformis; admitteret enim Impudentiam in sua Forma circa Terminos Convertibiles, qui quidem de se invicem affirmari possunt universaliter et particulariter, neuter vero negari potest de altero. Unde non valet ista Conversio: *Aliquod brutum est bipes, ergo aliquod bipes non est brutum*, habet enim in sua Forma contubernalem Impudentiam: *Aliquod sentiens est animal, ergo aliquod animal non sentit.* Quare autem Conversio non possit procedere a non distr. ad distr., satis ante monstratum est circa Regulas Argumentorum Logicorum.

3. Conversio dividitur in Puram (quam Simplicem vocare solent) et Praegnantem (quam vocare solent Conversionem-per-accidens). Conversio Praegnans est, cui Subalternatio intruditur; estque vel Affirmativa vel Negativa. Affirmativa est v. g. ista: *Omnis homo est animal, ergo aliquod animal est homo*, quae sic resolvitur: *Omnis homo est animal, ergo aliquis homo est animal* (ubi Subalternatio), et: *Aliquis homo est animal, ergo aliquod animal est homo* (ubi pura Conversio). Praegnans Negativa est v. g. ista Conversio: *Nullus homo est bos, ergo aliquis bos non est homo*, quae sic resolvitur: *Nullus homo est bos, ergo nullus bos est homo* (ubi pura Conversio), et *Nullus bos est homo, ergo aliquis bos non est homo* (ubi Subalternatio). Ex quo vides, in resolutione Conversionis Praegnantis Negativae primo ponendam esse Conversionem Puram, ac deinde Subalternationem; cum in resolutione Conversionis Praegnantis Affirmativae vice versâ procedendum sit, ac primo producenda Subalternatio, deinde vero Conversio Pura.

4. Pura Conversio est, cui Subalternatio non intruditur; estque etiam Affirmativa vel Negativa. Affirmativa est v. g. ista: *Aliquod brutum est bipes, ergo aliquod bipes est brutum.* Fundamentum ejus est Tertium Axiom. 5. Quadr. Negativa est v. g. ista: *Nullum brutum est homo, ergo nullus homo est brutum.* Fundamentum ejus est 4. Axio. 5. Quadr. Ex quo

etiam colligitur, Converſiones Affirmativas per Converſionem Soriticam reſpondere Negativis, et contra; v. g. hoc modo: *Si nullus homo eſt brutum, nullum brutum eſt homo, ergo ſi aliquod brutum eſt homo, aliquis homo eſt brutum.* Idem obtinet in Converſionibus Praegnantibus; ſed eas ſecundum ſe curare non debemus, niſi ut reſolvamus, juxta Reg. traditam praeced. Sect. cap. 6. n. 8.

5. Converſio Pura habet duas Propositiones Particulares Affirmativas, aut duas Universales Negativas. Converſio Praegnans habet eam quae loco Antecedentis eſt, Universalem, quae loco Conſequentis, Particularem, ſive ambae ſint Affirmativae, ſive ambae Negativae (non licet autem unam Propositionem Affirmativam et alteram Negativam capere, ut patet ex dictis n. 2.). Caeterae omnes Converſiones ſunt extra Argumenta Formalia et continent proceſſum a non diſtrib. ad diſtrib. Si enim ſumpſeris duas Universales Affirmantes, procedetur a non diſtrib. ad diſtrib., a Praedicato Antecedentis ad Subjectum Conſequentis, hoc modo: *Homo eſt animal, ergo animal eſt homo.* Si ſumpſeris duas Particulares Negantes, procedetur a non diſtrib. ad diſtrib., a Subjecto Antecedentis ad Praedicatum Conſequentis, v. g. hoc modo: *Animal non eſt homo, ergo homo non eſt animal.* Si vero ſumpſeris Antecedens Particulare et Conſequens Universale, fiet idem proceſſus, in Affirmativis quidem a Praedicato ad Subjectum, in Negativis a Subjecto ad Praedicatum.

6. Regula Converſionis: Integra Extrema Antecedentis tranſponenda ſunt in Conſequente. Unde non valet iſta Converſio: *Mus rodit caſeum, ergo caſeus rodit murem,* quia non integrum Praedicatum Antecedentis ponitur loco Subjecti in Conſequente, ſed tantum pars iſtius Praedicati, *Caſeus* enim non eſt integrum Praedicatum Antecedentis, ſed *Rodens caſeum*; proinde ſic reſtituitur praedicta Converſio: *Mus rodit caſeum, ergo aliquod rodens caſeum eſt mus.* Eodem vitio laborat iſta Converſio:



*Senex fuit puer, ergo quidam puer fuit senex*; ibi enim *Puer* non est integrum Praedicatum Antecedentis, sed (Logicâ licentiâ) *Fuens puer*, quod Latine redditur *Is qui fuit puer*; et praedicta Conversio sic reponenda est: *Senex est fuens puer, ergo aliquod fuens puer est senex*, hoc enim et recte sequitur et verum est; barbarum illum sermonem, si aures tuae non ferant, in hunc transferas licet: *Senex est is qui fuit puer, ergo quidam qui fuit puer, est senex*. Hinc jam etiam facile in hac Conversione et vitium deprehendes et tolles: *Quaedam virgo erit meretrix, ergo quaedam meretrix erit virgo*; potes hanc non invitâ Latinitate castigare hoc modo: *Quaedam virgo est futura meretrix, ergo quaedam futura meretrix est virgo*, hoc enim rursus et verum est, et bene sequitur.

## CAPUT V.

*De Syllogismo Formali.*

1. Speciem Syllogismo largiuntur Puncta Secundaria Formae, et ex iis etiam praeced. Sect. cap. 8. Speciem ei fecimus. Sed tantum *in fieri*, ut loquuntur, eum contemplavimus; nunc *in facto esse* considerandus est. Nempe Enthymema sumpsimus, Supplementum confecimus, hoc Enthymemati praemisimus, et vel Antecedenti praefiximus, vel inter Antecedens et Consequentiam interjecimus. Quid ex operatione istâ consequeremur, sigillatim et diffuse vidimus. Cogenda jam ista, et Definitionis alicujus limitibus includenda compages. Nimirum Syllogismus est Argumentum cum tribus Terminis bis positus in Argumento, et dispersis per Antecedens Argumenti. Atque ibi est Definitio Syllogismi non construendi jam, sed constructi, seu Syllogismi *in facto esse*, ut loquuntur. Cape Enthymema cum Supplemento praemisso; videbis tale Argumentum te habere, quale hîc describitur. Cape Argumentum quale hîc describitur; videbis

non aliud habere te, quam Enthymema cum Supplemento praemisso. Nempe tres Termini, iique bis positi, tres Propositiones important. Tres item illi Termini per Antecedens dispersi, duas in Antecedente Propositiones faciunt; unum Terminum bis in Antecedente poni, caeteros tantum semel, et (cum bis ponantur in toto Argumento) in Consequente recurrere necessum; hi sunt Extremitates, et ille Medium.

2. Hoc igitur est Syllogismus secundum Speciem suam consideratus; hoc secundariis illis Punctis debet. Exquirat jam a Cardinalibus Punctis Formae, quod ad Consequentiam irrefragabilem et necessariam sufficiat. A primo puncto, nempe ab Acceptione Terminorum, has leges feret: Medium in altera Praemissarum distribuat; et, Ne procedat a non distrib. ad distrib. A qualitate Enunciationum duas itidem leges accipiet: primo, Syllogismus sit Uniformis; secundo, ne sit ex puris Negativis. His si morem ille gesserit, secura res et necessaria Consequentia parta est.

3. Quatuor igitur dumtaxat sunt Regulae Syllogismorum; quarum Prima sit: Ne tres Propositiones, ex quibus constat Syllogismus, omnes sint Negativae. Unde non valet iste Syllogismus: *Nullus homo est lapis, nullus homo est marmor, ergo nullum marmor est lapis*; non valet, inquam, in ratione Syllogismi Formalis, alias valet ut Syllogismus materialiter consideratus; sed per Syllogismum solemus intelligere Syllogismum Formalem, ut ante adhuc monui.

4. Secunda Regula: Ut Syllogismus sit Argumentum Uniforme; id est, ne Antecedens et Consequens sint diversae Qualitatis, nempe unum Affirmativum et alterum Negativum. Cum autem Antecedens in Syllogismo sit Complexum, hinc ut Antecedens ejus sit Negativum, sufficit unam ejus Praemissam esse Negativam; Affirmativum vero non censetur, nisi utraque ejus Praemissa sit Affirmans. Conclusio autem in Syllogismo est Simplex, ideoque penes ipsam et non penes partes

ejus aestimanda est ejus Qualitas; vide Sect. praeced. cap. 10 n. 3. Contra hanc Regulam peccat iste Syllogismus: *Homo est animal, Petrus est homo, ergo Petrus non est animal*; habet enim Antecedens Affirmativum et Consequens Negativum. Contra eandem Regulam peccat iste: *Petrus est homo, et Petrus non est bos, ergo aliquis bos est homo*, habet enim vice versâ Antecedens Negativum et Consequens Affirmativum.

5. Ex duabus hîsce Regulis sequitur, in quolibet Syllogismo debere esse unam Praemissam Affirmativam; si enim ambae Praemissae fuerint Negativae, vel insuper Conclusio erit Negativa, et sic peccabitur contra Primam Regulam; vel Conclusio non erit Negativa, sed Affirmativa, adeoque peccabitur contra Secundam Regulam, quia Antecedente Negativo Consequens erit Affirmativum.

6. Tertia Regula est, ut Medium in altera Praemissarum distribuatur. Unde non valet: *Homo est animal, brutum est animal, ergo brutum est homo*, nec etiam sic: *Aliquod animal est homo, aliquod animal est brutum, ergo aliquod brutum est homo*, quia Medium, *Animal*, in neutra Praemissarum distribuitur, sed in utraque particulariter capitur. Sufficit interim si Medium bis singulariter capiatur; unde iste Syllogismus est bonus: *Petrus est homo, Petrus est animal, ergo aliquod animal est homo*; haec enim Acceptio aequivalet Distributioni, quia *Unus*, ubi tantum unus est, perinde est ac *Omnis*. Imo sufficiet si Medium bis quasi-universaliter, aut bis quasi-particulariter capiatur, modo pro iisdem capiatur; sed hae Acceptiones sunt rae. Non licet autem Medium modo unâ, modo aliâ ex his Acceptionibus accipere, quia committeretur Homonymia et multiplicatio Termini, et sic Syllogismus e Specie sua detruderetur; vide Parte 1. Sect. 2. cap. 7. n. 7.

7. Quarta Regula: Ne in Syllogismo procedatur a non Distributo ad Distributum. Unde non valet iste: *Homo est animal, brutum non est homo, ergo brutum non est animal*; pro-

ceditur enim a non distrib. ad distrib. ex parte Termini *Animal*. Atque hae sunt omnes Regulae Syllogismorum. Igitur apage ingentem illam et confusam Regularum Generalium, Specialium adhuc indies crescentium farraginem. Syllogismus positus in Specie sua (id est, Enthymema cum Supplemento praemisso) si contra nullam ex his quatuor Regulis peccet, erit Syllogismus Formalis, erit Syllogismus proprie dictus, in cujus Forma impossibile sit Impudentiam aliquam ponere. Si vero Syllogismus in Specie sua positus (id est Enthymema cum Supplemento praemisso) aliquam ex his quatuor Regulis violaverit, non erit jam proprie Syllogismus, nec famose isto nomine veniet, sed *Paralogismus* vocabitur. Adeo ut Paralogismus non sit aliud quam Enthymema cum Supplemento praemisso, peccans contra unam ex quatuor recensitis Regulis; qui licet ipse subinde non sit Impudens, in Forma tamen ejus semper poni potest Impudentia, hoc ipso, quo unam aliquam ex istis Regulis transgreditur. Velut hîc: *Homo non est lapis, et homo non est lignum, ergo lignum non est lapis*, non est quidem Impudentia, sed cum peccet contra Primam Regulam, Paralogismus est, et in Forma ejus ponitur ista Impudentia: *Homo non est lapis, et homo non est flex, ergo flex non est lapis*. Similiter hîc non est Impudentia: *Petrus est homo, Petrus est animal, ergo aliquod animal non est homo*, Paralogismus tamen est, quia peccat contra Secundam Regulam, et in Forma ejus habitat ista Impudentia: *Petrus est animal, et Petrus est homo, ergo aliquis homo non est animal*. Rursum ista non est Impudentia: *Brutum est animal, bos est animal, ergo bos est brutum*; sed haec Impudentia in eadem Forma ponitur: *Bos est animal, mus est animal, ergo mus est bos*, etc. Considera octo Puncta Formae de quibus dixi praeced. Sect. cap. 9.; videbis has Impudentias cum Paralogismis, quibus subjunguntur, ad amissim convenire in Forma.

8. Restare videtur, ut quatuor illas Regulas, quibus Formam



Syllogisticam circumscripsi, demonstrem. Quod antequam aggreddiar, Scopum, quem sibi Syllogismus Formalis praestituit, contemplabor. Hoc agit: sumptis duobus Terminis, habentibus se ut Subjectum et Praedicatum, tertium aliquem Terminum corripit; atque ex eo, quod hic certo modo penes Affirmationem aut Negationem se habeat cum uno, concludit, etiam certo modo penes Affirmationem aut Negationem se habere cum altero. Adeo ut, si ordinem Naturae spectes (is autem ordo subinde quoad verba nonnihil interturbatur), Syllogismus primo (1.) Affirmationem aliquam exhibeat (v. g. hanc: *Homo est animal*); secundo affirmat aliquid (v. g. *Sentiens*) de Praedicato istius Affirmationis, et tertio concludit, idem (v. g. *Sentiens*) affirmari de Subjecto primae Affirmationis, hoc modo: *Homo est animal, et animal sentit, ergo homo sentit*, quae operatio procedit juxta 1. Axiom. 1. Quadr.

(2.) Aut secundo loco negat aliquid de Subjecto, et tertio loco concludit, idem negari de Praedicato; v. g. hoc modo: *Homo est animal, et homo non est brutum, ergo animal non est brutum*, quae operatio procedit juxta 2. Axiom. 1. Quadr.

(3.) Aut secundo loco Subjectum affirmat de aliquo, et tertio loco concludit, Praedicatum affirmari de eodem, hoc modo: *Homo est animal, Petrus est homo, ergo Petrus est animal*, quae operatio procedit juxta 3. Axiom. 1. Quadr.

(4.) Aut secundo loco negat Praedicatum de aliquo, et tertio loco concludit, Subjectum etiam negari de illo, hoc modo: *Homo est animal, et lapis non est animal, ergo lapis non est homo*, quae operatio procedit juxta 4. Axiom. 1. Quadr.

(5.) Aut secundo loco affirmat aliquid de Subjecto, et tertio loco concludit, idem dici de Praedicato particulariter sumpto, hoc modo: *Homo est animal, et homo est rationalis, ergo aliquod animal est rationale*, quae operatio procedit juxta 1. Axiom. 2. Quadr.

(6.) Aut secundo loco negat aliquid de Praedicato distributo,

et tertio loco concludit, idem negari de Subjecto, hoc modo: *Homo est animal, et nullum animal est lapis, ergo homo non est lapis*, quae operatio procedit juxta 2. Axiom. 2. Quadr.

(7.) Aut secundo loco dicit aliquid de Subjecto particulariter sumpto, et tertio loco concludit, idem dici de Praedicato particulariter sumpto, hoc modo: *Homo est animal, et aliquis homo est doctus, ergo aliquod animal est doctum*, quae operatio procedit juxta 8. Axiom. 2. Quadr.

(8.) Aut secundo loco negat aliquid de Praedicato distributo, et tertio loco concludit, idem negari de Subjecto distrib., hoc modo: *Homo est animal, et nullum animal est lapis, ergo nullus homo est lapis*, quae operatio procedit juxta 4. Axiom. 2. Quadr. Atque hi sunt Modi Primarii, praeter quos dantur adhuc duo Modi Secundarii, quorum operatio procedit juxta Axioma Appendicis ad 2. Quadr.; et in his primo loco non ponitur Affirmatio Universalis seu talis Affirmatio, in quae Praedicatum simpliciter dicatur de Subjecto (sicut fit in Modis Primariis), aut Affirmatio Particularis, in qua Subjecto expresse vel implicite praefigatur Nota *Aliquis*. Qua Affirmatione admiffa, necessum est concedere, ejus Extrema Concordare, juxta Demonstrationem exhibitam hac Sect. cap. 2. n. 3. Igitur

(9.) Aut primo loco ponitur Affirmatio Particularis et secundo loco affirmatur aliquid de uno Extremorum, ac tertio loco concluditur, idem affirmari de altero Extremorum particulariter sumpto, hoc modo: *Aliquod brutum est bipes, et brutum est irrationale, ergo aliquod bipes est irrationale*, aut: *Aliquod brutum est bipes, et bipes ambulare potest, ergo aliquod brutum ambulare potest*, quae operationes procedunt juxta 1. Axioma Appendicis;

(10.) Aut primo loco ponitur Affirmatio Particularis et secundo loco negatur aliquid de uno Extremorum distributo, et tertio loco concluditur, idem negari de altero Extremorum particulariter sumpto, hoc modo: *Aliquod brutum est bipes, et*

*nullum brutum est rationale, ergo aliquod bipes non est rationale, aut: Aliquod brutum est bipes, nullum bipes est quadrupes, ergo aliquod brutum non est quadrupes*, quae operationes procedunt juxta 2. Axioma Appendicis. Hos esse omnes Modos, ac praeter hos nullos alios suppetere, manifestum fiet ei, qui sumptâ Affirmatione aliquâ, alias inter Extrema ejus ac tertium aliquem Terminum comparationes instituere aggressus fuerit; deprehendet enim aliam quamcunque operationem, ut malâ Maximâ nitentem, non subsistere, quod et hîc demonstrare poteram, si nimia prolixitas non obstitisset.

9. Ex hoc Scopo Syllogismi clare patet, in Syllogismo unam Praemissam Affirmativam esse debere (atque ita Prima Regula, quam adduxeram, demonstrata est); hanc Praemissam ordine Naturae Primam esse in Syllogismo, adeoque peccare Logicos in suis istis Modis *Barbara, Celarent, etc.*, in quibus eam saepe designant postponendam. Patet 2., Secundam Praemissam in Syllogismo, et Consequens, ejusdem Qualitatis esse debere (atque ita Secunda Regula demonstrata est); si enim duas illas Propositiones diversae Qualitatis feceris, videbis operationem tuam malâ Maximâ niti. V.g. si secundam Praemissam Affirmativam feceris Conclusionem Negativâ, procedet operatio juxta hanc Maximam: *Quod affirmatur de Praedicato, negatur de Subjecto*, aut: *Quod affirmatur de Subjecto, negatur de Praedicato, etc.*, quas omnes valde facile deprehendes esse malas et falsas. Similes malas Maximas incurres si secundam Praemissam Negativam et Conclusionem Affirmativam feceris; cum igitur Secunda Praemissa non possit in Qualitate dissentire a Conclusionem, sequitur, Syllogismum uniformem esse debere. Prima enim Praemissa semper affirmat, igitur vel Secunda etiam affirmat, vel non; si prius, etiam conclusio affirmabit, adeoque Syllogismus erit Uniformis, Antecedente pariter ac Consequente Affirmativis. Si posterius, etiam Conclusio erit Negans, adeoque Syllogismus iterum Uniformis ex Antecedente et Consequente

pariter Negativis. Patet 3., Terminum, qui ex Affirmatione primâ repetitur in Praemiſſâ ſecundâ Syllogiſmi, diſtribui in alterâ Praemiſſarum (atque ita demonſtrata eſt tertia Regula). In primo Modo, Praedicatum primae Praemiſſae repetitur in ſecunda Praemiſſâ, et ibidem diſtribuitur; in ſecundo Modo, Subjectum primae Praemiſſae repetitur in ſecundâ Praemiſſâ, et diſtribuitur in primâ Praemiſſâ. Et ſic porro examinandi tibi ſunt reliqui Modi. Tandem, non licere procedere a non diſtrib. ad diſtrib., per ſe notum eſt ex iis quae dicuntur praeced. Sect. cap. 12. n. 3. Sed etiam, cum in iſtam Regulam impeggeris, videbis te malâ Maximâ niti; v. g.: *Homo eſt animal, brutum non eſt homo, ergo brutum non eſt animal*; Maxima eſt: *De quo negatur Subjectum, de eo negatur et Praedicatum*, quod ſine dubio falſum, cum Praedicatum poſſit ſubalternare ſibi ſuum Subjectum, adeoque Diſcordare a ſuo Subjecto; Parte 1. Sect. 2. cap. 2. n. 9.

10. Igitur Propoſito aliquo Syllogiſmo, ſi ex Scientiâ de eo iudicare velis, examina eum juxta duo prima Quadrata. Quod ſi non vacet, et Arte contentus ſis, examina ipſum penes quatuor Regulas, quas jam dedi; ſecurus de caetero, an in primâ, an in ſecundâ, an in tertiâ Figurâ; an Directus, an Indirectus; an in *Barbara*, an in *Celarent*, *Darii*, etc. Nihil horum te angat, nihil horum inquireas; bonus eſt Syllogiſmus, ſi modo quatuor illas Regulas ſervet; malus ſi vel unam ex his Regulis non ſervet, quidquid ſit reliquorum.

## C A P U T V I.

### *De Antifyllogiſmo.*

1. Antifyllogiſmus eſt Argumentum per Conversionem Soriticam correfpondens Syllogiſmo; ut: *Petrus non eſt animal, ergo vel Petrus non eſt homo, vel aliquis homo non eſt animal*. Poſito enim hoc Syllogiſmo: *Omnis homo eſt animal, Petrus eſt*



*homo, ergo Petrus est animal*, si procedere volueris a Contradictoriâ Consequentis ad Contradictoriam Antecedentis, habebis hoc Argumentum: *Petrus non est animal, ergo non et Petrus est homo, et omnis homo est animal*, cujus Argumenti Conclusionem reducendo juxta Schema Part. 2. Sect. 2. cap. 3. propositum, produces Antifyllogismum initio formatum: quia *Non et idem est quod Vel non*; hoc ergo: *Non et Petrus est homo, et omnis homo est animal*, huc reducitur: *Vel Petrus non est homo, vel non omnis homo est animal*. Rursum *Non omnis idem est Aliquis non*; huc ergo reducitur: *Vel Petrus non est homo, vel aliquis homo non est animal*. Vide Schema loco citato.

2. Quia tres Termini dispergendi sunt per Consequens Antifyllogismi, necessum est illud Consequens constare duabus Propositionibus, quas *Submissas* vocare possumus. Et in eo differunt a Praemissis in Syllogismo, quod hae quidem copulative sibi mutuo jungantur, illae vero disjunctive, institutâ scilicet Reductione juxta Schema citatum; juxta illud enim Disjunctivum contradicit Copulativo.

3. Petes: quare Anti-subalternatio, et Anti-conversio, non recensentur etiam inter Species Argumenti Formalis. Respondeo: quia non constituunt distinctam Speciem a Subalternatione et Conversione, respective loquendo. Positâ enim Subalternatione aut Conversione aliquâ, si e Contradictoriâ Consequentis inferas Contradictoriam Antecedentis, non nanciscêris novam Speciem Argumenti, sed habebis denuo Conversionem aliquam vel Subalternationem. V. g. haec Conversio est: *Omnis homo est animal, ergo aliquod animal est homo*. Converte hoc Argumentum Conversione Complexâ, seu infer ex Contradictoriâ Consequentis Contradictoriam Antecedentis; resultabit hoc Argumentum: *Nullum animal est homo, ergo aliquis homo non est animal*, quod iterum Conversio est. Similiter si positâ hac Subalternatione: *Omnis homo est animal, ergo aliquis homo est animal*, Convertere volueris, resultabit hoc Argumentum:

*Nullus homo eſt animal, ergo aliquis homo non eſt animal*, quod rurſum eſt quaedam Subalternatio. Atque adeo Converſiones Affirmativae et Negativae, itemque Subalternationes Affirmativae ac Negativae, correfpondent ſibi mutuo per Converſionem Soriticam, ſeu procedendo a Contradictoriâ Conſequentis ad Contradictoriam Antecedentis. Non ſic res ſe habet in Syllogiſmo, ſed cum illum convertere volueris, videbis Argumentum tuum, quod iſta Converſione intuleris, extra ſpeciem prioris Argumenti, id eſt, extra ſpeciem Syllogiſmi recidere.

## CAPUT VII.

*De Argumento-a-Diviſis-ad-Conjuncta.*

1. Argumentum-a-Diviſis-ad-Conjuncta eſt Argumentum, quod ex Praemiſſis Syllogiſticis infert Concluſionem coacervatam. Coacervatam Concluſionem voco, in qua et Medium ponitur et ambae Extremitates, ſed hae in unum Terminum coeſcentes. Proinde ſicut ex Enthymemate Syllogiſmus, ſic ex Syllogiſmo quodammodo naſcitur hoc Argumentum. Tale eſt iſtud: *Petrus eſt homo, et Petrus eſt doctus, ergo Petrus eſt homo doctus*. Diviſa in iſto Argumento ſunt Extremitates in diverſis Praemiſſis reſpectae, v. g. *Homo* et *Doctus* in praedicto Argumento. Conjuncta ſunt eadem Extremitates in unum Terminum coactae, v. g. *Homo doctus* in Conſequenti ejuſdem Argumenti. Ultra tres illos Terminos reperitur quartus, quem *Baſim* voco, eſtque Terminus ille qui cum Diviſis pariter ac Conjunctis ſeu affirmative ſeu negative connectitur.

2. Regula hujus Argumenti: Integra Diviſa in Conſequenti conjunguntur; non pars cum parte, aut totum unum cum alterius parte. Unde peccat hoc Argumentum: *Petrus videt corvum et Petrus videt album, ergo Petrus videt corvum album*; cum enim Diviſa in Antecedente ſint integra Praedicata, nempe *Videns corvum*, item *Videns album*, haec non conjunguntur

unum in Terminum in Consequente, sed prius eorum integre quidem ponitur, posterius vero non integre, sed posterior pars ex eo deraditur, atque cum priori Divisorum conjungitur. Simili vitio laborat istud Argumentum: *Hic canis est pater, hic canis est tuus, ergo hic canis est pater tuus*; integra enim Divisa sunt *Pater*, supple *alicujus*, et *Possessio tua* (*Tuus* enim non est integer Terminus, sed suppleri postulat, hoc modo: *Possessio tua, Magister tuus, Famulus tuus etc.*). In allegato igitur Argumento non conjunguntur ista Divisa, sed pars ex uno, pars ex alio furripitur, et sibi invicem apponuntur; sic enim oportebat conjungere integra Divisa in Consequente: *Ergo hic canis est pater alicujus et possessio tua, seu, Pater alicujus possessus a te.*

3. Secunda Regula: In Argumento Affirmativo a Divisis ad Conjuncta oportet Praemissas copulative connectere. Unde non valet istud Argumentum: *Homo est animal, vel homo est irrationalis, ergo homo est animal irrationale.* In Argumento autem Negativo licet tum Disjunctive tum Copulative connectere Praemissas. Unde valet: *Homo non est animal vel homo non est irrationalis, ergo homo non est animal irrationale.*

4. Tertia Regula: Procedendo Affirmative a Divisis ad Conjuncta, distribuenda est Basis in altera Praemissarum. Unde non valet: *Aliquod animal est equus, et aliquod animal latrat, ergo aliquod animal est equus latrans.* In Argumento Negativo non requiritur ista Distributio Basis.

5. Quarta Regula: Cavendum ab Homonymia in iis quae Divisa et in iis quae Conjuncta concernunt. Unde non sequitur: *Duo non sunt quinque, et tria non sunt quinque, ergo duo et tria non sunt quinque*; committitur enim Homonymia circa particulam *Et*, quae in Antecedente laxè, et in Consequente pressè copulat. Haec quarta Regula, et Prima in ordine, concernit Speciem Argumenti-a-Divisis-ad-Conjuncta; non potest enim Argumentum illud poni in sua Specie, si unam ex duabus istis

Regulis negligat. Reliquae Regulae spectant ad Formam, et ad necessitatem Sequelae ei conciliandam. Ad quam etiam accidentaliter saltem spectare videtur, ut Divisa habeant se instar Substantivi et Adjectivi, et ut Praemissa ponantur in tertia Figura; tunc enim clarius apparebit Argumentum; unde hoc duriusculum est: *Petrus est homo, Petrus est animal, ergo Petrus est homo animal.*

## CAPUT VIII.

### *De Argumento-a-Conjunctis-ad-Divisa.*

1. Argumentum a-Conjunctis-ad-Divisa est Argumentum correspondens priori Argumento penes Conversionem Soriticam; ut: *Brutum non est animal rationale, ergo brutum non est animal vel brutum non est rationale.* Cum Divisa ponantur in Consequente hujus Argumenti, consequenter duae requiruntur Propositiones in Consequente, quas *Submissas* vocare possumus.

2. Cum hoc Argumentum per Conversionem Soriticam correspondeat Argumento a Divisis ad Conjuncta, hinc cum simili inversione omnes easdem Regulas habet, quas prius Argumentum. Ac primo Integra Conjuncta dividenda sunt in Consequente; hinc non sequitur: *Hic canis non est pater tuus, ergo hic canis non est pater vel hic canis non est tuus*; et haec Regula clare correspondet Primae Regulae in praecedenti Capite.

3. Secundae Regulae correspondet ista: In Argumento Negativo a Conjunctis ad Divisa oportet Submissas Disjunctive connectere. Unde non valet: *Petrus non est animal irrationale, ergo Petrus non est animal, et Petrus non est irrationalis, sed Vel etc.* dicendum fuerat. Tertiae Regulae correspondet ista: In Argumento a Conjunctis ad Divisa, Negative procedendo, non licet Basim distribuere in utraque Submissarum. Unde non valet: *Nullum animal est equus latrans, ergo nullum animal est equus, vel nullum animal est latrans.* Eodem vitio laborat istud:



*Mons sine valle non est, ergo vel mons non est, vel sine valle non est.* Basis enim ibi est *Existens*, quod distribuitur in utraque Submissa. Quarta Regula hîc etiam proscribit Homonymiam; unde peccat istud: *Duo et tria sunt quinque, ergo duo sunt quinque et tria sunt quinque.*

4. Atque ita fuerunt Argumenta-Formalia-in-Terminis: 1. quidem Argumentum formale cum uno Termino; quod ad Repetitionem spectat, potestque vocari *Supina Repetitio*; 2. Argumentum Formale cum duobus Terminis; quod vel est cum unica Propositione, vel cum duabus Propositionibus; prius illud iterum ad Repetitionem pertinet; posterius dividitur in Subalternationem et Conversionem; 3. Argumentum formale cum tribus Terminis, comprehenditque Syllogismum et Anti-Syllogismum; 4. Argumentum formale cum quatuor Terminis (sic tamen ut quartus Terminus compositus sit ex duobus reliquorum), comprehenditque Argumenta-a-divisis-ad-conjuncta, et contra.

## CAPUT IX.

*De Argumento Topico.*

1. Argumentum-in-Terminis Materiale solet a Logicis vocari Argumentum Topicum. Estque Argumentum, in cujus Forma ac Materia simul sumptis non ponitur Impudentia. Per Formam intelligo Formam integram octo Puncta complexam; per Materiam intelligo Materiam Terminos concernentem. Ex quo sequitur, quod Argumentum Topicum debeat esse Enthymema, quia Materia Terminos concernens in solo Enthymemate locum habeat, ut demonstr. praeced. Sect. cap. 9. num. 3. Igitur hoc est Argumentum Topicum seu Materiale: *Nullum animal est lapis, ergo nullus homo est lapis*; est enim Enthymema, ut patet satis ex Definitione Enthymematis, et consideratis simul Formâ ac Materiâ ejus, id est, novem prioribus Affectionibus Logicis, nunquam in illis poni poterit Antecedens verum Consequente

falso. Et quidem notatu dignum est, quod et in Formâ ejus poni possit Impudentia, et in Materiâ ejus poni possit Impudentia. In Formâ ejus ponitur haec Impudentia: *Nullum animal est lapis, ergo nullum marmor est lapis*; hîc enim eadem Forma est quae in priori, ut facile videbis percurrendo per octo puncta Formae in uno et in alio Argumento. In Materiâ ejus ponitur haec Impudentia: *Nullum animal est lapis, ergo omnis homo est lapis*; hîc enim eadem habitudo Inferentis ad Illatum penes Praedicationem, cum Inferens in utroque Argumento sit idem et Illatus idem. Igitur in Materiâ Argumenti Topici ponitur Impudentia, sed haec non ponitur in ejus Formâ; in Formâ ejus ponitur Impudentia, sed haec non ponitur in ejus Materiâ, ita ut in Formâ ac Materiâ conjunctis poni non possit Impudentia.

2. Cautè vero observandum est, non sufficere ad Argumentum Topicum seu Materiale, quod sit Enthymema habeatque Antecedens pariter ac Consequens vera, sed ulterius requiri, ne in simili Formâ ac Materiâ detur Antecedens verum Consequente falso. Unde hoc Argumentum Materiale non valet: *Petrus est homo, ergo Petrus est homo*; etiamsi enim res ibi bene se habeat quoad veritatem Antecedentis et Consequentis, hoc non sufficit, cum in simili Formâ a Materiâ poni possit Argumentum, in quo Extrema non bene se habeant quoad veritatem falsitatemque, sed in quo sit Antecedens verum Consequente falso; v. g. *Petrus est animal, ergo Petrus est brutum*; hoc enim est ejusdem et Materiae et Formae cum praecedenti Argumento. Ejusdem Materiae, quia est eadem habitudo Inferentis ad Illatum in utroque Argumento, nempe Inferens utrobique subalternat sibi Illatum. Ejusdem formae, quae in utroque Argumento sunt tres praecise Termini, eodem modo utrobique accepti, eodem modo situati, etc. Sic etiam non valet hoc Argumentum: *Lapis non est homo, ergo lapis non est animal*, quia in Formâ ac Materiâ simul sumptis istius Argumenti

ponitur haec Impudentia: *Bos non est homo, ergo bos non est animal.*

3. Materia Terminos concernens passim vocatur *Locus*, et hinc *Argumentum Topicum* seu *Locale* dictum est. Locus proinde quintuplex est: 1. Locus a Convertibilibus; estque habitudo Inferentis ad Illatum, ut Convertibilium. In hoc loco ponitur istud Argumentum: *Petrus est homo, ergo Petrus est animal rationale.* 2. Locus a Genere ad Speciem, seu potius a Subalternante ad Subalternatum; estque habitudo Inferentis ad Illatum, quâ se habet ut Subalternantem ad Subalternatum. In isto loco positum est hoc Argumentum: *Nullum animal est lapis, ergo nullus homo est lapis.* 3. Locus a Specie ad Genus, seu potius a Subalternato ad Subalternantem, juxta quem Inferens subalternatur et Illatus subalternatur. In eo loco ponitur hoc Argumentum: *Homo est rationalis, ergo aliquod animal est rationale.* 4. Locus a Disparatis, juxta quem Inferens et Illatus disparantur, et in eo loco sedet hoc Argumentum: *Omne brutum est irrationale, ergo aliquod bipes est irrationale.* 5. Denique Locus a Repugnantibus; et in eo fundatur hoc Argumentum: *Homo est animal, ergo homo non est lapis.*

4. Ut autem Fundamenta et Maximae Argumentorum Topicorum intelligantur, bene notandum est, quod Parte 1. Sect. 2. cap. 2. n. 8. et 9. demonstrat; nempe Terminum Convertibilem respectu Convertibilis correspondentis et Subjectum et Praedicatum esse; Subalternatum vero esse Subjectum Subalternantis (ibid. n. 9.), non vero Praedicatum de Subalternante (ibid. n. 7.); Subalternantem autem esse Praedicatum de Subalternato (n. 9.), non vero Subjectum Subalternati (n. 7.); Terminum vero Disparatos non habere se ut Subjectum et Praedicatum (n. 6.), nec etiam Terminos Repugnantes (n. 2.). Quibus positis, Fundamenta Argumentorum Topicorum defumuntur ex duobus primis Quadratis. Et Argumentamur a Convertibilibus (1.) ex parte Subjecti affirmative, v. g. *Homo*

*sentit, ergo rationale sentit*; Fundamentum est 1. Axioma 1. Quadr. *Quod dicitur de Praedicato, dicitur etiam de Subjecto.* 2. Ex parte Subjecti Negative, v. g. *Rationale non est lapis, ergo homo non est lapis*; Fundamentum est 2. Axioma 1. Quadr. *Quod negatur de Subjecto, negatur etiam de Praedicato.* 3. Ex parte Praedicati Affirmative, v. g. *Homo sentit, ergo homo est animal*, per 3. Axiom. 1. Quadr. *De quo dicitur Subjectum, de eodem et Praedicatum dicitur.* 4. Ex parte Praedicati Negative, v. g. *Lapis non sentit, ergo lapis non est animal*, per 4. Axiom. 1. Quadr. *De quo negatur Praedicatum, de eo negatur et Subjectum.*

(2.) Argumentamur a Genere ad Speciem 1. ex parte Subjecti Affirmative, v. g. *Animal sentit, ergo homo sentit*, per 1. Axiom. 1. Quadrati. 2. Ex parte Subjecti Negative, v. g. *Nullum animal est lapis, ergo homo non est lapis*, per 2. Axioma 2. Quadrati. 3. Ex parte Praedicati Affirmative non Argumentamur; occurrit enim mala Maxima: *De quo dicitur Praedicatum, de eo dicitur et Subjectum*, quod falsum est, cum Praedicatum possit Subalternare Subjectum (Parte 1. Sect. 2. cap. 2. n. 9.), et per consequens discordare a Subjecto, adeoque dici de aliquo, de quo Subjectum non dicitur (per definit. discor.). 4. Ex parte Praedicati Negative sic Argumentamur: *Lapis non est animal, ergo lapis non est homo*, per 4. Axio. 1. Quadr.

(3.) Argumentamur a Specie ad Genus 1. Ex parte Subjecti Affirm. hoc modo: *Homo est rationalis, ergo aliquod animal est rationale*, per 1. Axiom. 2. Quadrati. 2. Ex parte Sub. Neg. hoc modo: *Homo non est brutum, ergo animal non est brutum*, per 2. Axiom. 1. Quadrati. 3. Ex parte Praed. Affirm. hoc modo: *Petrus est homo, ergo Petrus est animal*, per 3. Axioma 1. Quadrati. 4. Ex parte Praed. Neg. non Argumentamur; occurrit enim mala Maxima: *De quo negatur Subjectum, de eo negatur etiam Praedicatum*, quod est falsum, cum Praedicatum possit discordare a Subjecto, adeoque Affirmari de aliquo, de



quo non Affirmatur (id est, de quo Negatur; hac Sect. cap. 2. n. 14.) Subjectum.

(4.) Argumentamur a Disparatis 1. ex parte Sub. Affirm. hoc modo: *Omne brutum est irrationale, ergo aliquod bipes est irrationale*, per primum Axioma Appendicis ad 2. Quadrat. 2. Ex parte Subjecti Negative, hoc modo: *Nullum bipes est quadrupes, ergo aliquod brutum non est quadrupes*, per 2. Axiom. Appendicis. 3. Ex parte Praedicati non Argumentamur. Non affirmative, quia occurrit mala Maxima: *De quo dicitur unus Disparatorum, de eodem dicitur et alter*, quod falsum est, cum Disparatus discordet a Disparato, adeoque possit dici de aliquo, de quo alius non dicatur. Non negative, quia occurrit alia mala Maxima: *De quo negatur unus Disparatorum, de eodem negatur alius*, quod falsum iterum, quia Disparatus discordat a Disparato, ideoque fieri potest, ut de quo unus negatur (id est, de quo unus non affirmatur, *hac Sect. cap. 2. n. 14*), de eo alius non negetur, id est, de eo alius affirmetur (*per idem*).

(5.) Argumentamur a Repugnantibus difformiter ex parte Praedicati, hoc modo: *Homo est animal, ergo homo non est lapis*. Maxima est: *De quo dicitur unus Repugnantium, de eo negatur alius*; si enim de eo non negaretur, ergo de illo diceretur (*hac Sect. cap. 2. n. 13.*), adeoque Repugnantes concordarent, quod est absurdum, *per defn. Repug.*

5. Sed inter Argumenta Topica eliminandum est Argumentum a Disparatis; hoc enim nunquam est purum Argumentum, sed semper duobus Argumentis praegnat, uno quod sit a Genere ad Speciem, altero quod sit a Specie ad Genus. Ipsum autem purum et ab illis secretum nusquam apparet; semper enim procedit implicite ab uno Disparatorum distributo ad Subjectum utrique Disparatorum commune (quod est a Genere ad Speciem procedere), et deinde a Subjecto illo communi procedit ad alterum Disparatorum particulariter sumptum (quod est a Specie ad Genus procedere). V. g. *Omne brutum est irrationale, ergo*

*quoddam bipes est irrationale*, sic resolvitur: *Omne brutum est irrationale, ergo avis est irrationalis* (ubi est Argumentum a Genere ad Speciem procedens, nempe ab uno Disparatorum distributo, ad Subjectum utrique Disparatorum commune), et *Avis est irrationalis, ergo aliquod bipes est irrationale* (ubi est Argumentum a Specie ad Genus, proceditque a Subjecto communi ad alterum Disparatorum particulariter sumptum). Quatuor ergo tantum sunt Argumenta Topica; habitudo enim Disparatorum non fundat novum Genus Argumenti. Quod ut melius pateat, operae pretium fuerit hoc Theorema demonstrare: Subjectum, in quo concordant duo Termini Disparati, utrique eorum subalternatur. Demonstr. Sint Termini Disparati A, B, et concordent in C. Dico primo, quod C subalternetur ipsi A; C enim non discordat ab A (si enim discordaret ab A, non subjiceretur ipsi A; *Parte 1. Sect. 2. cap. 2. n. 5.*); sed A discordat a C (si enim A non discordaret a C, non discordaret etiam a B, cum C utpote Subjectum non discordet a B Praedicato suo); igitur C subalternatur ipsi A *per defin. Subalternati*. Eodem modo demonstrabis quod C Subalternetur ipsi B. Igitur C Subalternatur tum ipsi A tum ipsi B. Quod erat demonstrandum.

## CAPUT X.

*De Regulis Argumenti Topici.*

1. Regulae Argumenti Logici Sect. praeced. cap. ult. allegatae obtinent etiam in Argumento Topico, utpote quod sit Species quaedam Argumenti Logici. Prima quidem Regula in eo obtinet, quia Terminus Communis per Antecedens et Consequens diffunditur. Secunda et Tertia servari debent circa Terminum Communem, siquidem in illo solo periculum est transgressionis istarum Regularum; non potest enim in Termino aliquo committi Homonymia aut processus a non distr. ad distr., nisi ille

Terminus faltem verbotenus bis occurrat in Argumento. Et quidem defectu Secundae Regulae non valet istud Argumentum Topicum a Genere: *Ludovicus est gallus, ergo quidam homo est gallus*, si *Gallus* in Antecedente ponatur pro *Oriundo ex Gallia*, et in Consequente pro *Certa Ave*. Sic nec istud valet: *Omne animal sentit, ergo omnis qui dormit, sentit*, fumendo *Sentiens* in Antecedente per potentiam, et in Consequente per actum. Contra Tertiam Regulam peccat istud Argumentum-a-Repugn.: *Brutum est animal, ergo homo non est animal*; ibi enim proceditur a non distr. ad distr. ex parte Termini Communis *Animal*.

2. Quarta Regula etiam obtinet in Argumento Topico; sed illa demonstrari debet. Quod ut commodius fiat, praemittendae sunt quaedam Definitiones et quaedam Theoremata. *Subjectum-utriusque* voco illud Subjectum, in quo Terminus Inferens et Terminus Illatus alicujus Enthymematis concordant, seu de quo uterque eorum affirmari potest. *Subjectum neutrius* voco illud Subjectum de quo nec Inferens nec Illatus affirmatur. *Praedicatum-de-utroque* dico quod et de Inferente et de Illato dicitur. *Praedicatum-de-neutro*, quod nec de Inferente nec de Illato dicitur. V. g. proposito hoc Enthymemate: *Petrus est homo, ergo Petrus est animal*, Subjectum-utriusque est *Petrus*, item *Homo*. Subjectum-neutrius est *Lapis*, item *Lignum*. Praedicatum-de-utroque est *Ens*, item *Animal*. Praedicatum-de-neutro est *Lapis*, item *Lignum*. Porro: *Subjectum-unius* voco, de quo unus istorum Terminorum (Inferens inquam vel Illatus) dicitur, sed non alter; et dividitur in *Subjectum-hujus* (sic voco Subjectum Termini Illati, quod non est Subjectum Termini Inferentis) et *Subjectum-illius* (sic voco Subjectum Inferentis, et non Illati). *Praedicatum-de-uno* similiter capitur; atque aliud est *Praedicatum-de-hoc*, aliud *Praedicatum-de-illo*.

3. Sequuntur jam quaedam Theoremata, quorum hoc Primum sit: Omnis Locus admittit Subjectum-neutrius et Praedicatum-de-neutro. Id est, In Loco-a-Convertib., in Loco-a-Genere,

a Specie, etc., poni poteſt Argumentum, ſic ut detur Subjectum, de quo nec Inferens nec Illatus dicatur, itemque Praedicatum quod nec de Inferente nec de Illato dicatur. Demonſt. in Loco-a-Convertib.: Quia, etiamſi Termini tantum de eodem dicantur (id eſt, Convertibiles ſint), cum eo bene conſiſtit, aliquid eſſe, de quo neuter dicatur, item aliquid eſſe quod de neutro dicatur. V. g. etſi *Animal* et *Sentiens* convertantur, tamen neutrum dicitur de *Ligno*, et *Lignum* de neutro dicitur. Perge eodem pacto ad Locum-a-Genere, a-Specie, etc. (prolixitatis vitandae ergo, teneor hoc exercitio tuo transcribere). Videbis clare, quod quilibet eorum admittat Subjectum-neutrius et Praedicatum-de-neutro. Ex hoc Theoremate clare ſequitur Quarta Regula, nempe Argumentum Topicum non poſſe eſſe Deforme. Vel enim eſſet Deforme ex parte Subjecti, vel ex parte Praedicati (quae enim a Praedicato ad Subjectum et contra procedunt Argumentationes, non conſideramus, utpote praegnantibus, *Sect. praeced. cap. 6. n. 8. et cap. 7. n. 3.*). Si ex parte Praedicati ſit Deforme, in eodem loco ponetur Impudentia, ſumpto pro Terminò Communi Subjecto-neutrius; de eo enim Inferens negabitur, ſed Illatus de illo non poterit affirmari. Si ex parte Subjecti ſit Deforme, ponetur Impudentia, ſumpto Praedicato-de-neutro; hoc enim de Inferente quidem negabitur, ſed de Illato non poterit affirmari.

4. Secundum Theorema: Quilibet Locus admittit Praedicatum-de-utroque. Etiamſi enim Termini ſint Convertibiles, idem poteſt affirmari de utroque (uterque enim affirmatur de utroque); etiamſi Subalterni ſint, idem poteſt affirmari de utroque (quia ſaltem Subalternans dicitur de utroque Subalternorum); etiamſi Repugnantes fuerint, idem de utroque dici poteſt (ſunt enim ad minimum aliquid; et ſic *Ens* de utroque dicitur). Ex hoc Theor. clare ſequitur Prima Regula Specialis Argumenti Topici: Argumentum Topicum ex parte Subjecti procedens, non poteſt eſſe Difforme; poſito enim Praedicato-de-utroque, hoc



ipso ponetur Impudentia; hoc enim Praedicatum de Inferente quidem affirmabitur, sed de Illato negari non poterit.

5. Tertium Theorema: Solus Locus-a-Reugn. excludit Subjectum-utriusque. Caeteri Loci admittunt; Repugnantes enim non concordant, at caeteri omnes Termini concordant. Ex hoc Theor. clare sequitur Secunda Regula Specialis: Omnia Argumenta Topica debent esse Uniformia, excepto Argumento-a-Repug. Nullum enim Argumentum Topicum potest esse Deforme, *juxta 1. Theor.* Nullum potest esse Difforme ex parte Praedicati, *juxta 2. Theor.* Nullum excepto Argumento-a-Repug., potest esse Difforme ex parte Subjecti. Sequitur ergo, ut omnia Argumenta Topica, excepto Argumento-a-Repug., sint Uniformia.

6. Quartum Theor.: Locus-a-Repug. admittit Subjectum-hujus, et Subjectum-illius, item Praedicatum-de-hoc, et Praedicatum-de-illo. Illatus enim istius Loci sibi subjicitur (quilibet enim Terminus sibi subjicitur, quando Substantivum cum Adjectivo confundimus, ut in materiâ Argumentorum semper confundimus); non subjicitur autem Inferenti (*Parte 1. Sect. 2. cap. 2. n. 2.*). Eâdem de causâ Inferens sibi subjicitur, et non Illato; item Illatus de se dicitur, et non de Inferente; et denique Inferens de se dicitur, et non de Illato. Sextum Theorem.: Locus Argumenti Affirm. procedentis ex parte Subjecti non admittit Praedicatum-de-illo. Fieret enim Impudentia cum isto Praedicato, quandoquidem hoc Praedicatum de Inferente quidem diceretur, de Illato autem dici non posset. Septimum Theor.: Locus Argumenti Affirm. proced. ex parte Praed. non admittit Subjectum-illius. De eo enim Subjecto Inferens quidem diceretur, Illatus de eo dici non posset, adeoque committeretur Impudentia. Octavum Theor.: Locus Argum. Neg. proced. ex parte Sub. non admittit Praedicatum-de-hoc. Praedicatum enim negaretur quidem de Inferente, negari de Illato non posset. Nonum Theor.: Locus Arg. Neg. proced. ex parte Praed. non

admittit Subjectum-hujus. Inferens enim de tali Subjecto negaretur, Illatus de eodem negari non posset. Ex hisce Theorematis sequitur Tertia Regula: Argumentum-a-Repugn. non potest esse Uniforme; quia nec Affirmativum esse potest, nec Negativum; non Affirm., quia vel procederet ex parte Sub. (atque illi obstat Theor. 5. et 6.), vel procederet ex parte Praed. (atque illi obstat Theor. 5. et 7.); non Neg., quia rursus vel procederet ex parte Sub. (atque illi obstat Theor. 5 et 8.), vel procederet ex parte Praed. (atque illi obstat Theor. 5. et 9.). Corollarium hujus Regulae est: Argumentum-a-Repug. est unicum et simplex in Specie sua; nempe Argumentum Difforme ex parte Praedicati procedens. Caeteri enim processus interdicuntur ei per praecedentia Theoremata.

7. Sequitur etiam ex his Theorem., quod Argumentum a Genere non possit Affirmative procedere ex parte Praedicati, *per Theor. 7.*, nec Negative ex parte Subjecti, *per se loquendo, per Theor. 8.*, sed excusatur hinc per distributionem Inferentis. Item, quod Argumentum a Specie non possit Affirm. procedere ex parte Sub., *per Theor. 6.*, *per se loquendo*, sed excusatur per Acceptionem Particularem Illati, nec ex parte Praedicati Neg., *per Theor. 9.*

## CAPUT XI.

### *De Reductione Argumenti Topici ad Syllogismum Formalem.*

1. Praemittenda sunt quaedam Theoremata. Primum Theorema: Enthymema Uniforme in Reductione ad Syllogismum Formalem requirit Supplementum Affirmativum. Demonstr.: quia Enthymema Uniforme habet Antecedens et Consequens, vel pariter Affirmativa, vel pariter Negativa. Si posterius fiat, Supplementum non poterit esse Negativum; Syllogismus enim peccaret contra Primam Regulam, utpote ex puris Negativis

procedens. Si prius fiat, Syllogismus peccabit contra Secundam Regulam, utpote Deformis, et ex Antecedente Negativo Conclusionem Affirmativam eliciens. Antecedens enim Negativum est, si vel una Praemissa sit Negans (quod hinc eveniet ratione Supplementi Negativi). Conclusio autem erit Affirmativa, utpote eadem cum Conclusionem Enthymematis.

2. Secundum Theorema: Enthymema Difforme debet reduci per Supplementum Negativum. Cum enim in tali Enthymemate Antecedens sit Affirmativum, Consequente Negativo, si Supplementum Affirmativum adhiberes, exurgeret Syllogismus Difformis. Antecedens enim esset Affirmativum (utrâque Praemissa, Antecedente nempe Enthymematis et Supplemento, Affirmativis), Conclusio autem esset Negativa. Sequitur ex hisque Theor., quod omnia Argumenta Topica debeant reduci per Supplementum Affirm., excepto Argumento-a-Repug., quod per Supplementum Neg. reducitur.

3. Tertium Theor.: Enthymema Deforme non reducitur. Cum enim in tali Enthymemate Antecedens sit Negativum, Consequente Affirmativo, debebit una Praemissa Syllogismi, ad quem fieret reductio, esse Negans (consequenter Antecedens Syllogismi erit Negativum). Conclusio tamen esset Affirmativa, utpote eadem cum Consequente Enthymematis, quod Affirmativum esse supponebatur.

4. Quartum Theor.: Enthymema, in quo proceditur a non distrib. ad distrib., non potest reduci. Illud enim vitium conferretur in Syllogismum, ad quem fieret Reductio; illud enim vitium appositione Supplementi non potest corrigi, cum vitium illud necessario resideat in Terminis Communi Enthymematis (*cap. praeced. num. 1.*); hinc autem non assumitur in Supplementum, sed tantum Inferens et Illatus.

5. Quintum Theorema: Si Inferens non distribuatur in Enthymemate, oportet distributionem ejus procurare in Supplemento. Si enim nec in Supplemento distribuatur, Medium in

Syllogismo non distribuetur. Inferens enim Enthymematis fit Medium in Syllogismo, ad quem Enthymema reducitur, *Praeced. Sect. cap. 8. num. 3.*

6. Sextum Theor.: Si Illatus distribuatur in Enthymemate, oportet etiam Distributionem ejus procurare in Supplemento. Si enim eo casu in Supplemento non distribuatur, fiet in ipso processus a non distributo ad distributum.

7. Septimum Theor.: Enthymema Uniforme, in quo Illato distributo Inferens non distribuitur, non potest reduci. Deberet enim tale Enthymema reduci per Supplementum Affirmativum (*juxta 1. Theor. hoc cap.*); deberet etiam Inferens in Supplemento distribui (*per 5. Theor.*); deberet et Illatus in Supplemento distribui (*per 6. Theor.*); hoc autem fieri non potest, cum in Propositione Affirmativâ tantum unum Extremum distribui possit. Praedicatum enim ejus non distribuitur, *Parte 1. Sect. 2. cap. 9. n. 10.*

8. Octavum Theor.: Si Illatus distribuatur, aut Inferens non distribuatur in Enthymemate Uniformi, oportet assumere Supplementum Universale, id est tale Supplementum, quod sit Propositio Universalis. Oportet enim in Reductione talis Enthymematis assumere Supplementum Affirmat. (*per 1. Theor.*). In Propositione autem Affirmante, solum Subjectum distribui potest; cum igitur oporteat in Supplemento isto unum Terminum distribuere (*juxta 5. et 6. Theor.*), ponetur ille Terminus distributus loco Subjecti in Supplemento, adeoque exsurget Propositio Universalis.

9. Nonum Theor.: Si in Enthymemate Uniformi Inferens non distribuatur, oportet assumere Supplementum Rectum, seu tale Supplementum, in quo Inferens obtineat locum Subjecti. Cum enim eo casu oporteat Supplementum affirmativum (*per 1. Theor.*) Universale (*per 8. Theor.*) assumere, in quo solum Subjectum distribuitur (*Parte 2. Sect. 1. cap. 8. n. 3.*), cumque oporteat Inferentem in Supplemento distribuere (*per*



5. *Theor.*), consequens est, ut Inferens loco Subjecti ponatur in Supplemento.

10. Decimum *Theor.*: Si Illatus in Enthymemate Uniformi distribuatur, oportet assumere Supplementum Inversum. Cum enim eo casu oporteat assumere Supplementum Affirm. (*per 1. Theor.*) Universale (*per Theor. 8.*), in quo solum Subjectum distribuitur; cumque oporteat Illatum in Supplemento distribuere (*per 6. Theor.*); consequens est, ut Illatus loco Subjecti ponatur in Supplemento.

11. Undecimum *Theor.*: In Enthymemate Uniformi, in quo Inferens distribuitur, Illato non distributo, licet assumere Supplementum Particulare. Quia nec Inferens nec Illatus distribui debet in Supplemento. Non Inferens, quia ille distribuitur in Antecedente Enthymematis, et sufficit Medium in una Praemissarum distributum esse. Non Illatus, quia non est cur ille distribuatur in Antecedente Syllogismi, quando non distribuitur in Consequente. Cum igitur Supplementum Universale nihil aliud adducat quam distributionem Inferentis aut Illati, neutrius autem distributio requisita sit in casu nostri Theorematis, integrum erit, supplementum Particulare assumere.

12. Duodecimum *Theor.*: Enthymema Difforme ex parte Subjecti procedens non reducitur. In illo enim Enthymemate Terminus Communis ponetur loco Praedicati (*praeced. Sect. cap. 7. n. 3.*); cumque Antecedens sit Affirmativum in tali Argumento (*per defin. Argum. Diffor.*), consequenter Terminus Communis in Antecedente non distribuitur (*Parte 1. Sect. 2. cap. 9. n. 10.*). Consequens autem in isto Argumento est Negativum (*per defin. Argum. Diff.*). Igitur Terminus Communis in Consequente distribuetur (*Parte 1. Sect. 2. cap. 9. n. 7.*). Igitur in isto Argumento proceditur a non distr. ad distr., et sic non reducitur, *per Theor. 4.*

13. Decimum tertium *Theor.*: Enthymema Difforme ex parte Praedicati procedens reduci debet per Supplementum Universale

Negativum. Inferens enim in Enthymemate illo non distribuitur tamquam Praedicatum Affirmationis (adeoque distribui debet in Supplemento, *per Theor.* 5.). Illatus autem distribuitur in Enthymemate, tamquam Praedicatum Negationis (adeoque etiam distribui debet in Supplemento, *per Theor.* 6.). Utrumque autem Extremum distribui non potest nisi in Universali Negante, *Parte 2. Sect. 1. cap. 1. n. 3.*

14. Decimum quartum Theorema: Quando Supplementum est Universale Negativum, aut Particulare Affirmativum, perinde est, an Rectum in Inversum adhibeatur. Quia sive Recta, sive Inversa fuerint ista Supplementa, eodem modo accipientur Termini; nempe in Univerf. Neg. uterque Terminus distribuitur *Parte 2. Sect. 1. cap. 8. n. 3.*, in Partic. Affirm. uterque Terminus accipitur particulariter (*ibid.*). Insuper aequivalent ista Supplementa Recta et Inversa, inferuntque se mutuo per Conversionem in Terminis, *per 3. et 4. Axiom. 5. Quadr.*

15. Haec de Theoriâ. Propius accedamus ad Praxim. Proposito aliquo Enthymemate, vel illud est Uniforme vel Biforme. Si Biforme, vel est Deforme vel Difforme. (1.) Si Deforme, non reducitur, *per Theorem.* 3.

(2.) Si Difforme, ergo vel ex parte Subjecti, vel ex parte Praedicati procedit (si enim a Subjecto ad Praedicatum, aut contra procedat, prius resolvendum est in Conversionem et Purum Enthymema, atque tunc demum de Reductione Puri istius Enthymematis cogitandum). Si sit Difforme ex parte Subjecti procedens, non reducitur, *per Theor.* 12.

(3.) Si sit Difforme ex parte Praedicati procedens, reducitur per Supplementum Universale Negativum (*per 13. Theor.*), quod perinde est, an Rectum an Inversum facias, *per Theor.* 14.

(4.) Si vero Enthymema propositum fuerit Uniforme, oportet adhibere Supplementum Affirmativum (*per 1. Theor.*), et in hoc Enthymemate vel 1. Inferens et Illatus distribuuntur, vel 2. ambo particulariter fumuntur, vel 3. Inferens distribuitur,

Illato particulariter sumpto, vel 4. Illatus distribuitur, Inferente particulariter sumpto. Singularis enim Acceptio, ac aliae minus usitatae, aequipollent Distributioni; eo tamen discrimine, quod illis non correspondeat Acceptio Particularis in eodem Termino. Si enim Terminus primo Singulariter, Quasi-universaliter, aut Quasi-particulariter capiatur, postea vero Particulariter sumatur, committitur Homonymia, adeoque non manet idem Terminus, *Parte 1. Sect. 2. cap. 7. n. 6. et 7.*

(5.) Si igitur in Enthymemate Uniformi Inferens et Illatus distribuuntur, Supplementum debet esse Affirmativum (*per 1. Theor.*), Universale (*per 8. Theor.*), Inversum (*per 10. Theor.*).

(6.) Si Inferens et Illatus in Enthymemate Uniformi, ambo particulariter sumantur, oportet adhibere Supplementum Affirmativum (*per 1. Theor.*), Universale (*per 8. Theor.*), Rectum (*per 9. Theor.*).

(7.) Si in Enthymemate Uniformi Inferens distribuitur, Illato particulariter sumpto, oportet adhibere Supplementum Affirmativum (*per 1. Theor.*); licet assumere Supplementum Particulare (*per 11. Theor.*); Rectum an Inversum adhibeas, arbitrium est (*per 14. Theor.*).

(8.) Denique si in Enthymemate Uniformi Illatus distribuatur, Inferente particulariter sumpto, non procedet Reductio (*per Theorem. 7.*).

16. Atque sic etiam tota Praxis circa hoc negotium exhibita est. Si enim te quaerente ex me certam Propositionem, Terminos protulerim (v. g. *Mus* et *Bos*), Si Qualitatem Propositionis etiam indicaverim (v. g. Affirmantem esse), Si ad haec Quantitatem innuerim (v. g. Universalem esse), Si denique etiam Ordinem Terminorum manifestaverim (v. g. *Bos* praecedere tamquam Subiectum, et *Mus* sequi tamquam Praedicatum), jam tota Proposito quam quaerebas revelata est (v. g. haec: *Bos est mus*). Atqui similiter, cum proposito Enthymemate desideretur tantum una Praemissa, ut reducatur ad Syllogismum, indicavi Terminos istius

Praemiſſae (nempe ratio Supplementi requirit Terminum Inferentem et Illatum Enthymematis, tamquam ſua Extrema), dixi ordinem Terminorum, quando praefcripſi an Rectum an Inverſum Supplementum eſſe deberet, dixi Quantitatem, dixi Qualitatem; igitur totam Praemiſſam dixi. Eratque id operae pretium; plerique enim Logicam propter Syllogiſmos tantum addiſcunt (recte an perverſe, nihil attinet hîc dicere). Atqui Argumenta Topica facillima ſunt, et nullo negotio petuntur ex Locis ſuis; ſi haec etiam facile ad Syllogiſmos reducantur (ut ex praefcripto noſtro tuto et facillime reducuntur), adepti ſunt quod deſiderabant.

17. Poſt Scientiam ſeu Theoriam, itemque poſt Artem ſeu Praxim, reſtat Exercitium. Id tibi ſume ex cap. 9. Et incipe Argumenta Topica ibi poſita reducere ad Syllogiſmos. Si ſcrupulus incidat, quo loco debeat Supplementum apponi, an ante, an proxime poſt Antecedens Enthymematis, Reſpond., id arbitrii tui eſſe. Si tamen ordinem Naturae ſequi velis, ſemper prima tua Praemiſſa debet eſſe Affirmans, ut monui hac Sect. cap. 5. n. 8. Igitur cum Supplementum Negativum adhibes, poſtpone illud Antecedenti Enthymematis; cum Supplementum Affir. adhibes in Enthymemate Negativo, praefige illud Antecedenti Enthymematis. In Enthymemate Affirm. arbitrarium ſit.

### SECTIO III.

#### De Argumento-in-Enunciationibus.

Argumentum in Enunciationibus eſt Argumentum cujus Conſequentia penes ſolas Affectiones Enunciationum aeſtimatur; non omnium tamen, ſed tantum Primarum et Secundarum. Si quae ante Primas ſint (quales ſunt Partes Primarum, cum Primae componuntur ex aliis Enunciationibus), earum Affectiones non veniunt in cenſum.



## CAPUT I.

*De Argumento-Formali-in-Enunciationibus.*

1. Argumentum-Formale-in-Enunciationibus est Argumentum cujus solâ Formâ Enunciationes concernente servatâ non fiet Impudentia, seu non ponetur Argumentum habens Antecedens verum Consequente falso. Forma Enunciationes concernens, ut supra dixi, comprehendit quatuor puncta: 1. Numerum Enunciationum ingredientium Argumentum, 2. Qualitatem earundem, 3. Situm seu ordinem earundem, 4. Numerum positionum earundem. Sub Numero comprehenditur etiam Species, nempe, an Enunciatio ingrediens Copulativa sit, an Disjunctiva, an Condicionalis, etc. Ad Numerum etiam spectat Contradictio.

2. Enunciationes ingredientibus Argumentum (quarum scilicet Numerus in Forma computatur) aut Primae sunt, aut Secundae. Secundae sunt, quae in Argumento, ad quod comparantur, debent esse compositae ex aliis Enunciationibus. Primae sunt, quae in Argumento, ad quod comparantur, non debent esse compositae, id est, Argumentum non requirit eas esse compositas, sive interim sint compositae sive non. Sic in Argumento, quatenus Argumento, una Enunciatio est Secunda, et duae Primae. Argumentum enim, ut sic, requirit unam Enunciationem Compositam, nempe Enunciationem Illativam, quae constituat Argumentum, seu quae sit ipsum Argumentum. Ultra hanc requirit Antecedens et Consequens, quae quidem in Argumento possunt esse Enunciationes Compositae, sed non debent; Argumentum enim, ut sic, permittit suum Antecedens ac suum Consequens simplicia esse. In Syllogismo autem duae sunt Enunciationes Secundae et tres Primae. Syllogismus enim requirit Antecedens componi copulative, et se ipsum componi illative ex suo Antecedente et suo Consequente. Partes autem Antecedentis, ac ipsum Consequens, non postulat componi, imo, quod hic plus est, postulat non componi.

3. Hiſce poſitis, operae pretium erit, propoſito aliquo Argumento, Formam ejus contemplari. Sit itaque hic Syllogiſmus Hypotheticus: *Si ſto, ſtare poſſum, atqui ſto, ergo ſtare poſſum.* Ubi, quantum ad Numerum et Speciem Enunciationum, duae ſunt Enunciationes primae et tres ſecundae. Secundae in ſpecie ſunt 1. Enunciatio illativa, quae eſt ipſum integrum argumentum, 2. Antecedens, quod eſt Enunciatio Compoſita Copulativa, 3. Una pars antecedentis, quae eſt Enunciatio Condicionalis. Primae in ſpecie ſunt duae Propoſitiones conſtituentes Antecedens et Conſequens praedictae Enunciationis Condicionalis. Quantum ad Qualitatem harum Enunciationum, illa eſt affirmans in omnibus; omnes enim Enunciationes, quae Argumentum illud ingrediuntur, ſunt affirmantes. Quantum ad Situm et Numerum ſituum in iisdem Enunciationibus, 1. Una Primarum, quae eſt Antecedens Enunciationis Condicionalis, 2. Altera Primarum, quae eſt Conſequens ejuſdem Condicionalis, 3. Ipſa Enunciatio Condicionalis ex illis Primis compoſita (Totum enim Partibus ſuis poſterius eſſe cenſetur), 4. Illa Primarum, quae erat Antecedens in Condicionali, iterato ponitur, 5. Enunciatio Copulativa ex praedicta Condicionali et ejus Antecedente repetito, tamquam Antecedens integri Argumenti, 6. Illa Primarum, quae fuerat Conſequens in praedicta Condicionali, 7. Integrum Argumentum ex iſto Antecedente Copulativo et hoc Conſequente compoſitum. Tali Numero Enunciationum et Specie, tali Qualitate, tali Situ et ordine ac Numero ſituum ſervato, impoſſibile eſt dare Antecedens verum Conſequente falſo; adeoque Argumentum eſt Formale.

4. Hic autem non attenditur ad Terminos eorumve numerum, acceptionem, etc. Unde hoc Argumentum: *Si omnis homo eſt doctus, aliquod animal eſt doctum, ſed omnis homo eſt doctus, ergo aliquod animal eſt doctum,* eſt ſimilis Formae cum praecedenti, cum tamen hic non ſit ſimilis, ſed longe diſpar Acceptio Terminorum. Imo etiam hoc eſt ejuſdem Formae: *Si loquor et*

*ambulo, plura simul ago, sed loquor et ambulo, ergo plura simul ago*, etsi hîc sint plures Termini, imo etiam plures Enunciationes: non enim sunt plures Primæ aut Secundæ, quæ solæ computantur in Forma horum Argumentorum.

## CAPUT II.

*Sextum Quadratum Logicum.*

1. Primum Axioma: Ad veritatem Enunciationis Copulativæ requiritur et sufficit veritas omnium partium. Copulativa enim omnes suas partes ex aequo veras esse dicit; unde si ipsa vera sit, et hæ veræ sint necessum est, et contra.

2. Requisitum idem est quod Consequens ejus, ad quod requiri dicitur; Consequens, inquam, bonæ Consequentiae. Sufficiens autem est Antecedens ejus ad quod sufficere dicitur. Sic *Sto*, hoc sufficit ut *Stare possim*; at *Stare possim*, hoc requiritur ut *Stem*; unde cum aliquid ad alterum requiritur et sufficit, necessum est ut cum ipso convertatur, seu sit ejus pariter Antecedens atque Consequens. Atque adeo hic efficitur sensus istius Primi Axiomatis: *Si Copulativa est vera, omnes ejus partes sunt veræ, et si omnes partes sunt veræ, Copulativa ex illis etiam est vera.*

3. Sed, dices, hæc est Copulativa vera: *Non et sum bos et sum lapis*, tamen omnes ejus partes sunt falsæ; hæc e contrario: *Necessario et Philippus est rex et Carolus est rex*, habet omnes partes veras, et tamen ipsa est falsa. Respondeo: Axiomata hujus Quadrati agunt de Enunciationibus Puris seu non Modalibus. Quid ad veritatem Falsitatemque Modalium requiratur et sufficiat, vide Parte 2. Sect. I. cap. 10. n. 6.

4. Secundum Axioma: Ad Falsitatem Enunciationis Copulativæ requiritur et sufficit Falsitas alicujus partis. Secundum hoc Axioma per Conversionem sequitur ex primo Axiomate;

ſiquidem haec eſt prior pars primi Axiomatis: *Si Copulativa eſt vera, omnes ejus partes ſunt verae*, ex qua per Converſionem ſequitur: *Si aliqua pars ſit falſa, Copulativa eſt falſa*. Secunda pars Prima Axiomatis eſt iſta: *Si omnes partes ſunt verae, Copulativa eſt vera*, ex qua per Converſionem ſequitur: *Si Copulativa eſt falſa, aliqua ejus pars eſt falſa*. Duae duarum iſtarum Converſionum Concluſiones reddunt integre Secundum Axioma. Senſus enim ſecundi Axiomatis eſt hic: *Si Copulativa eſt falſa, aliqua ejus pars eſt falſa* (hoc eſt, Ad Falſitatem Copulativae requiritur Falſitas alicujus partis); *et ſi aliqua pars eſt falſa, Copulativa eſt falſa* (hoc enim eſt, Ad Falſitatem Copulativae ſufficit Falſitas alicujus partis).

5. Tertium Axioma: Ad veritatem Enunciationis Diſjunctivae requiritur et ſufficit veritas unius partis. Diſjunctiva enim non dicit aliud quam, alteram ſuarum partium eſſe veram; igitur ſi haec vera ſit, et ipſa vera erit, ac contra. Unde etiam haec vera eſt: *Sum bos vel ſum homo*, etiamſi tantum una pars vera ſit. Senſus Axiomatis (attendendo, quid ſit Requiſitum, quid ſit Sufficiens) eſt hic: *Si una pars ſit vera, Diſjunctiva eſt vera* (id enim eſt, Ad veritatem Diſjunctivae ſufficit veritas unius partis); *et ſi Diſjunctiva eſt vera, una ejus pars eſt vera* (id enim eſt, Ad veritatem Diſjunctivae requiritur veritas unius partis).

6. Quartum Axioma: Ad Falſitatem Enunciationis Diſjunctivae requiritur et ſufficit Falſitas omnium partium. Hic ſenſus eſt: *Si Falſa ſit Enunciatio Diſjunctiva, omnes ejus partes ſunt falſae, et ſi omnes partes ſunt falſae, Diſjunctiva eſt falſa*. Ex quo clare vides, quartum hoc Axioma per Converſionem ſequi ex tertio Axiomate. Per Converſionem hic intelligimus ubique Converſionem Soriticam, quam inſinuavimus par. 2. et de qua mox etiam ſequetur.

7. Sed dices forte: Haec Diſjunctiva eſt falſa: *Si ſum homo, ſum lapis, vel ſi ſum homo, ſum lignum*, et tamen una pars ejus



est vera, nempe *Sum homo*. Respondeo, illam non esse partem, de qua intelliguntur haec Axiomata; intelliguntur enim haec Axiomata de parte proxima; at *Sum homo* ibi non est pars proxima, sed tantum pars remota seu pars partis. Partes autem proximae in illâ Disjunctivâ sunt duae illae Enunciationes Condicionales, quae ambae sunt falsae, adeoque et Disjunctiva falsa est.

### CAPUT III.

#### *De Subalternatione et Conversione Complexis.*

1. Subalternatio est Argumentum Formale, in quo ex Copulativâ pars, aut ex parte Disjunctiva infertur. Unde Subalternatio est duplex, Copulativa, et Disjunctiva. Subalternatio Copulativa est, in qua ex Copulativa pars infertur; ut *Sto et loquor, ergo sto*. Fundamentum Subalternationis Copulativae est: *Ad veritatem Copulativae requiritur veritas utriusque partis*. Subalternatio Disjunctiva est, in qua ex Parte infertur Disjunctiva; ut *Sto, ergo sto vel loquor*. Fundamentum ejus est: *Ad veritatem Disjunctivae sufficit veritas unius partis*.

2. Subalternatio Copulativa et Disjunctiva correspondent sibi mutuo per Conversionem; unde ista Subalternatio Copulativa: *Sto et loquor, ergo sto*, convertitur in hanc Disjunctivam: *Non sto, ergo non et sto et loquor*. Consequens huc reducitur juxta Schema part. 2. propositum, *Vel non sto, vel non loquor*. Et ista Subalternatio Disjunctiva: *Sto, ergo sto vel loquor*, convertitur in hanc Copulativam: *Non vel sto vel loquor* (quod juxta Schema citatum est *Et non sto et non loquor*), *ergo non sto*. Unde habent se cum proportionem Subalternatio Copulativa et Disjunctiva in Enunciationibus, sicut se habent Subalternatio Affirmativa et Negativa in Terminis; quia etiam hae sibi mutuo correspondent per Conversionem, ut supra videre potes.

3. Ad Formam Subalternationis Copulativae ſpectat binarius numerus Enunciationum Primarum et binarius numerus Enunciationum Secundarum. Una quidem Secundarum Copulativa eſt ex duabus Primis; altera Illativa eſt ex iſta Copulativa, tamquam Antecedente, et unâ ejus parte, ſeu unâ Primarum, tamquam Conſequentē. Qualitas in Primis Enunciationibus eſt libera (id eſt, perinde eſt, an Affirmans ſit an Negans); in Secundis requiritur Qualitas affirmans. Quantum ad Situm, numerum Situū et ordinem, 1. una Primarum, 2. altera Primarum, 3. Enunciatio Copulativa ex illis Primis tamquam Extremis ſuis compoſita, 4. Denuo una duarum Primarum, 5. Enunciatio Illativa, quae eſt integrum Argumentum ex iſta Copulativâ tamquam Antecedente, et unâ Primarum repetitâ tamquam Conſequentē. Forma Subalternationis Diſjunctivae conformiter deſcribenda eſt.

4. Converſio Soritica eſt Argumentum Formale, in quo ex unâ Enunciatione Condicionali inferitur alia, Extremis Contradictoriis et inverſis; ut *Si ſto, ſtare poſſum; ergo ſi non poſſum ſtare, non ſto*. Item *Si non poſſum ſtare, non ſto; ergo ſi ſto, ſtare poſſum*. Antecedens enim et Conſequens hujus Converſionis ſemper convertuntur, cum Contradictio ſit mutua. Converſio non poteſt eſſe Biformis. Non Deformis, quia procederet juxta hanc Maximam: *Si ex una Enunc. non ſequatur alia, ex Contradictoria hujus ſequetur Contradictoria illius*, quod eſt contra 4. Axio. 4. Quadr. Non Diſformis, qui procederet juxta hanc Maximam: *Si ex una Enunc. ſequatur alia, ex Contradict. hujus non ſequetur Contradict. illius*, quod eſt directe contra 1. Axio. 4. Quadrati.

5. Cum igitur omnis Converſio ſit Uniformis, ſequitur, eam non niſi Affirmativam aut Negativam eſſe poſſe. Affirmativa eſt, cujus Antecedens pariter atque Conſequens affirmant; tales ſunt duae Converſiones jam proxime allegatae. Cave putes Biformes aut Negativas eſſe; etiamſi enim partes earum aliquae

remotae, Negativae sint, Antecedens tamen ipsum pariter atque Consequens Affirmativa sunt, cum nulla Negatio cadat in Copulam *Si*. Fundamentum Conversionis Affirmativae est 1. Axio. 4. Quadr. Parte 2. Sect. 2. cap. 11. n. 2. Conversio Negativa est, in qua Antecedens pariter atque Consequens Negativa sunt; ut *Non si possum stare, sto; ergo non si non sto, non possum stare*; licet etiam Consequens hoc convertere in Antecedens, quia etiam in Conversione Negativa Antecedens et Consequens aequivalent, ac se mutuo per Conversionem inferunt. Fundamentum Conversionis Negativae est 4. Axioma 4. Quadr. ibid. n. 5.

6. Ad Formam Conversionis spectant 1. Duae combinationes duarum Contradictoriarum tamquam Primae; ad Secundas vero spectant duae Condicionales ex Primis compositae, et Enunciatio Illativa ex illis Condicionalibus tamquam Extremis suis conflata. 2. Qualitas in Primis Enunciationibus ea requiritur, quam secum importat Contradictio. In Condicionalibus vero libera est Qualitas, sed cum mutua dependentia; id est, possunt ambae affirmare, possunt ambae negare, sed non potest una affirmare alterâ negante, aut contra. Qualitas denique in ipso integro Argumento requiritur affirmans, cum Argumentum omne debeat esse Enunciatio affirmativa. 3. Quantum ad Situm, Numerum situm, et Ordinem: 1. Una Primarum ut Antecedens, 2. altera Primarum ut Consequens, 3. Enunciatio Condicionalis ex illo Antecedente et illo Consequente Composita, 4. Contradictoria istius Primae quae obtinuerat locum Consequentis, 5. Contradictoria illius Primae quae obtinuerat locum Antecedentis, 6. Altera Condicionalis ex illis Contradictoriis tamquam Extremis suis composita, 7. Integrum Argumentum ex priori Condicali tamquam Antecedente et posteriori Condicali tamquam Consequente conflatum.

## CAPUT IV.

*De Syllogismo Disjunctivo et Hypothetico.*

1. Syllogismus Disjunctivus est Argumentum Formale, in quo ex Enunciatione Disjunctivâ et Contradictoriâ unius partis infertur pars restans; ut *Sto vel lego; sed non sto, ergo lego.* Fundamentum ejus est: *Ad veritatem Disjunctivae requiritur veritas unius partis.* Syllogismus enim Disjunctivus virtute sic procedit: *Disjunctiva est vera; una tamen pars ejus est falsa, ergo pars restans est vera.* Pars restans est illa pars Enunciationis Disjunctivae, cujus Contradictoria in Antecedente sumpta non fuit. Unde non valet iste Syllogismus Disjunctivus: *Vel sto, vel non sto; sed non sto, ergo sto,* quia non infertur Pars restans, sed infertur illa pars cujus Contradictoria in Antecedente sumpta fuerat. In Antecedente enim sumpta fuerat, post Enunciationem Disjunctivam, Contradictoriâ prioris partis; igitur Pars restans erat posterior pars Enunciationis Disjunctivae; haec autem non infertur in Consequente, sed ipsa pars prior; unde procedit tali modo: *Disjunctiva est vera, et una ejus pars est falsa, ergo eadem illa pars est vera.* Sic igitur corrigendus est: *Vel sto vel non sto, sed non sto, ergo non sto;* jam enim infertur Pars restans seu illa pars, cujus Contradictoria in Antecedente sumpta non est; aut cum consuetâ Clausulâ, quae melius hic sonat, licet idem in re contineat: *Vel sto vel non sto, sed prius est falsum, ergo posterius est verum;* hoc enim penitus aequivalet priori, cum Enunciatio falsa et ejus Contradictoria sint idem, item Enunciatio et Enunciatio vera idem sint, *Parte 2. Sect. 2. cap. 11. n. 1.*

2. Cavendum etiam est ne mutetur ordo inter Contradictoriam unius partis et partem restantem, quod fieret si in Antecedente sumeretur una pars Disjunctivae, et in Consequente inferretur Contradictoria partis restantis; v. g. *Sto vel lego, sed*



*sto, ergo non lego.* Hic enim Syllogismus Disjunctivus non valet, utpote qui innitatur huic perverso Fundamento: *Ad veritatem Disjunctivae requiritur Falsitas unius partis.* Quod Fundamentum certe non valet, cum Disjunctiva ex omnibus veris non minus, sed vel potius vera sit, quam Disjunctiva ex unâ tantum parte verâ. Inniti tales Syllogismos Disjunctivos praedicto malo Fundamento, patet, quia virtute sic procedunt: *Enunciatio Disjunctiva est vera; sed una ejus pars est vera, ergo altera pars est falsa;* qui Discursus clare nititur reprobo isto Fundamento quod jam statim assignabamus.

3. Syllogismus Hypotheticus est duplex, Directus et Indirectus. Syllogismus Hypotheticus Directus est Argumentum Formale, in quo ex Argumentatione Condicionali et ejus Antecedente infertur Consequens ejusdem; ut *Si sto, stare possum; sed sto, ergo stare possum.* Fundamentum ejus est: *Ex vero nil nisi verum.* Virtute enim sic procedit: *Ex A sequitur B, sed A est verum, ergo et B est verum;* cujus Discursus hoc sane Fundamentum est: *Ex vero nil nisi verum.*

4. Cavendum summopere circa Situm, ne Consequens Argumentationis Condicionalis repetatur, antequam repetitum fuerit Antecedens. Unde non valet *Si sto, stare possum; sed possum stare, ergo sto.* Innititur autem talis Paralogismus isto malo Fundamento: *Verum non nisi ex vero;* sic enim virtute procedit: *Ex A sequitur B; sed B est verum, ergo etiam A est verum;* qui profecto discursus non potest inniti nisi isto malo Fundamento: *Verum non nisi ex vero.*

5. Syllogismus Hypotheticus Indirectus est Argumentum Formale, in quo ex Argumentatione Condicionali et Contradictoriâ Consequentis infertur Contradictoria Antecedentis; ut *Si sto, stare possum; sed non possum stare, ergo non sto.* Fundamentum ejus est: *Falsum non nisi ex Falso;* sic enim virtute procedit: *Ex A sequitur B; sed B est falsum, ergo etiam A est falsum;* qui discursus clare fundat se in praedicto Axiomate.

6. Quantum ad ſitum, valde hîc cavendum eſt, ne ſumatur Contradictoria Antecedentis Argumenti Condicionalis, antequam ſumpta fuerit Contradictoria Conſequentis; unde non valet *Si ſto, ſtare poſſum, ſed non ſto, ergo non poſſum ſtare*, qui Paralogiſmus nititur iſto malo Fundamento: *Ex falſo nil niſi falſum*; ſic enim virtute procedit: *Ex A ſequitur B, ſed A non eſt verum, ergo nec B eſt verum*.

7. In Hypothetico utroque, item in Diſjunctivo, poſt Enunciationem Compoſitam, a qua nomen ſuum fortiuntur, ſolet ſuppleri reliquum per quasdam particulas, quae etiam non mediocre compendium et claritatem adferunt iſtis Argumentis. In Syllogiſmo Diſjunctivo, poſitâ Enunciatione Diſjunctivâ (v. g. *Sto vel loquor*), ſic ſupplemus reliquum: *Sed prius eſt falſum, ergo poſterius eſt verum*, vel: *Sed poſterius eſt falſum, ergo prius eſt verum*. In Hypothetico Directo, poſt Argumentationem Conditionalem, ſic ſupplemus reliquum: *Sed prius eſt verum, ergo et poſterius*. In Hypothetico Indirecto, poſt Argumentationem Conditionalem, ſic ſupplemus reliquum: *Sed poſterius eſt falſum, ergo et prius*. Hae particulae, etſi in brevibus noſtris exemplis, quae ſunt *Sto, ſtare poſſum*, etc., nihil compendii facere videntur, id tamen egregie faciunt plerumque inter diſputandum, ubi ſubinde longas periodos neceſſum eſt proponere, a quibus repetendis excuſant nos opportune praedictae clauſulae. Formae horum Argumentorum deſcribi poſſunt ad exemplum praecedentium deſcriptionum; quod omiſi ne prolixior eſſem.

8. Ex hiſce Clauſulis, quae ſunt tres numero, ſcilicet 1. *Sed hoc eſt verum, ergo illud eſt verum*, 2. *Sed hoc eſt falſum, ergo illud eſt falſum*, 3. *Sed hoc eſt falſum, ergo illud eſt verum*, videor admoneri de quarta Clauſula, *Sed hoc eſt verum, ergo illud eſt falſum*, adeoque de quaerenda Argumentatione Formali, in quam Clauſula iſta quadret.

9. Atque Argumentationem illam etiam inveniriſſe videor,

quam pari ratione Syllogismus Copulativum voco, quâ passim quiddam Disjunctivus vocatur. Est autem Syllogismus Copulativus Argumentum Formale, in quo ex Copulativâ negatâ, et unâ ejus parte, infertur Contradictoria partis restantis; ut *Non et sto et loquor, sed sto, ergo non loquor*; in hoc enim Argumento post Enunciationem Copulativam, a qua nomen ei dedi, recte suppletur ista Clausula: *Sed prius est verum, ergo posterius est falsum*, hoc modo: *Non et sto et loquor; sed prius est verum, ergo posterius est falsum*.

10. Fundamentum Syllogismi Copulativi: *Ad Falsitatem Enunciationis Copulativae requiritur Falsitas unius partis*. Virtute enim sic procedit Syllogismus Copulativus: *Copulativa est falsa; sed una ejus pars est vera, ergo altera pars est falsa*, qui discursus sine dubio innititur praedicto Fundamento.

11. Et quamvis haec ita sint, atque Syllogismus Copulativus sic superaddatur tribus reliquis, quantum ad exteriorem Formam et apparatus; acrius tamen ad rem attendenti videbitur nulla ejus ponendi necessitas. Verbo dicam: in re non differt Syllogismus Copulativus a Disjunctivo, sed ad eum reducendus est. Copulativas enim et Disjunctivas Negativas, ut pridem dicebam, non ferimus, sed adhibitâ reductione mutamus in Affirmativas. Quod si fiat in Syllogismo Copulativo, videbis, te non amplius Copulativum, sed Disjunctivum habere prae manibus; v. g. ante citatus Syllogismus Copulativus per Reductionem huc recidit: *Vel non sto, vel non loquor; sed sto, ergo non loquor*; qui jam est perfectus Syllogismus Disjunctivus. Non est enim putandum quod in Syllogismo Disjunctivo, post Enunciationem Disjunctivam, semper subsumi debeat aliqua Enunciatio Negans, sed sufficit Contradictoriam unius partis subsumi (affirmans an negans sit, non refert) et inferri partem restantem; quod fit ad amissim in praedicto Syllogismo Disjunctivo.

## CAPUT V.

*De Enthymemate Soritico.*

1. Enthymema Soriticum eſt Argumentum cum tribus partibus diſperſis per duas Condicionales. Partes intelligo Enunciationes illas ex quibus Enunciatio aliqua Compoſita proxime conſtat. Hoc igitur eſt Enthymema Soriticum: *Si ſtare poſſum, ſum animal; ergo ſi ſto, ſum animal.* Omnia quae de Enthymemate Categorico dicta ſunt hac Parte, Sect. 1. cap. 7. cum proportionem transferenda ſunt ad Enthymema Soriticum. Quod enim ibi duae Propoſitiones, id hîc praeſtant duae Enunciationes Condicionales. Quod ibi tres Termini, hîc tres Partes ſunt: Pars Inferens, quae ponitur tantum in priori Condicionali (qualis in praedicto Enthymemate *Stare poſſum*), Pars Illata, quae tantum ponitur in poſteriori Condicionali (qualis in praedicto Enthymemate *Sto*), Pars Communis, quae in utraque Condicionali ponitur (qualis in praedicto Enthymemate *Sum animal*).

2. Sicut Enthymema Categoricum procedit ex parte Subjecti vel ex parte Praedicati, ſic Soriticum procedit ex parte Antecedentis vel Conſequentis. Et quidem ex parte Antecedentis procedit, cum Inferens et Illata ponuntur ambae ex parte Antecedentis, haec in poſteriori, illa in priori Condicionali; quale eſt Enthymema proxime allegatum. In eo enim Inferens, *Stare poſſum*, obtinet locum Antecedentis in priore Condicionali; Illata, *Sto*, obtinet ſimiliter locum Antecedentis in poſteriori Condicionali. Enthymema dicitur procedere ex parte Conſequentis, quando Inferens et Illata ponuntur ex parte Conſequentis; quale eſt iſtud: *Si ſtare poſſum, ſum animal; ergo ſi ſtare poſſum, ſentire poſſum.* In Enthymemate procedente ex parte Conſequentis, Pars Communis bis ponitur loco Antecedentis. Et in Enthymemate procedente ex parte Antecedentis, Pars Communis bis ponitur loco Conſequentis.



3. Materia Enthymematis Soritici est habitudo Inferentis ad Illatam, qua se habent ut extrema bonae Consequentiae. Potest et vocari *Locus Soriticus*, qui proinde duplex est, nempe Locus ab Antecedente ad Consequens; estque habitudo Inferentis ad Illatam, ut Antecedentis ad Consequens; et Locus a Consequente ad Antecedens, juxta quem Pars Inferens est Conclusio, et Pars Illata Antecedens bonae Consequentiae. Prior proinde potest vocari *Locus Rectus*, posterior *Inversus*. In Loco Recto ponitur hoc Enthymema: *Si sto, stare possum; ergo si sto, sum animal*; ibi enim Pars Inferens, nempe *Stare possum*, est Antecedens Partis Illatae, nempe *Sum animal*; sequitur enim: *Stare possum, ergo sum animal*. In Loco Inverso ponitur istud: *Si sum animal, sentire possum; ergo si stare possum, sentire possum*; ibi enim Inferens, *Sum animal*, est Consequens Illatae, *Stare possum*. Porro non sola bona Argumenta ponuntur in Locis Soriticis, sed et mala; ut illud: *Si sum homo, sum animal; ergo si sum homo, sum bos*; illud enim ponitur in Loco Inverso. Hoc interest inter Bonas et Malas Argumentationes in Locis suis positas, quod Malae quidem admittant, Bonae autem excludant a suo Loco Impudentias ejusdem secum Formae.

4. Ex his patet, sola Enthymemata Soritica habere Locum Soriticum; in his enim solis Pars Inferens et Pars Illata sunt, cum Partes istae non aliter quam per inexistentialiam suam in Enthymemate definiantur. Patet 2., non omne Enthymema Soriticum esse in Loco; cum enim quaevis Enunciatio sumi possit ad officium Inferentis, et quaevis ad officium Illatae, ut constat ex Definitione Enthymematis, clarum est, non debere Inferentem et Illatam habere se ut Extrema bonae Consequentiae. Sic illud Enthymema extra Locum est: *Si sto, stare possum; ergo si loquor, stare possum*, quia inter Inferentem et Illatam nulla Sequela est, nec horsum, nec prorsum. Ex quo etiam colligitur diversitas inter Enthymema Categoricum et Soriticum; omne enim Enthymema Categoricum ponitur in aliquo Loco

bene aut male, id eſt, ſic ut ſit Bonum Argumentum in iſto Loco, vel ſic ut ſit Malum, cum Terminus Inferens, quicumque fumatur, et Illatus quicumque, neceſſario ſe habeant uno ex quator modis quoad praedicationem, *Parte 1. Sect. 2. cap. 1. n. 4.* Cur autem hîc non fumantur totidem habitudines quoad Sequelam inter Partes Inferentem et Illatam, quot ante ſumptae ſunt inter Terminos Inferentem et Illatum quoad Praedicationem, operoſius eſt, quam ut in hoc libello deduci poſſit. Dicam brevibus, ut capiant qn̄i poſſunt: Enunciationes Repugnantes quoad Sequelam nullae ſunt; Diſparatae non fundant Locum juxta quem liceat Argumentari; Convertibiles et Subalternae eodem modo tractandae ſunt in hoc Argumento.

## C A P U T V I.

### *De Sorite.*

1. Sorites eſt Enthymema (nempe Soriticum) cum Supplemento praemiſſo. Supplementum Enthymematis Soritici eſt Enunciatio Condicionalis ex Parte Inferente et Illatâ, tamquam Extremis ſuis, compoſita. Hic igitur Sorites eſt: *Si ſto, ſtare poſſum; ſed ſi ſtare poſſum, ſum animal; ergo ſi ſto, ſum animal;* ibi enim vides primum Enthymema praeced. cap. allegatum cum Supplemento ipſum praecedente. Omnia quae pridem de Syllogiſmo materialiter conſiderato dicebam, cum proportionem transferenda ſunt ad Soritem, quem hactenus etiam materialiter conſideramus.

2. Sicut autem Syllogiſmus in Formâ poſitus non eſt aliud quam Argumentum, in quo praemiſſâ certâ Affirmatione deinceps proceditur juxta aliquod Axioma duorum primorum Quadratorum; ſic Sorites in Forma poſitus non eſt aliud quam Argumentum, in quo praemiſſâ Argumentatione Condicionali deinceps proceditur juxta aliquod ex Axiomatibus Tertii Qua-

drati. Primo igitur ordine naturae ponitur in Sorite Argumentum Condicionale, v. g. hoc: *Si stare possum, sum animal.* Secundo loco dicimus, Antecedens istius Argumenti sequi ex quadam aliâ Enunciatione; et tertio loco inferimus, etiam Consequens ejusdem Argumenti sequi ex eadem Enunciatione; hoc modo: *Si stare possum, sum animal; sed si sto, stare possum; ergo si sto, sum animal;* quae operatio procedit juxta primum Axioma Tertii Quadrati, exhibetque (si ad exteriorem apparatum et Formam attendere vacet) Soritem Affirmativum, Directum, in primâ Figurâ ordinariâ.

(2.) Aut Secundo loco dicimus, Consequens istius Argumenti ex aliâ quâpiam Enunciatione non sequi; et tertio loco inferimus, etiam Antecedens ex eadem Enunciatione non sequi; hoc modo: *Si stare possum, sum animal; sed non si vivens sum, animal sum; ergo non si vivens sum, stare possum,* quae operatio procedit juxta 2. Axiom. 3. Quadr., exhibetque, si exterior Forma te capiat, Soritem Negativum, Directum, in Secunda Figura positum.

(3.) Aut Secundo loco inferimus ex Consequente primi Argumenti Condicionalis certam quâpiam Enunciationem; et tertio loco concludimus, eandem illam Enunciationem etiam sequi ex Antecedente primi istius Argumenti; hoc modo: *Si stare possum, sum animal; sed si sum animal, sum vivens; ergo si stare possum, sum vivens;* quae operatio procedit juxta 3. Axiom. 3. Quadr., exhibetque, quantum ad Formam, Soritem Affirmativum Indirectum, in Prima Figura extraordinaria.

(4.) Aut Secundo loco dicimus, certam aliquam Enunciationem non sequi ex Antecedente primi Argumenti; et inde tertio loco concludimus, eandem illam Enunciationem non sequi ex Consequente ejusdem Argumenti; hoc modo: *Si stare possum, sum animal; sed non si stare possum, sto; ergo non si sum animal, sto;* quae operatio procedit juxta 4. Axiom. 3. Quadr., exhibetque Soritem Negativum, Indirectum, in Tertiâ Figurâ. Praeter

hos nullus Modus suppetit, ut manifestum fiet, si sumpto Argumento Condicionali, seu ejus Antecedente et Consequente, ac tertiâ aliquâ Enunciatione, alias operationes aggredi conatus fueris; videbis enim nullam talium subsistere, sed semper malâ Maximâ nitentem corruiere.

3. Ex his nascuntur Regulae servandae, cum mavis, Intellectu disturbato (quod insuetis et publice versantibus facile accedit) Memoriae et Sensibus committere negotium. Prima Regula: Ad minus una Praemissa debet esse Affirmans in Sorite. Patet ex ejus constructione; primo enim loco juxta ordinem Naturae debet consistere Argumentum Condicionale, et per consequens Affirmativa Enunciatio (*per defin. Argum.*). Peccat ideo iste Sorites: *Non si homo sum, lapis sum; et non si rationalis sum, lapis sum; ergo non si rationalis sum, homo sum.* Secunda Regula: Sorites non potest esse biformis. Tertia Regula: In Primâ Figurâ non potest esse Negativus; in Secundâ aut Tertiâ non potest esse Affirmativus. Quarta Regula: In Primâ ordinariâ et Secundâ non potest esse Indirectus; in Primâ extraordinariâ et Tertiâ non potest esse Directus. Atque hisce quatuor Regulis sufficienter instructus est Sorites, ut omnes a sua Forma abarceat Impudentias. Si vero vel unam ex his Regulis negligat, hoc ipso Formam ejus deformabit Impudentia. V. g. iste Sorites: *Si sum homo, sum animal; et si sum rationalis, sum animal; ergo si sum rationalis, sum homo*, peccat contra tertiam Regulam, ideoque non valet, non sequitur, non potius quam ista impudentia in eâdem Formâ consistens: *Si sum homo, sum animal; et si sum bos, sum animal; ergo si sum bos, sum homo.* Nec mirum; ecce malam Maximam, qua istae operationes nituntur: *Ex quo sequitur Consequens, ex eodem sequitur et Antecedens*, quod falsissimum est. Atque adeo, cum contra aliquam ex his Regulis peccabis, semper talem malam Maximam invenies, qua te abduci siveris. Periculum fac, et videbis.



4. Atque ita fuerunt Argumenta-Formalia-in-Enunciationibus, non quidem penitus omnia, aſt faltem praecipua. Atque haec Recapitulatio eſt: Argumentum-Formale-in-Enunciationibus aliud eſt in una Prima (eſtque repetitio), aliud in duabus Primis (eſtque vel Subalternatio Complexa, vel Syllogiſmus Hypotheticus Directus). Aliud in unâ, et unâ Combinatione Contradictoriarum inter Primas (quo ſpectat Syllogiſmus Diſjunctivus, et Argumentum aliquod innominatum, quale hîc depromitur: *Et ſto et non loquor; ergo non ſi ſto, loquor*). Aliud eſt in duabus combinationibus Contradictoriarum inter Primas (eſtque Converſio Soritica, vel Syllogiſmus Hypotheticus Indirectus). Aliud denique eſt in tribus Primis (quo ſpectat Sorites). Poſſunt etiam haec Argumenta Soritice converti, et ſic ſubinde naſcentur novae Species.

## CAPUT VII.

*De Argumento-Materiali-in-Enunciationibus.*

1. Argumentum-Materiale-in-Enunciationibus eſt Enthymema ſic poſitum in Loco Soritico, ut in eodem loco non ponatur Impudentia ſimilis Formae cum ipſo. Et ſi omiſſis ambagibus ad rem ipſam attendere voluerimus, non eſt aliud quam Argumentum procedens juxta aliquod ex 4. Axiomatis 3. Quadrati, omiſſo tamen Condicionali Argumento, quod Antecedens ac Conſequens, circa quae operatio inſtituitur, ſuppeditat. Unde (1.) ex aliqua Enunciatione inferat Antecedens, et 2. concludit, ex eadem Enunciatione ſequi Conſequens, ſuppreſſo illo Argumento, in quo hoc Conſequens et illud Antecedens perhibeantur; v. g. *Si ſto, ſtare poſſum; ergo ſi ſto, ſum animal*, quae operatio procedit juxta 1. Axio. 3. Quadr., exhibetque Enthymema Affirmativum, poſitum in loco Recto et procedens ex parte Conſequentis.

(2.) Aut primo dicit, Consequens ex certa Enunciatione non sequi; et secundo concludit, etiam Antecedens non sequi ex eadem, suppresso tamen Argumento, in quo sit hoc Antecedens et illud Consequens; v. g. *Non si vivens sum, animal sum; ergo non si vivens sum, stare possum*, quae operatio procedit juxta 2. Axiom. 3. Quadr., exhibetque Enthymema Negativum positum in Loco Inverso, procedens similiter ex parte Consequentis.

(3.) Auferendo priorem Praemissam a Sorite Tertio, operaberis juxta 3. Axio. 3. Quadr., et operatio exhibebit Enthymema Affirmativum, positum in Loco inverso, procedens ex parte Antecedentis.

(4.) Auferendo priorem Praemissam a Sorite Quarto, operaberis juxta 4. Axio. 3. Quadr., et operatio producet Enthymema Negativum positum in Loco Recto, ex parte Consequentis procedens.

2. Ex his sequuntur Regulae: 1. Argumentum-Materiale-in-Enunciationibus non potest esse Biforme. 2. In Loco Recto, ex parte Antecedentis procedens, non potest esse Affirmativum; niteretur hac malâ Maximâ: *Quod sequitur ex Antecedente, sequitur etiam ex Consequente*. 3. In Loco Recto, ex parte Consequentis procedens, non potest esse Negativum; niteretur hac malâ Maximâ: *Ex quo non sequitur Antecedens, ex eo non sequitur Consequens*. 4. In Loco Inverso, ex parte Antecedentis procedens, non potest esse Negativum; niteretur hac malâ Maximâ: *Quod non sequitur ex Consequente, non sequitur ex Antecedente*. 5. In Loco Inverso, ex parte Consequentis procedens, non potest esse Affirmativum; niteretur hac malâ Maximâ: *Ex quo sequitur Consequens, ex eodem sequitur Antecedens*. Absurditas harum Maximarum facile innotescet ei, qui Naturam Consequentiae, et praesertim Subalternarum, perspectam habuerit, *Parte 2. Sect. 2. cap. 9. n. 7.*

## CAPUT VIII.

*De Argumentis Physicis quibusdam.*

1. De singulis Argumentis Physicis differere, et praeter propositum meum, et si cui propositum hoc, is impossibile se aggressum esse, re ipsâ deprehendet; non possunt enim ad certos Canones redigi, cum sint infinita. Vide sis (ut nihil de aliis dicam) omnia Mathematicorum Argumenta. Quaelibet eorum Theoremata sunt quaedam Argumentationes Condicionales; veluti: *Si duo Triangula habeant duo latera aequalia utrumque utrique etc., erunt etiam bases aequales etc.* Item: *Si recta super rectam consistat lineam etc.* Item: *Si duae rectae se mutuo secuerint, angulos ad verticem aequales facient, etc.* Imo quae inter eorum Theoremata simplices Propositiones videntur, re bene attentâ, omnia sunt Argumenta Condicionalia; ut: *Anguli Isoscelium triangulorum ad basim sunt aequales.* Dicere enim volunt et demonstrare, Si Triangulum aliquod sit Isosceles, angulos ei ad basim aequales esse. Quae Consequentiae omnes non aliter investigari et tradi rite possunt, quam per Axiomata et Definitiones quibus nituntur, atque per concatenatas Demonstrationes, quibus ex se mutuo deducuntur. Hoc autem esset integram Geometriam tradere, et confundere cum Logicâ omnes Scientias. Ad haec, ipsâ Theoremata Logica, quibus Argumenta dirigimus, rursum sunt quaedam Argumenta; veluti: *Si ex una Enunc. sequatur alia etc.* et reliqua Axiomata 4. Quadr.; nonne clare et ad oculum sunt Argumentationes Condicionales? Imo reliqua in reliquis et extra reliqua Quadrata Axiomata et Theor. nostra, semper sunt Argumentationes; illud enim *Quod*, quod in illis saepe occurrit, intelligendum est *Si quod*; veluti: *Quod dicitur de Praedicato, dicitur etiam de Subjecto*, hoc est, *Si quid dicatur de Praedicato etc.*; volumus enim dicere, hanc Sequelam valere, hoc Argumentum esse bonum: *Dicitur de Praedicato, ergo dicitur de Subjecto.* De illis autem Theor. non

agit Logicus tamquam de Argumentis dirigendis, sed tamquam de Regulis dirigentibus. Si enim etiam has Regulas velut Argumenta quaedam considerare velit, et rursus Regulis dirigere, aut in circulum res abibit, aut in Infinitum. Ex quo patet, nos, antequam Argumenta Logica conficiamus, antequam ex praescripto Regularum Argumentemur, jam in ipsis Regulis Argumentari. Regula enim Argumenti Argumentum est. Et caeterae quidem operationes Argumentis, Argumenta vero non nisi Argumentis diriguntur.

2. Quae quamvis ita sint, et Logica non omnia Argumenta, nec sua, nec aliarum Scientiarum dirigat; omnes tamen Scientiae ei incumbunt, et ipsa sibi quoad prima ejus Theoremata, praefertim quoad istud Axioma, *Ex vero nil nisi verum*. Omnes enim Disciplinae ex Principiis quibusdam deducunt suas Conclusiones, easque postmodum tam sanctas ac veras habent quam ipsa Principia; idque jure; sed totum illud Jus ex hac Lege est, et hac lege sublatâ non esset nisi stulta praesumptio. Item, *Quod sequitur ad Consequens, sequitur ad Antecedens*. V. g. Mathematici afferunt, et merito, posteriores suas Propositiones, quae nempe ex prioribus eliciuntur, non cedere in certitudine ac evidentia prioribus Propositionibus, quae nempe immediate deducuntur ex Principiis; unde in ista concatenatione suarum Propositionum nituntur isto Theoremate Logico: *Quod sequitur ad Consequens, sequitur ad Antecedens*, quod Axioma nec demonstrant ipsi, nec inter Communes Notiones seu Principia praeferunt; idque, ut omnia eorum sunt, circumspecte; hoc enim Axioma ex Logicâ tamquam Scientiâ naturâ priori supponendum erat. Quam saepe iidem non utuntur isto Axiomate: *Falsum non nisi ex falso*; nempe in omnibus Demonstrationibus indirectis, quas ipsi Negativas vocant. Item: *Ad veritatem Enunciationis Disjunctivae requiritur veritas alicujus partis*. Unde etiam saepe utuntur Syllogismo Disjunctivo in Forma posito, sic procedentes: *Vel A vel B est; sed A non est* (quod quibusdam



interjectis demonstrant), *ergo B est*. Ad haec, nulla Disciplina dubitat Subjecto tribuere quod de Praedicato demonstravit; ut, cum Triangulum habet angulos aequales duobus rectis, etiam Triangulum aequilaterum habere angulos aequales duobus rectis, etc. Et sic Cubo nostro incubant omnes Scientiae, eumque aperte et re ipsâ fatentur se priorem esse. Nulla autem propinquius ei incubat, quam ipsa Logica.

3. Etsi igitur de Argumentis Physicis nobis hîc ex professio tractandum non sit, quaedam tamen Argumenta Physica, quae Logicis propinquiora videntur, producemus in medium. Et primo quidem Argumentum a Majori ad Minus, et Argumentum a Minori ad Majus, quae exteriorem apparatus similem habent cum Argumentis Topicis, et subinde etiam sunt vera Argumenta Logica, praesertim a genere ad speciem aut contra.

4. Majus est id quocum Terminus verisimiliter connectitur quam cum alio, ad quod comparatur; ut *Elabi per foramen* verisimiliter connectitur cum *Gracili* quam cum *Obeso*, cum *Pygmaeo* quam cum *Gigante*; adeoque *Gracilis* aut *Pygmaeus* ibi est majus. Minus est id quocum minus verisimiliter aliquid connectitur, quam cum alio. Ut *Elabi per foramen aliquod in carcere* minus verisimiliter connectitur cum *Obeso* aut *Gigante*, adeoque *Gigas* in casu posito est minus. His respondet Commune, quod cum duobus sic connectitur, ut cum uno eorum verisimiliter, cum altero minus verisimiliter connectatur; ut in casu posito *Elabi per etc.*

5. A Majori ad Minus tantum argumentamur negative; v. g. *Gracilis non poterat elabi per illud foramen e carcere, ergo nec obesus poterit*; non autem affirmative, quia non sequitur *Gracilis potest elabi, ergo et obesus poterit*. A Minori ad Majus tantum argumentamur affirmative; v. g. *Obesus potuit elabi, ergo gracilis etiam poterit*; non autem negative: *Obesus non poterat elabi, ergo nec gracilis poterit*. Ex quo vides, Argu-

menta a Majori ad Minus, et a Minori ad Majus, ſibi mutuo correfpondere per Converſionem Soriticam.

6. Nota quofdam imperite confundere Argumenta a Majori et a Minori; quod fit ex ignorantia Definitionis. Neſciunt enim, quid hîc debeat dici *Majus*, quid *Minus*, atque ideo id omne, quod majorem molem aut ſpeciem prae ſe fert, *Majus* vocant. Nec dubitarent hoc Argumentum: *Obefus poteſt elabi per hoc foramen carceris, ergo et gracilis poterit*, vocare Argumentum a Majori. Sicut et illud vocant Argumentum a Majori: *Deus dat vitam, ergo dabit et victum*, cum utrumque fit Argumentum a Minori. Quod ut videant, notent in Argumento-a-Majore-ad-Minus, poſt Copulam Illativam *Ergo*, apte ſubjici illam particulam: *Multo minus*; id enim ſignum eſt, *Minus* reperiri in Conſequentē, et *Majus* praeeſſiſſe in Antecedente. Sic apte dicimus: *Gracilis non poteſt elabi per illud foramen, ergo multo minus obefus poterit*; ubi nota, in ipſo Argumento *Obefum* vocari *Minus*. In Argumento autem a-Minori-ad-Majus, poſt Notam Illativam, apte ſubditur illa particula: *Multo Magis*; ut: *Deus dat vitam, ergo multo magis dabit victum*; ubi *Dare victum* vocatur *Majus*, aut potius *Magis* in ipſo Argumento, ita ut *Dare vitam* ſit Minus hîc. Unde hoc a Majori eſt: *Homo non dat victum, ergo multo minus dabit vitam*.

7. Nota ſecundo, Argumenta a Majori et a Minori, dum ex parte Praedicati procedunt, plerumque eſſe Argumenta a genere vel a ſpecie. Ut hoc Argumentum a Majori: *Petrus non poteſt ferre quinquaginta libras, ergo Petrus non poteſt ferre centum libras*, eſt Argumentum a genere ad ſpeciem, quia *Potens ferre quinquaginta* ſubalternat, et *Potens ferre centum* ſubalternatur. Iſtud autem: *Poteſt ferre centum, ergo poteſt ferre quinquaginta*, eſt et a Minori ad Majus, et ſimul etiam a Specie ad Genus.

8. Atque haec de Argumentationibus illis inter Logicas et Phyſicas velut ambigentibus. Argumentum Phyſicum et ſtabile

dividitur in Metaphysicum et simpliciter Physicum. Metaphysicum est quod ex Affectionibus Metaphysicis desumitur; ut Argumentum a Causa, a Causato, a Parte, a Toto, a Subjecto, ab Adjunctis, etc. Sed exprimendum hîc ulcus quoddam inveteratum et sordidum, ac Arti nostrae restituendus nitor suus et pristina sanitas. Ab Aristotele in hunc usque diem Logici putant se intra sua pomaeria versari, dum per has Argumentorum Metaphysicorum ambages et confusos Locos ac Canones, volutantur potius quam procedunt. Ex his quantae turbæ, quanta vertigo et confusio in Logicam irruerint, quantum de existimatione ejus apud omnes probos discefferit, non possum tam brevibus, quam instituti mei ratio requirat, expedire. Hoc sciant modo Logici isti, se in alieno choro pedem posuisse. Canones, quibus utuntur, *Causa causæ est etiam causa causati, Qualis effectus talis causa, Quale Totum simile, talis et pars ejus, etc.* non aliud clamant quam patriam suam, et se in mediâ Metaphysicâ natos; ibidem tamen plerumque reprobi sunt et ad spongiam damnati. Sed si divellere et excerpere est animus, quod in centonem aliquem conferant, cur id in Metaphysicâ tantum audent? cur non etiam ex aliis Scientiis lacinias sibi comparant Logici? Cur non infarciunt Locum a Latere ad Angulum subtensum, Locum ab Angulo interno ad Angulum externum oppositum? (Canones erunt: *Majori angulo majus latus subtenditur*, item: *Angulus externus interno opposito major est*, et infinita talia Matheſeos Theoremata.) Cur non Locum a Morbis ad Remedia? (Canon generalis erit: *Contraria contrariis curanda*; specialis: *Victus humidus febricitantibus omnibus convenit*, et sexcenti similes Aphorismi.) Cur non alios Locos ex Jure, alios ex Theologiâ, et aliunde infinitos alios coacerant? Id enim pari jure licebat, imo pari ratione postulante fieri debebat, si non mutilum et abruptum, sed, ut decebat, continuum aliquem ac integrum contextum exhibere studuissent. Quamvis etiam contextus ille, qui Locos Metaphysicos con-

cernit, ſemper mancus ſit et melioribus ſuis partibus detruncatus. Non enim demonſtrant, quod iis ſummopere demonſtrandum fuerat, plures e Metaphyſica Locos peti non poſſe, alios, praeter eos quos allegant, Canones in iſtis Locis non reperiri; ſed quiſque, velut Scholae ſuae tyrannus, pro libidine ſua leges figit ac reſigit, hic plures, ille pauciores Canones fancit.

9. Locus a Caſibus, a Conjugatis, ab Etymologiâ et ſimilis farinae complures, non ſunt Loci, ſed Rhetorum floſculi, ſaepe frivoli, nullumque ex iis ſolidum Argumentum deducitur. Sed ne ego hîc deſuiſſe videar, praeclaris iſtis Locis auctarium facio, Locum a nomine poſitis literis, ad idem nomen tranſpoſitis literis exaratum (quod *Anagramma* vocant), otioſas aevi noſtri nugae; et ſi vacat, ex egregio Loco egregium Argumentum depromo. *Ego ſum Geulinx, ergo ego ſum gelu, nix*; aut quod forte magis magnificum erit, *Ego ſum Geulinx, ergo ego ſum genI lux*. Sed miſſis ineptiis et ſuperſtitionibus iſtis, veniamus ad ſeria.

## CAPUT IX.

### *De Cubo Logico.*

1. Cubus Logicus reſolvitur in ſex Quadrata; quodlibet Quadratum in quatuor Axiomata. Axioma voco Propositionem neceſſariam et per ſe notam, aut ex tali evidenter demonſtratam. Axiomatis Cubum Logicum ingredientis hae ſunt condiciones. Primo debet dirigere Argumentationem; ex quo ſequitur, quod debeat eſſe Argumentum (Argumentum enim non niſi Argumento dirigitur). Si Argumentum, ergo et Enunciatio Affirmativa (*per defin. Argu.*). Unde hoc Axioma: *Non, ſi quidpiam dicatur de Subjecto, ideo dicetur etiam de Praedicato*, non eſt Axioma idoneum pro Cubo Logico; non enim dirigit Argumentationem aliquam, cum non praefcribat, quid ex quo ſequatur, ſed quid ex quo non ſequatur. Omnia igitur Axio-



mata quae sunt Enunciationes Negativae, per hanc condicionem excluduntur a Cubo nostro. Sed dices: Parte 1. sect. 1. cap. 3. n. 1. diximus, in quolibet Quadrato Logico duo Axiomata Negativa reperiri. Respond.: non dici Axiomata in Quadratis nostris Negativa, quasi ipsa secundum se sint Enunciationes Negativae, sed quia dirigunt Argumenta Negativa, ipsaeque sunt etiam quaedam Argumenta Negativa; quo pacto autem Argumentum aliquod Negativum dicatur, vide hac parte, sect. 1. cap. 10. n. 1.

2. Secunda Condicio est, ut Axioma sit Logicum, deductum nempe ex Affectionibus seu Proprietatibus Consequentiae ut sic; non autem ex Affectionibus Consequentiae in hac vel illa materia versantis. Nimirum (1.) si Consequentiam ut sic intuear, video Antecedens et Consequens; haec enim necessario et proxime ex naturâ ejus dimanant (*parte 2. sect. 2. cap. 6. n. 1.*). Atque hinc comparando penes Consequentiam Antecedens et Consequens cum aliquo tertio, nanciscor facile hoc Axioma: *Ex quo sequitur Antecedens, ex eo sequitur et Consequens*, ac reliqua Axiomata Tertii Quadrati. (2.) Considerando Antecedens et Consequens etiam abstractim ab omni materia in qua versentur, facile deprehendo, quod dicant esse vel non esse, adeoque quod sint Enunciationes, adeoque vera vel falsa. Enunciationem rursum secundum se et ab omni materia abstractam non possum cogitare, nisi videam ei Contradictoriam correspondere; adeoque nanciscor facile hoc Axioma: *Si ex una Enunc. sequatur alia, ex Contradic. hujus sequetur Contradic. illius*; et ex hoc reliqua Axiomata Quarti Quadrati. (3.) Enunciationem ab omni materia separatam cogitando, clare video eam vel unicam seu simplicem esse debere, vel plures seu compositam; et siquidem sint plures Enunciationes, vel disjungi illas plures Enunciationes vel copulari (*parte 2. sect. 1. cap. 4. n. 1.*); adeoque emergit Enunciatio Copulativa et Enunciatio Disjunctiva. In Copulativâ facile invenio hanc Proprietatem:

*Ad veritatem ejus requiritur veritas omnium partium, eaque sufficit.* In Disjunctivâ hanc: *Ad veritatem ejus sufficit veritas unius partis, eaque requiritur*; et sic adhibito simul praescripto Quarti Quadrati, Sextum Quadratum detectum est. (4.) Considerando Enunciationem simplicem in genere et ab omni materia seclusam, video eam aut Affirmationem aut Negationem esse (*parte 2. sect. 1. cap. 3. n. 1. et 2.*). In Affirmatione, ut sic, video Subjectum et Praedicatum (*parte 1. sect. 1. cap. 1. n. 3.*). Et ex natura Subjecti ac Praedicati facile deduco hanc Proprietatem: *Quod dicitur de Praedicato, dicitur de Subjecto*, et *De quo dicitur Subjectum, de eodem et Praedicatum*; ideoque adhibito artificio Quarti Quadrati, nacti etiam sumus Primum Quadratum. (5.) Speculando Subjectum et Praedicatum video, quodlibet eorum aut unum esse aut multa; et sic Terminum Communem seu Universalem nactus sum, qui non est aliud quam multi Termini. Atqui multa in Termino Comuni vel disjunguntur vel copulantur, et utrumque vel presse vel laxè (*parte 1. sect. 2. cap. 5. et 6.*); et sic Terminum distributum ac Terminum particulariter sumptum detexi. Ex quorum naturâ facile, ceu Proprietates, dimanant Axiomata 2. et 5. Quadrati, cooperante Quarto Quadrato. Per hanc Secundam Conditionem excluduntur a Cubo nostro omnia illa Axiomata, quae quidem Consequentiam aliquam dirigunt, sed Consequentiam non praecifam, aut positam in materiâ non Logicâ, seu in materiâ non dimanante ex Consequentia ut sic; v. g. *Totum est majus sua parte*; *Quae sunt aequalia uni tertio, sunt aequalia inter se, etc.*, quae quidem quamplurimas Argumentationes dirigunt in Mathefi, sed ponuntur extra materiam Logicam. Tales sunt etiam Canones Metaphysici, quos violenter in Logicam egit vulgus Logicorum, quando scilicet boni sunt.

3. Atque hae sunt Condiciones Axiomatis in Cubum nostrum admittendi. Condiciones Quadrati sunt, ut duo talia Axiomata Affirmativa sensu affinia congreget; Affirmativa, id est, quae

dirigant Argumentationes Affirmativas. Defectu hujus condicionis, Appendicium Secundi Quadrati non excrefcit in perfectum Quadratum; quia Axiomati Affirmativo, quod ibidem primo fumitur, non invenitur aliud Affirmativum affine. Secunda Condicio est, ut ex duobus illis Affirmativis proliciat per Conversionem Soriticam duo Negativa Axiomata, id est, dirigentia Argumentationes Negativas.

4. Tandem Condicio Cubi Logici est, ut sex similibus Quadratis totam Logicorum Argumentorum compagem sustineat. Quod Cubus noster egregie praestat; nam Argumenta-in-Terminis, Primo, Secundo, et Quarto Quadrato suffulta sunt; Argumenta-in-Enunciationibus tribus reliquis Quadratis sustentantur. Non est igitur opus ut alio se vertat, qui Cubo isto bene instructus est; hoc ipso enim quidquid est in Logicâ Argumentorum exacte sciet. Quinimo de Formâ aut Materiâ Argumentorum Logicorum sollicitus esse non debet; eam enim ex Cubo et ipse inveniet, et si quid ab aliis erratum sit, deprehendet. Unde ex praescripto Cubi procedendo, Syllogismus non est aliud quam Argumentum, in quo praemissâ Affirmatione deinceps agitur juxta aliquod Axioma duorum primorum Quadratorum. Argumentum Topicum est Argumentum, quod omissâ illâ Affirmatione idem praestat. Sorites est Argumentum, quod praemissâ Argumentatione Condicionali, deinceps agit juxta aliquod Axioma Tertii Quadrati. Argumentum Materiale ei correspondens est Argumentum, quod omissâ illa Argumentatione Condicionali, idem praestat. Conversio Soritica et Hypotheticus Indirectus agunt juxta Quartum Quadratum. Et Hypotheticus a Conversione Affirmativâ differt, quod in illâ utrumque Argumentum sit Condicionale, in hoc posterius Argumentum sit Rationale; de caetero eodem principio nituntur: *Si ex Enunc. sequatur alia, ex Contradict. hujus sequetur Contradict. istius.* Perge sic ad reliqua Argumenta Logica.

5. Sed restant Difficultates aliquot exsolvendae. (1.) Si Qua-

drata sufficiant, cur igitur Appendix ad Secundum Quadr.? Respond.: facilitatis causâ. Alioqui Axiomata Appendicis continentur satis in Axiomatibus Quadratorum. Primum enim Axioma Appendicis continetur in 1. Axio. 1. Quadr. et in 1. Axio. 2. Quadr. simul sumptis; quod enim dicitur de uno Concordium (Praedicato), dicitur de Subjecto communi utriusque Concordium (ubi militat 1. Axio. 1. Quadr.), et quod dicitur de Subjecto illo, dicitur de altero Concordium particulariter sumpto, id est, de Praedicato particulariter sumpto (ubi militat 1. Axio. 2. Quadr.). Secundum autem Axioma Appendicis continetur in 2. Axio. 2. Quadr. et 2. Axio. 1. Quadr.

(2.) Secunda Difficultas: Si Cubus sufficiat, tam operosa Formae ac Materiae in Argumentis descriptio cui bono est? Respond.: insinuavi aliquid hac parte sect. 2. cap. 11. n. 4., item hac sect. cap. 6. n. 3., quia facilius est Memoriâ et sensibus uti, quam Intellectu, praesertim inassuetis et in Publico versantibus. Deinde Cubus supponit Argumenta pura; hinc labor resolvendi si Praegnantia proponantur; Forma autem etiam Praegnantia ista complectitur. Si quis tamen satis firmo et praesenti in rem animo sit, auctor sim, ut ad Formam istam nunquam attendat, sed Cubo nostro contentus sit; id enim humanius est, cum alterum illud magis animale sit.

(3.) Tertia Difficultas est: Quomodo Cubus ille sufficiat Argumento-a-Repug.; hoc enim est Argumentum Difforme, omnes autem Maximae in Cubo sunt Uniformes seu directrices Argumentorum Uniformium. Respond.: Argumentum-a-Repug. fundatur in 2. Axio. 2. Quadr. Quando enim unus Repugnantium Affirmatur de aliquo Subjecto, quoniam de hoc Praedicato distributo Negatur alius Repugnantium (*parte 3. sect. 2. cap. 2. n. 4. et n. 23.*); hinc etiam alius ille Repugnantium negatur de illo Subjecto (per 2. Axio. 2. Quadr.). Hoc interim verum est, Argumentum-a-Repug., quatenus Difforme, non dirigi ab isto Axiomate; unde etiam aliam Maximam ei praescripsi, ubi



de ipso tractavi. Sed quid refert? Absolute, ut vides, isto Axiomate dirigitur.

(4.) Quarta Difficultas est circa Syllogismum Hypotheticum Directum ac Argumenta-a-Divisis-ad-Conjuncta et contra. Non apparet enim, in quo Axiomate Cubi fundentur. Respond.: Argumenta illa videntur ad Repetitionem spectare; ideoque ante Cubum nostrum sunt, innixa isti Principio: *Si est, est.* Si enim integrum Principium Directivum Hypothetici Directi, v. g. hujus: *Si sto, stare possum; sed sto, ergo stare possum*, tibi proponas, non aliud invenies quam hoc: *Si ex Antecedente sequatur Consequens, ex Antecedente sequetur Consequens*, id est, *Si est, est.* Igitur qua fronte Hypothetici Directi Disputationes publicas frequentant, et tam crebro ad Probandum assumuntur? Argumentum-a-Divisis-ad-Conjuncta, si Maximas ejus indages, etiam Repetitionem esse videbis. Una Maxima: *De quo dicuntur Praedicata Divisa, de eo etiam dicuntur Praedicata Conjuncta.* Sed quid refert, Divisa an Conjuncta sint? Eadem esse debent utroque casu; ni fuerint, non valebit Argumentum, juxta Regulas ejus, parte 3. sect. 2. cap. 7. n. 2. et 6. De reliquis ejus Maximis, atque de Maximis Argumenti-a-Conjunctis-ad-Divisa, idem esto judicium.

---

---

## PARS IV.

### . SECTIO I.

#### De Instrumentis Logicis.

Fructus Logicae sunt Instrumenta; quo haec rite fiant, illa discitur et docetur. Sed noli hic malleum, aut ferram, aut calamum, aut citharam, similiaque vocata passim Instrumenta cogitare, sed Instrumenta Scientiarum cogita. Illa hic perdiscenda sunt; eo fine caetera praemissa sunt.

#### CAPUT I.

##### *De Instrumento Logico in genere.*

1. Instrumentum Logicum est apta responsio ad quaestionem Scientificam. Quaestionem Scientificam voco, qua passim in tradendis Scientiis uti consuevimus. Et non est aliud quam quaestio *Quid est?* aut ex ea nata; v. g. si petatur: *Quid est Corpus?* respondeasque: *Corpus est ens extensum*, haec responsio est instrumentum. Nisi malis dicere Formulam illam Respondendi esse Instrumentum Scientiae, Responsonem autem ipsissimam Scientiam esse; quod magis exactum et accuratum est.

2. Quaestio Scientifica dividitur in primam et secundam. Prima est, quae ex alia quaestione non nascitur. Et talis est sola quaestio *Quid est?* Etiam si enim aliquando soleamus quaerere, quomodo vocetur, antequam exacte sciamus, quid sit (v. g. in hortis Botanicorum: *Quomodo vocatur ista herba?*), tamen etiam

tunc aliquatenus scimus, quid sit (quomodo enim alioqui interrogare possemus: *Quomodo vocatur?*), et ex illa quaestione *Quomodo vocatur?* non nascitur quaestio *Quid est?* cum scientes, quomodo vocetur, nihilo plus instructi simus ad exacte sciendum, quid sit, per se loquendo. Cur ergo, inquis, tam avide quaerunt in hortis Botanicorum: *Quomodo vocatur haec Herba, iste frutex?* et in Theatro Anatomico: *Quomodo vocatur iste musculus, ista vena?* et curru vel navi praetervecti: *Quomodo vocatur iste Pagus, istud Castellum?* Respondeo: ut si quid ipsi ante sciverint, vel imposterum ab aliis audiant, possint conjungere cum imperfectâ illâ scientiâ, quam hîc sensûs beneficio conquirunt, atque ita ad usus humanae vitae accommodare.

3. Quaestio Secunda est quaestio ex quaestione nata, scientifica nempe ex scientifica. Quaestio autem non per se nascitur ex quaestione, sed per accidens, cum nempe ex responsione ad unam quaestionem, sequitur responsio ad aliam quaestionem; v. g. *Quid est Essentia?* Haec est prima quaestio circa Essentiam; cui respondemus: *Essentia est Praedicatum in Subjecto, id est Praedicatum quod praecedit ex parte Subjecti, antequam veniat ad locum sibi destinatum.* Ex qua responsione facile parati sumus ad respondendum isti quaestioni: *Quotuplex est Essentia?* Cum enim Praedicatum, quod etiam praecedit Copulam, stare possit ab anteriore illâ parte, vel ut integrum Extremum, vel ut pars istius Extremi, hinc etiam inventa est responsio ad quaestionem: *Quotuplex est Essentia?* Nempe oportet, ut quaedam praecedat Copulam, tamquam integrum Extremum consistens ante Copulam; quaedam tantum ut pars istius Extremi; hanc *Partialem*, illam *Totalem Essentiam* voco.

4. Hinc patet, multas esse quaestiones non scientificas; v. g. *An existat Carolus? An exsul fuerit? An uxorem ducturus sit? Ubi regat? Ubi degat?* Hae, inquam, et similes non sunt scientificae quaestiones; non enim nascuntur ex quaestione *Quid est?* Quantumcunque enim scias exacte respondere ad quaestionem

*Quid est Carolus?* (aliud autem respondere non poteris, quam *Carolus est homo hic*), nihilo per hoc instructor eris, ut respondeas praedictis quaestionibus. Non enim ex hac responsione: *Carolus est homo hic*, sequitur ergo *Carolus existit*, seu *Carolus est in vivis* (quae est responsio ad primam quaestionem propositam), nec sequitur *Est homo hic*, ergo *fuit exsul*, ergo *uxorem ducet*, ergo *degit et regit in Angliâ*.

5. Ex quo jam clare intelligitur illud Axioma Philosophorum: *Contingentium non est Scientia*. Scientia enim proprie dicta, et quae ad Disciplinas spectat, non est aliud quam apta responsio ad quaestionem *Quid est?* aut ad quaestionem inde natam; jam autem nec ad quaestionem *Quid est?* per Contingentem propositionem responderi potest, nec ex responsione ad quaestionem *Quid est?* Contingens propositio sequi potest. Non prius, quia ad quaestionem *Quid est?* responderi non potest nisi per Essentiam Subjecti, de quo quaeritur, quid sit. Jam vero talis affirmatio est necessaria, imo fons necessitatis, ut patet ex supra dictis. Non posterius, quia tunc ex Necessario sequeretur Contingens, quod est impossibile. Hinc, Carolum esse, eum esse regem, exulem fuisse, uxorem ducturum, degere in Angliâ, non ex Disciplinâ aliquâ vel Scientiâ profiteamur, sed ex Sensu vel Historiâ aliorumque narratione.

6. Dicunt etiam Philosophi, *Singularium non esse Scientiam*. Quod de Scientiâ speciali et notatu dignâ accipio. Alioqui datur prima Scientia Singularium, cum ea non sit aliud quam responsio ad Quaestionem *Quid est?* seu Definitio, quae circa singularia valde obvia est, adeo ut loco nominum eorum, quibus plerumque hîc destituimur, circumferamus eorum Definitiones; v. g. *Haec charta*, *Hic calamus*, *Haec mensa*, Definitiones sunt et non nomina. Errant igitur qui dicunt, Singularia definiri non posse; potiori jure dixissent, ea non nisi definiri posse; nominari enim extra Humanam speciem vix solent, et ut universim nominentur, inutile est, imo impossibile. Ex primâ illâ Scientiâ



Singularium, quam loco nominum eorum circumferimus, non refultat alia. Non *Quotuplex est?* quia Singulare est individuum. Non *Quodnam est?* quia Exemplum Definitionis Singularis non differt ab ipfa. Similiter quaestio *Cur est?* nihil speciale potest elicere circa Singulare, quod non praecesserit circa Speciem ejus seu circa Superius ejus.

## CAPUT II.

*De Numero Instrumentorum Logicorum.*

1. Numerus Instrumentorum Logicorum numero Quaestionum scientificarum par est. Videtur autem numerus Quaestionum scientificarum quaternario definiri: *Quid est?* *Quod est?* *Quotuplex est?* et *Cur est?*

2. Et prima quidem harum Quaestionum est *Quid est?* Frustra enim aliquid aliorum scire desiderat, qui necdum, quid sit, perceperit. Ex hac primâ Quaestione scientificâ facile et primo, ut apparet, loco nascitur Quaestio *Quodnam est?* cum nempe, subjectâ responsione ad quaestionem *Quid est?* petimus *Quodnam est?* v. g. hoc ordine procedentes: *Quid est Essentia?* Respondetur: *Praedicatum in Subjecto*. Rursum: *Quodnam est tale Praedicatum*, seu, *Da tale Praedicatum*. Resp. *Homo respectu hominis albi*; haec enim responsio facile elicitur ex responsione ad primam quaestionem. Cum enim Essentia sit Praedicatum in Subjecto, posito hoc praedicato, *Homo*, et hoc illius subjecto, *Homo albus*, necessum erit, illud praedicatum hujus subjecti essentiam esse, cum illud praedicatum sit in hoc subjecto.

3. Tertio loco occurrit Quaestio *Quotuplex est?* v. g. *Quotuplex est Essentia?* Quae quomodo ex Quaestione *Quid est Essentia?* dimanet, supra ostendi. Atque hae sunt Quaestiones scientificae, quae versantur potissimum circa Terminos seu circa

Subjecta incomplexa; quamvis tamen suo modo etiam versari possint circa Enunciationes, ut infra patebit.

4. Quarto loco occurrit Quaestio *Cur est?* Et haec versatur circa Subjectum complexum, seu circa Enunciationem; v. g. *Cur Essentia est prior Accidente?* Respondetur: *Quia Essentia est in Subjecto, Accidentis vero tantum consistit ex parte Praedicati.* Et quod haec responsio facile sequatur ex responsione ad Quaestionem *Quid est Essentia?* per se notum videtur.

5. Sed difficultas suboritur circa Quaestionem *An est?* nam et illa inter Scientificas computanda videatur. Videtur enim etiam ex Quaestione, *Quid est?* deduci posse; v. g. *An essentia sit prior Accidente?* Responsio ad hanc quaestionem non minus sequitur ex responsione ad quaestionem *Quid est Essentia?* quam quaestio *Cur Essentia est prior Accidente* ex eadem sequatur. Sed respondeo, Quaestionem *An est?* complicari cum caeteris quaestionibus scientificis, et praesertim cum Quaestione *Cur est?* V. g. *An Essentia sit in Subjecto?* complicatur Quaestioni *Quid est Essentia?* imo in re est illa ipsa quaestio. Magis ordinarie Quaestio *An est?* complicatur Quaestioni *Cur est?* ut infra patebit. Saepe etiam Quaestio *An est?* non est Scientifica, quando nempe non nascitur ex Quaestione *Quid est?* v. g. *An Carolus est rex?*

6. Cum igitur instrumentum non sit aliud quam apta responsio ad Quaestionem scientificam, quatuor autem dumtaxat occurrant tales quaestiones, patet, quatuor etiam dumtaxat Instrumenta assignari debere. Nempe Definitionem, qua respondemus ad quaestionem *Quid est?* Exemplum, quo subjectâ Definitione respondemus ad quaestionem *Quod est?* Divisionem, qua respondemus ad quaestionem *Quotuplex est?* Et denique Rationem, qua respondemus ad quaestionem *Cur est?* Ex quo patet, Methodum a quibusdam male connumerari cum Instrumentis, cum illa non sit Instrumentum, sed plurium Instrumentorum apta inter se coordinatio. Ac proinde hujus tractatio non spectat etiam ad Logicam nisi per accidentis.

7. Ex his patet, Quid sit Logica? Nempe Ars respondendi ad Quaestiones scientificas. Sunt autem istae responsiones, materialiter consideratae, ipsae Scientiae; unde et Logica est Ars Sciendi.

## CAPUT III.

*De Definitione.*

1. Definitio est apta responsio ad Quaestionem *Quid est!* Eique adhaeret Definitum, quod non est aliud quam id de quo quaeritur, quid sit, subsequente aptâ responsione; v. g. *Quid est Essentia?* respond. *Praedicatum in Subiecto*; hîc *Essentia* Definitum est, *Praedicatum in Subiecto* Definitio.

2. Nota, Quaestionem *Quid est?* subinde improprie sumi, ut coincidat cum Quaestione *Quomodo vocatur?* Ut cum in dissectionibus Anatomicis passim quaerunt ignari: *Quid est hoc?* respond. v. g. *Diaphragma*; *Quid est istud?* respond. v. g. *Pancreas*, etc. Similiter pueri, cum primum loqui incipiunt, de quibuscumque rebus sensum incurrentibus, petunt: *Quid est hoc?* *Quid est illud?* Respondent matres: *Hoc est piscis, hoc est liber, etc.* Pueri autem eo casu non nisi nomina quaerunt; unde iis etiam non aliter quam nomen reddendo respondetur; eâ nempe cognitione, quam sensus ingerit, contenti sunt, nomina autem naturaliter petunt, quo possint imposterum intelligere aliorum sermones, cum eos de his aut illis rebus loquentes audient. Sic ego hîc non capio Quaestionem *Quid est?* ut solummodo nomen rei exquirat; sed intelligo Quaestionem *Quid est?* proprie sumptam, cui non satisfit nisi Definitione. Atque hoc est discrimen inter Quaestionem *Quid est?* proprie et improprie sumptam, quod improprie sumpta tantum demonstrat; v. g. *Quid est hoc?* *Quid est istud?* proprie autem sumpta, non simpliciter demonstrat, sed nomen promit istius rei, de qua

instituitur Quaestio; v. g. *Quid est Essentia? Quid est Praedicatum? Quid est Logica? etc.*

3. Definitio distinguitur in Applicantem et Applicatam. Definitio applicata est praecisa responsio ad quaestionem *Quid est?* nihil scilicet resumens ex quaestione. Atque Definitio applicata semper est Terminus aliquis; v. g. *Praedicatum in Subjecto* est definitio *Essentiae*. Hinc Definitio applicata vocari posset *Terminus Definiens*. Definitio applicans est propositio, in qua Definitio applicata affirmatur de Definitio, ut *Essentia est Praedicatum in Subjecto*; haec non est tam praecisa responsio ad quaestionem *Quid est?* sed ex quaestione mutuatur sibi Subjectum et Copulam. Interim Definitione applicatâ respondentes ad quaestionem *Quid est?* implicite etiam resumimus Subjectum et Copulam ex quaestione, licet expressè tantum reddamus Praedicatum, seu Terminum definiensem.

4. Definiuntur proprie Termini; illis enim subjectis, proprie quaeritur *Quid sint?* v. g. *Quid est Corpus? Quid est Lapis? etc.* Sed tamen etiam suo modo definiuntur Enunciationes; nec omnino tam inepte, illis subjectis, quaeritur *Quid sint?* v. g. *Quid est, solum animal sentit?* Respond. *Id est, et animal sentit, et nihil distinctum ab animale sentit.* Igitur Definitio Enunciationum non sic vocatur, sed vocatur *Expositio Enunciationum*, de qua supra dictum, *parte 2. sect. 2. cap. 4.*; quodque ibi Exposita, id hîc Definitum, quod ibi Exponens, hîc Terminus definiens est, cum proportionem.

5. Inquiunt Philosophi: *Scire est per Definitionem cognoscere.* Scire non est aliud quam, in promptu habere responsionem ad Quaestionem scientificam; omnis autem Quaestio scientifica vel est quaestio *Quid est?* ad quam respondetur per Definitionem, vel est quaestio inde nata. Itaque Definitio totum humanum scire complectitur; quidquid sciendum est, inde eliciendum est. Hoc tamen non crude de Definitionibus Formalibus intelligo, sed Definitiones Eminentes etiam comprehendo; de quibus infra.



6. Inquiunt et Philosophi : *Oportet Discipulum credere*. Discipulus, inquam, debet Magistro suo credere Definitiones. V.g. *Quod Essentia sit praedicatum in subjecto, quod Forma sit Essentia adjectiva, quod Subjectum sit id de quo affirmamus, etc.* Hoc autem non est aliud quam, haec et illa sic vocari, aut faltem sic vocari a Docente. Qualis fides merito debetur Docenti; cum enim acturus sit de rebus, quas vulgus non considerat, et quibus proinde nomina non indidit, necessum est ei alia nomina adinvenire, et quid illis dictum velit, indicare; quod fit per Definitionem. In caeteris oportet cum Catone credere, qui etiamnum puer sic magistris suis credebat, ut identidem posceret et causam. Uno verbo: in caeteris non oportet credere Docenti; eum enim non credendi sed sciendi causâ accedunt Discipuli, itaque ex Definitionibus suis deducat necesse est, si quid a Discipulis suis recipi velit. Aliud hîc jubere, est Scholasticum Tyrannum agere. Sed, inquis, si creduntur Definitiones, ergo Quaestio *Quid est?* non est Scientifica, cum ei non ex Scientiâ, sed ex fide, quam Docenti habemus, respondeatur. Respondeo, Definitiones credi tantum quoad nomen Definiti; sciuntur vero quoad Essentiam Definiti. Definitio enim ultra nomen Definiti, quod exhibet ex parte Subjecti, insuper rem aliquam distincte proponit ex parte Praedicati, quam percipere et considerare, non est fidei, sed scientiae; cum Docens quidem possit nomen dare rei, sed rem ipsam facere aut praestare non possit.

## CAPUT IV.

*Prima Proprietas Definitionis.*

1. *Definitio convertitur cum Definito*; id est, Definitum et Terminus definiens sunt Termini Convertibiles. Ratio hujus Proprietatis est, quia ad Quaestionem *Quid est?* non apte respondetur, nisi per Convertibile. Si enim quaeratur: *Quid*

*est Brutum?* respondeaturque: *Res sentiens*, responsio quidem data fuerit per Subalternans, sed non valebit, ut patet ex communi sensu. Quotquot enim aderunt (nam omnes in ista materiâ fatis versatos se existimant), objicient, hominem etiam sentire, nec tamen esse brutum. Si autem ad eandem Quaestionem: *Quid est Brutum?* respondeas: *Animal latrans*, responsio quidem data fuerit per Subalternatum, sed item reprehensioni obnoxia; dicent enim, equum etiam esse brutum, nec tamen latrare. Si vero per Disparatum respondeas, minus adhuc valebit responsio; v. g. *Quid est Brutum?* respondeas, *Animal bipes*, duplicem patieris reprehensionem. Quidam enim dicent, hominem esse bipedem, nec tamen esse brutum, alii dicent bovem esse brutum, nec tamen esse bipedem. Si tandem per Repugnans responderis ad praedictam Quaestionem, nugatoria censebitur Responsio, et ne quidem reprehensione digna.

2. Igitur cum Terminus ad Terminus necessario se habeat uno ex quinque modis, *Parte 1. Sect. 2. cap. 1. n. 4.*, atque ostensum sit Terminus Definientem cum Definito nec repugnare posse, nec disparari, nec etiam subalternari posse Definito, aut sibi subalternare Definitum, restat ut cum Definito convertatur.

3. Ex his fatis detegitur communis error Logicorum, qui ad Quaestionem *Quid est?* apte responderi volunt per Superius, per Genus nempe vel Speciem Praedicabilem Subjecti quaestionis, seu ejus de quo quaerebatur Quid esset? Adeoque penes Quaestionem *Quid est?* etiam definiunt Genus ac Speciem. Sed fatis errorum istum confutat sensus communis omnium hominum; qui talem responsionem non tolerant, sed reprehendunt; v. g. *Quid est homo?* respond. *Animal*. Inquierit: *Brutum etiam est animal*; adeoque istâ admonitione innuunt, non satis factum videri Quaestioni.

4. Ex hac Proprietate ulterius dimanant istae: *Quod continetur Definito, continetur Definitione, et contra*. Item *Quod excluditur a Definito, excluditur etiam a Definitione, et contra*.

Contineri Definito aut Definitione est esse Subjectum Definitionis aut Definiti. Excludi autem a Definitione vel Definito est repugnare cum Definito vel Definitione. Sic posito hoc Definito: *Homo*, et posita hac ejus Definitione: *animal rationale*, continetur quidem Definito *Petrus*, et is etiam continetur Definitione; excluditur vero, tum a Definito isto tum a Definitione, *Bos*. Sufficit igitur ad redarguendam Definitionem, si aliquid eâ contineri, quod non continetur Definito, vel contra, aut aliud ab ea excludi, quod non excluditur a Definito, vel contra, ostenderimus. Estque hic tritus admodum et receptus in Scholis Definitiones impugnandi modus.

## CAPUT V.

*Secunda Proprietas Definitionis.*

1. *Definitio explicat suum Definitum.* Explicare est Partes sigillatim et expresse proponere, quae ante in Toto confuse et conjunctim proponebantur. Unde omnis Explicatio Totum aliquod respicit. Ratio Proprietatis est, quia ad Quaestionem *Quid est?* non apte respondetur nisi explicando. Si enim petatur *Quid est ensis?* respondeaturque *Gladius*, non satisfactum videtur Quaestioni; explicationem enim expectabat percunctator, quae ibi nulla redditur. In Lexicis tamen et Vocabulariis non tam inepta videntur ista; *Quid est homo?* respond. *Mensche*; *Quid est Philosophia?* respond. *Amor Sapientiae*; *Quid est subijcibile apud Logicos?* respond. *Substantivum apud Grammaticos*. Sed hic improprie sumitur Quaestio *Quid est?* ut eadem sit cum Quaestione *Quomodo vocatur?* v. g. *Quomodo homo Belgice dicitur?* Respond. *Een Mensche*; *Quomodo Latine redditur Philosophia?* respond. *Amor Sapientiae*; *Quomodo apud Grammaticos vocatur Subjectum?* respond. *Substantivum*. Et quidem adhuc alias ita improprie fumi Quaestionem *Quid est?* ut aequivaleat Quaestioni *Quomodo vocatur?* atque tunc non elicere Definitionem, supra dixi.

2. Definitio autem plerumque explicat Definitum per Materiam et Formam ejus. Nempe Definitum Formam suam et Materiam contegit, et sub uno vocabulo ingerit; Definitio easdem illas reteggit, et singulas seorsim reddit; in eoque consistit explicatio, qua Definitio Definitum suum explicat. V.g. haec Definitio: *Essentia est Praedicatum in Subjecto*, explicat Definitum suum per Materiam et Formam Definiti; Materia enim *Essentiae* est *Praedicatum*; Forma ejus est *In subjecto*, siquidem ille obliquus cum praepositione aequivalet Adjectivo, ut alibi observavi, *Parte 1. Sect. 1. cap. 4. n. 6.*

3. Dices: non semper Definitum Materiam et Formam suam sub uno vocabulo ingerit, sed subinde etiam eas seorsim depromit; v. g. *Essentia totalis*, *Essentia partialis*, *Enunciatio copulativa*, *Enunciatio necessaria*, etc. sunt Definita Definitionum a nobis antea assignatarum; et tamen Materiam suam et Formam palam habent, et prae se ferunt Substantivum cum Adjectivo. Respondeo, illa non esse legitima Definita, sed integras Definitiones; sufficiuntur autem in locum Definitorum propter penuriam nominum. Quod si quis satis magnam voces instituendi auctoritatem sibi fumeret, nihil horum ex parte Definiti ferendum erat. Dum interim haec quomodocunque ex parte Definiti reponuntur, non tota definiuntur; sed soli Formae accommodatur Definitio, resumptâ Materiâ ex Definito, et in Definitionem translatâ. V.g. *Essentia totalis est Essentia eadem cum suo subjecto*; ex Definito hîc resumitur Materia in ipsam Definitionem, nempe *Essentia*; et quod reliquum est Definitionis explicat Formam, nempe particulam *Totalis*.

4. Videtur Definitio aliquando etiam Explicare Definitum per Partes Integrales; ut haec Definitio: *Syllogismus est Enthymema cum Supplemento praemisso*, quia Enthymema et Supplementum Enthymematis sunt Partes Integrales Syllogismi, ut colligere potes ex definitione Partium Integralium, *Parte 1. Sect. 2. cap. 3. n. 3.* Facile tamen tales Definitiones reducuntur eo,



ut per Partes Essentiales, nempe per Materiam et Formam, explicent Definitum. V. g. praedicta Definitio sic reducitur: *Syllogismus est compositum ex Enthymemate et Supplemento praemisso*, ubi *Compositum* habet rationem Materiae, et Praepositio cum Obliquis subsequenter simul faciunt unum Adjectivum et exhibent Formam.

5. Ex hac Proprietate dimanat alia Proprietas, nempe *Definitio illustrat suum Definitum*. Ita enim a Natura comparati sumus, ut plura sigillatim proposita melius clariusque intelligamus, quam simul et junctim obtrusa. Sicut melius novisse videmur hortum aliquem, si prata ac viridaria ejus feriatu lustravimus, singula considerando, quam si apertâ forte januâ, et mox iterum clausâ, oblatus sit unicus ejus et repentinus conspectus; atqui hic hortus jam Definitum, et tunc Definitio quodammodo erat.

## CAPUT VI.

### *Prima Regula Definitionis.*

1. Ex secundâ hac Proprietate sequitur Capitalis Regula Definitionum: *Quae satis clara sunt, definiri non debent*. Cum enim eo naturaliter tendat Definitio, atque ob hoc solum esse videatur, ut declaret illustretque Definitum, si id jam ante satis clarum ac illustre sit, frustra definitur; nam obtento sine cessant media.

2. Hac Regulâ excusamur a definienda Mente ac Animo nostro, eorumque operationibus. Unde non tenemur definire, quid sit *Affirmare*, *Negare*, *Inferre*, *Supponere*, *Accipere*, *Copulare*, *Disjungere*, *Praescindere*, etc. Item *Amare*, *Odisse*, *Laetari*, *Tristari*, *Sperare*, *Timere*, etc. Quibus annumeramus ea, quae ab hisce denominantur; ut *Verum*, *Falsum*, *Bonum*, *Malum*, *Requiri*, *Sufficere*, *Sensu sequi* et *Praecedere*, *Eodem* ac *Diverso Sensu dicere*, etc. Haec enim omnia nobis sunt per

Conscientiam, quâ eorum in nobis ipsi conscii sumus, clarissima perspectissimaque.

3. Quod quidam obscura haec velint, et aliis passim persuadeant obscura esse, non aliâ de causâ fit, quam quod imaginatione velint attingere, quod solo intellectu percipi potest. Unde similes sunt iis, qui queruntur lumen esse perceptu difficile, quia id non audiunt, licet quam possunt altissimo silentio auscultent. Sed lumen videndum erat, non audiendum; sic et ista, quae commemoravi, intelligenda sunt, non imaginanda, cum omni careant imagine et corporea extensione. Scio equidem, cum Intellectus de rebus istis cogitat, solere obversari Phantasiae idolum aliquod, quod cum re ab Intellectu perceptâ conciliare volunt, qui non satis accurant suas cogitationes, ac proinde non mirum, si sentiunt talem difficultatem, qualem sentimus, cum montem sine valle, aut circulum sine area contendimus imaginari; versantur enim in aequae difficili, imo aequae impossibili subjecto. Haec difficultas conciliandi res tam dispares et inconciliabiles effecit, ut persuasum habeant, res illas difficulter intelligi.

4. Cum interim Mentis nostrae operationes habent aliquos characteres et notas, quae sunt exiguae molis Vocabula, admodum notae significationis, quibus totam earum naturam exprimere solemus, videor eo adduci posse, ut per eos characteres et definiri sinam, et ipse definiam. Si modo sit hoc definire, et non potius notam aliquam ejus, de quo quaerebatur, quid esset, adferre; v. g. Affirmare est dicere *Est*, Negare est dicere *Non*, Inferre est dicere *Ergo*, Copulare est dicere *Et*, Disjungere est dicere *Vel*, Praescindere est dicere *Quatenus* aut *In Quantum*, Distribuire est dicere *Omnis*, Particulariter accipere est dicere *Aliquis*, Verum dicere est dicere *Sicut est*, Falsum dicere est dicere *Aliter quam sicut est*. Sic etiam operationes Animi solent habere pro suis characteribus certos tonos; aliter enim rogantes, aliter suadentes, aliter imperantes intonamus eandem

etiam quoad verba Sententiam; aliter tristes, aliter laeti, aliter irati vocem modulantur.

5. Deridiculi etiam fiunt, qui hîc attentant, qui Actuum istorum Definitiones pollicentur; nam cum maxime definire sibi ac aliis visi sunt, convincuntur non Definivisse. Veluti si pro Definitionibus haec obtrudas: *Affirmatio est Propositio quae Partes conjungit; Negatio, quae separat ac dividit.* Sic insto: verene et proprie haec separat Partes, illa conjungit? Non, sed per Tropum, per Metaphoram, per Similitudinem aliquam. Igitur, inquam, hoc dicis: Negatio velut separat, Affirmatio veluti conjungit; haec conjungenti, illa dividenti similis est. Atqui Quaeestio, quae Definitionem exposcebat, non, cui similis Affirmatio vel Negatio, sed *Quid essent*, quae siverat; huic cum necdum responderis, necdum etiam Definivisti.

6. Dices: si non oportet definire operationes nostrae Mentis, ergo nec Definitio, nec Divisio caeteraque Instrumenta Definienda fuerint; haec enim spectant etiam ad operationes nostrae Mentis, et quidem illustri Titulo. Respondeo, non definiri etiam a nobis, nisi penes suas Notas, ut Definitionem per *Quid*, Rationem per *Cur*, etc., quae sunt propriae notae ac proprii characteres ipsorum Instrumentorum; ipsos autem illos Characteres, qui designant Formam Instrumentorum istorum, nunquam definiendos esse dico, imo definiri non posse contendo.

7. Cum per hanc Regulam excusamur a Definiendo, plerumque ad secundum Instrumentum, nempe Exemplum, omisso Primo, per saltum imus; mox etiam Demonstrationes, ubi res exigit, Divisionesque subnectimus. Sic initio hujus Libelli, omiffa Definitione Affirmationis, adhibui Exemplum; mox subjunxi Demonstrationem, qua Subjectum et Praedicatum in Affirmatione demonstrabam.

8. Sed cum aliquid propter nimiam suam claritatem non definitur, non censeo ego penitus omiffam esse Definitionem, sed Definitionem eminenter datam esse intelligo. Adeoque

Definitionem Eminentem voco illam Scientiam, qua ſcimus optime et intuitive, ut loquuntur, quid res ſit, etiamſi forte exterius non poſſimus ullam ejus Definitionem adferre.

## CAPUT VII.

### *Secunda Regula Definitionis.*

1. *Definitum non licet ponere in Definitione.* Definitio enim debet explicare Definitum, adeoque plura, quae in Definito complicantur, exſolvere et ſigillatim offerre; ſunt autem iſta plura partes Definiti, inter quas proinde nequit eſſe ipſum Definitum, cum idem non ſit pars ſui. Atque hinc convincitur, Definitum non poſſe ingredi Definitionem, qua parte explicat; ſi quid autem ultra explicationem addatur Definitioni, id ſuperfluum eſt. Adeoque ſolum hoc poſtremum Regula eſt, prius enim illud neceſſitas erat et proprietas Definitionis. Inquam, Definitum non ingredi Definitionem, quâ parte Definitio explicat, eſt proprietas Definitionis; Definitum autem ultra iſtam Explicationem non adjici in Definitione, eſt Regula, quae ex Lege Naturae de vitandis ſuperfluis derivatur.

2. Peccat igitur iſta Definitio: *Sonus eſt quod percipitur a Facultate perceptiva ſoni; Familia eſt Societas hominum ſub Patrefamilias.* Et quidem hae Definitiones ſunt eſſentialiter malae, ſeu non ſunt Definitiones; conjiciunt enim Definitum intra ſuam explicationem, quod in veram Definitionem cadere non poteſt. Haec vero poteſt haberi pro accidentaliter tantum malâ: *Homo eſt animal rationale quod eſt homo*, ſi nempe abſolutâ et peractâ jam explicatione cenſeamus adjicere Definitum; hoc enim cum ſuperfluum ſit, vitiatur accidentaliter Definitio.

3. Aliquando non tam aperte Definitum ponitur in Definitione, ſed tecte et per circulum; non minus tamen vitii tunc eſt, quam cum aperte peccatur. Circulus autem inter definiendum



committi dicitur, cum Definita mutuas ingrediuntur Definitiones; ut si interrogatus: *Quid est sonus?* responderis: *Id quod percipitur ab auditu*; ulterius autem interrogatus: *Quid est Auditus?* respondeas, *Est Facultas perceptiva soni*. Hîc enim Definitionem *Soni* ingreditur *Auditus*, et Definitionem *Auditus* ingreditur *Sonus*; adeoque Definita Definitiones mutuas ingrediuntur. Hoc cum fit, Definitum etiam recte ponitur in suâ ipsius Definitione; hoc modo: *Sonus est id quod percipitur* (ab auditu; id est, juxta tuam Definitionem) *a Facultate perceptiva Soni*. Item: *Auditus est facultas percipiens* (sonum, id est, juxta tuam Definitionem) *id quod percipitur ab auditu*. Talis Circulus etiam hîc committitur: *Familia est societas hominum sub Patre-familias*, et *Pater familias est caput familiae*. Et perinde facile est ostendere ex sensu, eo etiam casu Definita poni in suis ipsorum Definitionibus, non tantum in mutuis; hoc modo: *Familia est societas hominum* (sub patre-familias, id juxta subsequentum definitionem est) *sub capite familiae*. Item: *Pater-familias est caput* (familiae, id est juxta praecedentem definitionem) *Societatis hominum sub Patre-familias*. Et hae quidem Definitiones omnes sunt essentialiter malae, cum Definita sua suis explicationibus immisceant. Et omnino difficile est ut Definitio aliqua hîc peccet, et tamen retineat naturam Definitionis; cum enim Definitio sit ad explicandum, quidquid adducitur, censetur explicationem ingredi.

4. Sed dices: Ante definitur: *Essentia totalis est essentia indistincta a suo Subjecto*. Ecce definitum, *Essentia*, ponitur in suâ definitione. Respond.: *Essentia* non est definitum istius definitionis, sed *Essentia totalis*; haec vero non ponitur in definitione. Quod vero *Essentia* ponatur in ista definitione, nil mali, imo sic debebat; cum enim *Essentia* sit materia definiti, merito ponitur in definitione. Sed, inquis, *Totalis* est forma; conjiciatur ergo etiam in eandem definitionem. Nequaquam; Definitio enim debet explicare Definitum; quod non praestabit

ſi eaſdem partes expreſſe perhibeat, quas aequè expreſſe perhibebat Definitum.

5. Atque hinc dimanat alia quaedam Regula Definitionis, nempe, Nitendum quidem eſſe, ut Definitum ſit ſimplex vocabulum, et non explicet; ſed cum hoc conſequi non poſſumus, ita temperandum eſſe negotium, ut prior pars Definiti, quae obtinet rationem Materiae, reſumatur in Definitione, ac reliqua explicatio accommodetur poſteriori parti Definiti ſeu Formae ejus. Ut vides factum eſſe in Definitione mox propoſitâ et multis ſimilibus: v. g. in Definitione *Enunciationis neceſſariae*, *Enunciationis modalis*, *Argumenti Formalis etc.*

## CAPUT VIII.

### *De Deſcriptione.*

1. Simia Definitionis eſt Deſcriptio, ei quod Externam apparentiam ſimilis, inſuper etiam convertibilis cum Deſcripto; ſed non explicat ipſum. Loco enim ejus, quod adferret plura quae ſunt in ipſo, adfert plura Accidentia quae ſunt ad ipſum aut circa ipſum Deſcriptum; v. g. *Petrus eſt ille juvenis, qui habitat in foro, et utitur veſte nigrâ, et frequentat Collegium Logicum ſub N., etc.* Ubi clarum eſt non fieri explicationem *Petri*, cum non adferantur plura quae ſunt in *Petro*, ſed tantum circumſtant ipſum, ut *Juvenis*, *Habitans*, *Frequentans*, etc., quae omnia ſunt ejus accidentia. Unde etiam Deſcriptio non recte reſpondetur ad Quaestionem *Quid eſt?* Non quadrat enim *Quid eſt Petrus?* reſpond. *Juvenis, habitans, frequentans etc.*, ſed hoc quadrat: *Quid eſt Petrus?* reſpond. *Eſt homo hic.*

2. Petes: ad quam ergo Quaestionem reſpondemus per Deſcriptionem? Reſpondeo: ad Quaestionem *Quis eſt?* Sic quadrat v. g. *Quis eſt Petrus?* reſpond. *Juvenis ille qui habitat ad interſigne bovis etc.* Objicies: ad Quaestionem *Quodnam?* et per conſequens ad Quaestionem *Quiſnam*, et *Quaenam*, reſpondemus

per Exemplum, ut cap. 2. dicitur; ergo jam male dicimus, per Descriptionem responderi ad illam Quaestionem. Respondeo: Ad Quaestionem *Quisnam est?* subjectâ Definitione respondemus per Exemplum; v. g. petitur: *Quid est Terminus inferens?* respond. *Est Terminus qui ponitur in Antecedente Enthymematis, et non in Consequente.* Petitur: *Quisnam est talis in hoc Enthymemate, sto, ergo stare possum?* respond. *Stans.* Ubi quia Definitio subjicitur isti Quaestioni *Quisnam?* respondendum est ei per Exemplum; sed ad Quaestionem *Quisnam est?* non subjectâ Definitione, respondemus per Descriptionem.

3. Descriptio dividitur in Quasi-definitionem et Descriptionem stricte dictam. Quasi-definitio est Descriptio assignata per Proprietatem ejus, cujus dicitur descriptio; ut *Corpus est res divisibilis, Corpus est res palpabilis.* Haec in eo mere deficit a Definitione, quod loco Formae Proprietatem assumat; atque ideo *Quasi-definitionem* voco, quia propius accedit ad veram Definitionem quam Descriptio, sicut Proprietas magis accedit ad Essentiam quam Accidens stricte dictum. Unde et quadrat aliquatenus in Quaestionem *Quid est?* v. g. *Quid est Corpus?* Responso *Res palpabilis* non est omnino tam inepta. Descriptio stricte dicta est, quae assignatur per Accidens stricte dictum ejus, cujus dicitur descriptio; atque ea non quadrat in Quaestionem *Quid est?* sed *Quis est?* ut ante dixi.

4. Describere solemus Singularia; illa enim sub sua Specie non differunt in Essentia, nisi penes *Hic* et *Ille*, quae differentia non continet in se aliquid speciale seu notatu dignum. Singularia vero sub eadem Specie multum differunt in Accidentibus. V. g. Carolus est rex, et Petrus est civis, Petrus est mas, et Anna est femina, Croesus est dives, et Irus est pauper, etc., adeoque accumulatis Accidentibus fit Descriptio, qua ab aliis fecernantur notabiliter, cum Essentiâ vix differant.

5. Sed Descriptio excidit e nostris Instrumentis; quia non continet Scientiam, sicut caetera Instrumenta, sed Sensum,

Experientiam, aut Fidem, quae omnia ſunt extra Scientiam. V. g. *Petrus eſt iſte juvenis, qui habitat in foro etc.* non continet aliquam Scientiam aut Doctrinam, ſed Senſum, quo ipſe hoc vidi, aut Fidem, qua aliis hoc credo. Igitur non ſtudioſe excolemus Deſcriptionem; ſed remitemus eam ad Rhetoricam, Poëſim, et vulgare commercium, quibus debetur. Hoc tamen intellige de Deſcriptione ſtricte dictâ; nam ad Quaſi-deſinitionem ſaepe cogimur propter difficultatem inveniendi Formas rerum; conſtricti enim hoc pacto ſaepe ſumus, ut loco Formae Proprietatem aliquam, quod ea facilius occurrat, ſurrogemus.

## CAPUT IX.

*De Exemplo.*

1. Exemplum eſt apta reſponſio ad Quaestionem, qua ſubjectâ Definitione quaeritur *Quodnam ſit?* Ut cum ſic procedimus: *Quid eſt Eſſentia?* reſpond. *Praedicatum in Subjecto*, hîc eſt Definitio; *Quodnam eſt Praedicatum in Subjecto?* reſpond. v. g. *Homo reſpectu Hominis albi*, haec reſponſio eſt Exemplum. Exemplum etiam praemiſſâ Definitione plerumque ſolemus expetere hac formulâ: *Da tale aliquod*; v. g. ſi praeceſſerit *Quid eſt Eſſentia?* reſpond. *Praedicatum in Subjecto*, ſubjungimus examinando: *Da tale aliquod*; reſpond. *Homo reſpectu hominis albi*. Et quidem circa Exemplum aptior eſt haec Petitio, quam fuerat iſta Quaestio; hinc et uſitatio. Ad haec Exemplum ſubnectimus Definitioni mediante particula *Ut*, aut *V. g.*, ita ut iſta ſit applicatio Exempli ad ſuum Exemplatum (ſi ita dicere licet) ſicut Verbum *Eſt* eſt applicatio Definitionis ad ſuum Definitum. Eſt autem Exemplatum (ſi quis iſto nomine offendatur, is *Typum* dicat, *Formam*, aut *Normam*, propter analogiam de qua cap. ſequen. agemus) Definitio, quando ea per Exemplum appoſitum illuſtratur.



2. Definitionem nunquam adhibemus nisi subjungamus Exemplum; Exemplum tamen quandoque adfertur nullâ præcedente Definitione; cum scilicet excusamur a Definiendo per primam Reg. Definit. Nisi quis forte contendat, tunc saltem eminenter præceffisse Definitionem. Sic initio hujus libelli, Affirmatione et Negatione non Definitis, subjungimus utriusque Exempla.

3. Quamvis autem Exemplum deducamus ex Definitione (Formali scilicet vel Eminentem), non tamen semper et quolibet proposito casu dicere possumus, sitne Exemplum idoneum, quod proponitur, an non, etiamsi Definitionem exacte intelligamus. Sic, licet habeamus bonam et Eminentem Definitionem *Veri*, non possumus tamen dicere, sitne hoc: *Arenae maris sunt numero pari*, Exemplum *Veri*, nec ne. Interim vix videtur fieri posse, ut Definitio aliqua sit nobis satis clara, et non innotescat etiam clare aliquod saltem exemplum; sic in casu posito habemus ad manum quamplurima et quam clarissima Exempla *Veri*; v. g. *Petrus est Petrus*, *Duo et tria sunt quinque*, etc., etiamsi hæreamus circa multa, sintne etiam illa Exempla *Veri*, nec ne.

4. Sicut Primum Instrumentum, scilicet Definitio, non tantum competit Terminis, sed suo modo etiam applicatur Enunciationibus; sic et Secundum Instrumentum seu Exemplum etiam Enunciationibus illustrandis infervit, præsertim Regulis, Legibus, et Axiomatis. V. g. proposito hoc Axiomate: *Ex vero nil nisi verum*, idem illustratur hoc Exemplo: *Sic quia verum est, Sum homo, ex eo nihil falsi unquam sequi poterit*. Sed Exemplum Enunciationibus accommodatum non subnectitur Definitioni, seu potius Expositioni Enunciationis (sicut Exemplum Terminis accommodatum subjungimus semper Definitioni Termini), sed, ut dixi, Regulis generalibus et Axiomatis. Multae enim inter Enunciationes Definiuntur, id est Exponuntur, quarum Expositioni Exemplum subdi non potest; v. g. *Solus sto, id est, sto, et nemo alius stat*, hîc Definitio seu Expositio; sed si velis Exemplum subnectere, *Ut, v. g., etc.*,

videbis te haerere, et non nisi ridicule tali Schemate sermonis posse procedere. Atque adeo hoc discrimen aliquod est inter Exemplum Terminis, et Exemplum Enunciationibus accommodatum.

5. Et quidem Regulae, Leges, et Axiomata non tantum Exemplo illustrantur, sed etiam Peccato. V. g. Proposito eodem Axiomate: *Ex vero nil nisi verum*, illustrabitur hoc peccato: *Sum homo, ergo sum bos*; haec enim ideo non valet Consequentia, quia peccat contra Regulam: *Ex vero nil nisi verum*. Et Peccato circa Regulam analogice respondet Exclufum circa Definitionem; sicut enim Peccato illustratur Regula, sic etiam illustratur Definitio adducto eo quod ab illa excluditur. V. g. haec Definitio: *Essentia est Praedicatum in Subjecto*, illustratur non tantum si dicas: *Sic homo est essentia hominis albi* (quod est Exemplum adducere), sed etiam si dixeris: *Rex autem non est Essentia Caroli*; quia scilicet non est in illo ut Subjecto; quod est Exclufum adducere. Ne tamen ideo existimes, augendum esse numerum Instrumentorum hac novâ accessione; nam Exclufum fatis intelligitur ad Contentum seu Exemplum, et possumus utrumque generali *Exempli* nomine complecti.

## CAPUT X.

### *Proprietates et Regulae Exempli.*

1. Exemplum habet analogiam cum Materia; Exemplatum autem seu Definitio cum Forma Artificum. Sicut enim in Formam artificialem conjicitur Materia liquefacta, quae intra capacitatem Formae coagulata, prodit eâdem istâ Formâ insignita; sic etiam Exemplum quodammodo in Definitionem conjicimus, eique Definitionem sic applicamus, ut Definitioni per omnia conforme videatur. Atque hinc fit, ut Exemplum naturaliter illustret Definitionem. Sicut enim Formam aliquam artificialem melius cognoscimus, cum cera liquefacta in cavum

ejus immiffa, ibidemque concreta, tandem lineamentis Formae circumfcripta rurfum excluditur, fic etiam Definitionem aliquam longe melius intelligimus, ubi Exemplum aliquod velut Materia ei apponitur, cui figillum et characterem fuum imprimat. Habet etiam Exemplum analogiam cum libris impreffis, et Definitio cum typis Librariorum, quos prelo fubdunt. Sicut enim inaffueti difficillime legunt literas ex typo (literae enim non ita clare apparent, infuper dextrorfum ac finiftrorfum inverfae funt), eafdem vero in Exemplari aliquo impreffas facile quivis legit, fic etiam Definitio difficulter intelligi folet, nifi exemplo alicui inprimatur. Quod adeo verum eft, ut Tirones Scientiarum nullam unquam Definitionem recte percipiant, nifi ei Exempla plura, eaque craffa ac palpabilia fubdantur; Veterani autem non ita adhaerent Materiae, fed folâ Definitione faepe contenti funt, eamque fine ullo Exemplo probe intelligunt.

2. Hinc etiam fequitur Regula Exempli: *Exemplum debet effe exutum Formâ Definitionis ac Definiti*. Frufta enim in Formam aliquam conjicitur Materia, quae jam Formâ iftâ circumfcripta eft. V.g., *Effentia eft Praedicatum in Subjecto*; *Ut Effentia*, aut, *Ut Praedicatum in Subjecto*, mala Exempla funt, quae ibi mediante particulâ *Ut* fubduntur Definitioni. Imo non fatis idoneum apparet hoc Exemplum ejufdem Definitionis: *Ut Effentia totalis*; non fatis enim exuitur illud Exemplum Formâ Definiti. Sed cur Exemplum debet exui Formâ Definiti, cum non fit ejus Materia, fed Materia Definitionis? Refpond.: etiam eft Materia Definiti; videmur enim non tantum Definitionis, fed etiam Definiti Exemplum dare, adeo ut Exemplum quadret potius in Definitionem applicantem quam applicatam.

3. Sequitur ex Prima illa Proprietate Exempli adhuc alia Proprietas, quam tamen etiam vicem Regulae licet accipere: *Exempla craffa bene docent*. Exempla craffa funt Exempla e rebus obviis et fenfum valide moventibus petita; haec bene docent,



quia habent analogiam cum Materiâ craſſâ ac durâ, quae Formam ſibi impreſſam tenaciter ſervat. Sic enim etiam Exempla iſta Definitionem ſibi ſemel applicatam perpetuo fere cuſtodiant; et quia familiaria ſunt ſeu e rebus obviis petita, hinc ſaepeius occurrentia habent vim refricandi Memoriam, et Formam ſeu Definitionem, qua ſemel ſignata ſunt, ſaepeius offerendi. Delectant etiam iſta Exempla; juvat enim videre res viles et communes Definitione, velut Philoſophica veſte, circumamictas, e Trivio in Scholam trahi. Atqui tirones non niſi pellice aliqua voluptate rapiuntur ad Philoſophandum. Unde tam multa, imo omnia fere noſtra Exempla hactenus fuerunt *Sto, Homo, Petrus, Homo albus, Carolus, Rex, Homo eſt animal, Aurum vel metallum, etc.*; quae omnia ſunt maxime obvia, et ſenſum valide pulſantia. Inter craſſa et familiaria Exempla etiam refero, quae in Arte vel Scientiâ, in qua adferuntur, antea bene tractata et perpenſa fuerunt; illa enim commodiſſime poſtea in Exemplum trahuntur. Hinc tam frequens apud nos Exemplum ab *Effentiâ* ejuſque Definitione petatum, et ab aliis alibi ante tractatis in hoc libello.

4. Inquiunt etiam Philoſophi: *In Exemplo non requiritur veritas*. Sufficit enim quod veriſimile ſit, et paſſim omnes apprehendant, quod Definitio ei bene conveniat. Exempla enim non propter ſe adducuntur In Scientiis, ſed mere ut Definitionem veluti incorporent et palpabilem reddant. Sic in Logica dicimus: *Bos* et *Brutum* concordant, *Bos* et *Mus* diſcordant, non quaſi de Bobus et Muribus velimus inſtituere ſermonem, ſed ut melius intelligatur Definitio Terminorum Concordantium aut Diſcordantium. Sic etiam ſupra per modum Exempli diximus, quod *Brutum* et *Bipes* concordent in *Ave*; licet forte avis aliqua non ſit bipes, hoc enim ibi non tam rigide penſandum erat, cum tantum ferviret pro Exemplo. Similiter dicimus ſaepe: *Homo eſt animal*, etiamſi non ipſe, ſed corpus ejus animal potius dicendum videatur quibuſdam. Haec enim



talia non convenit hoc loco examinare; sed supponuntur sic esse cum communi Logicorum Schola; et hoc satis est, ut Exempli vicem habeant.

## CAPUT XI.

*De Divisione.*

1. Divisio est apta responsio ad Quaestionem *Quotuplex est?* Ut: *Quotuplex est Essentia?* respond. *Alia totalis, alia partialis;* haec responsio est Divisio. Divisum vero est id de quo quaeritur *Quotuplex est?* subsequente aptâ responsione. Sic in Exemplo proposito Divisum est *Essentia*. Divisio etiam distingui se patitur in Applicantem et Applicatam. Divisio applicata est praecisa responsio ad Quaestionem *Quotuplex est,* quae scilicet nihil resumit ex ipsa Quaestione; et talis est divisio jam proxime allegata. Solet vero Divisionem applicatam praecedere illa particula: *Duplex, Triplex, etc.,* quae non videtur proprie pars ejus, sed Nota, sicut *Ut* est nota Exempli. Divisio applicans componitur ex Divisio et Divisione applicatâ tamquam suis Extremis; ut: *Essentia, alia totalis, alia partialis.*

2. In Divisione applicatâ spectantur Membra dividencia; suntque Substantiva illa, quae ponuntur in Divisione, faciuntque numerum correspondentem Quaestioni *Quotuplex?* Connectuntur autem inter se mediante particula *Alius;* v. g. *Essentia, alia totalis, alia partialis;* hîc membra dividencia sunt *Essentia totalis, Essentia partialis.* Adduci etiam poterant antea Membra Definientia, quae sunt Materia et Forma Definiti, sed non erant tantae considerationis sicut Membra dividencia.

3. Ex Membris Dividentibus cum interjectâ particulâ *Vel* exfurgit Terminus Dividens. Sic positâ hac Divisione: *Animal aliud homo, aliud brutum.* Terminus Dividens assignatur *Homo vel brutum;* ille enim componitur ex utroque Membro Dividenti

cum interjectâ particulâ *Vel*. Et quamvis Terminus Definiens coincidat cum Definitione Applicata, Terminus tamen Dividens non penitus coincidit cum Diviſione Applicatâ. Membra enim in Diviſione ſecernuntur illâ particulâ: *Alius*, et ſic ſecreta, non proprie conſtituunt Terminum; aſt cum particulâ *Vel* interjectâ, proprie dictum Terminum faciunt, qui de aliquo affirmari poſſit. Saepe Diviſio ſumitur pro Termino Dividente.

4. *Membra Dividentia debent inter ſe repugnare.* Debent enim in Diviſione cohaerere mediante particulâ *Alius*, quo pacto non bene cohaerent Termini Concordes. V. g., *Animal, aliud brutum, aliud bipes*, inconcinna et falſa locutio, cum non ſit neceſſe ut brutum aliud ſit a bipede, aut bipes aliud ſit a bruto. Multo minus haec conveniunt: *Vivens, aliud animal, aliud homo*, aut, *Homo, alius ſtebilis, alius riſibilis*; cum non ſint alia, quae ibi alia dicuntur.

5. *Singula etiam Membra Dividentia debent ſubalternari Diviſo.* Quia ad Quaestionem *Quotuplex eſt?* non apte reſpondetur niſi per talia membra. Sume tibi cujuſvis generis membra; quamdiu non ſubalternantur Subjecto quaestionis, tamdiu videbis, ineptam per ea fieri reſponſionem ad quaestionem *Quotuplex eſt?* V. g. *Quotuplex animal?* reſpond. *Aliud lapis, aliud lignum*; abſurda reſponſio eſt, quia non per membra ſubalternata, ut decebat, ſed per membra repugnantia cum Diviſo inſtituitur. Non minus ineptum hoc: *Homo alius animal, alius ens*; ubi per membra ſubalternantia ſibi Diviſum inſtituitur reſponſio. Et ſic porro.

6. Sequitur jam ex his, *Membra dividentia debere eſſe Partes Potentiales diviſi*. Unde et ſequitur, quod Diviſio explicet Diviſum conſideratum tamquam Totum Potentiale. Ex quo etiam ulterius ſequitur, quod Diviſio illuſtret ſuum Diviſum. Et ex hoc Regula: quod, quae ſatis nota ſunt in genere Totius Potentialis, dividi non debeant. Sic ineptae Diviſiones: *Albor alius hic albor, alius iſte, alius ille albor, etc.*; *Homo alius hic, alius iſte homo, etc.*, ſeu *alius Petrus, alius Paulus, etc.* Diviſa

enim ibi quoad istas partes Potentiales satis quam nota sunt, ut non oporteat ullam per eas instituere Divisionem. Hinc et Regula est, *Ne in Divisionibus procedatur usque ad Singularia*. Quae omnia tam clare sequuntur ex dictis, praesertim consideratis iis, quae in simili praecefferunt circa Definitionem, ut non sit opus iis exaggerandis diutius immorari.

## CAPUT XII.

*De Proprietatibus et Regulis Divisionis.*

1. Proprietates et Regulae Divisionis, servatâ proportionem, eadem sunt cum Regulis et Proprietatibus Definitionis. Nam Divisio explicat Divisum per Partes Potentiales, sicut Definitio explicat Definitum per Partes Actuales. Secundo Divisio (quod inde sequitur) illustrat Divisum etc., quae paulo ante commemorata sunt.

2. Haec omnia magnam arguunt affinitatem analogicam seu proportionatam inter Definitionem et Divisionem. Cui et illud accedit: Quod Divisio etiam debeat esse convertibilis cum Diviso. Censetur autem Divisio converti cum Diviso, quando Terminus Dividens convertitur cum Diviso; v. g. haec Divisio: *Animal, aliud homo, aliud brutum*, convertitur cum Diviso, quia Terminus dividens, nempe *Homo vel brutum*, convertitur cum Diviso, nempe cum *Animali*. Similiter et ista Divisio: *Essentia, alia totalis, alia partialis*, convertitur cum Diviso; membra enim dividenda sunt *Essentia totalis, Essentia partialis*, quae sine dubio, commissa per *Vel*, facient Terminum convertibilem isti Termino *Essentia*.

3. Quod autem Divisio debeat esse convertibilis, facile probatur; quia quamcunque eam facias, quamdiu non erit convertibilis cum subjecto quaestionis, tamdiu non quadrabit in Quaestionem *Quotuplex est hoc?* sed tantum in Quaestionem

Quotuplex fit aliud quidpiam. V. g. ſi petatur, *Quotuplex eſt Animal?* reſpondeafque, *Aliud homo, aliud avis*, certum eſt non reſpondiſſe te ad Quaefſionem propositam; at reſpondiſti ad hanc quaefſionem: *Quotuplex eſt animal bipes?*; illud enim, aliud homo, aliud avis eſt. Si vero ad eandem Quaefſionem reſpondere volueris: *Aliud canis, aliud bos*, ſimiliter convincam te non reſpondiſſe ad illam Quaefſionem, ſed ad aliam, v. g. *Quotuplex eſt A?* ſumendo A ut ſignificet Animal bovi et cani praeciſe commune.

4. Ex eo quod Diviſio convertatur cum Diviſo, ſequitur etiam iſta Proprietas: *Quod continetur Diviſo, continetur altero Membrorum Dividentium, et contra.* Item *Quod excluditur a Diviſo, excluditur ab utroque Membrorum Dividentium, et contra*, aut, ſi velis, *Quod continetur Diviſo, continetur etiam Diviſione, et contra, et quod ab hac, etiam ab illo excluditur, et contra*; ſed per Diviſionem ibi intellige Terminum illum, qui ex Membris dividentibus intercedente particulâ *Vel* conſurgit, ſeu Terminum Dividentem.

5. Magna illa affinitas, quae eſt inter Definitionem et Diviſionem, effecit, ut Diviſio etiam non uſque adeo male quadret in Quaefſionem *Quid eſt?* Ubi Diviſionem capio ſicut paulo ante, nempe pro Terminum composito ex Membris Dividentibus cum interjectâ particulâ *Vel*. Sic v. g. ad hanc Quaefſionem: *Quid eſt animal?* non peſſima reſponſio eſt *Homo vel brutum*. Et ſolent paſſim Philoſophi ad quaefſionem, qua quaeritur *Quid eſt enunciatio?* reſpondere: *Oratio vera vel falſa*. Ubi ſane loco Definitionis ſuppeditant Diviſionem ſeu Terminum Dividentem; quia *Oratio vera vel falſa* eſt Terminus Dividens Enunciationem, non vero Definiens. Sed affinitas iſta, etſi efficiat ut Diviſio quandoque ſuppleat locum Definitionis, non tamen impetrare poteſt, ut vice verſâ, Definitio aliquando ſuppleat locum Diviſionis. Definitio enim, ſeu id quod proprie reſponſionis loco quadrat in Quaefſionem *Quid eſt?* nunquam quadrare



potest in Quaestionem *Quotuplex est?* V. g. *Quotuplex Essentia?* respond. *Praedicatum in Subjecto*, Fatua profecto responsio.

## CAPUT XIII.

*De Distinctione.*

1. Simia Divisionis est Distinctio. In hac loco Divisi consistit Vocabulum Homonymum, et loco Membrorum Dividentium plures Termini, qui isto Vocabulo significantur; v. g. *Sentiens aliud actu, aliud potentiâ sentit*; aut formâ minus fictâ: *Sentiens per actum et per potentiam sumitur*. Distinctio itaque cum non sit proprie Divisio, non proprie etiam respondetur ad Quaestionem *Quotuplex est?* sed ad Quaestionem *Quotupliciter sumitur?* vel *Quinam Termini veniunt sub isto nomine?*

2. Et quamvis Distinctio non sit inter Instrumenta, adeoque per accidens tantum ad Logicam spectet ejus Tractatus; non tamen ita rejicienda est sicut Descriptio. Hac enim nec Logica, nec ulla alia Disciplina utitur circa sua objecta; Descriptio siquidem versatur circa Singularia, circa quae non versantur Disciplinae; ad haec non confert scientiam Descripti, sed sensum vel testimonium, ut ante dicebamus. At Distinctione tum Logici, tum caeteri Doctores jugiter opus habent. Cum enim aliqua contermina sunt in Diciplinis, facile acquirunt idem nomen; adeoque Discipulum occupat confusio et perplexitas, dum modo sic, modo aliter capitur idem Vocabulum, nisi bona Distinctione praeveniatur. V. g. in nostra Arte *Negatio* sumitur pro Negatione Propositionis, et pro Adverbio negandi *Non*. Item Definitio Formalem aliquando et saepius, Eminentem aliquando et rarius significat; aliquando Applicantem, aliquando Applicatam; aliquando nomine Divisionis intelligitur Terminus Dividens; et infinita similia occurrunt, de quibus si non admoneatur Discipulus, adhibitâ legitimâ Distinctione, nihil distincte percipiet.

3. Regula Distinctionis: *Ne inter Membra ejus referantur ea, quae spectant ad aliam Scientiam ab ea, in qua Distinctio adfertur.* V. g. in Logicâ licet Subjectum distinguere in Subjectum Actu, Potentiâ, et Dignitate. Non vero etiam in Subjectum Affirmationis et Subjectum Inhaesionis, quia hoc posterius membrum non spectat ad Logicam, sed ad Metaphysicam. Similiter Divisionem non distinguet Logicus in realem, qua corpora dividuntur in partes, et instrumentalem seu mentalem; prius enim illud membrum spectat ad Physicam. Hanc Regulam dum quidam minus accurate servant, congerunt ingentes rhapsodos, in quibus tot Distinctiones non sunt nisi una confusio, et taediosa earundem rerum repetitio ac prolixitas.

4. Discrimen inter Divisionem ac Distinctionem hoc est, *Quod Divisum de Membris Dividentibus dicatur in eodem sensu, Distinctum vero de Membris Distinguentibus dicitur in diverso sensu.* V. g. *Sentiens* alio sensu dicitur universim de omni animali, alio sensu de eo animali, quod jam verberatur et verbera ista sentit. Quidnam autem hoc sit, eodem vel diverso sensu affirmari, non debemus dicere, cum hoc sit inter operationes nostrae mentis aut inde denominetur. Qui haec conantur explicare, aut operam ludunt, aut obscuris ambagibus involvunt, quod nos breviter et clare diximus. Et licet Tirones aegre subinde discernant inter Homonymum ac Synonymum, et per consequens non bene discernant inter Divisionem ac Distinctionem, hoc non arguit, Definitionem hîc aliquam requiri, qua explicetur, quid sit idem vel diversus sensus, quo vocabula de pluribus affirmantur, sed arguit, eos ob exiguam experientiam, quam habent circa Terminos artis, ut vocant, non bene judicare circa Exempla seu circa Materiam. Alioqui quoscunque homines abunde novisse, quid sit eodem, quid sit diverso sensu affirmari, satis arguit, quod Formam illam in aliquâ saltem Materiâ seu Exemplo, promptissime et sine ulla haesitatione agnoscant. Sic omnes intelligunt alio sensu Ludovicum dici Gallum, alio sensu

avem nostram dici Gallum. Et sit Belga quidam, idiota, omnium artium ac scientiarum expertus, hoc sane novit, alio atque alio sensu dici: *Den Dag is licht, de Pluym is licht*. Formam ergo satis noverunt, licet non noverint illam in omni Materia, propter opacitatem et tenebras analogicas, quas multae Materiae conferunt secum, et Formis quibus signatae sunt affundunt. Ponam in simili: Petrus bene notus est omnibus hujus Oppidi civibus; perpetrato facinore, ut effugiat, sumit habitum muliebrem et jam notissimorum etiam oculis imponit. Idem saepe fit in Formis: Secundum se, et in familiari Materiâ, admodum notae sunt; in peregrinis autem materiis non agnoscuntur.

5. Praeter Distinctionem, de qua hactenus, datur alia quadam, in qua loco Divisi res quaequam, et loco Membrorum Dividentium eadem illa res diversis circumstantiis aut considerationibus imbuta; adeoque in hac Distinctione Membra cohaerent mediante particula *Modo* (v. g. *Modo pluit et modo sudum est*; Item *Luna modo crescit, modo decrescit*), aut particulis *Hic, ibi* (v. g. *Sol hic emollit, et ibi indurat*; item *Essentia hic tecta, et ibi resecta est*), aut particulâ *Quatenus*, quo casu tamen aliquid ultra Distinctionem adducimus. V. g. *Homo quatenus homo, ratiocinatur; quatenus animal, sentit*; ubi ultra Distinctionem reperiuntur illa Praedicata *Ratiocinatur et Sentit*.

## SECTIO II.

### De Instrumento Complexo.

Definitio, Divisio, et Exemplum, occupantur circa Terminos; seu Subjectum Quaestionis, cui respondent ista Instrumenta, Terminus quidam est; ideoque vocari possunt Instrumenta Simplicia. Ratio autem circa Enunciationes versatur, quae ideo Instrumentum Complexum dici potest. Nam Terminos Simplicia, Enunciationes Complexa Themata vocare, receptum apud Logicos.

## CAPUT I.

*De Ratione.*

1. Ratio est apta responsio ad Quaestionem *Cur est?* Veluti si quaeratur: *Cur ex vero nil nisi verum?* respondeasque: *Quia verum non potest dicere, verum esse, quod non est verum.* Ibi integra illa Enunciatio, quae subsequitur Notam *Quia*, et responsio est ad Praedictam quaestionem, et ideo etiam Ratio; at Nota *Quia* est nota Rationis, sicut *Est* Affirmationis, *Non* Negationis notae sunt. Rationes maxime elucēt in Demonstrationibus; v. g. *Cur Subjectum et Praedicatum concordant?* respond. *Quia dicuntur de eodem, nempe de ipso Subjecto* (Parte 1. Sect. 2. cap. 2. n. 1.); *Cur Subjectum non potest discordare a Praedicato?* respond. *Quia Terminus non potest dici de Termino repugnante secum* (ibid. n. 5.). Et sic ubicunque Demonstrationes in hoc libello videbis, semper etiam Locupletem aliquam Rationem deprehendes, quam aptissime respondere poteris ei qui Theorema demonstratum quaestioni *Cur?* subjecerit.

2. Sicut Definitioni Definitum, Divisioni Divisum, et sumptâ licentiâ voces fingendi, Exemplo accommodavimus Exemplatum; sic Rationi Ratum apponimus; et non est aliud quam Subjectum quaestionis *Cur?* seu id de quo quaerimus *Cur sit?* aptâ subsequente responsione. Sic in Exemplis proxime allegatis *Ex vero nil nisi verum, Subjectum et Praedicatum concordant, Subjectum non potest discordare a Praedicato*, Rata sunt. Ego passim *Ratam* dico, quia subaudio *Enunciationem*; haec enim sola Rata est, cum Terminus Ratus esse non possit, utpote qui non possit subjici quaestioni *Cur?* sed quod ei quaestioni subjicitur, semper Enunciatio est, ut infra videbimus.

3. Ordine Inventionis et Naturae Ratio praecedit Ratam; sed ordine Dispositionis ac Disciplinae Rata praecedit Rationem; insistentes enim ordini Naturae, primo novimus eam Proposi-



tionem, quae Ratio est; ex ea concludimus aliam Propositionem, quae per hoc Rata est. V. g. ordine Naturae et Inventionis primo deprehendimus hanc Propositionem: *Vera Enunciatio non potest dicere id esse verum quod non sit verum*, ex qua bene sequitur illa: *Ex vero nil nisi verum*, quae proinde per illam Sequelam denuo deprehenditur. Ordine vero Dispositionis in Logicâ primo ponitur ista: *Ex vero nil nisi verum*, ex altera subsequitur in Demonstratione hoc modo: *Quia Verum non potest dicere etc.* Sed dices: Ratio hujus Theorematis: *Repugnantes non possunt se habere ut Subjectum et Praedicatum*, est istud Theorema: *Subjectum et Praedicatum concordant*, et tamen in Logicâ nostrâ illa Ratio praecedit hanc Ratam, *Parte 1. sect. 2. cap. 2. n. 1. et 2.* Respond., Enunciationem quae est Ratio in Disciplinis debere praecedere Enunciationem quae est Rata, quia bene constitutae Disciplinae ordine Naturae procedunt. Sed hoc solum contendo, Rationem qua talem in Disciplinis sequi post Ratam; v. g. loco citato in Logicâ nostrâ Prima lex praecedit Secundam, qua Theorema; sed quatenus Ratio secundae Legis, sic subsequitur Secundam Legem.

4. Quaestio *Cur est?* complicat in se quaestionem *An est?* Et quidem ordine Periculi seu Examinis praecedit *An?* et sequitur *Cur?* v. g. hoc modo: *An Subjectum et Praedicatum concordent?* respond. *Concordant.* Rursum: *Cur concordant?* respond. *Quia affirmantur de eodem.* Sic quaerendo procedere solent, qui periculum faciunt seu examinant aliquem. At in ordine Inventionis ac Naturae redundat *An?* Si enim nescias *Cur sit, aut non sit*, nunquam statues *An sit, nec ne*; si vero hoc inveneris, *Cur sit, aut non sit*, jam frustra inquiris, *An sit, nec ne*, cum, si scias *Cur sit*, hoc ipso scias *Esse*, et si scias *Cur non sit*, hoc ipso scias *Non esse*. V. g. quamdiu nescis, *Cur Subjectum et Praedicatum concordent*, quamdiu etiam nescis, *Cur non concordent*, tamdiu fieri nequit, ut scias, *Concordent, an non concordent*; sed simul atque sciveris, *Cur concordent*,

aut simul atque sciveris *Cur non concordent*, jam vanum est quaerere quod inventum est, *An concordent nec ne*.

5. Sed : Quid ? inquis, nonne omnes noverunt, An Magnes trahat ferrum ? nonne item, aut nemo, aut certe pauci noverunt, Cur Magnes trahat ferrum ? Respond. Sicut hîc noverunt *An*, sic etiam noverunt *Cur* ; quia ferrum a Magnete trahi sciunt propter Rationem Externam, nempe Experientiam Sensus, aut Testimonium Historiae. Et sicut hoc non est proprie scire Cur, sic ipsi etiam non sciunt proprie An. Nullum enim proprie dictum Scire est, nisi ex Ratione proprie dictâ susceptum.

## CAPUT II.

### *De Ratione-Ut, Ne et Quia.*

1. Ad Quaestionem *Cur* ? respondentes, subinde praetendimus illam particulam *Ut* ; v. g. *Cur studes* ? respond. *Ut fiam doctus* ; atque hic redditur Ratio-ut. Subinde auspicamur responsionem ab illa Nota : *Ne* ; v. g. *Cur studes* ? respond. *Ne sim ignarus* ; atque ea responsio continet Rationem-ne. Tandem etiam responsioni nostrae subinde praefigimus Notam *Quia* ; v. g. *Cur Corpus est palpabile* ? respond. *Quia Corpus non est penetrabile* ; atque hic respondetur per Rationem-quia.

2. Ratio-ut jam pridem *Finis* vocatur, item *Causa finalis* ; Ratio-ne non habet adhuc nomen ; ego soleo illam *Initium* vocare, eâdem licentiâ, qua Ratio-ut *Finis* vocatur : quippe voluntas nostra inter Bonum ac Malum hoc pacto consistit, ut in Bonum quidem tendat per Media (ideoque Bonum in hoc motu habet conditionem Finis), a Malo autem recedat per Remedia, adeoque Malum habet condicionem Initii. V. g. Voluntas inter doctrinam, quae ut bona apprehenditur, et gnorantiam sic sita est, ut ab hac recedat, et in illam tendat ; et doctrinae quidem consequendae studium adhibeat tamquam

medium, idem studium contra ignorantiam adhibeat tamquam remedium.

3. Igitur nota Finis est *Ut*, nota Initii est *Ne*. Utrumque motivum voluntatis est; Finis enim allicit voluntatem quasi a fronte, Initium urget illam quasi a tergo. Neutrum proinde proprie dicta ratio est; haec enim ad Mentem spectat. Unde etiam neutrum est Enunciatio; v. g. *Cur studes? Ut sis doctus*, aut *Ne sis ignarus*; ibi Finis et Initium sequuntur suas notas, *Ut*, *Ne*, sed neutrum est Enunciatio, at imperfectum hoc: *Sis doctus*, *Sis ignarus*. Neutrum etiam exacte quadrat in quaestionem *Cur*; sed Finis potius in quaestionem *Quam-ob-rem?* item *In quem finem?* Initium autem in quaestionem *Quâ-de-causâ?* *Quo intuitu?*

4. Rationes-ut et -ne plausibiles dicuntur, quando cadunt in quaestionem habentem pro Subjecto suo Propositionem independentem a nostro arbitrio: v. g., *Cur sol unicus? Ne si plures sint, comburant Universum. Cur dierum et noctium, aestatis et hiemis vicissitudines? Ut sit varietas in rebus, et ne pulchra vilescant si nullâ molestiâ interpolentur. Cur quatuor Instrumenta? Cur quatuor Axiomata sexies repetita Cubum Logicum constituunt? Ut sit harmonia in rebus; Natura nempe quaternario numero gaudere videtur*. Hae, inquam, et similes ratiunculae plausum habent apud vulgum, quia Fabulis admodum inescatur; apud veros Philosophos fastidium. Licet enim sit ordo, varietas et harmonia in Universo, etiamsi Mundi incendium aliaque similia incommoda belle caventur, haec tamen omnia posteriora sunt, nec debent nos movere ad statuendum aliquid de rebus (sunt enim infinitis erroribus obnoxii tales discursus); sed cum ex veris ac legitimis Rationibus pervenerimus ad rerum notitiam, inveniemus res sic esse ordinatas, omnia se habere concinne, et Deum suum ubique testari.

5. Sola igitur Ratio-quia est, quae ad verae Rationis locum aspires; sub ejus tamen velamine latent aliquae rationes-ut et -ne;

quales v. g. hîc insinuantur: *Cur ambulas? Quia coelum serenum est. Cur domi manes? Quia pluit*; hoc enim est, *Ut coelo sereno fruar*, et *Ne a pluvia madescam*. Hae igitur et similes spuriae rationes, detractâ Notâ, quae iis non debetur, amendantur ad sui congeneres.

## CAPUT III.

*De Ratione Bonâ et Malâ.*

1. Ratio-quia distinguitur in Bonam et Malam. Bona Ratio est, quae apte respondetur ad quaestionem *Cur?* Mala Ratio est, quae quidem loco Rationis respondetur ad quaestionem *Cur?* sed non bene quadrat in illam quaestionem. Unde non est vera Ratio, sed supposititia. Ex quo patet, bonam Rationem etiam veram, et malam supposititiam vocari posse.

2. Et Mala quidem Ratio dividitur in Fatuam et Captiosam seu fallacem. Fatua est sic mala, ut ne quidem appareat esse bona; v. g. *Cur Essentia est prior Accidentibus?* respond. *Quia baculus est in angulo*. Captiosa ratio est quae sic est mala, ut tamen appareat esse bona; v. g., *Cur civitates A, B sunt aequales?* respond. *Quia habent aequales circuitus, seu aequale tempus uni ac alteri circumeundae impenditur*. Haec enim vulgo videtur Bona Ratio (vulgus enim civitates metiri consuevit tempore quod Cingulis eorum perambulandis impendit), sed non est bona ratio, cum aequales circuitus continere possint civitates admodum inaequales; puta si hic circuitus sit rotundus seu circularis, is longe majorem civitatem continebit quam alius circuitus oblongus seu ovalis, etiamsi ambo supponantur aequales, et aequale tempus iis ambulatione conficiendis impendatur.

3. Captiosa Ratio subdividitur in Rationem Sophisticam et Praejudicium. Ratio Sophistica est Ratio Captiosa propter voces; v. g. *Cur Petrus habet cornua?* respond. *Quia necdum*



*amisit ea*; illa enim Ratio captiosa est propter vocem *necdum*, qua insinuari videtur, Petrum habuisse cornua. Praejudicium est ratio captiosa propter rem et non propter voces; v. g. *Cur plumbum celerius labitur quam lignum?* respond. *Quia plumbum majori impetu labitur quam lignum.* Illa enim Ratio est mala, cum quae inaequali impetu labuntur, saepe labantur aequali celeritate (ut constat Experimentiâ in globo tormenti bellici majoris et pilâ palmariâ, quae ex fenestrâ domus simul demissa, simul etiam ad terram pertingunt), apparet tamen bona Ratio inexpertis; atque apparentiam illam non habet ex ullis vocibus, sed ex re ipsa. Tale est etiam istud Praejudicium: *Cur in lapidibus et metallis plus substantiae est, quam in aëre vel aqua?* respond. *Quia duriora et graviora sunt aëre ac aquâ.* Et plurima talia Praejudicia detecta vide apud Cartesium Praejudiciorum acrem infectatorem, praesertim parte 1. Princip. Philosoph. § 71.

4. Bona Ratio generat Scientiam; Fatua Ratio causat risum aut indignationem; Sophistica Ratio gignit confusionem; Praejudicium parit errorem.

## CAPUT IV.

*De Ratione Firmâ et Infirmâ.*

1. Bona Ratio subdistinguitur in Firmam et Infirmam. Ratio Firma est, quae Ratam ponit extra dubium, id est, certam et vere Ratam facit. V. g. *Cur Corpus est divisibile?* respond. *Quia Corpus est extensum;* *Cur Contrariae non possunt esse simul verae?* respond. *Quia alioqui Contradictoriae essent simul verae.* His enim rationibus certum fit atque extra omnem dubitandi aleam ponitur, et quod Corpus divisibile sit, et quod Contrariae non possint esse simul verae.

2. Ratio Infirma est, quae subjectum quaestionis saltem verisimile reddit, et non eximit ipsum penitus e dubio; ut: *Cur*

*pluet?* respond. *Quia coëunt multae et crassae nubes supra nostrum verticem.* Ex hac enim ratione fit quidam verisimile, quod pluet, sed non ita, quin absolute maneat dubium, pluetne an non pluet.

3. Infirma Ratio non est proprie ratio, sed Conjectura; neque tam apte quadrat in quaestionem *Cur?* quam in quaestionem *Unde conjicis;* v. g. *Unde conjicis quod male sibi conscius sit?* respond. *Quia ad commemorationem facinoris totus expalluit.*

4. Firma Ratio Certitudinem gignit; Infirma Ratio generat Opinionem. In hanc vulgus omne propendet; quod arguunt haec iis tam crebro usurpata vocabula, *Putare, Arbitrari, Existimare, Videri, Verisimile, Probabile, etc.*, quae omnia denotant Opinionem. Veri autem Philosophi ab Opinionibus; et hinc veteri Adagio *Putare non est Sapientis.*

## CAPUT V.

### *De Ratione Positivâ et Negativâ.*

1. Secundo Ratio distinguitur in Positivam et Negativam. Negativa Ratio est, non esse seu non occurrere rationem pro Contradictoria Ratae; v. g. *Cur ex Falso potest sequi verum?* *Quia nulla est ratio cur id non possit,* seu *Quia in eo nulla est Implicantia,* ut loquuntur, id est *nulla Contradictio;* hoc enim perinde est ac si responsum fuisset: *Quia nulla est ratio dicendi quod non possis.* Si enim esset ratio dicendi, quod non possit, ea esset, quod contradictio in eo lateret, id est, ipso posito sequeretur idem esse et non esse.

2. Ratio Negativa non valet nisi in Favorabilibus. Favorabilia sunt, quae praesumuntur seu supponuntur esse, quamdiu non probatur ea non esse. Et in Disciplinis inter favorabilia primum occurrit Potentia; praesumimus enim pro Potentiâ quamdiu non ostenditur Impotentia. Secundo Paucitas; multitudo enim et

diversitas in rebus non praesumitur nisi probetur; v. g. *Cur intellectus et voluntas realiter eadem sunt?* Ratio Negativa est: *Quia nulla est ratio distinguendi inter intellectum et voluntatem. Cur non dantur plures Enunciationes Compositae, quam Copulativae et Disjunctivae?* Respond. *Quia nulla est necessitas admittendi alias.*

3. In Foro Favorabilia occurrunt multa; hinc et Rationes Negativae, et Praesumptiones ibidem multae sunt. *Cur Reus est innocens?* *Quia non probatur esse nocens;* *Cur non valet Exceptio?* *Quia non ostenditur valere;* *Cur Possessio est bonae fidei?* *Quia non probatur mala fides; etc.*

4. Extra Favorabilia, in odiosis nempe vel neutris, absurdum est uti Ratione Negativa; v. g. *Cur ex Vero non potest sequi Falsum?* absurda ratio est: *Quia non ostenditur posse.* Potentia enim non debet probari, sed sine probatione praesumitur, quousque non probatur impotentia. Sic etiam in Foro: *Cur est nocens?* *Quia non probatur quod sit innocens,* absurdum et iniquum est.

5. Ratio Positiva est simpliciter Ratio, seu Ratio quae non est Negativa; v. g. *Cur ex Falso potest sequi Verum?* respond. *Quia quod falsum est potest pro aliqua sui parte verum esse.* Nota tamen, quod Ratio positiva bene possit esse Enunciatio negativa; v. g. *Cur non stat?* *Quia non potest stare,* positiva ratio est, etiam si sit Enunciatio negativa. Ratio enim non censetur negativa, nisi in hoc tota sit, *Non esse rationem pro opposita parte.*

6. Ratio Negativa non est proprie ratio, ne quidem in favorabilibus, ubi tamen suo modo valet; quia non bene redditur ad quaestionem *Cur sit?* sed potius ad quaestionem *Cur praesumendum sit?* V. g. *Cur reus est innocens?* in hanc quaestionem non bene quadrat: *Quia Actor non probat;* sed ea responsio potius in hanc Quaestionem quadrat: *Cur reus praesumitur innocens?* nec enim ideo est innocens, quia Actor non probat, sed ideo praesumitur innocens.

7. Ratio Positiva Assensum conciliat Subjecto quaestionis seu suae Ratae; Ratio Negativa Praesumptionem parit Subjecto quaestionis. Quae Praesumptio in eo consistit, quod etiam citra assensum, ita tamen agamus circa Propositionem, ac si assensum praestitissimus. V. g. Judex ex Ratione Negativâ, Actore scilicet non probante, non potest moveri ad assensum istius Propositionis: *Reus est innocens* (hic enim ei, stante solâ ratione negativâ, tam dubia est, quam ista: *Arenae maris sunt numero pari*); ita tamen agit ac si assentiretur; hinc et Reum absolvit, et Actorem multat.

## CAPUT VI.

### *De Ratione Internâ et Externâ.*

1. Ratio interna est, quae sequitur ex Subjecto quaestionis, seu ex Rata; v. g. *Cur Corpus est divisibile?* respond. *Quia Corpus est extensum*; sequitur enim: *Corpus est divisibile, ergo Corpus est extensum*, ex Ratâ Ratio. Nota vero, cum Ratio et Rata sunt Enunciationes negativae, etiam Rationem censerî internam, quando Contradictoria Rationis sequitur ex Contradictoria Ratae; v. g. *Cur lapis moto suo non defatigatur?* respond. *Quia non potest defatigari*, aut *Quia non est animal*, Interna Ratio est; non sequitur tamen: *Non defatigatur, ergo non potest defatigari*, neque: *Non defatigatur* (actu scilicet), *ergo non est animal*.

2. Ratio Externa est, quae non sequitur ex Subjecto quaestionis; v. g. *Cur graviora non semper per aëra celerius labuntur minus gravibus?* respond. *Quia constat Experientiâ*; et ad oculum videmus crustam panis simul cum plumbo multi ponderis e manu hominis stantis in pavimento demissa, simul etiam ad pavimentum pertingere. Haec Ratio est Externa, quia non sequitur ex Subjecto quaestionis; haec enim consequentia nulla est: *Ita est, ergo ita esse constat Experientiâ*.



3. Ratio Externa dividitur in Testimonium et Experientiam. Testimonium est assertio, quâ quis asserit certam Propositionem, seu dicit illam Propositionem esse veram. Fitque Ratio sui generis, cum ad quaestionem *Cur est?* reponitur; v. g. *Cur Mundus est ab aeterno?* respond. *Quia Aristoteles sic dicit.* Ut Testimonium in suo genere sit bona Ratio (absolute enim non est bona Ratio, ut statim patebit), requiritur peritia et probitas Testantis seu Testimonium perhibentis; bonus videri debet, ne videatur decepturus; peritus videri debet, ne existimetur ipse deceptus esse; utrumque fidem dictis ejus derogabit, si aut decipere velle videatur, aut ipse deceptus esse credatur. Hae duae condiciones, Probitas inquam et Peritia, cum penes aliquem manifeste reperiuntur, dicimus eum habere Auctoritatem.

4. Experientia est perceptio Sensus circa aliquam Propositionem. Ut Experientia, qua experimur Aloëm ventrem subducere, ferrum ad Magnetem accedere, Aestus maris a Luna pendere, etc. Fit ratio sui generis, cum ad quaestionem *Cur est?* reponitur. Ut Experientia in suo genere sit bona Ratio, requiritur Sensus constans, et verae Rationi non contrarius. Constans quidem, quia semel iterumve deprehendisse sensu non facit fidem, cum sensus facile decipiatur; v. g. *Post sumptum hoc pharmacum aeger convaluit*, non est sufficiens Experientia, ut hoc pharmacum isti aegritudini pellendae commendetur; sed demum si saepius et constanter aegri liberentur. Requiritur etiam ad legitimam Experientiam sensus Rationi non contrarius; quia cum Sensus contradicit Rationi, quantumvis ille sit constans, non fundat legitimam experientiam. V. g. cum oculus fuste percutitur, Sensus satis constanter observat scintillas; non licet tamen ideo dicere quod Experientiâ constet, eo casu scintillas circa oculum dispergi; huic enim Ratio reclamat; sed hoc tantum constat experientiâ, talem fieri eo casu perceptionem, qualis solet a scintillis excitari. Similiter astra omnia, excepto Sole et Lunâ, valde exigua et flammulis candelarum nostrarum

non abſimilia demonſtrat Sensus admodum conſtans; ipſum Solem et Lunam lancibus menſae non multo maiores. Hae ſenſus noſtri perceptiones non faciunt Experientiam, quia Ratio iis adverſatur.

5. Ratio externa non eſt vera Ratio, quia ad Quaestionem *Cur eſt?* non apte reponitur. V. g. *Cur acus in pyxide nautica jugiter ſe vertit ad Septentrionem?* Reſpondes: *Quia conſtat Experientiâ, et ipſe ſaepe vidi.* Mala reſponſio; non enim ideo ſic erat, quia tu ſic vidisti, ſed contra tu ſic vidisti, quia ſic erat, ſi modo recte videris. Et ſimiliter: *Cur Mundus eſt ab aeterno?* Inepta reſponſio: *Quia Ariſtoteles hoc dixit;* nec enim ideo ab aeterno eſt, quia ipſe hoc dixit, ſed quia ab aeterno eſt, ideo dixit ab aeterno eſſe; ſi modo ſat bonus et ſat peritus hoc dixerit, ſi nec decipiat hoc dicens, nec ipſe decipiatur.

6. Ratio interna fulgorem praestat ſuae Ratae; Ratio externa caliginem quidem ei non affundit, ſed nec diſpellit. Res enim nobis veluti contectae ſunt, et ſpiſſis tenebris involutae, antequam lumen verae Rationis acceſſerit. Interim Externa Ratio, cum ipſa ſatis valida eſt in genere ſuo, gignit etiam aſſenſum ſatis firmum erga Subjectum quaestionis, ſeu erga Ratam.

## C A P U T VII.

### *De Ratione Adaequatâ et Inadaequatâ.*

1. Ratio adaequata eſt Ratio reciproca cum Ratâ, id eſt, poſitâ Ratâ ponitur Ratio, et contra. V. g. *Cur Corpus eſt diſiſibile?* Reſpond. *Quia eſt extenſum;* recte enim ſequitur: *Diſiſibile eſt, ergo extenſum eſt,* et contra. Ex quo patet, Rationem Adaequatam ſemper etiam internam eſſe.

2. Inadaequata Ratio eſt, quae non eſt reciproca cum Subjecto quaestionis. Eaque vel Latior eſt vel Strictior. Ratio

Strictior est, quae infert Subjectum quaestionis, sed ab eo non infertur. V. g. *Cur lassus est? Quia vehementer cucurrit*; sequitur enim: *Vehementer cucurrit, ergo lassus est*, sed non sequitur: *Lassus est, ergo cucurrit*, cum et bajulando et saltando aut equitando fessus esse possit. Ratio Latior est, quae infertur a Subjecto quaestionis, sed ipsum non infert. V. g. *Cur fessus est? Quia egit*, aut *Quia est animal*, aut *Quia defatigabilis erat*; recte enim sequitur: *Fessus est, ergo egit*, aut *ergo animal est*, aut *ergo defatigabilis erat*, sed *Egit*, aut *animal est*, aut *defatigabilis est, ergo defatigatus est*, nulla Consequentia est.

3. Ratio Disparata non datur. Si enim interrogatus *Cur lassetur?* responderis: *Quia albus est*, aut *Quia ingeniosus est*, Fatuam Rationem reddere videris; cum tamen Rationes Inadaequatae, licet non sint omnino verae Rationes, non tamen eo usque malae sunt, ut fatuae dici possint; sed quadrant aliquatenus in quaestionem *Cur?* et in suo genere bonae sunt. Attamen hoc non est inconueniens: *Cur fessus est? Quia cucurrit*; cum tamen disparata videantur *fatigari* et *cucurrisse*. Sed si bene attendas, videbis hîc reddi Rationem Strictiorem; quia quod ordinarium est in ea consideratur; ordinarium autem est, ut currens defatigetur: adeoque ordinariâ saltem lege ex Ratione hîc sequitur Rata, quamvis non contra. Cum Disparata Ratio sit Fatua, stultior adhuc erit Ratio Repugnans; v. g. *Cur non sentit? Quia est animal*.

4. Inadaequata Ratio absolute non est bona Ratio; quia rigide loquendo, non recte quadrat in quaestionem *Cur?* Nec enim ideo fessus est, quia defatigabilis erat, multi enim defatigabiles sunt et non fessi; similiter nec ideo simpliciter fessus est, quia cucurrit, sed ideo tantum currendo-fessus est. Ratio Inadaequata passim etiam non tam Ratio vocatur quam Condicio; et Ratio quidem latior *Condicio-sine-qua-non*, Ratio autem strictior *Condicio-cum-qua-sic* vocatur; ut *Animal esse* est *Condicio-sine-qua-non Defatigationis*; et *Currere* est *Condicio-*

cum-qua-sic *Defatigationis*. Ratio Strictior secundum se etiam non est Interna, sed tantum ex genere suo; non sequitur enim secundum se ex Subjecto Quaestionis, sed tantum secundum genus suum; non sequitur enim *Fessus est, ergo cucurrit*, sed *Fessus est, ergo vehementer exercuit*, cujus vehementis exercitii species quaedam est cursus.

## CAPUT VIII.

*De Ratione a Priori et a Posteriori.*

1. Ratio-a-Priori est Ratio quae assignatur per Terminum priorem in Ordine Logico; id est, Subjectum Rationis Subjecto Ratae, aut Praedicatum Praedicato, Logice prius est. V. g. *Cur Materia est in Subjecto? Quia Essentia est in Subjecto; Essentia* enim est prior *Materia*, cum sit Superius *Materiae*. Item *Cur lapis non fatigatur? Quia non est animal; Animal* enim prius est *Fatigato* tamquam Essentia, Proprietate dimanante ex illâ Essentiâ, aut tamquam Actu istius proprietatis, si nempe *Fatigatum* actu intelligas.

2. Ratio-a-posteriori est quae assignatur per Terminum posteriorem in Ordine Logico. V. g. *Cur potest stare? Quia stat; Stans* enim posterius est *Potente stare*, ut supra videre potes. Item, *Cur Corpus infinite extensum? Quia infinite divisibile est; Divisibile* enim posterius est *Extenso* tamquam Proprietas Differentiâ ex qua resultat.

3. Petes: qualis est Ratio data per integram Definitionem; v. g. *Cur A est Essentia? Quia A est Praedicatum in Subjecto*. Item: *Cur Petrus est homo? Quia est animal rationale*. Respondeo, hanc rationem gratiâ suarum partium esse a priori; gratiâ sui totius nec a priori, nec a posteriori, imo nec rationem esse, sed idem. Quatenus igitur Definitio seorsim suas partes, Materiam inquam et Formam, applicat alicui, eatenus est Ratio



Definiti; fed quatenus illas conjunctim applicat, idem est cum Definito. Et Definitio quidem etiam subinde *Ratio* dicitur. Veluti cum dicimus: *Habet rationem Essentiae, Habet rationem Praedicati, etc.*, quod perinde est atque Definitionem Essentiae, Praedicati, etc. ei competere.

4. Ratio-a-Posteriori non est proprie dicta Ratio, quia non dicit *Cur sit*, fed *Quod sit*. V. g. *Stare me* non dicit *Cur stare possim*, fed tantum dicit *Quod stare possim*. Ratio-a-posteriori dividitur in Inductionem et Indicium. Inductio est Ratio-a-posteriori assignata per omnes Species Generis in Ratâ expresse vel implicite contenti; v. g. *Quare Extrema Argumenti debent esse Enunciationes?* respond. *Quia et Antecedens debet esse Enunciatio, et etiam Consequens debet esse Enunciatio*; ibi enim in Ratâ Genus est *Extremum Argumenti*, cujus omnes Species adferuntur in Ratione, nempe *Antecedens* et *Consequens*. Item: *Cur Terminus Definiens et Definitus debent Converti?* respond. *Quia nec Subalterni esse possunt, nec Disparati, nec Repugnantes*; ibi enim in Ratâ implicite ponitur Genus istarum Specierum, quae enumerantur in Ratione; insinuat enim Quaestio, quod Definiens et Definitus non possint se habere alio modo quam ut Convertibiles; ubi *Alio modo* importat Genus omnium reliquorum modorum. Igitur Inductio non spectat principaliter ad Argumenta, ut vulgo persuasum habent; transfertur tamen secundario etiam ad Argumenta seu Ratiocinationes; sicut generatim omnes Rationes, seu proprie dictae seu analogicae, eo transferuntur, ut infra patebit.

5. Indicium comprehendit quamlibet Rationem-a-posteriori distinctam ab Inductione. Et sub eo primo loco occurrit Exemplum; quod est Ratio-a-posteriori assignata per unam tantum Speciem Generis in Rata contenti, v. g.: *Cur ex Falso potest sequi verum?* respond. *Quia v. g. Sum bos est falsum; et tamen ex eo sequitur hoc verum: Sum ens*; ibi enim una tantum Species seu unum tantum Subalternatum *Falsi verum inferentis* depro-

mitur. Exemplo tantum locus est, cum Rata continet Potentiam, aut Genus particulariter sumptum. Cum autem Rata continet necessitatem, aut Genus distributum, utendum est Inductione. Unde: *Cur Definitio debet esse convertibilis?* respond. *Quia v. g. ista Definitio: Homo est animal rationale, est convertibilis*, valde manca et inepta responsio; esto enim, haec Definitio sit convertibilis; unde constat, nullam alibi esse, quae convertibilis non sit? Et distinguendum magnopere inter Exemplum ut Exemplum, nempe quatenus spectat ad Secundum Instrumentum, ac inter Exemplum quatenus est quaedam Ratio-a-posteriori. Et quidem Exemplum qua tale non male subnectitur Propositioni Universali, in qua Genus distribuitur. V. g.: *Definitio debet esse convertibilis; sic v. g. ista Definitio: Animal rationale, convertitur cum Definito suo, nempe Homine*, non est ineptus sermo; sed tunc demum ineptit Exemplum, cum isto casu locum Rationis affectat, et ad quaestionem *Cur?* responderi se finit; non vero cum tantum velut Materia incorporandae Propositioni subjicitur.

6. Secundo loco sub Indicio reperitur Argumentum, sed aliâ significatione quam qua *Parte 3. sect. 1. cap. 1.* et deinceps a nobis usurpatur. Est igitur Argumentum hîc Ratio-a-posteriori assignata per Actum, cum Rata contineat Potentiam, aut per Proprietatem, cum Rata contineat Essentiam, aut per Proprietatem posteriorem, Ratâ continente priorem. Sic *Sto* arguit (id est, Argumentum est) *Me stare posse*. Et, quod *Corpus divisibile sit*, arguit, *Corpus extensum esse*. Et, quod *Palpabile sit*, arguit, ipsum *Resistere et Impenetrabile esse*. Argumentum, quoad primum Membrum, saepe participat cum Exemplo.

6. Quamvis autem Ratio-a-posteriori non sit proprie dicta Ratio, communicat tamen cum genuina Ratione in ista excellenti Proprietate: *Probat*, et non minus invincibiliter probat, quam vera Ratio. Unde et nos ea saepe saepius usi, ut *Parte 2. sect. 2. cap. 4. n. 3. 4. 7. 8. 9. 10. 11.*, ubi Exemplis et Indiciis jugiter utimur loco Rationis; et *n. 3.* breviter ostenditur,

Indicia et Exempla istis casibus sufficere ad demonstrandum. Inductione etiam saepe usus sum, praesertim *Parte 3. sect. 2. cap. 5. n. 8.* et ibidem *cap. 10. n. 3., etc.*

## CAPUT IX.

*Prima Proprietas Rationis.*

1. *Ratio illustrat.* Habet enim Ratio maximam analogiam cum Lumine; cum citra Rationem omnino nobis sint obscura et velut in densissima nocte constituta. Unde apud omnes cujuscunque condicionis homines haec audias, non videre se, obscurum sibi esse quod dicitur, quamdiu rationem non intelligunt ejus quod dicebatur; quam simul atque perceperint, clarum jam sibi esse, jam se conspiciere dicunt id de quo sermo fuerat; et si, quod sibi ratione factum est clarum, alii adhibitis iisdem rationibus non intelligant, ajunt eos caligare aut etiam coecos esse.

2. Et quidem Ratio propriissime illustrat. Caetera enim Instrumenta aut explicando (velut Definitio et Divisio) aut incorporando (velut Exemplum) illustrant; quod sane non est proprie illustrare, sed dumtaxat occasionem praebere ut illustretur. Cum enim v. g. tapetem, qui complicatus fuerat, evolvimus, aut aeri incisam imaginem injecto atramento chartae imprimimus, tantum ponimus condicionem ut illustretur tapes aut imago a lumine circumfuso; non autem aut ipso collustramus, aut condicio illa collustrat. Sic etiam Instrumenta incomplexa non illustrant proprie, sed sunt condiciones extrinsecae, quibus positis naturaliter succedit illustratio seu declaratio Subjecti circa quod adhibentur; Ratio vero illustrat proprie tamquam ipsa lux affusa et infusa Propositioni quam dictat.

3. Ex quo patet, hanc esse primam Proprietatem Rationis; Rationi enim proprie competit, nec datur ratio cur ei competat, sicut non datur ratio cur lux luceat et illustret, nisi ratio

eminens. Caeteris vero Instrumentis illustrare competit improprie, ut jam proxime declaratum est; et ex ratione competit; ideo enim Definitio et Divisio illustrant, quia explicant; ideo Exemplum illustrat, quia incorporat, et crassum ac palpabile reddit.

4. Haec Proprietas principaliter competit Rationi verae. Rationes enim improprie dictae non illustrant; velut Ratio externa, Ratio negativa, Ratio inadaequata latior non illustrant, Inadaequata strictior subinde non nihil illustrat, quia subinde continet in se veram rationem aut causam sicut Antecedens suam conclusionem; Ratio-a-posteriori, quando caeteroqui bona est, satis etiam illuminat, nisi quod tergum quodammodo et non faciem irradiet. Causa etiam, quamvis non sit proprie ratio, proprie tamen illustrat, nec hac in parte cedit Rationi. De Causa mox sequetur.

## CAPUT X.

### *Secunda Proprietas Rationis.*

1. *Ratio probat.* Probat conciliando assensum Propositioni per ipsam Ratae ac dictatae, idque suo merito.

2. Quid sit Assensus, non debet dici nisi per Exemplum. Si in animo et ex animo tecum dixeris *Duo et tria sunt quinque*, jam assensum praebuisti isti propositioni: *Duo et tria sunt quinque*. Assentiri alicui propositioni a parte rei est dicere quod illa propositio sit vera; dicere, inquam, in animo et ex animi sententia. Assensui opponitur Dissensus; et dissentiris v. g. isti propositioni: *Duo et tria sunt sex*, si tecum ex animo dixeris, non ita esse, seu falsum id esse.

3. Hinc dimanant istae Proprietates: 1. *Manifeste vero assentiri possumus, dissentire non possumus*; v. g. huic: *Duo et tria sunt quinque*, assentiri perfacile; dissentire, quidquid conemur,



impossibile est; quamvis quidem ore tenus negare possimus illam Propositionem, sed hoc non est ei dissentire. 2. *Manifeste falso dissentire possumus, assentiri non possumus*; v. g. huic propositioni: *Duo et tria sunt sex*, dissentire perfacile, sed assentiri penitus impossibile. 3. *Dubio nec assentiri possumus nec dissentire*; v. g. huic: *Arena maris sunt numero pari*, nec assensum nos praestare posse nec dissensum, sed haerere, et inter utrumque librari, quam clarissime sentimus in nobis ipsi. Et quidem quod dubium est, possumus opinari, dum intra limites dubii magis ad verum accedere videtur, adeoque *Verisimile* vocatur aut *Probabile*; sed tamen absolute non possumus assentiri; opinari enim est infirmiter assentiri, id est propendere et inclinari in assensum, necdum tamen assentiri.

4. Ratio non hoc solo probat, quod assensum conciliet Propositioni ratae, sed hoc etiam quod digna sit assensu, seu assensum istum mereatur Propositioni a se dictatae. Alioqui Captio etiam seu Captiosa ratio conciliat saepe assensum Subjecto quaestionis; tunc tamen non censetur probare, sed decipere, quia assensum, quem conciliat, non meretur Subjecto quaestionis; adeoque ille assensus *Error* vocatur; v. g. *Cur civitates A et B sunt aequales?* respond. *Quia habent aequales circuitus*. Vulgus ob hanc rationem assentitur Subjecto quaestionis; sed ratio non meretur illum assensum, adeoque vulgus ob rationem illam assentiendo Errat; et sic ratio ista non probat, sed imponit vulgo.

5. Non sola Ratio probat, seu merito conciliat assensum Propositioni ratae. Sed etiam Ratio externa, praesertim Experientia, conciliat saepe firmum assensum Subjecto quaestionis. Idem praestat Ratio-a-posteriori, quae in probando certe non cedit Rationi-a-priori, quamvis in illustrando primas ei deferat. Ratio inadaequata latior nihil probat. Probat saepe Ratio strictior. Nihil denique Ratio infirma, Negativa, aut Mala probant. Sed Negativa Praesumptionem, Infirma Opinionem

conciliat Subjecto quaestionis; jam autem nec Praesumptio nec Opinio sunt assensus. Ratio mala subinde conciliat assensum; eo tamen non probat, sed decipit ac in errorem ducit, ut dictum est.

6. Omnis tamen Ratio proprie dicta probat; adeo ut cum alium in finem petimus *Cur?* quam ut nobis probetur Subjectum quaestionis, responsio ad istam quaestionem exuat naturam Rationis, et potius jam Causa fit. Atque adeo illo casu non tam proprie petimus *Cur?* quam *Unde?* Velut: *Unde Eclipsis in Luna?* respond. *Ab interposita Terra inter Solem et Lunam;* melius inquam ibi petitur *Unde?* quam *Cur?* quia probari nobis non petimus Eclipsim, cum de eâ nullum sit dubium, tamquam de re sensui manifestâ; quapropter respondens non tam proprie Rationem cur fit Eclipsis, quam Causam unde fit Eclipsis reddere censetur.

7. Atque hinc fit, ut Contingentium non detur proprie Ratio; quia non petimus illa nobis probari, cum vel sensu pateant vel omnino nos lateant. Cum sensu patent, non petimus ea probari, quia hoc frustra foret; v. g. nemo petit sibi probari ventos, nimbos, fulmina, aestus maris, dierum noctiumque vicissitudines, incrementa ac decrementa Lunae, Eclipses, etc., cum satis ista videat quilibet; sed unde sint, naturaliter quaerimus; adeoque Causam hîc quaerimus et non Rationem, proprie scilicet loquendo; Causa enim sicut admodum affinis est Rationi, ita saepe etiam nomine Rationis se ingerit.

## C A P U T X I.

### *Tertia Proprietas Rationis.*

1. *Ratio militat.* Militat pro Ratâ suâ, et in Contradictoriam suae Ratae. Militia ejus maxime consistit in eo, quod conciliet dissensum Contradictoriae Propositionis quam ipsa Ratio dictar-

Unde Ratio eâdem operâ, qua probat, etiam militat; Assensus enim unius et Dissensus alterius Contradictoriam aequivalent, et in re quodammodo idem sunt (sicut dicere: verum est *Sto*, et dicere: falsum est *Non sto*, idem sunt in re); atqui probando Ratio conciliat assensum propositioni Ratae; ergo et dissensum Contradictoriae ejusdem Ratae, quod est Militare hîc.

2. Oritur interim hîc Divisio Rationis in Directam et Indirectam. Directa Ratio est, quae principaliter probat (ita scilicet, ut secundario tantum et velut ex accidenti militet). Indirecta Ratio est, quae principaliter militat (ita nempe ut secundario tantum probet). V. g. *Cur ex vero nil nisi verum?* respond. *Quia verum non potest dicere quidquam falsi, sed quidquid dicit, verum sit necesse est.* Haec ratio directa est, et principaliter probat Subjectum quaestionis. *Cur ex vero nil nisi Verum?* respond. *Quia aliqui Verum diceret aliud quidpiam esse Verum, quod tamen non foret verum; hoc autem est impossibile.* Haec Ratio indirecta est et principaliter militat; hoc enim principaliter agit, ut evertat Contradictoriam Ratae, ostendendo nempe quod ex Contradictoria Ratae sequatur impossibile; quo ostenso concidit illa Contradictoria, juxta Principium Logicum *Falsum non nisi ex falso.*

3. Ratio Indirecta ordinarie conjicitur in Syllogismum Hypotheticum Indirectum, quem et ideo *Indirectum* vocavi; v. g. *Si ex Vero sequeretur aliquid quod non esset Verum, jam Verum diceret aliquid esse Verum, quod tamen non esset Verum; sed posterius est absurdum, ergo et prius.* Ratio Directa nititur isto Principio Logico: *Ex vero nil nisi verum*; Ratio Indirecta isto: *Falsum non nisi ex falso.*

4. Rationis Indirectae frequens usus est in Mathematicis disciplinis; incipitque in earum Demonstrationibus hac formulâ: *Si enim non credatur etc.*

## CAPUT XII.

*Quarta Proprietas Rationis.*

1. *Ratio convincit.* Nempe fortiter inclinando nos in assensum Propositionis ab ipsa dictatae. Eâdem igitur operâ, qua probat et militat, eâdem inquam operâ nos convincit. Et quidem fortissime convincit. Quidquid imponant hominum Testimonia, quidquid urgeant Experientiae, quidquid statuât Praesumptio, quidquid suadeant Conjecturae, circumveniant Fallaciae; his omnibus potentior est vel unica non fucata Ratio.

2. Vincit autem haec omnia sola Ratio, tum conciliando tum profligando. Experientias saepe conciliat Ratio, et inter se et secum, id est, cum ipsa Ratione. Caetera sibi adversa, velut Praesumptionem, Testimonia, Conjecturam et Captiones profligat; nec plus illa valent affulgente Ratione, quam tenebrae sub dio deprehensae valeant adversus orientem Solem.

3. Experientiam conciliat secum. Videamus in Exemplo. Ratio dictat, *Corpus a Corpore penetrari non posse*; Experientia videtur oppositum suadere. Nam cyathus cineribus repletus tantundem ferme admittit aquae quam vacuum; quod sic videbis: Cyathum aquâ reple, mox eandem aquam effunde in scyphum vacuum; tum cyathum probe detersum reple cineribus per cribrum antea transmissis; tum aquam e scypho sensim affunde; totam pene bibet. Hic Experientia Rationi adversari videtur; sed eam Ratio in Physicis secum conciliat.

4. Experientias inter se conciliat. Videamus in Exemplo. Plumbum et lignum simul demissâ ex fenestra domus, si soluta sint, simul ad terram pertingent; si interjecto bacillo colligentur, praecedit plumbum. Has Experientias, quantum apparet, inter se dissidentes, Ratio conciliat. Item, si in situla aquam continente plumbum ex funiculo suspensum ita demergas, ut nec fundum nec latera tangat, gravior fiet situla; sed multo gravior fiet si lapidem, qui sit cum isto plumbo aequalis ponderis,



eodem modo e manu fufpenfum demergas (quod ftaterâ, fi vis, expendere potes; ita enim invenies, ut dixi). Haec et infinita fimilia funt in Phificis praefertim Difciplinis, quae Rationi conciliare incumbit.

5. Atque inde patet, Experientiam dignitate quàm proxime accedere ad Rationem (fub Ratione hîc etiam comprehendo Rationem-a-pofteriori, nempe Inductionem et Indicia). Utpote quam Ratio nunquam a fe repellit, cum legitima eft, nec hoftiliter profligat, ut caetera fibi adverfa; fed amice conciliat fibi, tamquam egregium fub ipfâ militem; fed nempe fub ipfâ. Cum Testimonio (hominum nempe, de eo enim loquor) non tam benigne agit Ratio; fed ubi hoc illi adverfum fuerit, fit quantumvis legitimum, et ufu atque confenfu firmatum, Ratio tamen illud evertit, et auctoritatis vel in partem vel in folidum apud alios difpendio multat Testantem.

6. Quatuor funt adhuc Proprietates Rationis, quae vim fuam principaliter exferunt in Animum, ficut, quae praecefferunt, in Mentem; quas curfim appono: 1. *Quietat*; 2. *Delectat*; 3. *Pafcit*; 4. *Satiat*. Quietat Ratio (ubi cum Ratione etiam Caufam comprehendî volo); Animus enim irrequietus, donec Rationem inveniat. Cum enim etiam Experientiâ certi fumus eſſe, non ibi ſiſtimus, fed naturaliter cur fit inquirimus. Certum Experientiâ eſt, ferrum accedere ad Magnetem; non acquieſcimus, fed inſtamus: *Cur accedit?* Certum eſt, e pleno vaſe, bene undique obturato, detracto epiſtomio, nihil effluere; centies id vidimus; fed hoc nihil eſt; quaeritur, *cur nihil effluat?* Et ita jugiter urgemus illud *Cur?* et in quaerendo *Cur eſt?* totum noſtrum Cor eſt. Nihil Animo bono gratum, niſi quod bonae Menti Ratum.

7. Nec jam plura dicam de his effectis. Hoc videbit qui volet, Rationem eſſe veram imaginem Divinitatis, cui cum probe conformamur Animo et Mente, jam bene Rationales, jam boni homines, et quantum nobis datum eſt, Divi fumus.

## CAPUT XIII.

*De Primâ Notione.*

1. Prima Notio est Propositio necessaria cujus non est petenda Ratio. Ut *Ens est Ens*. Dico *Necessaria*; quia licet Contingentium non petatur ratio, non tamen primae notiones vocantur.

2. Prima Notio subinde etiam est prima Ratio, nempe quando non tantum non petenda est ejus Ratio, sed neque potest reddi ulla ejus Ratio praeter ipsam; sic ista est prima Ratio: *Ens est Ens*, quia nec petendum est cur sit, nec si petatur, reddi potest alia Ratio praeter id ipsum quod positum erat in quaestione. Datur vero Prima Notio, quae non sit prima Ratio; ut *Corpus est Corpus*. Etiam si enim non debeat peti ratio, si tamen petita fuerit, reddi potest *Quia Corpus est Extensum*.

3. Objicis: Philosophi dicunt: *Essentiae non datur Ratio*. Respondeo: dicere volunt: *Non est danda*. Alioqui iidem dicunt, *Formam esse rationem quidditatis*; id est, si aliquid Formam habens affirmetur de Subjecto, Ratio istius Affirmationis reddi poterit per istam Formam; adeoque haec juxta eos bona Ratio est: *Lapis est Corpus, quia lapis est extensus*, imo etiam: *Corpus est Corpus, quia Corpus est extensum*. Si enim *Quoddam Corpus* (id est lapis) *ideo Corpus sit, quia extensum est*, certe etiam *Corpus ideo Corpus est, quia extensum est*.

4. Prima Notio apte redigitur in quaedam Capita. Primum Caput contineat Propositiones essentiales, in quibus nempe Essentia dicitur de suo Subjecto. Hae semper sunt Primae Notiones, quando bene intelliguntur; cum enim Essentia semper sit in Subjecto, tales Propositiones non nisi identicum aliquod continent; v. g. *Corpus est ens*, id est, *Certum illud ens est ens*; *Corpus est extensum*, id est, *Res extensa est extensa*; aliud enim non intelligimus per *Corpus* quam *Rem extensam*. Et si quis aliud quiddam velit, is non de eadem re loquetur, de qua

nos loquimur et quam nos *Corpus* vocamus, etiamſi eodem nomine aliam illam rem designet, quod nihil operatur in ipſa re.

5. Secundum Caput contineat illas Propositiones, in quibus prima Proprietas affirmatur de Subjecto Definitionem non admittente; ut *Verum nihil falſi dicit, Aequalia coincidunt* (cum ſcilicet unum alteri rite ſuperponitur). Cum enim Subjecta iſtarum Propositionum juxta Regulam Definitionis non debeant definiri, primae Proprietates iſtorum Subjectorum ſuccedunt quodammodo in locum Effentiae, adeoque conſtituunt Primas Notiones. Et talis farinae ſunt plerumque Communes Notiones quae in Scientiis circumferuntur, ut videre potes in Elementis Euclidis.

6. Tertiam Claſſem facio earum Propositionem neceſſariarum, in quibus primum Analogum dicitur de Subjecto; ut *Ratio illuſtrat, Exemplum incorporat, Aequalia coincidunt*. Licet enim haec ſaepe multum probari et illucidari debeant a poſteriori, antequam rite capiantur, tamen nullâ Ratione-a-priori probari poſſunt; adeoque nulla vera Ratio iſtorum reddi poteſt, aut certe nulla petenda eſt. Plures forte tales Claſſes concinnari poſſunt, a quibus recenſendis abſtineo brevitatis ſtudio.

## CAPUT XIV.

### *De Ratiocinatione.*

1. Ratiocinatio eſt Ratio in Argumentum redacta. Quod fit, cum Ratio loco Antecedentis ponitur (ſaepe etiam adhibita applicatione, quae applicatio *Subſumptum* vocatur aut *Minor*), Rata vero loco Concluſionis reſervatur; v. g. *Effentia eſt in Subjecto et Accidens tantum conſiſtit loco Praedicati; Atqui Subjectum ſenſu prius eſt Praedicato, ergo Effentia eſt prior Accidente*; ubi applicatio Rationis ſequitur notam *Atqui*, haec enim proprie eſt nota applicationis Rationis, ſeu nota ſubſumpti. Item

*Corpus eſt extenſum, Atqui extenſum eſt diviſibile, ergo Corpus eſt diviſibile.* Unde Ratiocinatio ſervat ordinem Naturae, quem invertit Rationis-quaefſtio ſeu Quaefſtio-Cur cum adhibita reſponſione; vide hac Sect. cap. 1.

2. Ex dictis patet, quod omnis Ratiocinatio ſit Argumentum, quamvis non omne Argumentum ſit Ratiocinatio; paſſim tamen confundunt. At ſicut Ratio analogice ſeu cum adjunctis particulis extendit ſe ad Rationem bonam et malam, fatuam et captioſam, firmam et infirmam, etc., ſic etiam Ratiocinatio cum iifdem particulis dicitur, ac etiam Argumentum. Ita ut hoc pacto loquendo Argumentum Bonum ſeu bona Ratiocinatio ſit quae continet bonam Rationem ſuae concluſionis; et conformiter cenſendum de Argumento Malo, Captioſo, Fatuo, Sophiſtico, Firmo, Infirmo, etc. V. g. hoc eſt Argumentum Plauſibile: *Convenit eſſe varietatem in Univerſo; ergo conveniens erat poni dierum et noctium viciffitudines.* Item *Conveniebat alimentum in promptu eſſe nutriendis infantibus; ergo conveniebat lac eſſe in mamillis puerperarum;* ſuggerit enim rationem plauſibilem pro ſua Concluſione. Hoc eſt Argumentum Captioſum: *Civitates A et B habent aequales ambitus, ergo ſunt aequales;* ſuggerit enim Rationem Captioſam pro ſua Concluſione. Et tali methodo facile conficies Argumenta Poſitiva, Negativa, Firma, infirma, etc. habitis ſimilibus Rationibus.

3. Argumentum Infirrum vocant paſſim *Argumentum Dialecticum*. Argumentum autem Firmum, ſi etiam internum fuerit, vocatur *Demonſtratio*, item *Argumentum Demonſtrativum*, aut *Apodicticum*. Eſtque Demonſtratio aut a priori, aut a poſteriori, prout ſcilicet Rationem-a-priori vel Rationem-a-poſteriori pro ſua Concluſione adducit. Quibus addunt Demonſtrationem-per-reductionem-ad-impoſſibile, quae ſcilicet continet Rationem indirectam pro ſua concluſione. V. g. haec eſt Demonſtratio-a-priori: *Corpus eſt extenſum, Atqui extenſum eſt diviſibile, ergo Corpus eſt diviſibile.* Haec eſt Demonſtratio a poſteriori: *Recte*



*sequitur: Sum bos, ergo sum animal; Atqui prius est falsum, et posterius est verum; ergo ex falso potest sequi verum.* Haec est Demonstratio-per-reductionem-ad-impossibile: *Si ex vero sequeretur falsum, jam verum diceret, quod falsum esset verum; Atqui posterius est absurdum, ergo et prius.*

4. His etiam Dilemma subjungo; quod non est aliud quam Demonstratio ex Contradictoriâ Conclusionis; infrequens genus Demonstrationis sed fortissimum. Ideo autem rarum est Dilemma, quia rarum est, Propositionem aliquam sequi ex suâ Contradictoriâ. Estque talis propositio summe necessaria; sive enim sit vera, vera est, sive sit falsa (id est, Contradictoria ejus sit vera), equidem vera est. Duo Dilemmata invenies in hoc Libello circa duas primas partes Legis Contradictoriarum *Parte 2. Sect. 2. cap. 10. n. 3.* Mathematici etiam tales aliquas Demonstrationes exhibent, sed paucas. Dilemma dicitur a Forma, qua proponi aliquando solet; v.g. hoc modo: *Vel Contradictoriae sunt simul verae, vel non sunt simul verae; si non sunt simul verae, bene habet; si sint simul verae, ergo non sunt simul verae;* quae postrema Consequentia probanda est Demonstratione a nobis exhibitâ loco proxime citato. Atque ea continet nucleum Dilemmatis; cum apparatus ille qui praeceffit, quique ei nomen dedit, tantum sit cortex.

## CAPUT XV.

### *Considerationes circa Instrumenta.*

1. Prima Consideratio: In Definitione, Divisione, et Ratione, Subjectum Quaestionis Scientificae subjicitur etiam in Response, et Instrumentum sequitur velut ex parte Praedicati. In Exemplo autem is ordo invertitur, et Instrumentum ponitur loco Subjecti. V. g. *Quid est essentia?* respond. *Essentia est*

*Praedicatum in Subjecto*; ibi Subjectum quaestionis, nempe *Essentia*, subjicitur etiam in responsione, Instrumento seu Termino Definiente posito ex parte Praedicati. Idem facile apparet in Divisione. In Ratione vero Subjectum quaestionis in Responsione non quidem proprie obtinet locum Subjecti, Instrumento tenente locum Praedicati (cum sint Enunciationes), sed veluti; v. g. *Cur Corpus est divisibile?* respond. *Corpus est divisibile, quia Corpus est Extensum*; ibi Rata in responsione veluti subjicitur, et Ratio veluti praedicatur. In Exemplo autem: *Detur Essentia*, respond. *Homo est Essentia* (nempe *Hominis albi*), Subjectum quaestionis in Responsione praedicatur, et Instrumentum ponitur loco Subjecti. Et hinc confirmatur ratio analogica Materiae in Exemplo.

2. Secunda Consideratio: Subjectum Rationis est Enunciatio; Subjecta reliquorum Instrumentorum sunt Termini. Etiam si enim hoc valeat: *Cur calamus?* respond. *Ut scribatur*, tamen ibi non est Ratio, sed tantum Ratio-ut, seu Finis. Si vero responderis *Quia convenit scribere*, aut idem valet cum praecedenti responsione, aut nihil valet; non enim ideo est calamus, quia hoc convenit; posito enim quod aliquid sit conveniens seu bonum, non ideo necessum est suppetere media ad ipsum; ut convenit Daedalum avolare, non ideo ei sunt alae.

3. Tertia Consideratio: Ratio continet duo Instrumenta, Exemplum et Divisionem. Cum enim responsum fuerit ad quaestionem *Quodnam?* aut *Quotuplex?* responsio subjici debet quaestioni *Cur?* alias non est Instrumentum sciendi. Itaque duo tantum sunt Instrumenta capitalia, Definitio et Ratio. Imo cum Definitio sit Eminens Ratio sui ipsius, merito quis dicat, unum tantum Instrumentum esse, nempe Rationem. Haec enim, ut vidimus, omnia reliqua Instrumenta complectitur. Haec igitur Logicae Objectum est, et ab hac *Logica* seu *Rationalis Ars* nostra dicitur.

## CAPUT XVI.

*De Sophismate.*

1. Sophisma idem est quod Argumentum Sophisticum, id est, Argumentum suppeditans Rationem Sophisticam pro sua Conclusionem; v. g. *Petrus necdum amisit cornua, ergo Petrus adhuc habet cornua.* Sophismatum ingentem plerique Logici farraginem obtrudunt. Nos tribus hisce generibus totam Sophismatis latitudinem exhaustiri existimamus; inquam: Sophismate Difformi, Sophismate Vago, et Sophismate Mimico.

2. Sophisma Difforme est, quod fallit, quia admissa Ratione in uno sensu, postea subsumitur Applicatio, aut infertur Conclusio juxta alium sensum Rationis. Fundamentum hujus Sophismatis est, quod Ratio ejus admittatur juxta Regulam de favendo Veritati *Parte 1. Sect. 2. cap. 8. n. 3.*; in subsumendo autem vel inferendo negligatur Regula de conformitate locutionis *ibid. n. 4.* V. g. *Quidquid non amisisti, habes; cornua non amisisti, ergo cornua habes;* ubi prima propositio admittitur (juxta Regulam de favendo Veritati) in sensu commodo, nempe hoc: *Quidquid habuisti, et non amisisti aut aliter alienasti, hoc adhuc habes;* postea subsumitur *Cornua non amisisti,* non juxta illum sensum primae propositionis, sed juxta alium ejus sensum qui rigidus est, nempe: *Quidquid non amisisti simpliciter (sive interim habueris, sive non), hoc adhuc habes.* Similiter hinc: *Cornua necdum amisisti, ergo cornua adhuc habes,* Antecedens juxta Regul. de fav. ver. conceditur in sensu rigido; infertur autem Consequens juxta sensum commodum Antecedentis, nempe hunc: *Cornua quae habuisti, non amisisti:* nam particula *quae habuisti* videtur aliquatenus subindicare istam particulam *Necdum.* Tale est etiam istud Sophisma: *Cuncti intrant hanc Civitatem per portas, ergo magnus Turca intrat hanc Civitatem per portas.* Juxta Reg. de fav. ver. admittitur Antecedens; ideoque Antecedenti datur sensus commodus, nempe *Cuncti intrant hanc*

*Civitatem per portas, cuncti*, inquam *qui intrant*; infertur autem Consequens juxta sensum rigidum Antecedentis, ac si dictum fuisset, quod *Cuncti intrarent hanc Civitatem, et quidem cuncti intrarent per portas*.

3. Solvitur Sophisma Difforme, difformitatem tollendo et Conformitatem ei restituendo. His enim rite factis evanescit ejus fallacia, et detegitur fatuitas. V. g. *Quidquid habui et non amisi, adhuc habeo*; Concedo Majorem. *Cornua habui et non amisi*; Nego Minorem pro priori parte. Hic reponitur conformitas quoad sensum commodum. Item: *Cornua necdum amisi*; Concedo Antecedens. *Ergo cornua adhuc habeo*; Nego Consequentiam, quia quod non amisi, habere non debeo, nisi habuerim. Hic reponitur conformitas quoad sensum rigidum.

4. Sophisma Vagum est, quod fallit quia habet fere omnia requisita ad Argumentum Logicum in certâ specie, sed re bene examinatâ peccat contra Regulam generalem aut specialem istius argumenti. Hoc Sophisma vagatur circa omnes species Argumenti Logici. Aliud enim ferme Conversio est; v. g. *Mus rodit caseum, ergo caseus rodit murem*, sed peccat contra Reg. de integre transponendis extremis. Aliud fere Syllogismus est; v. g. *Omnis homo est animal, nullum brutum est homo, ergo nullum brutum est animal*, sed peccat contra Reg. de non proced. a non distrib. ad distrib. Item: *Omne animal sentit, qui profunde dormit non sentit, ergo qui profunde dormit, non est animal*, peccat contra Reg. de vitanda Homonymia. Et plura Sophismata hujus farinae vide supra. Aliud ferme Argumentum a-divisis-ad-conjuncta; v. g. *Hic canis est pater, hic canis est tuus, ergo hic canis est pater tuus*. Et sic porro.

5. Solvitur Sophisma vagum adferendo Regulam e Logica, contra quam peccat. Et nota, quo magis celat vitium suum, eo magis Sophisma esse, quale est illud: *Omne sentiens est ens, solum animal sentit, ergo solum animal est ens*. Item: *Quidquid est domi meae, est Leidae, unicus catellus est domi meae, ergo*



*unicus catellus est Leidae*; quae duo Sophismata peccant contra Reg. de non proced. a non distrib. ad distrib. ex parte majoris extremitatis, quae in Antecedente est Praedicatum affirmationis (adeoque ibi non distribuitur), in Consequente autem est Praedicatum negationis, sed tecte, nec patet nisi exponendo Consequens. Tale etiam est istud: *Duo et tria sunt par et impar, quinque sunt duo et tria, ergo quinque sunt par et impar*; quod peccat contra Reg. de cavenda Homonymia; nempe Terminus *Duo et tria* accipitur aequivoce propter particulam *Et*, quae in Majori laxè copulat, et in Minori presse.

6. Sophisma Mimicum est, quod simulat Argumentum Logicum in certâ specie, sed re aliquatenus examinatâ immane discrepat ab illo. V.g.: *Qui promittit est gratus, et praestans quod promissit adhuc gratior, ergo qui promittit verbera est gratus, et cum verberat adhuc gratior*; simulat enim Argumentum a genere ad speciem, sed re aliquatenus perpensâ nulla est apparentia, sed est Argumentum a repugnantibus, et proinde nihil valens. *Promittens* enim et *Promittens verbera* non sunt subalterna, sed repugnantia, cum promittens verbera minime promittat, sed minetur. Tale est etiam istud Sophisma: *Christus est agnus, ergo Christus est bestia*; videtur enim primâ fronte esse Argumentum a specie ad genus; sed re aliquatenus inspectâ est a repugnantibus, et per consequens absurdum; *Agnus* enim et *Bestia*, etiamsi in proprietate sint subalterna, tamen prout ibi per Tropum ponuntur, sunt repugnantia.

7. Solvitur hoc Sophisma larvam ei detrahendo, et reduciendo ipsum ad illum locum unde petitum fuerat.

8. Inter Sophismata eminet unum, quod ideo splendidum vocare soleo, nempe: *Quicumque dicit te esse animal, dicit verum; sed qui dicit te esse asinum, dicit te esse animal; ergo qui dicit te esse asinum, dicit verum*. Et licet Sophisma istud in istis tantum Terminis circumferri soleat, forma tamen ejus communis valde est, et infinitas similes nugas admittit. Unde

si attendant Sophistae, hic iis ubertim nata est occasio quidlibet absurdi Sophistice concludendi. V. g., Probare vis, album esse nigrum? Sic perge: *Quicumque dicit, album esse coloratum, dicit verum; sed qui dicit, album esse nigrum, dicit album esse coloratum; ergo qui dicit, album esse nigrum, dicit verum.* Vis probare, .... Sed quid opus est plura adferre? cum enim quidlibet fit ens, de quocunque Sophistice inferre poteris, ipsum esse quidlibet aliud.

9. Solutionem hujus Sophismatis, quotquot adhuc videre datum est, infeliciter aggressi sunt omnes, et quidam tam misere, ut non satis se vindicent ab illa labe, qua eos denigrat conclusio Sophismatis. Quo autem solutionem ejus expediamus, Nota, dupliciter aliquem hoc vel illud dicere, nempe Formaliter et Consequenter. Formaliter aliquid dicere est, conceptis verbis aliquid dicere; sic ille Formaliter dicet, te esse animal, qui totidem verbis dicit: *Tu es animal.* Consequenter aliquid dicere est, non hoc ipsum difertis verbis dicere, sed est dicere Antecedens, ex quo hoc bene sequatur. Sic qui dicit *Sto*, consequenter dicit, se stare posse, sed tamen hoc formaliter non dicit; at formaliter tantum dicit *Sto*.

10. His positis, veniat ad criterium Sophisma. *Quicumque dicit me esse animal, dicit verum;* Concedo Majorem, tum juxta Reg. de sensu obvio, tum juxta Reg. de favendo verit.; atque ideo hîc fit sensus: *Quicumque formaliter dicit, me esse animal, ille dicit verum;* non est enim necesse, ut qui consequenter hoc dicit, etiam verum dicat. Licet enim verum sit, me esse animal, potest tamen verum ex falso sequi, adeoque qui consequenter dicit, me esse animal (id est, Antecedens aliquod dicit, ex quo sequatur me esse animal), nullatenus necessum est ut is verum dicat. Atque ita satisfactum est Majori. Pergamus ad Minorem: *Atqui qui dicit, me esse asinum, dicit, me esse animal.* Nego Minorem juxta Regul. de conformitate locut.; ille enim qui dicit, me esse asinum, non dicit formaliter, me esse animal,

sed tantum consequenter. Si instet Sophista et velit, in Minori hoc, *dicat me esse animal*, intelligi *sive formaliter sive consequenter*, Concedo ei Minorem. *Ergo qui me dicit esse asinum, dicit verum*; Nego Consequentiam. Est Syllogismus, clamat Sophista. Respond.: sunt quatuor Termini; Medius enim Terminus, *Dicens me esse animal*, accipitur Homonymôs; in Majori est *Formaliter dicens, me esse animal*; in Minori *Sive formaliter sive consequenter dicens me esse animal*. Sed importunus est Sophista. Cape, inquit, in Majori, in Minori, sive formaliter, sive consequenter. Respond.: Esto; teneor enim obedire juxta primam Regulam *Parte 1. Sect. 2. cap. 8. n. 1.* Acceptionis; sed jam nego Majorem. Qui enim sive formaliter sive consequenter dicit me esse animal, non est necesse ut is verum dicat.

II. Tandem huc condescendo, ut, si in praedicto Syllogismo per vocem *dicat*, ubique intelligat Sophista *Formaliter vel consequenter dicit*, concedam ei integrum Syllogismum, Majorem, Minorem, Consequentiam, et Conclusionem. Ridet Sophista, et jam, inquit, intentum habeo, jam fateris te asinum esse cum caeteris; a qua labe alios non bene se expedire censebas, eandem et ipse incurris. Bona, inquam, verba, bona verba. Hic est sensus Syllogismi a me sic plene admissi: *Quicumque formaliter vel consequenter dicit, me esse animal, is formaliter vel consequenter dicit verum; Atqui, qui me asinum esse dicit, is formaliter vel consequenter dicit, me esse animal; Ergo, qui me asinum esse dicit, is formaliter vel consequenter dicit verum*. Ecce non fateor, me asinum esse; sed, qui me asinum esse dixerit, eum formaliter vel consequenter aliquid veri dicere; quod sane ita est, cum, qui *me asinum esse* dicit, consequenter dicat *me sensitivum esse, me animal esse, me ens esse, etc.*, quae omnino vera sunt.

## A P P E N D I X.

Methodum tractare non concernit Logicum, sed aliam aliquam Scientiam, secundam a Logicâ, anonymam hactenus, quam circumloquendo vocare possemus *Scientiam de Scientiis*. In qua de Notioribus, de Simplicioribus, Facilioribus, de Progressu mentis in cognitione rerum, de Gradibus per quos incedit, et offendiculis ac remoris, aliisque similibus multis tractandum, antequam ratio Methodi legitime constet. Tractatum aliquem in hanc Scientiam, Deo dante, brevi faciam publici juris. Auctarii saltem loco ex illo Tractatu huc transfero: Cum omnes moneant, in Scientiis nihil omittendum eorum quae dicenda sunt, Ego hoc moneo, nihil etiam committendum eorum, quae dicenda non sunt. Ingens hoc Scribentium cacoëthes transformavit omnes ferme Disciplinas in Rhapsodias. Et malam illam Metamorphosim potissimum debemus communi illi Logicae, quae per Scholas ubique divagatur. Abstrahant igitur, qui scripturi sunt, et discernant Objecta sua diligenter ab omni colluvione Materiae. Et ut aliquod saltem Exemplum habeas legitimae talis Abstractionis, repete quae dixi *Parte 3. Sect. 3. cap. 9. n. 2.*

F I N I S.



---

# DICTATA AD LOGICAM

E COD. SCHOLARUM MS.

---

## P R A E M O N E N D A.

Logica duplex est: Argumentatrix et Ratiocinatrix. Argumentatrix proprie Dialectica, Ratiocinatrix in specie Logica vocatur. Argumentatrix est iterum duplex: Inventrix et Indicatrix. Inventrix vel invenit ex alterutrâ praemissarum, et vocatur Disciplina (discientium enim est, ex praeceptis et cognitis veritatibus novas per Argumentationem elicere), vel ex conclusione, et vocatur Doctrina, item Probatrix. Indicatrix est itidem duplex: Indicatrix simpliciter, quae dijudicat utrum Argumentum oblatum bonum sit an malum, et Notatrix, quae vitium inventum ostendit et notat.

### AD PAG. 175:

N. 1. et 2. non proprie spectant ad Logicam, sed referuntur ad Scientiam de Scientiis. Sicut enim datur scientia aliqua de virtute (et haec est Ethica), item scientia aliqua de argumentatione (et haec est Logica), item scientia aliqua de rebus materialibus (et haec est Physica), et sic de caeteris, — sic etiam datur scientia aliqua de ipsis scientiis, ubi definire, unde incipere debeant; quo tenore, quae tractanda in iis sunt, disponi ordinarique debeant. Proinde haec scientia praescribit etiam Logicae, incipiendum ei esse ab Affirmatione, definendum in Argumentatione; simul quo tenore, quae inter haec interjecta sunt, exigi debeant, expendit; et similia praestat in aliis scientiis.

N. 2. Quid sit Affirmatio non debet dici, et afferuntur rationes duae, ob quas dici hoc non debeat: quia sc. primum est in Logica, et infuper quia est notissimum. Nam quod primum est in Logica vel

in aliqua aliâ scientiâ, non debet de eo dici quid sit; si enim diceretur quid esset, jam non ipsum illud, sed per quod, quid sit, dicitur, primum esset. Sic in Logica si dicas, quid sit Affirmatio, hoc modo (nam in exemplo non requiritur veritas): *Affirmatio est arbor cum pomis*, jam non Affirmatio prima erit in Logica, sed Arbor Affirmatione prior erit, et si, quid sit Arbor, etiam dixeris, jam nec Arbor prima erit, sed id per quod dices, quid sit Arbor, Arbore prius erit. Quod clarissimum est ex Scientiâ de Scientiis, et vel hîc facile sine demonstratione intelligitur.

Secunda ratio, quare non debeat dici, quid sit Affirmatio, est quia Affirmatio est notissima seu clarissima; ergo non debet, nec potest declarari; et si non possit declarari, non potest etiam dici quid sit; nam dicere quid sit est rem declarare, et quidem excellentissimo modo declarare. Ex his patet, duas esse causas ob quas aliquando non possumus dicere quid sit res: 1°. quia res illa est nimis obscura (v. g. tirones interrogati, quid sit enthymema, quia ignorant, et nimis obscurum est iis); 2°. quia nimis clara et aperta res illa est, de qua quaeritur quid sit. Sic quilibet interrogatus, quid sit *duo et tria esse quinque*, respondere non potest, non quia ignoret, sed quia nimis bene sciat, nimisque ei notum atque clarum sit, et per consequens non possit amplius declarare; quod tamen faciendum ei erat, si ad propositam quaestionem respondere aliquid, quod e re sit, decrevisset. Populus tantum agnoscit priorem causam; si enim dixeris, non posse te, quid res aliqua sit, dicere, eo quod ignores, et res illa tibi nimis obscura sit, feret; sin non posse te dicere quid sit res, eo quod nimis clara sit, professus fueris, explodet, et tanto, inquiet, melius debebas dicere quid sit, quanto tibi clarius est quid sit. Sed hanc populi repraesentationem facile eludimus regeſtâ ei interrogatiunculâ: Quid est, duo atque tria esse quinque? quidve est A esse A, etc., quibus quod respondeant inveniunt nihil, adeoque experienciâ et quasi ipso tactu convincuntur, posse rem eousque claram esse, ut quid sit dici nequeat.

Quando res tam clara est, tum fieri facile potest, ut nomen rei obscurum sit vel ambiguum. Infinita enim est diversitas inter rem ipsam et nomen rei; solent tamen tirones et vulgus confundere rem cum nomine suo. Quod inde factum videtur, quia nominibus inter

loquendum utimur loco rerum, quae tamen minime ideo res ipsae sunt; sicut calculi, etiam si iis inter computandum et subducendum pro nummis et summis uti solemus, minime nummi aut summae sunt. Potest ergo sine dubio facile contingere, ut re quidem clarâ nomen tamen rei obscurum sit atque ambiguum. Quod etiam extemplo facile declarari potest; nam si dictum fuerit: *color leucophaeus*, res quidem nota omnibus (vocatur enim aliter: *color cinereus*), sed nomen illud multis erit obscurum. Similiter pueri saepe, quod viride est, flavum aut rubrum vocant, non quidem in re ipsâ errantes (vident enim colores aequae atque nos), sed in nomine; non enim satis callent idioma maternum. Similiter facile fieri potest, et fit certe, ut cum tironibus Affirmatio ipsa clarissima sit, nomen tamen Affirmationis ambiguae sit illis obscuraeve significationis.

Cum vero re clara obscuritas aliqua versatur in nomine, eximere obscuritatem illam possumus, efferendo primum nomen in alio idiomate; sic v. g. nomen Affirmationis declarabimus efferendo illud Belgice, sc. *Verseeckering*; atque adeo omnis sententia illa, cui bono sensu praefigi potest Belgicum nostrum *ick verseecker uw'*, Affirmatio est. Et dico: bono sensu, non autem: cum veritate. Haec enim etiam est Affirmatio: *Petrus est bos*; cui quidem bono sensu, sed nullâ veritate praefigi potest Belgicum illud jam dictum.

Secundo possumus obscuritatem nominis illustrare afferendo nomen ejusdem rei in aliâ aliquâ disciplinâ; et sic Affirmatio quae apud Logicos vocatur, apud Grammaticos *Indicatio* (inde apud ipsos Indicativus modus) vocanda videtur. Ideoque omnes sententiae quae sunt Indicativi modi, et etiam solae illae sunt Affirmationes. Ex quo facile patet, hanc esse Affirmationem: *curanda est valetudo*; hanc minime: *cura valetudinem*; etiam si enim duabus hisce sententiis res eadem dicatur, non tamen eodem modo dicitur. Alius enim Indicativus (et hic solus ad Affirmationem pertinet), alius Imperativus est. Quae diversitas non est nullius in Logicâ momenti; inde enim provenit, ut altera istarum sententiarum *vera sit vel falsa* (nempe quae dicit: *curanda est*), altera nec vera nec falsa (quae dicit: *cura*). Et dixi, sententias ad Indicativum modum pertinentes esse Affirmationes; nam verbum *sum* (cum sc. verbum substantivum est, et mera nota affirmandi, certe se solo sententiam non absolvit; non vero

cum verbum adjectivum est, idemque valet ac *existit*, quo casu sententiam integram se solo absolvit) non est Affirmatio, quia licet Indicativi modi sit, non est tamen sententia.

Tertio denique manifestatur nomen per exemplum aliquod rei significatae per illud nomen. Sic v. g. nomen Affirmationis si obscurum sit, illustrabitur exemplo, et praecipue plusculis exemplis adhibitis. Afferantur proinde haec: *disputatur*; *Petrus est doctus*; *coelum est serenum*; *fit*, etc. Huic adde: si affinia quaedam, quae isto nomine non continentur, in medium protuleris ostenderisque, quae sit horum ab iis quae nomine isto continentur diversitas, nomen illud magnopere illustraveris. V. g. si Affirmationis non tantum exempla afferas, sed etiam haec atque similia proponas: *cura valetudinem tuam diligenter*; *utinam essem bonus logicus*, etc. Haec enim, cum Affirmationibus affines sunt sententiae, si, quae diversitas inter eas et veras Affirmationes intercedat, demonstraveris (ostendendo nempe, haec imperanter aut optanter, illa vero indicanter seu affirmanter dici, esseque illa vera vel falsa, haec neque vera neque falsa) magnam lucem in istud nomen contuleris.

Atque hi sunt tres aut quatuor modi quibus nomen aliquod declarare possumus; qui bene observari debent, nam sunt magni in disciplinis omnibus momenti, cum homines saepius ignorantia nominis quam rei labantur in errores. Non semper autem hi quatuor locum habent, quando res est clara et nomen rei obscurum. Subinde enim fieri potest ut nomen ejus alio idiomate expressum nihilo clarius sit eo quod in alia lingua exprimitur nomine. Tunc autem unicum restat exemplum, eaque quae exemplo adjecimus, affinia nempe, quae a significatione nominis excludi debent. V. g. Acceptionem et Suppositionem (de quibus agitur Cap. IV) satis, imo plus quam satis intelligimus (cum sit actus nostrae mentis, quem sexcentis agimus quotidie). Cum igitur hic nomen rei satis obscurum esse possit, declarari tamen nomen illud non potest si in alio idiomate efferatur (ibi enim obscurius forte erit quam in Logica), neque in alia scientia (aliae enim scientiae hac de re non tractant); superest ergo exemplum quo declaretur hoc nomen; et plura alia tecum ipse finge; vide Cap. IV.

Si petas, unde fiat quod Affirmatio nobis tam clara sit, perfacilis jam est responsio. Ex iis enim, quae circa nomen ejus explicandum



diximus, satis patet, Affirmationem non esse aliud quam certum actum nostrum (certum modum cogitandi nostrum), sicut videre, audire, amare, odire, esurire, sitire, etc., de quibus nunquam dicendum est, quid sint, cum eorum nimis jam explorata ac manifesta sit conscientia.

Habet vero Affirmatio hanc etiam praerogativam inter istos actus, quod sexcenties eam exerceamus quotidie; ubi saepe multi dies, imo et menses (quod potissimum de iis qui aetate aliquantulum processere, et umbraticam vitam inter litteras agunt, accipiendum est) elabuntur, quod ne semel quidem aut esuriamus aut sitiamus. Multum etiam subinde temporis est, quo non timemus, non speramus, non gaudemus, etc. At dies nullus abit quo non affirmemus saepe et saepius, si non ore (nec enim hoc ad affirmandum requiritur) ast mente, quod ad affirmandum satis est. Cur igitur haec et re et nomine tam clara? Affirmatio quidem re certe nota, nomine obscurior? Resp. quia de aliis illis solet populus loqui, de Affirmatione non item, hanc enim philosophis remittunt. Hinc ergo factum, ut nomina quidem aliarum istarum rerum perinde ut res ipsae clara sint, Affirmationis autem nomen obscurum manferit, donec adhibitis declarationibus (de quibus supra) perinde clarum fiat et manifestae significationis ut nomina famis et sitis, caeterarumque rerum ante enumeratarum et similium.

N. 3. Hic proprie incipit Logica; quae praecefferunt enim ea ex Scientia de Scientiis mutuati sumus. Nam Logicae non est dicendum, quid facere debeat Logica, sicut militis non est dicere quid miles facere debeat, sed id facere, nec de armis, sed arma tractare. Haec igitur omnia in prooemio Logices dicta sint, atque ibi maneant, neque se unquam in Logicam ipsam exferant.

Incipit ergo Logica a Subjecto et Praedicato. Et quidem nota Subjecti est *de quo*, Praedicati *quod*; haec enim duo adesse debent, si Affirmatio sit; nam si dicam, et de quo dicam et quod dicam necessum est adesse simul. Si petas: Quid necessum est ut, cum dico, sit de quo dicam? — resp., non debere dici, imo non posse dici; nam dicere quare sit non minus est declarare, quam quid sit dicere; hoc vero declarari non potest cum dico: Debet esse de quo dicam. Simile quid est de isto: Si dicam, debet esse quod dicam. Idea Subjecti absolvitur in *de quo*, Praedicati in *quod*. Nota vero, quâ homines invicem significare solent, quid inter affirmandum subjectum esse

velint, quid praedicatum, consistit in ordine aliquo; ponunt enim Subjectum primo, Praedicatum ultimo loco, sicut Belgae, dum quem ab altero verberari, amari, etc. dicunt, inter verberantem et verberatum simili ordine distinguunt; nam illum primo, hunc sequenti loco in sententia ponunt. Proinde sicut hic ordo non est a naturâ (Latini enim non observant illum, et amantem ac amatum pro lubitu praeponunt aut postponunt, solâ casus diversitate discrimen amantis et amati facientes), sic nec ille ordo a natura est, quo subjectum primo loco reponitur in Affirmatione. Unde Rhetores et Poëtae saepe mutant et intervertunt eum; v. g. *Homo bellus est Petrus; Animal homo est compos mentis*, etc. Ordo igitur hic totus est ab arbitrio humano; poterant vero meliorem instituere ordinem, juxta quem nota affirmandi seu verbum, quod jam interponitur, praeponeretur et primo loco prodiret, ut sic prima fronte, quem actum celebrare vellet, audienti subindicaret loquens. Sicut eadem de causa notam interrogandi, item exclamandi, etc. primo loco ponunt in sententiâ, ut ita audienti statim se manifestent in subjiciendâ sententiâ aut exclamationem, aut optationem, aut interrogationem, etc. velle celebrare. Quamvis igitur hic ordo sit meri arbitrii humani, non tamen negligendus est Logico; adeoque in sequentibus insinuare invicem debemus, quid Subjecti, quid Praedicati vicem habere voluerimus; semper Subjectum primo loco in Affirmatione nostrâ reponentes intelligemus hoc ipso, illud haberi loco ejus *de quo*, et similiter Praedicatum ultimo loco constituentes intelligemus ipsum *quod* loco ejus dicere. Et jussi vel ab homine vel ab Axiomate affirmare de aliquo alio (puta A de B) semper de quo affirmare jussi sumus (puta B) primo loco, et illud quod affirmare jubemur (puta A) ultimo loco reponemus in Affirmatione nostra, sciemusque ex eo indice facile eas esse Affirmationes: *Albedo est color* et *Color est albedo*, sed hanc quidem falsam, illam autem veram; licet autem apud Rhetores pro iisdem haberi soleant, qui eundem ordinem in sensu intelligunt istius utriusque propositionis, licet non sit idem in voce. Sed Logici insistentes decreto isti de Subjecto primum, et Praedicato deinceps reponendo, plane diversum sensum percipiunt in praedictis Affirmationibus, eo usque ut alteram veram, alteram falsam esse facile intelligant.

Subjectum aliquando secundum se assertur in Affirmatione (quo casu

naturalem Affirmationem esse dicimus), ut hic: *Homo est animal*; aliquando secundum se non affertur, sed designatur tantum per notam *Aliquis* (quo casu Affirmationem artificialem nos vocamus), ut: *Aliquod animal* (puta homo) est rationale. Unde patet, idem esse posse in utraque Affirmatione subjectum, sed in alterâ expresse poni et secundum se afferri, in alterâ tantum designari. Quae sublatâ notâ *Aliquis* supersunt in Affirmatione artificiali, non Subjectum et Praedicatum, sed Termini concordantes vocantur, de quibus infra in Sect II. Cap. I. In Affirmatione autem naturali propriè Subjectum et Praedicatum reperitur.

Subjectum et Praedicatum communi nomine vocantur Termini. Unde Terminus non est aliud quam sive Subjectum sive Praedicatum; ubi Subjectum et Praedicatum sumuntur per potentiam (de quibus Sect. I. Cap. II.); adeo ut Terminus non sit aliud quam omne id quod ita est expressum, ut possit locum Subjecti vel Praedicati in Affirmatione aliquâ obtinere; ut *Sapientia*, *Sapiens*, termini sunt, non autem *Sapienter*, *Sapientiam*.

Cum vero unumquodque sit hoc quod est, et per consequens omnis Terminus de se ipso affirmari possit (nam et *sapientia est sapientia* et *sapiens est sapiens*, etc.), hinc omnis Terminus absolute et Subjectum et Praedicatum est.

Subjectum et Praedicatum vocantur etiam aliquando Extrema, sed hoc nomen generalius est; nam etiam propositiones quae in enunciatione compositâ per copulam grammaticalem connectuntur inter se, vocantur etiam Extrema enunciationis compositae; ut hic: *Sto et loquor*, extrema sunt alterum quidem *sto*, alterum autem *loquor*.

NB. Sunt quatuor Subjecta Affirmationis et Negationis: 1°. Subjectum *de quo* Affirmationis (i. e. de quo affirmo); 2°. Subjectum *quod* Affirmationis (i. e. tota illa propositio quam affirmo); 3°. Subjectum *de quo* Negationis (de quo nego); 4°. Subjectum *quod* Negationis (totum illud quod nego).

Propositio affirmans et affirmata sunt idem; negans et negata differunt toto coelo. E. g. *Petrus est doctus* eadem est affirmans et affirmata; *Petrus non est doctus* est negans; sed negata est haec: *Petrus est doctus*, de ea enim dicitur hic *non* seu *falsum*.

NB. In assignando Subjecto et Praedicato studiose cavendum est,

ne quid plus aut minus demus quam quod petitur. In assignando Praedicato tirones saepe plus quam Praedicatum assignant, idque praecipue in illis propositionibus, in quibus Praedicatum cum Copulâ complicatur in verbo grammatico. V. g. *Animal sentit*; Praedicatum, inquiunt, est *sentit*; hoc vero non est Praedicatum, sed Praedicatum et Copula. In propositionibus vero praeteriti vel futuri temporis solent illi, qui minus in Logicâ versati sunt, pro Praedicato assignare partem Praedicati seu minus Praedicato. V. g. *Puer erit senex*; Praedicatum, inquiunt, est *senex*; hoc vero non est ibi Praedicatum, sed tantum pars ejus, nam Praedicatum ibi est *futurus senex*. Simile quid locum habet hic: *Senex fuit puer*.

Similiter in Subjecto saepe solent minus assignare, ut hic: *Aliquod animal est homo*; Subjectum, inquiunt, est *animal*; hoc vero non est Subjectum sed tantum pars Subjecti.

Et sic porro memores esse debemus, eum non dare quod petitur, qui plus vel minus dat quam petitur.

#### AD PAG. 176.

N. 4. Verbum seu Copula verbalis (datur enim et alia copula, quam grammaticalem vocant, quae media inter duas enunciationes, de qua Part. II. Sect. I. Cap. V.) non est aliud quam affirmandi nota. Operae ergo pretium est scire, quid sit Nota.

Nota est signum actus ut exerciti; i. e. signum quo significamus actum aliquem nostrum (ut affirmationem, negationem, amorem, odium, etc.) non simpliciter (qualiter etiam est cum nomen suum importatur), sed prout hic et nunc a nobis exercetur. Sic *An* est nota, et quidem interrogandi nota; significat enim actum aliquem nostrum (nempe interrogare), et non simpliciter significat illum actum, sed prout hic et nunc exercetur et a nobis agitur. Dum enim dicimus *An*, etc., non tantum significamus interrogationem, sed nos interrogare, seu interrogationem hic et nunc exercere.

Nota duplex est, nempe nota Mentis seu Intellectus, et nota Animi seu Voluntatis. Actus enim omnes nostri vel ad Intellectum vel ad Voluntatem pertinent; cum igitur, illos actus exercere nos, significatum aliis volumus, signum aliquod adhibemus, quod hoc ipso, quo actum illum ut exercitum significat, induit rationem Notae. Et quidem notae Animi sunt gestus illi, nutus, et oris inflectiones,



quibus aut amare nos aut odisse, aut timere, detestari, item taedere nos alicujus rei, pudere, poenitere, volentes quidem saepe, et saepe etiam nolentes testamur ac inviti. De notis Animi nihil ad Logicam pertinet; sunt enim hae sine veritate falsitateve, imo ad veritatem falsitatemve nihil faciunt, ad quas tantum Logica pertinet.

Nota Mentis est quae ad veritatem falsitatemque refertur, ut *Est, Et, Vel*, etc. Nota Mentis dividitur in Puram Notam et Copulam. Pura Nota est quae, licet ad veritatem falsitatemve referatur, potest tamen sine veritate exerceri. Complectitur duas potissimum notas, sc. Praecisivam et Condicionalem. Praecisiva nota est qua eorundem duorum alterum ab altero praecidimus; talis est illa nota *Quatenus, In quantum*, etc. *Homo quatenus animal* non ratiocinatur; item *Profundum qua profundum non est altum*. Nota Condicionalis seu Suppositiva est quâ supponimus, ut factâ suppositione illâ aliquid inferamus, negemus, narremus, doceamus; tales notae sunt *Si, fit*, etc., ut: *Si Petrus est bos, Petrus est bestia*; item: *Petrus fit bos, ergo et bestia erit*. Ubi nota, in exemplis allegatis veritatem falsitatemque reperiri quidem, sed post exercitium praedictarum notarum, sic sc. ut illae vim suam totam jam exercuerint antequam veritas falsitasve resultet. Cum enim *Homo quatenus animal* dico, jam praecisio absoluta est, et cum dico *Si Petrus est bos*, jam suppositio peracta est; quod vero iis suppletur, non spectat ad suppositionem praecisionemve, et oratio tota aliunde veritatem suam quam ex praedictis notis fortitur.

Copula vero est talis nota Mentis, quae ad veritatem falsitatemve facit, et sine veritate falsitateve exerceri non potest, ut *Est, Et, Vel, Ergo*, etc. Nihil horum significanter dici potest, quin veritas simul falsitasve dicatur. Copula igitur alia est Verbalis, alia Grammaticalis. Copula Verbalis idem est ac Verbum, non aliud nempe quam nota affirmandi. Copula Grammaticalis est particula, quae juncta propositioni, affirmationi, sensum inficit refarciendum appositione alterius propositionis, de qua agitur in Logica Part. II. Sect. I. Cap. V.

Petes, cur non quatuor Copulae sint, nempe nota affirmandi, nota negandi, nota copulandi et nota disjungendi. Resp. quia negatio non pertinet ad Copulam sed ad Praedicatum; nec enim aliud est Negatio quam Affirmatio, quâ de aliâ Affirmatione affirmamus illam esse falsam;

ex quo clare patet, *Falsum* seu *Non* pertinere ad Praedicatum, non vero ad Copulam. Sicut nec *Neccessario* nec *Forſitan*, nec *Poſſibile* et ſimilia, quae Logici modos vocant, eſſe Copulas, nec etiam ad Copulam pertinere, ſed eſſe Praedicata de Affirmationibus.

Inter Copulas Grammaticales impuras eminent *Quia* et *Ergo*, quarum illa Antecedenti praefigitur, haec Conſequenti, v. g. *Quia cogito, ſum*; item *Cogito, ergo ſum*. Unde praedictum *Quia* continet in ſe hanc Affirmationem: *Cogito eſt Antecedens*  $\tau\omicron\upsilon$  *ſum*, et illud *Ergo* continet in ſe hanc Affirmationem: *ſum eſt Conſequens*  $\tau\omicron\upsilon$  *Cogito*. Suntque enunciationes iſtae a parte rei enunciationes copulativae hoc modo reſolvendae: *Et cogito, et  $\tau\omicron$  Cogito eſt Antecedens  $\tau\omicron\upsilon$  ſum*; aut *Et cogito, et  $\tau\omicron$  ſum eſt Conſequens  $\tau\omicron\upsilon$  Cogito*. Si vero non eſt Copula, ſed tantum Nota Suppoſitinoiſ aut Condiſionis; habet tamen ſaepe expreſſe vel implicite conjunctum *Ergo*, quod eſt *Copula Impura*; atque in enunciatione condiſionali non aliud inferitur ſeu ſignificatur quam enuntiatio quae continetur in *Ergo*.

N. 5. Verbum eſt nota affirmandi, ut *Sunt*, quando dico *Duo et tria ſunt quinque*; ibi enim illud *Sunt* nihil aliud agit quam affirmandi notam. Non tempus ſignificat (quia duo et tria non jam aut alias, ſed ſimpliciter ſunt quinque); non perſonam (quia perſona ſeu ſubjectum praecedit in illis vocabulis *duo et tria*); non praedicatum aut quidvis aliud (ut per ſe notum eſt), igitur tantum eſt affirmandi nota. Nam dempto illo *Sunt* concideret Affirmatio (ſiquidem *Duo et tria quinque* imperfectus ſermo, nedum Affirmatio); igitur non fruſtra eſt illud *Sunt*, ſed ad denotandum Affirmationem omnino neceſſarium.

Quodſi *Sunt* in praedictâ Affirmatione verbum ſit, utique *Amo* non eſt verbum. Si enim homo nudus homo ſit, utique homo veſtitus (i. e. homo cum veſtibus ſuis) non eſt homo, ſed homo et aliquid aliud; item 100 non ſunt 99, etiamſi 99 in ſe complectantur. *Amo* igitur habet aliquid ultra notam affirmandi (ſeu ultra Verbum), nempe Subjectum *de quo* et Praedicatum *quod* et tempus *quando*; ita ut quarta pars ipſius *Amo* tantum ſit Verbum, nempe *ſum* quod in illo includitur (implicite; hoc autem Logico perinde eſt) affirmandi nota et nihil aliud.

Verbi naturam, quae de ſe longe clariffima eſt, obſcuram nobis reddidit intricatio quâ Verbum cum diverſis aliis diverſimode in unam dictionem intricatur.

I. Intricatur cum his tribus, Subjecto, Praedicato, et Adverbio temporis, hic: *Amo*; hoc enim est *Ego nunc sum amans*.

II. Intricatur cum Subjecto et Praedicato tantum: *Nunc amo*.

III. Intricatur cum Subjecto et Adverbio temporis tantum: *Sum amans*.

IV. Intricatur cum Praedicato et Adverbio temporis tantum: *Ego amo*.

V. Intricatur cum Subjecto tantum: *Nunc sum amans*.

VI. Intricatur cum Praedicato tantum: *Ego nunc amo*.

VII. Intricatur cum Adverbio temporis tantum: *Ego sum amans*.

VIII. Intricatur cum parte Praedicati in Affirmationibus praeteriti et futuri temporis. V. g. *Petrus nunc erit senex*; ibi Verbum *Est* cum ista particula Praedicati *futurus* intricatur in unam illam dictionem *erit*. Idem fit in Affirmationibus praeteriti temporis; ibi enim intricatur cum illâ distinctione *fuens*, quae Belgice melius effertur *geweeft*.

#### AD. PAG. 177.

N. 7. Negatio est etiam quaedam Affirmatio; patet satis ex indicio illo, quod Belgice expressimus: *Ick verseecker u*; hoc enim tam bene quadrat in Negationem quam in quamvis aliam Affirmationem. In omni enim Negatione affirmamus de certâ aliquâ Affirmatione, quod sit falsa; v. g. *Non sto*, id est *Sto est falsum*; habentque se eodem modo *non* et *falsum*, sicut *fortis* et *fortiter*, quamvis prius illud non perinde appareat sicut posterius, eo quod in posteriori reluceat derivatio Grammatica, quae deficit in priori. Proinde *negare* non differt ab *affirmare* nisi diverso respectu, ut Scholae loquuntur, seu diversis accusativis quos regant. Sic cum dixi: *Non sto*, affirmavi pariter atque negavi, sed aliud seu aliam rem affirmavi, aliam negavi; negavi enim *me stare*, affirmavi *me non stare*.

Ex quo vides, non tantum in Negatione Affirmationem semper esse, sed Negationem ipsam semper etiam esse Affirmationem. Subjectum autem atque Praedicatum dupliciter designantur in Negatione. Et subjectum quidem Negationis maxime naturale est Affirmatio illa quam includit; praedicatum autem ejus est *non* vel *falsum*; usitatum vero et famosum Negationis subjectum est id de quo *negare* dicimur (id est subjectum Affirmationis inclusae), praedicatum autem id quod de illo *negare* dicimur. V. g. subjectum hujus Negationis *Non sto* verum

quidem et naturalissimum est *Sto* (de illa enim Affirmatione loquimur), praedicatum vero *Non* vel *Falsum* (hoc enim de praedicta Affirmatione dicimus); subjectum vero usitatum et famosum est *Ego* (de eo enim negamus cum dicimus *Non sto*), praedicatum vero *Stans* (hoc enim de isto subjecto negabamus).

## AD PAG. 178.

N. 1. Subjecto et Praedicato per Actum sumptis adde etiam Subjectum et Praedicatum per Habitu sumpta. Subjectum Habitu est de quo solemus affirmare alterum ad quod comparatur, et Praedicatum Habitu, quod solemus affirmare de altero ad quod comparatur. V. g. *Homo* est Subjectum Habitu respectu *Animalis*, et *Animal* praedicatum Habitu de *Homine*. Subjectum et Praedicatum Habitu non debent esse talia per Dignitatem; nam *Frigidum* est praed. habitu de *Aqua*, item *Albus* de *Pariete*, haec tamen non sunt praedicata per Dignitatem. Etenim hae Affirmationes non sunt verae: *Aqua est frigida* (nam Aqua non potius frigida quam calida tepidave est); *Paries est albus* (nam Paries non potius albus quam niger alteriusve coloris est); hoc tantum verum est: *Quaedam aqua frigida* et *Quidam paries albus est*; non vero absolute, quod *Paries albus sit* et *Aqua frigida*.

N. 3. Praedicatum potentiâ (idem est de Subjecto) complectitur reliqua; nam et praed. Actu (s. quod hic et nunc affirmatur) est praed. potentiâ (s. potest affirmari); et praed. Habitu (s. quod solet affirmari) hoc ipso potest etiam affirmari; et praed. Dignitate (s. quod affirmatur in Affirmatione verâ) hoc ipso potest etiam affirmari. Datur autem praed. potentiâ et non actu (ut *Homo*, casu quo nemo loqueretur); item praed. actu quod non habitu (ut hic: *Arbor est mare classibus constratum*); et contra praed. habitu quod non actu (ut *Frigidum* respectu *Aquae*, si nemo loquatur). Sic etiam praedicatum datur habitu quod non dignitate (ut *Frigidum* respectu *Aquae*); item dignitate quod non habitu (ut *Negatio est Affirmatio quaedam*, etc.).

Participia passiva, *Amatus*, *Honoratus*, saepe solent totidem modis capi. V. g. *amatus* actu is est qui nunc amatur, isque amatus proprie dicitur; *amatus* habitu, qui amare solet, ut opes dicimus amari ab hominibus; *amatus* potentiâ, qui potest amari, et ille proprie *amabilis* dicitur; denique *amatus* dignitate est qui meretur amari, et is proprie *amandus* dicitur.



Participia vero activa solent etiam quatuor modis sumi, tribus quidem prioribus iisdem, sed loco quarti modi, dignitatis sc., adfiscunt Naturam. Sic *amans* actu est qui nunc amat, isque ita proprie dicitur; habitu est is qui solet amare (et is proprie amativus est); potentiâ est qui potest amare; denique *amans* dignitate f. naturâ est, qui natus est amare; sic matres amant suos liberos, et philosophi φιλόανθρωποι dicuntur.

*Homo* non est praedicatum dignitate de *Animali*; non potest enim affirmari de *Animali* in Affirmatione verâ; nam cui aliquid addi debet ut verum sit, nondum verum est (sicut 99 non sunt 100, quia debet eis addi adhuc 1); jam autem tali Affirmationi, ut vera sit, debet praefigi illa particula *Aliquis*. Quandoquidem autem in verâ Affirmatione dicere non possum *Animal est homo*, dicere necessum est, ut verum sit: *Animal non est homo*; nam quidlibet est vel non est, et ubi utrumque hoc scriptum est: *Est*, item *Non est*, ubi unum induxeris et deleveris, necessum est ut alterum hoc ipso remaneat; nam utrumque simul induci non potest.

Discrimen intra Subjectum et Praedicatum Dignitate ab unâ parte, et Subjectum et Praedicatum seu Actu, seu Habitu, seu Potentiâ ab altera parte est hoc: quod S. et P. Dignitate tantum reperiantur in Affirmatione verâ, reliqua autem tam in veris quam in falsis Affirmationibus. Item etiam hoc discrimen, quod Subjectum et Praedicatum famose per Dignitatem capiantur; unde quando seorsim dicimus Subjectum et Praedicatum, oportet ea per Dignitatem capere, nisi forte circumstantiae sermonis aliud requirant. Veluti, si petatur subjectum aut praedicatum in eâ quaestione: *Homo est lapis*, circumstantiae non finunt S. aut P. per Dignitatem intelligi (cum nullum ibi effet Subjectum aut Praedicatum); oportet ergo hic per Actum vel per Potentiam accipere.

Nota, hanc distinctionem Subjecti atque Praedicati non pertinere ad scientiam aliquam atque doctrinam, sed tantum ad enarrationem aliquam vel historiam. Scientia enim omnis versatur circa veritatem aliquam aeternam, cum haec distinctio mere spectet ad veritatem aliquam fluxam et ab hominum arbitrio penitus dependentem; siquidem illa nomina *Subjectum* et *Praedicatum* eam habere significationem, atque tot quot dictum modis capi, pendet ab institutis et placitis

hominum. Idem fere obtinet in caeteris distinctionibus. Nihilominus tales distinctiones aliquando enarrandae sunt, simileque historiae interponendae, cum illae requisitae sint et omnino necessariae ad evitandam confusionem reddendumque sermonem magis clarum et ab aequivocatione liberum. Adhibentur ergo haec et similia inter philosophandum, ut expeditior nobis sermo sit, commodiusque inter nos de iis quae dicenda sunt dicere possimus. Unde huc etiam spectat illud, quod Cap. I. tum de nomine Affirmationis, tum de situ atque ordine Subjecti, Copulae, atque Praedicati annotavimus.

AD PAG. 179.

N. 5. Ratio hujus Regulae manifesta est. Affirmatio enim solet sumi per Dignitatem; atque quod sic affirmatur, debet affirmari in Affirmatione vera; jam autem Affirmatio cui debet aliquid addi ut fiat vera, non est vera; ergo quod in illa affirmatur, nondum affirmatur per Dignitatem seu Affirmatione verâ.

Ex hoc Regulâ clare sequitur, quod *Senex* non sit praedicatum de *Nobis*; etiamsi enim forte in enunciatione verâ dicatur: *Nos erimus senes*, tamen ibi aliquid additur ultra quam sumptum fuerat, nempe adjicitur illa particula *futurus* ante sumptum, nempe *senex*. Ob similem rationem *Infans* non est praedicatum de *Nobis*, etiamsi in vera Affirmatione dicam: *Nos fuimus infantes*. Item *Homo* non est praedicatum de *Animali*; non enim haec vera est Affirmatio: *Animal est homo*, quandoquidem ei adhuc addi vel subaudiri debeat, ut manifesta vera esse affirmetur, hoc modo: *Aliquod animal est homo*.

Et nota bene: quando aliquis terminus non affirmatur de certo subjecto, quod tunc necessarium sit ut is de eodem subjecto negetur, juxta hoc Axioma: Quidlibet est vel non est; inde enim sequitur, si expungendum fuerit *Est* (seu pro falso ducendum), superstes futurum *Non est* (seu pro vero ducendum). Utrumque enim simul expungi non potest, cum quidlibet sit vel non sit. Hinc igitur sequitur, verum esse *Animal non est homo*, *Lapis non est marmor*, etc. Cum enim ibi non liceat dicere *Est*, utique dicendum est *Non est*.

N. 6. Duo hic monenda sunt. Primum quidem monet ipsa paragraphus, ne sc. quod ante additum vel subauditum quid non erat praedicatum, etiamnum post additum vel subauditum neges esse praedicatum. Sic *Homo* non est praedicatum de *Animali*, quia debet aliquid

addi, v. g. *quoddam*; hoc vero addito, *Homo* jam est absolute praedicatum, non quidem de *Animali*, sed (cum addito) de *Quodam animali*. Sic et *Infans* non est praedicatum de *Nobis*; at cum addito, nempe *Fuens infans*, est verum praedicatum de *Nobis*.

Secundum bene notandum est, Regulam dicere: Non censetur praedicatum cum *debet* aliquid addi vel subaudiri, non vero dicere eam: Non censetur praedicatum cum *poteſt* aliquid addi vel subaudiri. *Animal* est verum praedicatum de *Homine*, etiamſi poſſimus aliquid addere ſalvâ veritate ſive ad Subjectum ſive ad Copulam ſive ad Praedicatum (v. g. *Quidam homo eſt animal*; *Homo neceſſario eſt animal*; *Homo eſt animal rationale*), quae tamen addi non debent ut veritas ſalve perſiſtat.

N. 7. Praedicatum continet ſuum Subjectum, id eſt, S. et P. ſunt eadem, aut Subjectum cum aliquo alio, intercedente particulâ *vel*, continetur in Praedicato; unde primum ſchema: A eſt A; ſecundum ſchema: A eſt A vel B. Juxta primum ſchema Praedicatum eſt idem cum Subjecto. Juxta ſecundum Praedicatum eſt totum et Subjectum eſt pars Praedicati, quae cum alia parte (nempe B) continetur in Praedicato, intercedente particulâ *vel*. Juxta primum ſchema procedit iſta Affirmatio: *Homo eſt animal rationale*, nam *Homo* et *Animal rationale* habent ſe ut A et A, *Homo* vero et *Animal* habent ſe ſicut A et A vel B, quia *Animal* non eſt aliud quam *Homo vel Brutum*. Affirmationes juxta primum ſchema digniores ſunt et veriores, juxta ſecundum frequentiores.

#### AD PAG. 181.

N. 2. Nota, ut commode procedas juxta Axiomata Primi Quadrati, *Quod* vel *De quo* in iſtis Axiomatibus designare Terminum tertium, qui inveniendus eſt extra Affirmationem primo poſitam; cum eâ tantum differentiâ, quod *De quo* ſignificet illum terminum reponendum loco Subjecti, *Quod* vero ſignificet, reponendum eſſe loco Praedicati. Sed ille tertius Terminus non eſt primo ponendus in Affirmatione, ſed relicto loco vacuo in quo ille reponendus ſit, primum et ante omnia in ſecundâ Affirmatione reponendus qui nobis ſecundum Axioma ſuppeditatur ex primâ Affirmatione, idque vel loco Subjecti vel loco Praedicati prout Axioma praefcripſerit, quo facto facile videbimus, quis poſſit eſſe tertius ille terminus. Sic v. g. ſi procedendum ſit juxta

Axioma primum, datâ hac propositione primâ: *Homo est animal*, quia terminus suppositus ex prima illa propositione est praedicatum, idque praedicatum debeat fieri subjectum in secundâ propositione, primo ibi reponatur hoc modo:

*Homo est Animal*

*Animal est —*

Ibi jam facile videtur quis possit tertius esse terminus; nempe talis aliquis, qui quadrat in *Animal* per *est*.

Si procedendum sit juxta quartum Axioma, datâ eâdem propositione primâ, quia terminus suppositus ex primâ et transferendus in secundam est praedicatum, illudque in secundâ debeat obtinere locum praedicati per *Non est*, id igitur sic reponatur:

*Homo est Animal*

*— non est Animal*

Ibi iterum facile apparet, quis debeat esse tertius terminus, nempe talis aliquis, in quem quadrat *Animal* per *non est*.

Item de duobus reliquis Axiomatibus.

AD PAG. 202.

N. 1. Termini Concordes melius vocarentur *Compraedicata*; etiam si enim nomen illud minus Latinum sit, melius tamen rem illam quam volumus significat; concordare enim aliquando communi fermone solet intelligi quoad Praedicatum, ita ut illa vulgo concordare dicantur, quae conveniunt in eodem Praedicato; ut *Homo* et *Bestia* concordare dicuntur quod ambo *sentiant*. Nobis vero illi termini concordare dicuntur qui habent idem Subjectum, vel qui compraedicantur. Igitur Terminus Concors f. Compraeidicatum est Praedicatum ejusdem alicujus cum alio Praedicato Subjecti.

Ut vero Concordia illa seu Compraeidicatio facile inveniatur, praefige tibi hoc schema trianguli reclinati:



Per A et B repraesentantur duo termini (puta *Animal* et *Bestia*), de quibus quaerendum an compraedicentur seu concordent. Igitur in



triangulo utrique praefigitur copula *est*; videndumque jam an aliquid intra triangulum ante copulam produci possit, in quod uterque terminus A et B quadret per copulam *est*. Invento autem *Cane*, qui illo loco bene quadrat, dicemus praedictos terminos A et B concordare in *Cane*, seu compraedicari de *Cane*. Si vero per A et B intelligamus *Hominem* et *Bestiam*, quia nihil jam inveniri potest quod in cono trianguli reponatur, dicemus A et B non concordare. Videtur quidem in cono produci posse *Aliquod Animal*; sed re bene perpenſa non est idem *aliquod Animal*, quod cum A et B intercedente copula cohaeret, non enim idem aliquod Animal et Homo est et Brutum. Notandum est, illud quod in cono statuitur, non debere esse tertium distinctum ab A et B, sed posse esse alterum ipſorum. Unde, is per A *Hominem* et per B *Petrum* intelligas, poterit aliquid in cono trianguli produci, nempe B, adeoque absolute A et B concordant seu compraedicantur. Ex quo patet notabilis diverſitas terminorum concordium; quidam enim in tertio, quidam in altero ipſorum concordant.

## AD PAG. 203.


N. 2. Discrimen hic assignatur inter Concordiam Discordiamque terminorum, hoc nempe: *Concordia est mutua, Discordia non est mutua*.

Concordia est mutua, id est, quando unus terminus concordat cum alio, tunc alius vicissim concordat cum priori; nam concordare non est aliud quam habere idem aliquod Subjectum; sicuti si ego domum habeo quam tu etiam habes, ergo tu etiam habes aliquam quam ego habeo. Hinc sequitur, quotiescunque habemus unum terminum concordem, toties etiam habemus duos concordem; item quandocunque habemus unum qui non concordat, toties etiam habemus duos qui non concordent.

Discordia non est mutua, id est, quando unus terminus discordat ab alio, adhuc fieri potest ut alius non discordet a priori. Et nota generale Axioma: *Posse satis demonstratur per unum Actum*. Sint igitur isti termini: *Habens tria* et *Habens duo*, ubi videmus posteriorem terminum discordare a priori, seu habere subjectum proprium (cum, qui duo habet, non debeat habere tria); priorem vero terminum non discordare a posteriori (qui enim habet tria, hoc ipſo habet duo). Etiamſi vero Discordia in quibusdam terminis sit mutua, tamen absolute debemus dicere: *Non est mutua*; non enim possumus absolute dicere: *Est mutua*. Hinc quando unum terminum discordem habemus,

non fequitur inde, nos duos habere, et per confequens non funt idem *Difeordat* et *Discordant*; item non funt idem *Non discordant* et *Neuter difcordat*. Quae omnia oppofito modo fe habent in terminis concordibus.


N. 3. Termini *Repugnantes funt qui non concordant*; idem eft ac fi dicas: Neuter concordat, imo fi dicas: Alter non concordat; vide annotata ad n. 2. Ex quo etiam fequitur, quod *Repugnantia fit mutua*. Oftenfum enim circa n. 2, quod' non tantum Concordia fit mutua, fed etiam non-concordia (f. repugnantia) fit mutua. Jam autem Repugnantes nihil aliud funt quam non-concordes. Non recte fic definiuntur: qui difcordant; nam difcordare nihil aliud eft quam habere fubjectum fibi proprium; jam autem hoc non eft fatis ad terminos Repugnantes, quod habeant fubjecta fibi propria, fed ulterius requiritur, ut nullum habeant idem fubjectum, feu non concordent. Multum enim differunt *Habere fubjectum fibi proprium* et *non habere fubjectum commune*, ut fatis patet in terminis difparatis.



*Convertibiles funt quorum neuter difcordat*. Non recte fic: *qui non difcordant* (vide ann. ad n. 3).



*Disparati funt qui concordant et difcordant*. Non fufficit *qui concordant*, quia hoc etiam Convertibilibus et Subalternis commune eft; et non fufficit etiam *quod difcordent*, quia hoc etiam Repugnantibus commune eft.



*Subalterni funt quorum unus tantum difcordat*. Hic qui difcordat vocatur *Subalternans*, alter *subalternatus*. Etc.

## AD PAG. 204.

N. 4. Quamlibet combinationem Terminorum spectare ad unam ex quatuor recensitis, nullamque in medio relinqui, tam est necessarium quam quidlibet esse aut non esse, nihilque hic in medio relinqui. Nam sumptis duobus quibuscunque terminis, v. g. A et B, vel concordant illi vel non concordant. Si non concordant, sunt Repugnantes. Si autem concordant, igitur vel unus eorum discordat vel non unus. Si non unus, sunt Convertibiles. Si concordent et unus discordet, ergo vel tantum ille unus discordat, vel non tantum ille unus. Si non tantum ille unus, sed etiam alter discordet, igitur concordant et discordant, sunt Disparati. Si unus tantum discordet, sunt Subalterni.

Unus vero terminus, comparatione factâ ad alium quemcunque, habet se uno ex his quinque modis: aut repugnat illi aut convertitur cum illo aut disparatus est aut subalternus, et vel subalternat sibi illum vel subalternatur illi.

## AD PAG. 208.

Post Cap. II. *Leges Concordiae et Discordiae Terminorum.*

*Lex 1. Quilibet terminus de se ipso dicitur.* Nam quidlibet est quod est.

*Lex 2. Omnis terminus de aliquo dicitur.* Nam de se dicitur (per l. 1.), ergo de aliquo.

*Lex 3. Subjectum et praedicatum concordant.* Nam subjectum de se ipso dicitur (per l. 1.) et praedicatum de subjecto dicitur (per defin.). Ergo concordant (per def. concordantiae), et quidem concordant (ut patet) in subjecto.

*Lex 4. Terminus repugnans discordat a suo repugnante.* Dicitur enim de aliquo subjecto (per l. 2.), non tamen de communi subjecto (per defin. repugn.); ergo de subjecto proprio, et per consequens discordat (per defin. discord.).

*Lex 5. Terminus qui discordat non subjicitur ei a quo discordat.* Si enim subjiceretur, etiam subjectum proprium ejus subjiceretur; nam subjectum subjecti est etiam subjectum praedicati (per 3. Axiom. 1. Quadr.), adeoque non esset subjectum proprium sed commune, quod est absurdum.

*Lex 6. Terminus repugnans non subjicitur suo repugnanti, nec disparatus disparato, nec subalternans subalternato.* Nam hi omnes ter-

mini discordant; primus quidem per legem 4, duo reliqui per suas defin.; et cf. lex 5.

*Lex 7. Terminus qui non discordat subjicitur ei a quo non discordat.*

Si enim non subjiceretur, discordaret in se ipso; ipse enim de se dicitur (per l. 1.), et alter de ipso non diceretur, quia ipse alteri non subjicitur (ex supposito); igitur discordaret in se, seu ipse sibi esset subjectum proprium (per defin. subjecti proprii).

*Lex 8. Terminus convertibilis suo convertibili, et subalternatus subalternanti subjicitur.* Hi enim termini non discordant (per defin. eorum), ergo subjiciuntur (per l. 7.).

*Lex 9. Uterque convertibilium subjicitur alteri.* Uterque enim convertibilis est cum altero (per defin. convert.), ergo subjicitur (per l. 8.).

*Lex 10. Uterque convertibilium praedicatur de altero.* Hoc ipso enim quo hic subjicitur alteri, alter praedicatur de ipso (per defin. subj. et praed.); cum igitur uterque subjiciatur alteri (per l. 9.), uterque etiam praedicatur de altero.

*Lex 11. Quod dicitur de uno convertibilium, dicitur etiam de altero.* Prior enim convertibilium est praedicatum (per l. 10), posterior subjectum (per l. 9); igitur quod de priori, etiam de posteriori dicitur (per 1. Ax. 1. Quadr.).

*Lex 12. Quod non dicitur de uno convertibilium, non dicitur etiam de altero.* Quia unus ille est subjectum (per l. 9.) et alter praedicatum (per l. 10.); ergo quod de priori non dicitur, non dicitur etiam de posteriori (per 2. Axiom. 1. Quadr.).

*Lex 13. De quo dicitur unus convertibilium, de eo et alter.*

*Lex 14. De quo non dicitur unus convertibilium, de eo nec alter.*

*Lex 15. Subalternatus subjicitur subalternanti* (per l. 8.); *non contra* (per l. 6.). *Subalternans vero affirmatur de subalternato* (per l. 8.); *non contra* (per l. 6.).

*Lex 16. Quod dicitur de subalternante, dicitur de subalternato; non contra.*

*Lex 17. Quod negatur de subalternato, negatur de subalternante; non contra.*

*Lex 18. De quo dicitur subalternatus, de eo et subalternans; non contra.*

*Lex 19. De quo negatur subalternans, de eo et subalternatus; non contra.*



*Titulus ad posteriores leges.*

Hae supponunt Acceptionem terminorum, cum praecedentes tantum intra Concordiam Discordiamque versarentur. Hae concernunt Affirmationes et Negationes artificiales, cum priores tantum ad naturales pertinerent.

*Lex 1. Termini concordēs inter se particulariter affirmantur.* Sint termini concordēs A et B. Quoniam igitur habeant subjectum commune, de quo ambo affirmantur (par defin. concord.), et respectu cujus ambo sunt praedicata, supponamus illud subjectum esse C. Dico A et B inter se particulariter affirmari. Imprimis A affirmatur de B particulariter sumpto; nam A dicitur de C, ergo A dicitur de B particulariter sumpto (per 1. Axiom. 2. Quadr.); est enim B ex supposito etiam praedicatum de C. Eodem modo demonstrabis, quod B dicatur de A particulariter sumpto.

*Lex 2. Terminus particulariter sumptus designat certum aliquid.* Cum enim dictum est *Aliquis homo est etc.*, designatur ibi Petrus vel Paulus etc. Quod adeo verum est ut, siquidem termino praefigatur *Aliquis* sine designatione certi alicujus, terminus non accipiat particulariter sed confuse, v. g. *Aliqua navis est necessaria ad navigandum.* Quia non designatur certa et determinata aliqua navis, hinc etiam navis non accipitur ibi particulariter. Licebit ergo ex indiciis cognoscere, confusene an particulariter accipiat terminus cui nota *Aliquis* praefigitur. Si non inepte petatur *Quis?* terminus accipietur particulariter (petitur enim istā interrogatione ejus designatum); sin minus, accipietur confuse. V. g. *Aliquis homo est doctus;* quadrat *Quis?* Sed *Aliquis homo requiritur ad loquendum;* non recte petitur *Quis?* Non est hic certum aliquid designatum.

*Lex 3. Designatum est subjectum designantis.* Conjungitur enim cum designante a priori parte, intercedente particulā *Qui est.* V. g. *Aliquis homo;* si hic designetur Aristoteles (ut *Aliquis homo docuit Alexandrum Philosophiam*), praefigitur Aristoteles hoc modo: *Aristoteles qui est homo etc.* Ex quo clare liquet, Aristotelem esse subjectum istius termini particulariter sumpti; nam hoc ipso quo designat Aristotelem, hoc ipso affirmatur de ipso.

*Lex 4. Quod dicitur de termino particulariter sumpto, dicitur etiam de subjecto ejus designato.* Quod dicitur de termino part. f., non

necessario dicitur de ejus quocunque subjecto; sic enim procedere pertinet ad 2. Quadr. 3. malum Axioma. Unde non sequitur: *Hom<sup>o</sup> est animal, et aliquod animal est quadrupes, ergo homo est quadrupes.* Sed saltem hoc est verum: Quod dicitur de termino part. sumpto, dicitur de subjecto ejus designato; unde valebit argumentum quod jam proxime adferebamus, si in minori pro subjecto designato accipiatur *homo*; sed minor tunc erit falsa.

*Lex 5. Terminus qui dicitur de alio particulariter sumpto, concordat cum illo.* Non tantum igitur concors particulariter dicitur, sed vice versâ etiam, qui part. dicitur, concors est. Prius demonstratum fuit leg. 1, posterius hic demonstrandum est. Sint termini A et B, et A dicatur de B part. sumpto; dico quod A concordet cum B. Sit enim designatum ipsius B, nempe C (per leg. 2), erit C subjectum ipsius B (per leg. 3); sed C etiam erit subjectum ipsius A; nam A dicitur de C (per leg. 4.); erit igitur C subjectum commune ipsius A et B; igitur A et B concordant. Q. e. d.

*Lex 6. Cum unus terminus de alio dicitur particulariter, etiam alius de priori sic dicitur.* Sint termini A et B, et A dicatur de B particulariter; dico quod B etiam dicatur de A particulariter. Nam A concordat cum B (per leg. 5.); igitur etiam B concordat cum A (nam concordia est mutua, ut ante demonstratum est); igitur B dicitur de A particulariter sumpto (per leg. 1.). Q. e. d.

*Lex 7. Terminus non dicitur particulariter de suo Repugnante.* Si enim part. diceretur, concordaret (per leg. 5.); atqui non concordat (per defin. Repugn.); ergo non dicitur etc. Q. e. d.

*Lex 8. Terminus negatur de suo Repugnante, universaliter.* Non dicitur enim de aliquo, nam hoc esset de part. sumpto dici; igitur de nullo dicitur: nam *non aliquis* seu *non ullus* idem est quod *nullus*.

*Lex 9. Terminus concors non negatur de concordi distributo.* Affirmatur enim de ipso part. sumpto (per leg. 1.), seu dicitur de *aliquo*; ergo non dicitur de *non aliquo* seu de *nullo*.

*Lex 10. Sunt quatuor subjecta Affirmationis particularis, totidemque praedicata; unum vero subjectum Negationis artificialis seu universalis, unumque praedicatum.* Subjecta Aff. part. sunt Convertibilis, Subalternatus, Subalternans, et Disparatus; et haec quidem etiam sunt praedicamenta talis Aff. Haec enim omnia concordant, igitur

inter se particulariter dicuntur et subjiuntur (per leg. 1.). Subjectum autem et praedicatum Neg. univ. sunt Repugnantes (per leg. 8. et 9.).

*Praxis Legum priorum.*

Oportet applicare Axiomata Quadratorum hisce terminis. Primum primi sic applicabitur: Quod dicitur de uno Convertibilium, dicitur etiam de altero; et quod dicitur de Subalternante, dicitur etiam de Subalternato. Ratio est quia subalternans est praedicatum de subalternato, et unus ille convertibilium est praedicatum de altero, per Leg. 8.

Secundum Axioma sic applicabitur: Quod non dicitur de uno Convertibilium, non dicitur etiam de altero; item quod non dicitur de Subalternato, non dicitur etiam de Subalternante. Ratio est, quia unus Convertibilium est Subjectum, etc.

Similiter applicabis 3. et 4. Axioma.

Mala Axiomata etiam applicare quidem poteris ad Subalternos, non vero ad Convertibiles.

*Praxis Legum posteriorum.*

Quandocunque habemus Affirmantem particularem, licet invertere ejus extrema eodem manente sensu illativo. Cum enim concordēs omnes inter se particulariter dicantur, et soli, igitur Affirmatio particularis constans terminis certo ordine positis, et alia constans iisdem terminis inversis, inferunt se mutuo, adeoque in inferendo et sequendo idem valent.

Similiter et universalem Negantem invertere licebit. Cum enim omnes et soli Repugnantes possint talem propositionem ingredi, idem est, quantum ad illationem consequentiamque, hoc an illo ordine disponantur termini. Ex quo contingit jam multiplicari (non re ipsâ sed in speciem) Axiomata secundi Quadrati et Appendicis. Quia enim primi Axiomatis secundi Quadrati conclusio particulariter affirmat, hinc licet invertere ejus extrema; exsurget hoc (in specie novum, re ipsâ vetus) Axioma: *Si quid dicatur de subjecto, praedicatum de ipso dicetur particulariter sumpto.* Et secundum quia habet praemissam negantem universalem, licebit invertere et exsurget Axioma: *De quo distributo negatur praedicatum, ipsum negatur de subjecto.* Quod simul

ad apparentiam tantum novum Axioma, re ipsâ solitum illud nobis et secundum.

Et nota, hinc totam illam farraginem *Barbara*, *Celarent*, etc. ortum suum ducere. Deficiunt enim a nostris Axiomatibus talibus aliquibus terminorum in particulari Affirmante vel Negante universali transpositionibus, adjunctâ insuper aliquando transpositione praemissarum, ut in Solertiâ nostrâ [f. Meth. Inv. Argum.] monstravimus.

Hinc etiam commodum medium nancisci poterimus ad probandum negantem Artificialem; et breviter medium sic praescribitur: *Terminus qui dicatur de subjecto et negetur de praedicato distributo*. V. g. positâ hac probandâ: *Nullus homo est brutum*, medium idoneum erit *Rationale*; hoc enim dicitur de subjecto et negatur de praedicato distributo. Praedicatur itaque hoc modo: *Homo est rationale; nullum brutum est rationale; nullus homo est brutum*. Qui syllogismus est reverâ juxta 4. Axioma 2. Quadr., etiamsi non appareat ob inversionem in minori.

#### AD PAG. 211.

C. IV. *Suppositionis et Acceptionis exemplum*. Caesar mittit legatum ad Regem Galliae. Quis supponit? Caesar. Quem? Legatum. Pro quo? Pro se ipso, sc. Caesare. Quis accipit? Rex Galliae. Quem? Legatum. Pro quo? Pro Caesare.

N. I. Suppositio et Acceptio aliquando sunt Conformes, aliquando Difformes; aliquando una est sine alterâ, et contra. Sic si loquens dicat: *Galli sunt libidinosi*, supponens seu intelligens hoc de gallis gallinaceis, fieri facile potest ut audiens hoc accipiat de iisdem, adeoque Suppositio et Acceptio hic conformes sunt; et fieri etiam potest ut audiens hoc accipiat de Francis, adeoque Supp. et Acc. hic difformes sunt. Fit etiam aliquando ut quis Latine alloquatur ignarum Latinae linguae, quem tamen Latine scire putaverat. Hic est Suppositio, nam loquens supponit voces Latinas pro certis rebus, et nulla tamen Acceptio, quia audiens non accipit voces pro certis rebus cum eas non intelligit; adeoque hic et Supp. sine Acc. Contra, cum puer Latine dicit e fuggestu, auditores gnari Latinae linguae accipiunt voces pro certis rebus, puer, cum Latine nesciat, voces quas profert non supponit pro certis rebus.



N. 2. *Acceptio ordinaria est Acceptio vocis pro re significatâ quatenus tali.* Quod addo vel subaudio, quia quando dico *Omne sonus est disyllabum*, tunc sonus accipitur quidem pro re quam significat (quia *sonus* significat etiam omnes voces *sonus*), tamen non accipitur ordinarie sed grammatice; nam etiam si accipiatur pro re significatâ, non accipitur tamen pro eâ quatenus tali. Quod patet ex genere neutro in quo ibi constituitur, nam voces grammatice sumptae sunt neutrius generis.

Distinguunt aliqui duas significationes in vocibus, unam quae est ex instituto generali, alteram quae est ex inst. speciali. Ex inst. gen. vox quaelibet significat suam speciem, seipsam et quamlibet ejusdem fecum speciei; ex inst. sp. voces significant res illas, ad quas significandum specialiter institutae sunt. Contingit autem aliquando ut vox idem aliquod significet ex instituto generali et speciali simul; ut vox *Ens*; cum enim quidlibet significet ex instituto singulari, etiam seipsam significat et alias omnes ejusdem speciei voces; has autem etiam significat ex instituto generali. Tales etiam sunt vox *sonus*, vox *vox*, etc.

Quando ergo vox accipitur pro aliquo, quatenus significato ex instituto generali, tunc grammatice capitur; quando autem sumitur pro aliquo quatenus significato ex inst. speciali, tunc plerumque quidem ordinarie, raro autem logice.

Acceptio Logica non fit nude pro re quam vox significat (quando enim dico *Bos est subjectum bestiae*, ibi *Bos* non capitur pro istâ re nobis per sensum notâ et in mundo extra nos existente; nam illa res non potest esse subjectum, quandoquidem subjectum debeat stare in Affirmatione; Affirmatio autem fit in mente nostrâ, in quâ bos ipse secundum se esse non potest). Nec etiam Acceptio Logica fit pro voce (quando enim dico *Bos est subjectum bestiae*, ibi nomen illud *Bos* non capitur pro seipso; falsum ergo est, quod illud nomen sit subjectum *Bestiae*, seu quod *Bestia* de illâ voce affirmari possit). Fit ergo Acceptio Logica pro re quatenus res illa certo modo significatur per vocem (sic quando dico *Bos est subjectum bestiae*, ibi significatur, *Bovem* quatenus istâ voce *Bos* importatur, esse subjectum *Bestiae*). Similitudine aliquâ res ista declarari potest. In picturâ hominis sunt oculi, sed non oculi ipsi (ibi similitudo intelligitur cum

acceptiōe ordinariâ), nec enim maculae (ibi sim. int. cum acc. gram-maticâ), sed oculi quatenus per maculas repraesentati sunt in istâ picturâ (ibi similitudo intelligitur cum accept. logicâ).

Tria puncta requiruntur ad Acceptiōem Communem: 1. vox debet accipi ordinarie (defectu hujus condicionis *Homo* non accipitur communiter, quando dico *Homo est subjectum animalis*, item *Homo est tertiae declinationis*. 2. vox debet accipi pro pluribus (defectu hujus condicionis non accipitur communiter subjectum hujus propositionis: *Deus creavit coelum et terram*, quia tantum accipitur de uno). 3. debent illa plura, pro quibus vox accipitur, etiam plura esse subjecta termini; sic sc. ut idem terminus de singulis eorum affirmari possit (defectu hujus condicionis non accipitur communiter subjectum hujus: *Academia Leydenfis habet multos praeclaros viros*; accipitur enim pro pluribus, sc. *Rectore, Professoribus, Studiosis*, sed illa non sunt plura subjecta istius termini *Academia Leydenfis*).

Ad Acceptiōem autem Singularem duae condiciones requiruntur: 1. ut vox accipiatur ordinarie (defectu hujus cond. subjectum non accipitur singulariter hîc: *Petrus est subjectum hominis*, item *Petrus est secundae declinationis*, etc.). 2. vox ut accipiatur sive pro uno sive pro pluribus, sic tamen ut sive id unum sive illa plura tantum sit unum subjectum termini.

#### AD PAG. 213.

N. 1. Terminus aut est unus aut multi. Unus est qui unius modo affirmatiōis, ad quam comparatur, subjectum vel praedicatum est; multi sunt diversa diversarum affirmatiōum subjecta et praedicata talia.

Prioris generis terminus est *Petrus*, cum dico *Petrus est homo*; est enim unicum istius affirmatiōis, quae ibi jacet, subjectum. Posterioris generis sunt *Petrus et Paulus*, cum dico *Petrus est doctus et Paulus est doctus*, aut, quod idem est, *Uterque homo est doctus*; imo etiam si dixerim *Omnis homo est doctus*; in illis enim propositionibus *Petrus* et *Paulus* per diversas affirmatiōes tanquam subjecta earum dispar-guntur.

Unus terminus subdividitur in simplicem et compositum. Simplex est unus terminus qui non componitur ex pluribus, ut *Deus*, cum dico *Deus est omnipotens*. Compositus est qui ex pluribus aliis terminis

componitur, qui tamen omnes unicum constituunt subiectum istius, ut *Apostoli*, cum dico *Apostoli sunt duodecim*; ibi enim subiectum *Apostoli* componitur ex *Petro*, *Paulo* [sic], *Joanne*, etc., sed omnes hi simul sumpti constituunt unicum subiectum praedictae affirmationis.

Multi termini dividuntur in separatos et comparatos. Separati sunt ita multi termini, ut non enumerentur seu non simul sumantur, ut *Bos* in Affirmatione quam Belga pronunciat, et *Unus* in Affirmatione quam Arabs pronunciat <sup>1</sup>. Termini vero comparati, qui inter se enumerantur, ut *Petrus* et *Paulus* cum dico *Omnis homo est doctus*.

Omnis autem Enumeratio vel est Copulativa vel Disiunctiva. Quando enim intellectus noster plura enumerat, facit id per *Et*, i. e. copulative, aut per *Vel*, i. e. disiunctive. Hoc ipso enim quo plura aliqua enumerat, nec tamen interponit *Vel*, hoc ipso, inquam, interponit *Et* (v. e. *Veni, vidi, vici*, etiam *Petrus, Paulus, Joannes*). Hinc fit ut termini comparati aut copulati sint aut disiuncti; ut *Petrus* et *Paulus* copulati sunt cum dico *Omnis homo est doctus*, contra disiuncti cum dico *Aliquis homo est doctus*.

Inter terminos unos, qui compositus est, similiter aut copulatus est aut disiunctus secundum suas partes, seu illos quos includit terminos. Copulatus quidem non tam proprie dicitur quam partes ejus copulae dicuntur, ipse vero melius vocabitur Quasi-universalis terminus. Disiunctus similiter ex partibus disiunctis constans melius vocaretur Quasi-particularis seu Confusus. Igitur hic est terminus quasi-universalis, qui obtinet locum subiecti: *Ignis, Aër, Aqua, Terra, sunt quatuor elementa*; terminus quasi-particularis, qui est loco subiecti: *Dexter vel sinister oculus* (aut: *alteruter oculus*) *est necessarius ad videndum*.

Termini multi, qui copulati sunt, constituunt terminum Universalem; termini vero multi qui disiuncti sunt, terminum Particularem.

Quando termini copulati (s. terminus Universalis) unâ voce perstringuntur, tunc illa vox accipi dicitur universaliter, item distribui. Sic plures termini qui copulantur hic ex parte subiecti: *Petrus est*

---

<sup>1</sup> [*Bos* enim, quod plenius *bosch* scribere solemus, Belgice *fluyam* significat, et *Unus* Arabice est nomen plurale a singulari *anäs*, i. e. mansuetus. L.]



*doctus et Paulus est doctus*, hic perstringuntur unâ voce: *Omnis homo est doctus*, ideoque vox illa *homo* dicitur etc.

Quando vero termini multi disjuncti unâ voce perstringuntur, tunc dicitur vox illa accipi particulariter; ut *homo* hic: *Aliquis homo* (i. e. *Petrus vel Paulus*, etc.) *est doctus*.

Quando autem vox perstringit unum terminum tantum, tunc dicitur accipi singulariter; ut *Petrus* cum dico *Petrus est homo*.

Cum vero vox quae singulariter capitur, perstringit interim terminum compositum ex pluribus terminis, siquidem plures illi termini in termino composito copulentur, dicitur vox illa accipi quidem singulariter in genere, sed in specie etiam quasi-universaliter. Sic *Apostoli* cum dico *Apostoli sunt duodecim* (nam est unum tantum subiectum unius ejusdem affirmationis a duodecim illis hominibus constitutum, sed est similitudo quaedam hujus acceptionis singularis cum universalis, eo quod in utrâque plures termini copulative numerantur). Quando autem vox perstringit unum terminum e pluribus disjunctis compositum, tunc similiter in genere quidem dicitur accipi singulariter, in specie vero quasi-particulariter, ut *oculus* hic: *Alteruter oculus necessarius est ad videndum*.

De reliquis Acceptionibus infra, cum de Sophismate acturi sumus.

Enumeratio dividitur etiam in Tectam et Apertam. Aperta est ubi clare et ad sensum enumeramus, ut hic: *Petrus et Paulus sunt duo*. Tecta est ubi enumeramus quidem, sed sic ut sensus non appareat, ut hic: *Omnia elementa sunt quatuor*, tecte enumeravi omnia elementa: Ignem, Aërem, Terram, Aquam.

Enumeratio Copulativa et Enumeratio Laxa sunt termini Disparati. Concordant in hac enumeratione: *Petrus est doctus et Paulus est doctus*. Prior discordat a posteriori in hac: *Petrus et Paulus sunt duo*, posterior vero discordat a priori in hac: *Vel Petrus est doctus vel Paulus e. d.*

Similiter termini Disparati sunt Acceptio Communior et Acceptio Copulativa. Concordant in subiecto hujus: *Homo est animal*. Prior discordat in subiecto hujus: *Aliquis homo est doctus*. Posterior vero discordat a priori in subiecto hujus: *Omnia elementa sunt quatuor*.

Enumeratio Disjunctiva et Laxa sunt etiam termini Disparati. Concordant in hac: *Vel Petrus est doctus vel Paulus e. d.* Disjunctiva discordat a Laxâ hic: *Vel dexter vel sinister oculus est necessarius ad*



*videndum.* Laxa discordat a Disjunctivâ hîc: *Et Petrus est doctus et Paulus e. d.*

Similiter termini Disp. sunt Acceptio Disjunctiva et Acc. Communior. Concordant hîc: *Aliquis homo est doctus.* Discordat Communior in subjecto hujus: *Omnis homo est doctus;* Disjunctiva in subjecto hujus: *Aalteruter oculus etc.*

Enumeratio Copulativa et Pressa concordant in hac: *Duo et tria sunt quinque.* Cop. discordat hîc: *Petrus est doctus et Paulus e. d.* Pressa hîc: *Dexter vel sinister oculus etc.*

Eodem modo Acceptio Copulativa et Acc. Simpliciter communis concordant in Acceptione subjecti hujus prop.: *Omnia elementa sunt quatuor;* uno verbo concordant in Accept. quasi-universali. Acc. Simpl. communis discordat a Copul. hîc: *Aliqua navis est necessaria ad navigandum,* uno verbo in Acc. confusâ.

Enumeratio Disjunctiva et Pressa concordant in hac: *Vel dexter vel sinister oculus etc.* Disjunctiva discordat a Pressâ: *Vel Petrus est doctus vel Paulus e. d.* Contra Pressa in hac: *Duo et tria sunt quinque.*

Igitur Acceptio Disjunctiva et Acc. Simpl. communis etiam sunt termini Disparati. Concordant in Acc. confusâ, qualis est in subjecto hujus: *Aalteruter oculus etc.* Prior discordat in Acc. particulari: *Aliquis homo est doctus.* Posterior in Acc. quasi-universali: *Omnia elementa sunt quatuor.*

#### AD PAG. 215.

N. 1. Acceptio communis habet conjunctam Enumerationem. Quando habet conjunctam Enumerationem Copulativam, ipsa Copulativa vocatur. Sic *Homo* accipitur copulative, quando dico *Omnis homo est doctus*, item *Omnes homines sunt plus quam mille.* Quando habet conjunctam Enum. Disjunctivam, ipsa vocatur Disjunctiva; v. g. *Aliquis homo est doctus*, item *Aliquis homo requiritur ad loquendum.* Quando habet conj. Enum. Laxam, vocatur Acceptio Communior, eo quod inter communes frequentior sit; v. g. *Omnis homo est doctus*, item *Aliquis homo e. d.* Acceptio Communis, quando ei conjungitur Enum. Pressa, vocatur Simpliciter communis, eo quod inter communes sit rarior; e. g. *Omnes homines sunt plus quam mille*, item *Aliquis homo requiritur ad loquendum.*

Quando Acceptioni Communi conjungitur Enumeratio quae simul

fit et Copulativa et Laxa, tunc etiam Acc. illa non tantum Copulativa vocatur, sed etiam Universalis, et uno nomine Distributio. Unde quatuor sunt conditiones Distributionis: 1. vox debet accipi ordinarie, 2. communiter, 3. copulative, 4. communius, f. cum Enumeratione Laxâ.

Acceptio communis, quando ei conjungitur Enumeratio quae simul est Copulativa et Pressa, vocatur Acceptio Quasi-universalis; v. e. *Omnes homines sunt plus quam mille*, etc. Ejus etiam sunt quatuor conditiones: 1. vox debet accipi ordinarie, 2. communiter, 3. copulative, 4. simpliciter communiter f. cum Enum. Pressâ.

Quando A. C. habet conj. Enum. Disjunctivam et Laxam, vocatur Particularis, item Determinata; unde quatuor conditiones: 1. vox debet accipi ordinarie, 2. communiter, 3. disjunctive, 4. communius.

Quando Acceptio Communi conjungitur Enum. Disjunct. et Pressa, tunc illa Acc. vocatur Quasi-particularis, etc.

Universale dicit *Et* seu Enumerationem Copul. Particulare dicit *Vel* seu Enum. Disj. *Quasi* dicit Enumerationem Pressam. Omissio istius particulae Enum. Laxam.

Universalis Acceptio dicit singulos, Quasi-universalis dicit universos. Particularis admittit interrogationem *Quis?* Quasi-particularis non admittit illam.

Inter Acceptiones frequentissima est communis (sc. in scientiis, quae de singularibus non tractant). Inter communes frequentior est communior. Haec autem duplex est, universalis et particularis, quae ambae aequae frequentes sunt, sed in diversis locis altera earum alterâ naturalior est. In subjecto Affirmationis naturalis est Acceptio universalis (itaque illa semper ibidem est nisi amoveatur per notam *Aliquis*); in praedicato Affirmationis naturalis est Acceptio particularis. In Negatione haec convertuntur, et in subjecto Negationis naturaliter viget Acceptio particularis (itaque haec semper adest nisi excludatur per notam *Nullus*); in praedicato autem Negationis naturaliter viget Acceptio universalis.

Quando quaeritur, quomodo vox aliqua accipiatur, respondendum est per membrum aliquod Acceptionum quod ulterius non subdividitur in alia membra; talia autem sunt septem: Grammaticae, Logicae, Singulariter, Universaliter, Particulariter, Quasi-universaliter, Quasi-particulariter.

Ex his septem Acceptionibus exfurgunt totidem Propositiones; inter quas duae sunt Quantae, nempe Universalis et Particularis; quinque reliquae Non-quantae dicuntur. Et siquidem nota Quantitatis (*Omnis*, *Nullus*, *Aliquis*) non praefigatur expresse, sed tantum subaudiatur, vocantur Indefinitae.

Quaedam etiam Quantae sunt Naturales, quaedam Artificiales. Naturales sunt quarum subjectis vel nulla nota praefigitur (ut sunt omnes Indefinitae), vel illa praefigitur quae adest a naturâ (i. e. quae si verbo abfuisset, re tamen et sensu adfuisset); inde omnes universales Affirmantes et particulares Negantes, sive expresse Quantae fuerint sive Indefinitae, sunt propositiones Naturales. Propositio Artificialis est cujus subjecto nota Quantitatis praefigitur quae non inest a naturâ (i. e. si verbo abfuisset, re et sensu non fuisset subaudita); tales sunt omnes Affirmantes particulares omnesque Negantes universales.

## AD PAG. 218.

N. 1. Plures Termini uno et eodem loco sub eodem nomine convenientes non constituunt Homonymum. Sic *Homo* non est Homonymum quando dico *Omnis homo est doctus*; ibi tamen sub isto nomine plures termini sunt, nempe *Petrus* et *Paulus*, etc. Requiritur ergo ad Homonymum ut plures termini sic sub eodem nomine veniant, ut unus uno loco, alius alio loco veniat; adeoque nomen Homonymum ad minimum bis debet poni, saltem virtute. Quod addo quia, si quis dicat *Librum Petri divendi*, intelligens hoc de libro cujus Petrus est auctor, et audiens hoc accipiat de libro cujus Petrus est possessor, Homonymia erit in isto nomine *Liber Petri*, et tamen semel tantum expresse ponitur, dum virtute bis ponitur, semel apud loquentem, iterum apud audientem.

N. 2. Vox dicitur accipi Aequivoce, quando pluribus locis posita uno quidem loco accipitur pro aliquo, pro quo non accipitur alio loco; ut cum dico *Omnis homo est doctus*, ibi vox *Homo* aequivoce sumitur, priori loco enim pro omnibus hominibus capitur, posteriori pro duobus tantum. Vox autem dicitur Univoce capi, quando ubique capitur pro omnibus iisdem, ut hic: *Omnis homo est doctus* et *Aliquis homo est natus de virgine*. Homo enim utrobique capitur pro omnibus hominibus tantum diversimode enumerandis; quae diversitas hic non inducit diversitatem Acceptionis.



Nota igitur, quod diversitas Enumerationis nunquam inducat Aequivocationem, nisi simul inducat diversitatem rei acceptae. Quod addo propter Enumerationem Laxam et Pressam; cum enim Acceptioni communi adhaeret semel Enum. pressa et alias Enum. laxa, licet eadem omnia enumerentur, non est tamen Acceptio pro iisdem, sed pro diversis. Cum enim presse enumeramus, Acceptio fit pro multitudine vel multiplici; cum laxe enumeramus, Acceptio fit pro ipsis multis. Sic Aequivocatio committitur hic: *Omnis planeta est stella, omnes planetae sunt septem stellae, ergo quaedam [sic] planeta est septem stellae*; nam in majori *planeta* fumitur pro multis, in minori fumitur pro multitudine, quae licet illis multis constet, non tamen formaliter illa multa est. Sic etiam hic: *Navis est necessaria ad navigandum; cymba est navis, ergo cymba est necessaria etc.*; nam in majori fumitur pro multiplici *navis*, in minori pro multis disjunctive enumerandis.

## AD PAG. 219.

N. 3. Discrimen inter Aequivocum purum et Analogum: quod Analogum per omnes linguas solet diffundi (ut *Prata ridere* non tantum Latine dicimus sed etiam Belgice, etc.), Aequivocum autem purum unâ fere linguâ terminari solet (ut *Jus* Latinis aequivocum est, Belgis non item; *Licht* vero Belgis aequivocum, Latinis non item). Ratio hujus discriminis est, quod Analogum non fit vere Homonymum seu Aequivocum; in Analogo enim plures termini non veniunt sub eodem nomine (nisi forte quoad exteriorem apparentiam), sed sub diversis nominibus, unum nempe sub nomine solo, alterum sub eodem cum adjunctâ particulâ *Quasi*. Ut certa stella est *Sol*, *Christus* vero non est *Sol* nisi subauditâ vel additâ part. *Quasi*. Non est igitur mirum, Analogum vagari per omnes linguas, cum similitudo apud omnes nationes sit eadem.

N. 4. Haec species Analogiae non multum habet loci in Philosophiâ; Philosophi enim qua tales utuntur proprio sermone, non autem Tropis rhetoricis.

## AD PAG. 220.

N. 5. Haec Analogia apud Philosophos etiam viget; tenentur enim aliquando propter penuriam vocum, eandem vocem modo per actum, modo per potentiam, etc. capere, ut patet ex cap. 2. nostri libelli, ubi subjectum et praedicatum per actum, per habitum, etc. capi dicuntur.



N. 6. Quando terminus capitur Grammatice, tunc capitur pro suo nomine. Quando capitur Logice, tunc capitur pro themate (i. e. pro re quatenus certo modo significatâ per vocem). Quando fumitur ordinarie, tunc fum. pro re significatâ. Quando communiter, tunc pro multis; quando singulariter, tunc pro uno. Quando universaliter, tunc fumitur pro multis intercedente *Et*; quando particulariter, tunc pro multis interced. *Vel*. Quando quasi-universaliter, tunc pro multitudine; quando quasi-particulariter, tunc fumitur pro multiplici. Apparet igitur, vocem plerumque fumi pro aliis et aliis, et per consequens, vocem illam Aequivoce capi feu Homonymiam committi.

N. 7. Ex iis quae ad praecedentem n. notata sunt satis patet, Acceptionem universalem et particularem posse permutari inter se sine aequivocatione; sunt enim duae illae Acceptiones pro ipsis multis, ergo nulla erit ratio Homonymiae feu Aequivocationis agnoscendae.

Aliud est cum vox universaliter et quasi-universaliter capitur; eo enim casu uno loco pro multis, alio pro multitudine feu numero illorum capitur; unde hic Homonymia est: *Omnis Apostolus est homo* et *Omnes Apostoli sunt duodecim*. Similiter cum vox accipitur particulariter et quasi-particulariter; priori enim loco pro multis, posteriori pro multiplicitate eorum fumitur, ut hic: *Cymba est navis, et navis est necessaria ad navigandum, ergo cymba est n. ad n.*

## AD PAG. 221.

N. 1. Haec regula nullam habet exceptionem. Cum enim loquens absurde utitur vocabulis, reprehendi quidem potest ab audientibus, sed tamen audientes debent per vocabula hoc quod ipse velit accipere, et penes eam Acceptionem aut concedere aut negare quod dicit.

N. 2. Haec regula patitur aliquam exceptionem, et primum quidem irrefragabilem exceptionem facit prima regula; si enim loquens aliam quam communem et obviam Acceptionem dedit, standum est voluntati ejus. Secundo exceptionem saepe patitur haec regula a tertiâ regulâ, praesertim quando cum infirmioribus et non bene in Logicâ versatis agendum est; tunc enim contra communem et obvium sensum saepe stamus pro veritate propositionis quam loquens profert. Ut si dixerit, *Omnes homines esse in hoc conclavi*, capiemus subjectum universaliter, aut si dixerit, *Omnes homines non posse esse in hoc cubiculo*, capiemus quasi-universaliter, ut sic veritas asseratur propositioni. Tertio ex-

ceptionem valde magnam patitur secunda regula a quartâ; vix enim attendimus ad communem et obvium sensum, cum conformitas sermonis aliud requirit; v. g. si quis dixerit, *Gallum esse avem*, posteaque subsumat, *Ludovicum esse Gallum*, negabimus ei minorem propter conformitatem sermonis.

## AD PAG. 222.

N. 3. Haec regula etiam habet tres exceptiones. Irrefragabilem a primâ regulâ; frequentem a secundâ. Cum enim inter firmos versamur seu in Logicâ versatos, non favemus veritati dictorum ipforum (quod quodammodo Caritatis est), sed metimur dicta ipforum ad regulam communis sermonis communisque et naturalis intellectûs (quod quodammodo est rigidae Iustitiae). Tertiam exceptionem habet haec a quartâ regulâ; inter firmos perpetuam (inter hos enim Acceptiones aestimamus penes conformitatem sermonis, nunquam vero penes favorem veritatis), raram et fere nullam inter infirmos; horum enim dicta semper interpretamur in meliorem partem, conamurque ea quantum fieri potest verificare.

N. 4. Haec regula duas tantum habet exceptiones. Irrefragabilem a primâ regulâ, et aliquando benignam a regulâ tertiâ, quando cum infirmis agitur. Sed non videtur admittenda exceptio tertia, quae fieret per regulam secundam. Voces etiam quam maxime contra communem et obvium sensum interpretari solemus quando id postulat conformitas sermonis. V. g. quia in Logicâ nostrâ dicimus, terminos *concordes* esse qui in eodem subjecto conveniunt, hinc postea dicemus, *Hominem et Brutum non concordare*, etiam si juxta communem sermonem dicendum esset *concordare*, nam ambo sunt animalia, ambo sentiunt, etc.

## AD PAG. 224.

N. 1. Regulae speciales quae derivantur ex secundâ regulâ generali, hinc patiuntur easdem exceptiones.

N. 5. Nota *Omnis* saepe implicite praefigitur, sed nota *Nullus* nisi expresse praefigitur, non censetur absolute praefigi, (stando saltem in secundâ reg. generali, in qua stant hae regulae speciales). Igitur si dictum fuerit *Animal non est homo*, non subintelligitur *Nullum* sed *Aliquod*. Similiter si dicas *Bos non est mus*, etiam si nullus Bos sit mus, sensus tamen est, *Aliquem bovem non esse murem*.

N. 8. Nota *Aliquis* implicite praefigitur subjectis Negationum quando illis nulla nota expresse praefigitur; ut *Animal non est homo* idem est quod *Aliquod animal non est homo*. Cum enim *animal* ibi accipiat communiter seu pro multis (non enim ibi fermo est de uno aliquo animali) et multa illa enumeranda sint, debent ibi enumerari per *Et* aut per *Vel*. Sed, si numeres per *Et*, falsa reddetur propositio, cum tamen vera sit (quia haec falsa est: *Animal est homo*); igitur numerandum per *Vel*, adeoque efficitur sensus *Aliquod animal non est homo*.

In propositionibus autem Affirmantibus nota *Aliquis* nunquam subauditur subjecto (quamdiu sc. statuitur in secundâ reg. generali), nam *Animal est homo* perinde est ac *Omne animal etc.* (ut supra part. I., sect. I. cap. 2. n. 5.), cumque *Animal* ibi pro multis capitur, siquidem numeres per *Vel*, vera reddetur propositio; restat ut per *Et* numeres, quo posito exsurgit hic sensus: *Omne animal est homo*.

N. 11. Praedicatum Affirmationis universalis (i. e. constantis subjecto distributo seu universaliter sumpto) accipitur quidem particulariter (sicuti generatim per regulam decimam praedicatum Affirmationis accipitur particulariter), sed non semel accipitur particulariter, ast saepius. Quod intelligi poterit ex hoc schemate:

OMNIS HOMO EST ANIMAL, id est (primo): *Hic homo est an.*; id rursum est: *Vel hic homo est hoc animal, vel hic homo est illud animal;*

(secundo) *et iste homo est an.*; id rursum est: *Vel iste homo est hoc an., vel iste h. est istud an.*;

(tertio) *et ille homo est animal;* id rursum est: *Vel ille homo est hoc an., vel ille h. est istud an.*

Et sic porro pergendum in infinitum. Ubi vides, in singulis classibus, quae numero primo, secundo, tertio infinitae sunt, *Animal* accipi semel particulariter; adeoque in omnibus simul classibus, saepe usque in infinitum, particulariter accipitur. Non potest autem *Animal* in hac propositione *Omnis homo est animal* accipi semel tantum particulariter, quia tum sensus esset: *Vel omnis homo est hoc animal, vel omnis homo est istud animal, etc.*, qui sensus sine dubio falsus est, cum nullum sit Animal quod sit Omnis homo.



## AD PAG. 227.

N. 1. *Primum Axioma.* Sit subiectum A, Praedicatum B, et C dicatur de A; dico quod C etiam dicatur de B particulariter sumpto. Nam A concordat cum B (per leg. 3. pri.); igitur A dicitur de B particulariter sumpto (per leg. 1. post.); igitur B part. sumptum est subiectum et A praedicatum de ipso (per defin. Subj. et Praed.). Igitur et quod dicitur de A (per suppos.) etiam dicitur de B particulariter sumpto (per 1. Axiom. 1. Quadr.). Q. e. d.

Axiomata hujus secundi Quadrati etiam applicanda sunt ad terminos Convertibiles et Subalternos, sicut id fecimus circa Axiomata Secundi Quadrati, etc. Oportet autem supponere praedicatum capax.

## AD PAG. 228.

N. 5. Nota, omnia haec Axiomata supponere aliquam affirmationem primo loco positam; secundo vero loco incipere dispensationem ipso-  
rum Axiomatum, et tandem tertio loco finiri. Unde clare insinuantur tres propositiones in Syllogismis, quibus moderantur ista Axiomata.

Sed Axiomata duorum primorum Quadratorum supponunt primo loco Affirmationem Naturalem (i. e. eam quae subiectum suum secundum se adfert). Axiomata autem Appendicis supponunt primo loco Affirmationem Artificialem (i. e. quae Subjectum suum tantum designat per notam *Aliquis*). Cum enim Axiomata Quadratorum diserte loquantur de Subj. et Praed., utique oportet praecedere expresse vel implicite Affirmationem aliquam, in qua haec diserte reperiantur, i. e. Naturalem. Axiomata autem Appendicis loquuntur tantum de Terminis Concordibus, qui designantur per Aff. Artificialem; in hac enim tantum innuitur, terminos, qui abjectâ notâ *Aliquis* supersunt, concordēs esse, seu idem habere subiectum.

N. 5. et 6. Quia inter Terminos Concordes infimo loco censentur Disparati, hinc Axiomata Appendicis proprie quadrant in illos, atque sic accommodari possunt:

(1.) Quod dicitur de uno Disparatorum, dicitur etiam de altero particulariter sumpto. Ratio est, quia Disparati sunt Concordes. Sic sequitur *Bipes ambulat, ergo Aliquod Brutum ambulat*. Item: *Brutum est irrationale, ergo aliquod Bipes est irrat.*

(2.) Quod negatur de uno Disparatorum distributo, negatur etiam de altero. Sic sequitur: *Nullum Bipes est quadrupes, ergo Aliquoa*



*Brutum non est quadrupes. Item: Nullum Brutum est homo, ergo Bipes non est homo.*

Atque ita habentur in hisce Quadratis cum Appendice omnis Syllogismi, item omnia Enthymemata. Syllogismi in ipsis quidem Axiomatibus sunt, Enthymemata vero in applicationibus Axiomatum ad Terminos Convertibiles, Subalternos, etc.; quod ita esse monstravimus in Methodo nostrâ.

## AD PAG. 238.

N. 4. Ad partem Enunciationis Compositae duo requiruntur. 1. Debet esse Enunciatio (defectu hujus condicionis in hac compositâ: *Veni vidi*, pars non est *ego* aut *fuens veniens*). 2. Debet ea Enunc. expresse cum alia Enunc. exhiberi in Enunc. Compositâ (defectu hujus cond. *existi* non est pars illius *Veni vidi*, quia non ingeritur expresse in illa, sed tantum implicite, eo quod sequitur *Veni, ergo existi*).

Enunc. Comp. est plures formaliter ac expresse Enunciationes simul-sumptae. Dico *formaliter et expresse*, quia alioqui omnis En. effet Composita; vide n. 1. et 2. in Textu. Addo *quâ Enunciationes*, quia ad Enunc. Comp. non sufficiunt plures quomodocunque Enunciationes; si enim non ut Enunciationes, sed ut Subjecta et Praedicata, aut ut horum partes concurrerent, non constituerent Enunc. Compositam. Sic haec non est Composita sed Simplex: *Petrus est doctus non est Paulus est doctus*. Ex quo intelligis, etiam Negationem non debere compositam dici; etiamsi enim duplex sit Enunciatio, nempe Affirmatio inclusa et ipsa integra Negatio, tamen prior harum non ut Enunc. sed ut Subjectum concurrat.

Vides etiam hinc, Enunciationem Condicionalem non esse Compositam; duarum enim Enunciationum, quas expresse proponit, unam ut Subjectum, alteram ut partem Praedicati proponit. V. g. *Si cogito, sum*; sensus est: *Cogito infert Sum*, ubi proinde *Cogito* est subjectum, *Sum* autem pars praedicati.

Enunciatio autem Rationalis proprie est En. Composita, et quidem Copulativa, constans Antecedente tanquam unâ parte, et Enunc. condicionali, ex Antecedente et Consequente, tanquam alterâ parte. V. g. haec Enunc. Rationalis: *Cogito, ergo sum*, hunc habet sensum: *Et cogito et, si cogito, sum*, seu *Et cogito et hoc infert Sum* (s. *me esse*). Ex quo patet, in omni Argumento Rationali semper involvi

aliquod Arg. Condicionale, et proinde in Syllogismo Hypothetico directo primam praemissam redundare. Hinc si opponens Hypotheticum directum proposuerit, defendens tantum repetat posteriorem partem.

Dixeram etiam *Enunciationes simul-sumptae*, quia una Enunc. hodie et altera cras pronunciatae sine ulla simul-sumptione intellectûs nostri, non constituunt Enunciationem Compositam.

Ex his sequitur, omnem Enunc. Compositam esse Copulativam aut Disjunctivam. Cum enim intellectus noster plura simul sumit et enumerat, aut Copulative aut Disjunctive enumerat, ut supra satis ostensum est. Non licet hic autem alias species comminisci ob Enumerationem Laxam et Pressam; quia Enunciationes quâ tales (quae hic requiruntur) non possunt nisi laxe enumerari, semperque recedent a se mutuo integrâ et perfectâ sententiâ, cum ipsaemet integrae sunt et perfectae sententiae; ut proinde hic non debeat illa diversitas exspectari in Enunc. Compositis, quae ante se obtulit in Acceptio-nibus Communibus ab Enumerationum diversitate petita.

#### AD PAG. 243.

N. 3. Copula pura est quae se solâ non potest inducere veritatem falsitatemve in Enunciationem Compositam, sed tantum id praestat adjuta a veritate falsitateve alicujus partis. Copula autem impura est, quae se solâ veritatem, sine adminiculo partis verae, vel falsitatem, sine adminiculo partis falsae, inducere potest in Enunc. Comp. *Et* introducit veritatem non nisi cum adminiculo utriusque partis verae, falsitatem vero cum admin. etiam unius partis falsae. Oppositum fit in *Vel*, nam introducit veritatem cum admin. unius partis verae, falsitatem vero non nisi cum adminiculo utriusque partis falsae. Copulae purae tamen introducunt aliquando necessitatem atque impossibilitatem sine admin. partis necessariae vel impossibilis; ut haec necessaria est: *Sto vel non sto*; haec impossibilis: *Sto et non sto*; in hac tamen neutra pars imposs., in illâ neutra pars necess. est.

Impurae Copulae continent in se enunciationem aliquam; sunt enim verae vel falsae. Sic *Quia Aristoteles ambulavit, A. est doctus* falsa est, et falsitas omnis recumbit in copulâ *Quia*. Sic etiam *Quia Petrus est bos, P. est brutum* etsi falsa esse intelligatur, tamen veritas aliqua percipitur in copula *Quia*, et bene intelligimus, hanc non esse in causâ cur praedicta enuntiatio sit falsa. Idem facile videmus in notâ

*Ergo*; differunt autem istae duae notae, quod *Quia* antecedentis, *Ergo* consequentis nota est; sufficit autem alterutram notam apponere. Quando *Ergo* simul cum condicionali copulâ reperitur, potest etiam e medio loco revelli, ut hic: *Si sto, stare possum*, potest *Ergo* implicite positum e medio revelli, hoc modo: *Ergo stare possum, si sto*. Ex quo patet, quod *Si* et *Ergo* inter se conjuncta in eâdem Enunc. Compos. possunt quidem ambo seorsim revelli e loco medio, sed ita ut, cum unum antrorsum revellitur, alterum ad medium deturbetur et contra, observato ut mutetur ordo extremorum.

Quia autem enunciationem in se continent Copulae Impurae, omnis autem enuntiatio re ipsâ est Affirmatio (part. 2. sect. 1. cap. 1. n. 5.), hinc etiam in copulis imp. subjectum et praedicatum designari debent. Quod quia primâ fronte paradoxon videtur, hinc Logicis agnitae non fuerunt, et ignorantia Impuritatis istarum copularum totam iis abstulit Enunc. Compositae veram doctrinam. Composita namque Enunciatio non nisi Copulativa Disjunctivave esse potest; quod illi non animadverterunt ob alias illas copulas grammaticales, quas non minus veras atque puras quam *Et* et *Vel* arbitrabantur. *Quia est, cogitat*; ibi in *Quia* continetur haec affirmatio (quae et praedictam enunc. falsam reddit): *Existere infert Cogitare in eodem*. Similiter *Est, ergo cogitat*, ubi in *Ergo* continetur haec affirmatio: *Cogitare sequitur Esse in eodem*.

Quia etiam impurae sunt hae copulae, necessum est ut equidem puram copulam involvant (quia impurum non est aliud quam purum cum aliquo alio). Dicimus ergo quod involvant copulam *Et*, et proinde five Causalis (cujus copula est *Quia*) five Rationalis Enunciatio (cujus copula est *Ergo*) revera sunt Enunc. Copulativae; ut *Cogito, ergo sum* sic resolvitur: *Et cogito, et ex Cogito sequitur Sum*. Idem facile ostenditur in Causali.

Sed difficultas manet circa Copulam Condicionalem, quam non possumus recte dicere esse Cop. Impuram, cum nullam involvat Puram; neque enim *Et* neque *Vel* in *Si* reperiuntur. Dico ergo, *Si* non esse absolute Copulam, sed verbum grammaticum contractum, acsi diceretur *Sequitur*; veluti *Si cogitat, est*, id est *Sequitur ex Cogitat Est*. Ex quo rursus clare patet, Enunc. Condicionalem esse Simplicem tantum Enunciationem.

Duae ergo sunt Copulae Purae: *Et* (quae pertinet ad totum actuale)



et *Vel* (quae pert. ad totum potentiale); duae etiam Copulae Impurae, quae non tam reapse (ambae enim consequentiam notant) quam connotato (antecedente vel consequente) differunt, nempe *Ergo* et *Quia*, quarum proinde etiam altera redundat. Manent tres tantum in universum Copulae Grammaticales, quibus accedens Cop. Verbalis *Est* quaternarium numerum absolvit.

## AD PAG. 247.

N. 2. In Propositione Relativâ duo verba reperiuntur: Verbum Relationis (quod proprium est particulae *Qui*) et Verbum Propositionis (quod remotius est ab illâ particulâ). Cum V. Rel. praecedit, propositio relativa dicitur Relati Subjecti; cum sequitur, Relati Praedicati.

Implicite Relativa vel est cum verbo Relationis puro (ut *Homo albus non debet esse albus* juxta sensum in quo vera est, hunc nempe: *Homo ille qui albus est*, puta *Petrus*, *non debet esse albus*), vel cum V. Rel. modificato (v. g. *Petrus est brutum non album*; sensus enim est: *P. est brutum quod non est album*). Atque illa quae posterioris generis est, vocatur apud Logicos propositio Infinita. Nota incidenter, hanc propositionem *Homo albus etc.* habere duos sensus, in quorum altero vera sit, in altero falsa (juxta quem sc. non exponitur relative). Priorem vocant Logici sensum divinum, posteriorem compositum.

## AD PAG. 249.

N. 1. Cum Propositio Quanta debeat constare Subjecto sumpto communius, et ad Acceptionem Communiorem tres condiciones requirantur (1°. ut sit ordinaria, 2°. communis, 3°. laxa), hinc per primam cond. excluduntur duae propositiones, nempe Logica (v. g. *Mus subjicitur Animalî*) et Grammatica (v. g. *Mus est syllaba*); per secundam cond. excluditur Singularis (v. g. *Petrus est homo*); per tertiam excluduntur rursus duae, nempe Quasi-universalis (v. g. *Omnia elementa sunt quatuor*) et Quasi-particularis (v. g. *Aliqua navis est necessaria ad navigandum*). Adeo ut in universum quinque sint propos. Non-quantae, et duae Quantae, nempe Universalis et Particularis.

N. 2. Nota bene, has non esse propos. ejusdem quantitatis: *Omnis homo est doctus* et *Omnia elementa sunt quatuor*; nec illas: *Aliquis homo est docendus* et *Aliquis homo requiritur ad docendum*. Similiter non sunt diversae quantitatis, quarum altera est universalis, altera quasi-particularis, aut altera quasi-universalis, altera particularis. Unde



etiam patet, multas esse propositiones quae nec ejusdem nec diversae sunt quantitatis; sicut Homo et Lapis nec recte eadem, nec recte diversa cogitare dicuntur, sive nec ejusdem nec diversae cogitationis esse, quia Lapis nullius est cogitationis.

AD. PAG. 250.

N. 3. *Prima Regula*: In universali negativâ utrumque extremum distribuitur. Haec regula complectitur duas regulas speciales, nempe quintam et septimam quas vide pag. 225. *Nullus Homo est Brutum*; ibi *Homo* distribuitur, nam sensus est: *Et hic homo non est br., et iste homo non est br., etc.* Sed et *Brutum* distribuitur, nam sensus est: *Et nullus homo est hoc br., et nullus homo est istud br., etc.*

*Secunda Regula*: In Universali Affirmativâ solum Subjectum distribuitur. Subj. distribuitur per regulam quintam; praedicatum non distribuitur, sed accipitur particulariter, et quidem saepius particulariter, per regulam decimam et undecimam. Rursum igitur Secunda Regula complectitur duas regulas speciales.

*Tertia Regula*: In Particulari Negativâ solum Praedicatum distribuitur. Praedicatum quidem per regulam septimam; Subjectum vero non distribuitur sed accipitur particulariter per regulam octavam.

*Quarta Regula*: In Particulari Affirmativâ neutrum extremum distribuitur. Non Subjectum; vide regulam octavam. Non Praedicatum; vide regulam decimam. Singulae ergo hae Regulae complectuntur duas speciales, et fere continent totum quod de Acceptionibus dicendum est, modo sc. stetur in Acceptionibus magis usitatis.

N. 4. Propos. Indefinita, cum est Affirmativa, habet sensum propositionis Universalis. Demonstratur ex primo Ax. primi Quadrati, nam illud Axioma indefinite loquitur proponitque omnes propositiones Aff. Indefinitas. Cum igitur Axioma sit verissimum (quod patet ex ejus demonstratione), necessum est, Indefinitis Affirmantibus accommodare sensum Universalem; si enim particularem aliquam facies, corrumpet Axioma. V. g. *Homo est animal, et animal est bos, ergo homo est bos* procedit juxta primum Axioma, et secunda prop. etiam erit vera, si indefinitae propp. habent sensum particularem; itaque notus syllogismus erit bonus (utpote Axiomati irrefragabili conformis), et quidem praemissae erunt verae, consequens autem manifeste falsum; quod est absurdum, cum ex vero non nisi verum sequatur, et ante-

cedens non possit esse verum consequente falso, ut infra demonstrabitur.

## AD PAG. 251.

N. 5. Hic jam tradere possumus modum contradicendi (qui est unum ex Logicae capitibus). Igitur Enunciatio aut est Simplex aut Composita.

Composita vel habet Copulam Puram vel Impuram. Si Puram, geminamus eam et primo loco praefigimus ei adverbium negandi. V. g. *Sto et loquor*; contradic: *Non et sto et loquor*. Si vero habeat cop. Impuram, revellimus eam e medio (si revulsa non sit), mutando simul ordinem extremorum. V. g. *Sto si stare possum*; contradic: *Non si stare possum, sto*. Male contradicit vulgus *Petrus est homo et Petrus est brutum* hoc modo: *P. non est homo et P. non est brutum*, utraque enim illa composita est falsa; item *P. est h. vel P. est br.*, mala contradictio *P. non est h. vel P. non est br.*; utraque enim enunciatio composita est vera.

Si vero enunciatio Simplex fuerit, vel est Quanta vel Non-quanta. Si Non-quanta, contradicimus ei applicando adverbium negandi *Non* ad copulam verbalem *Est*. V. g. *Homo est secundae declinationis* (haec est propositio grammatica); contradic: *Homo non est sec. decl.* Item *Homo subjicitur bovi* (haec logica); contradic: *Homo non subj. b.* Item *Petrus est doctus* (haec singularis), etc. Si vero propof. Quanta fuerit, vel est expresse Quanta, vel Indefinita. Expresse quantis contradicimus praefigendo negationem notae quantitatis; v. g. *Omnis homo est doctus*; contradic: *Non omnis h. e. d.* Item *Aliquis homo est bos*; contradic: *Non aliquis etc.* Item *Nullus homo est doctus*; contradic: *Non nullus etc.*

Ubi bene notandum est et cavendum, ne Quasi-quantis eadem formâ contradicamus; siquidem *Aliqua navis est necessaria etc.* et *Non aliqua* (seu *Nulla*) *navis est necess.* etc. non sunt contradictoriae, quia ambo sunt simul verae; item *Omnia elementa sunt quatuor*, etc.

Quantis Indefinitis contradicimus eadem formâ quâ Non-quantis, sed non eodem sensu. V. g. *Animal est homo*; contradic: *Animal non est homo*, ubi sensus similis seu ejusdem farinae cum Quantis; nam *A. est h.* perinde est ac *Omne a. est h.*, et *A. non est h.* perinde est ac *Non omne a. est h.*, seu *Aliquod a. non est h.*

## AD PAG. 255.

N. 4. Enunciatio Modalis (feu Affirmatio de Affirmatione) constat Modificatâ tanquam subjecto, et Modo tanquam praedicato. Sicut enim Praedicatum fumitur per Actum, per Potentiâ, etc. (cap. 2. hujus libelli), sic etiam Modus fumitur. Unde, cum dico *Sto est lapis*, ibi quidem *Lapis* est modus actu, item potentiâ (nam affirmatur de Affirmatione), sed non dignitate. Modus vero potissimum fumitur per dignitatem, sicut et Praedicatum, atque adeo Modus, per dignitatem, est omne id quod de Affirmatione affirmare possumus in Aff. verâ; proinde tales Modi sunt *Verum*, *Falsum* seu *Non*; item *Certum*, *Dubium* seu *Forfitan*; item *Neceffarium*, *Possibile*, *Impossibile*, *Contingens*; item *Sequens* aut *Inferens*. Ex quo ultimo patet, Enunciationem Condicionalem non esse Compositam, ut prima fronte videtur, sed Simplicem, et quidem Modalem. Nam *Si sto, stare possum* est Affirmatio de Affirmatione *Sto*, nempe quod inferat istam aliam *Stare possum*.

Formaliter Modalis est, quae affirmat de Aff. per adverbium praefixum copulae suae. V. g. *Petrum esse bovem est falsum*, haec est Modalis realiter (absolute enim est Aff. de Aff.), sed non est Mod. formaliter, quia non affirmat per adverbium praefixum copulae; sic igitur reddes Mod. form.: *Petrus non est bos*. Sic nec ista modalis est: *Omnis homo possibiliter est in hoc conclavi*, copula enim Quantarum continetur in notâ quantitatis Subjecto praefixâ. Sic igitur modalem facies: *Possibiliter omnis homo est in hoc conclavi*, quae falsa est, cum praecedens vera foret.

Magnopere igitur distinguendum est inter Enunc. Modalem et Enunc. constantem partibus modalibus; nam ipsa Enunc. non censetur modalis, nisi Modus cadat in ejus Copulam; ita ut ad rem non faciat si cadat aut non cadat in copulas partium ejus. Unde haec non est modalis: *Possibiliter curro et possum non curro*; sic modalis efficitur: *Possib. et curro et non curro*, quod falsum est cum praecedens illud verum esset.

Quando Modus cadit in copulas partium, Logici vocant sensum divisum; quando vero cadit in copulam ipsius Enunc., vocant sensum compositum. Nec differt re ipsâ a pressâ et laxâ nostrâ Enumeratione, de quâ actum antehac; in sensu enim composito pressâ enumeratio



est, praecedentibus partibus tanquam uno subiecto, et sequente Modo tanquam praedicato; in sensu diviso autem laxa enumeratio est, praecedentibus partibus tanquam subiectis multis, et cum singulis conjuncto Modo tanquam praedicato saepius repetito.

Enunc. Modalis dicitur etiam habere sensum Compositum et Divisum, quando sc. Quanta est. Sensus compositus Modalis Quantae est juxta quem modus intelligitur cadere in copulam grammaticalem inclusam in notâ Quantitatis. Ut *Impossibiliter aliquod animal est homo*; sensus compositus est juxta quem modus *Impossibiliter* cadit in *Vel* inclusum in notâ *Aliquod*, in quo sensu propositio vere quidem modalis est, sed et falsa. Sensus autem Divisus est quando modus intelligitur tantum cadere in copulas verbales partium; sic *Aliquod animal impossibile est homo* sensus divisus est, in quo sensu propositio vera quidem est sed non modalis. Ex quo vides, solum in sensu composito Quantas pertinere posse ad Enunc. modales. Vides etiam, saepe veram esse in sensu diviso, quae in sensu composito falsa est (ut patet in exemplo proposito; saepe contra, ut hic: *Infallibiliter alterum est verum, sc. cras pluet aut non pluet*. Potest etiam subinde fieri ut in utroque sensu vera sit vel in utroque falsa, ut ista: *Necessario omnis homo est animal*, et haec: *Animal necessario est homo*.

Patet etiam, in sensu Composito pressam fieri Enumerationem, in Diviso laxam; nam in Comp. plures propositiones numerantur tanquam partes subiecti intercedente *Et* aut *Vel*, Modus autem quoad sensum sequitur ex parte praedicati, quae enumeratio (cum non fit enunciationum ut enunciationum) necessario pressa est; in sensu autem Diviso plures enunciationes qua tales intercedente *Et* aut *Vel* enumerantur, ut videre potes in exemplis antepositis.

Et nota, generatim enumerationem Laxam apud Logicos revocari ad sensum Divisum, Pressam ad Compositum, ut *Aliqua navis est necessaria etc.* verum est in sensu Comp., falsum in sensu Diviso; similiter *Omnia elementa sunt quatuor*, etc. Sed etiam sensum Comp. atque Div. agnoscunt in propositionibus constantibus Adjectivo Contingenti tanquam subiecto, ut *Album non debet esse album*, ubi sensus divisus est, juxta quem *Album* relative intelligitur, et intercedente *Qui* divisum a subiecto suo; ut *Ea res quae est alba* (puta paries quispian) *non debet esse alba*, qui proinde sensus verus est. Sensus



autem Compositus est, juxta quem non diffungitur subjectum intercedente Relativo *Qui*, sed potius conjungitur et replicatur intercedente particulâ *Dum*, hoc modo: *Album dum est album non debet esse album*, in quo proinde sensu falsa est praedicta propositio. Simi ter facile sensum Comp. et Div. hujus generis agnosces in istis: *Seiens potest stare*; *Quicquid est, necessario est*, quarum prior vera est in sensu diviso, falsa in sensu composito, posterior vice versâ.

## AD PAG. 258.

N. 2. Bene notandum est, quod *Neque* non est *Non et* (ut alioqui ad verbum sonare videtur), sed idem est atque *Et non*; nam *Non et* idem est atque *Vel non*, ut patebit ex schemate Reductionum. Idem notandum est in particulâ *Nisi*, quae non est *Non si*, sed *Si non*. Et nota hic generalem Dialecticae admonitionem, diligenter attendendum ad illas particulas, quae cum exteriori apparatu non multum differant, altera tamen veritatis, altera falsitatis auctor esse in oratione potest; contingunt enim hinc facile fraudes in sermone, et gignuntur errores in animo.

N. 3 et 4. Negatio non potest cadere nisi in Enunciationem; nihil potest dici *Non* seu *Falsum* praeter Euunciationem, per hanc, quae apud omnes Logicos exstat, definitionem Enunciationis: *est dictio vera vel falsa*. Talis ergo Negatio Infitans, qualem communis Logicorum schola obtrudit, quae proprie in Substantivum aliquod, Adjectivum, vel Adverbium cadat, est impossibilis. Semper ergo cum *Non* pronunciatum fuerit, siquidem id rite factum fuerit, seu bono sensu, semper inquirenda est Enunciatio seu Affirmatio in quam illud *Non* cadat. V. g. *Non docti saepe sunt non probi*, ubi sensus relativus primum assignandus est, sc. *Illi qui non sunt docti saepe etc.*, et prius *Non* intelligitur cadere in copulam Relationis, et per consequens in partes hujus Quantae particularis: *Quidam sunt docti*, quae partes omnes sunt enunciationes. Posterius vero *Non* revellendum est a praedicato, juxta regulam pag. 267 n. 4., hoc modo: *Qui non sunt docti, saepe non sunt probi*, ubi posterius *Non* incidit in copulam propositionis, et per consequens in hanc Enunciationem: *Qui non sunt docti, sunt probi*. Videtur aliquando quidem negatio cadere in alium modum Enunciationis, v. g. *Petrus non necessario currit*, sed hoc non est ita, cadit enim in Enunc. Modalem constantem Modifi-

catâ et isto Modo *Neccessario*; nam haec Enunc. ibi falsa dicitur: *Petrum currere est neccessarium*, pro quo nota quod Modus semper habeat implicate conjunctam copulam verbalem seu verbum *Est*, mediante quo connectitur cum suâ Modificatâ, atque ita in Modali ad minus reperiuntur duae copulae. Subinde autem plures, cum pluribus modis modalem esse contigerit. Singuli enim Modi suam copulam habent, mediante quâ connectuntur in diversis Modificatis; ut *Petrus impossibiliter est bos*, i. e. *Petrus est bos est possibile est falsum*; et adhuc plures esse possunt, v. g. *Petrus evidenter impossibiliter est bos*.

AD PAG. 262.

N. 5. Certum est, ad Enunciationem Negativam requiri, ut Copula ejus afficiatur Negatione; nequaquam autem sufficere, ut Copulae partium ejus Negatione afficiantur. Hinc neccessum est dicere, illas quas in scholis vocant Universales Negativas et Particulares Negativas, Negativas non esse, sed Affirmativas ex partibus negativis. In argumentis tamen, ubi Antecedens vel Consequens, vel praemissam Antecedentis aut submissam Consequentis constituunt, merito Negativae vocantur, non in ratione Enunciationis, sed in ratione Antecedentis et Consequentis. Nam ad Antecedens negativum (ut pag. 316 in cap. de Argum. Uniformi et Bif. vidimus) sufficit, unam praemissam esse negativam, similiterque ad Consequens neg. sufficit, unam submissam esse neg. Unde hic: *Nullus homo est doctus, ergo Petrus non est doctus*, Antec. negativum est, non in ratione Enunc. sed in r. Antecedentis; habet enim quam plurimas praemissas, quae omnes sunt negativae. Atque sic lis illa composita videtur, quae inter nos et scholas de Enunc. Neg. erat; nobis quidem nullam contendentibus esse Negativam Enunc. cujus copula a negatione sit immunis, illis contra negativas quasdam volentibus, quarum non ipsarum copulae, sed dumtaxat copulae partium negatione afficerentur.

AD PAG. 266.

N. 2. Nota bene: *Duplex Negatio facit Affirmationem*, sed non negatio repetita. Haec enim non affirmat, sed fortius negat, ut *Non, non faciam*. Unde commate interjecto distinguitur. Duae Negationes se mutuo proxime quoad sensum sequentes habent se sicut *Falsum est falsum esse*. Affirmatio duplicem infert Negationem.

Petes forte: quid faciet duplex Affirmatio. Resp. Facit Affirma-

tionem, et quidem aequivalentem simplici. Negatio enim non negat se, sed Affirmatio affirmat se. Hinc obiter moneris, ut caveas tibi ab obscuro aliquo fonte errorum, qui plurimos adhuc latere videtur; nempe quadrare homines amant, et observantes forte, duplicem Negationem facere Affirmationem, praecipitanter dicunt aut existimant, pariformiter jam etiam duplicem Affirmationem facere Negationem; et quia Affirmans et Affirmata sententia sunt idem, quadrandi studio longius quam veritas finit abducti, dicunt etiam Negantem et Negatam idem esse. Hunc Genium sic quadrandi et ornandi omnia vocavi in Saturnalibus meis Mangonem, et ostendi plurimorum in Philosophiâ errorum causam esse.

## AD PAG. 276.

N. 2. Antecedens est Enunciatio quae dicit totum quod dicit aliqua alia enunciatio, seu Enunc. quae continet aliquam aliam. Consequens vero ea est, quae sic continetur in aliâ enunciatione.

## AD PAG. 278.

C. VIII. 1a *Proprietas*. Antecedens dicit, suum Consequens esse verum. — Consequens enim dicit se esse verum (nam omnis Enunciatio, cf. pag. 234). Antecedens autem dicit omne quod Consequens (per defin. Anteced.), ergo dicit suum Conf. esse verum; q. e. d.

2a *Proprietas*. Fieri non potest ut Antec. sit verum et Conseq. falsum. — Antec. enim dicit, suum Conf. esse verum (per 1. propr.); si ergo Conf. non sit verum, sed falsum, mentitur Antec., ergo et ipsum erit falsum.

3a *Proprietas*. Quandocunque Antec. est verum et Conf. etiam est falsum, Antec. etiam est falsum. — Alias enim habebitur Antec. verum et Conf. falsum, quod est contra secundam propr.

4a *Proprietas*. Fieri potest ut Anteced. sit falsum, Conf. verum, ut hic: *Duo et tria sunt sex, ergo duo et tria non sunt septem*; et hoc satis demonstratum est, nam posse satis demonstratur per unum actum.

## De Contradictione.

Contradictoria seu Contradictio non est aliud quam Enunciatio falsa. V. g. contradictoria hujus: *Sto* non est aliud quam ea ipsa falsa seu *Non sto*.

Enunciationibus singularibus et quasi-singularibus contradicimus praefigendo adverbium negandi copulae verbali. V. g. *Petrus est doctus*; contradic: *P. non est d.* Item *Omnes apostoli sunt duodecim*; contradic: *Omnes ap. non sunt duod.* Item *Aliquis homo requiritur ad cursum*; contradic.: *Aliquis h. non req. etc.*

Modalibus contradicimus Negationem proxime praefigendo ipsi modo seu adverbio quo modales redduntur; ut: *P. non est necessario doctus*, non autem sic: *P. necessario non est doctus.*

Quantis contradicimus Negationem praefigendo notis illis *Omnis*, *Nullus*, *Aliquis*. Quod si Quantae fuerint Indefinitae ut vocantur, seu Naturales ut nos vocamus, contradicimus eadem formâ quâ singularibus et quasi-singularibus, nam *Homo est doctus* perinde est atque *Omnis homo est doctus*, et *Homo non est doctus* perinde est atque *Aliquis homo etc.*

Quod si Quantitas simul et Modus in propositione fuerint, praefigenda est negatio ei quod inter duo ista praecedat. V. g. *Omnis homo possibiliter est in hoc conclavi*; contradic: *Non omnis homo etc.* Sed *Possibiliter omnis homo est etc.*; contradic: *Non possibiliter omnis homo etc.*

Denique Enunciationibus Compositis contradicimus praefigendo negationem copulae grammaticali; quae si sit *Et* aut *Vel*, geminamus illam, ponimusque *Et* initio simul et medio, eique primo loco positae negationem praefigimus, hoc modo: *Sto et loquor*; contradic: *Non et sto et loquor*. Si vero copula sit *Si* aut *Quia*, siquidem ponatur primo loco, simpliciter negationem ei praefigimus; v. g. *Si cogito, sum*; contradic: *Non si cogito, sum*. Si vero copula sit in medio, ipsam cum parte eam sequente ponimus ante partem priorem; v. g. *Aristoteles est doctus quia saepe ambulavit*; contradic: *Non quia saepe amb., A. est doctus.*

#### Prosecutio Proprietatum Consequentiae.

Cum Contradictio non sit aliud quam enuntiatio falsa, sequitur jam facile

5a *Proprietas*. Ex Contradictione Consequentis sequitur Contrad. Antecedentis, per 3am propr.

6a *Proprietas*. Cum una Enuntiatio non inferat alteram, Contradictio



hujus non inferat Contradictionem istius. — Si A non inferat B, C (quae sit contradictio ipsius B) non inferet D (quae sit contrad. ipsius A). Si enim C inferret D, etiam inferret B, per 5am propr. C enim esset Antecedens et D Consequens, ergo contrad. hujus (nempe A) inferret contrad. antecedentis (nempe B); cum enim C supponatur esse contradictio ipsius B, etiam B erit contradictio ipsius C (et idem dic de A et D). Contradictio enim est mutua; sed hoc jam demonstrandum est.

7a *Proprietas*. Contradictio est mutua, id est, si una Enunciatio contradicat alteri, altera vicissim contradicit priori. — Sint A, B, et A contradicat ipsi B, dico quod B contradicat ipsi A. A enim dicit B esse falsum (per defin. Contradictionis), sed B dicit se esse verum (per superius demonstrata); ergo dicit, A esse falsum, et sic est contradictio ipsius A (per defin.).

8a *Proprietas*. Consequens Consequentis est etiam Consequens Antecedentis. — Sit Antecedens A, Consequens B, et Conf. ipsius B sit C, dico quod etiam sit Consequens ipsius A. A enim dicit totum quod dicit B (per defin. Antec.) et B dicit totum quod C; ergo etiam A dicit totum quod dicit C; adeoque A est Antecedens ipsius C, C vero Consequens ipsius A; q. e. d.

9a *Proprietas*. Antecedens Antecedentis etiam est Antecedens Consequentis. — Simili modo demonstratur.

Ex his facile sequuntur haec: Quod non est Consequens Antecedentis, non est Consequens Consequentis. Item: quod non est Antec. Consequentis, non est Antecedens Antecedentis (per propr. 5.). Adeoque perfectum est 3um Quadratum; 4um autem habuimus reapse.

#### AD PAG. 321.

N. 3. Prima consideratio est cum omnes termini distribuuntur in argumento, ut hic: *Nullus homo est bos, ergo Nullus bos est homo*. In tali argumento nullum potest esse peccatum contra hanc regulam, cum regula clare supponat Non-distributum.

Secunda consideratio est cum nullus terminus distribuitur in argumento, ut hic: *Aliquod brutum est bipes, ergo Aliquod bipes est brutum*; et similiter hic nullum potest esse peccatum contra hanc regulam, quandoquidem regula clare supponat Distributum.

Tertia consideratio est cum in Antecedente aliquid distribuitur, in

Consequente vero nihil; et iterum non potest hic esse peccatum, quandoquidem regula supponat Distributum in Consequente. Hinc in isto argumento ac similibus nullum est periculum peccati contra hanc regulam: *Homo est animal, ergo Aliquod animal est homo.*

Hinc sequitur: Quando in argumento aliquo omnes sunt Universales Negativae, aut Particulares Affirmativae, aut saltem Consequens est Part. Affirmativum, nullum esse periculum peccandi contra hanc regulam.

Quarta consideratio cum in Consequente aliquid distribuitur et nihil in Antecedente; quo casu oportet adhuc distinguere, et videre num illud, quod in Conf. distribuitur, etiam reperiatur in Antecedente. Si enim ibi etiam reperiatur, necessario peccatur contra regulam; si vero non reperiatur, non peccabitur, ut hic: *Petrus est homo, ergo Petrus non est bos*; ibi enim in Conf. distribuitur *Bos*, in Antec. nihil distribuitur, et tamen non vitiatur regula.

#### AD PAG. 336.

N. 3. Prima Regula: *Ne tres propositiones etc.* Syllogismus est argumentum formale; requiritur ergo ut in formâ ejus non possit poni Impudentia. Sed si sumpseris omnes propositiones, necessario suborietur Impudentia, fumendo duas extremitates convertibiles inter se, repugnantes cum medio (capiendo v. g. *Hominem* et *Rationale* tamquam extremitates, *Lignum* vero tanquam medium). Hae enim extr. cohaerebunt negative cum medio quomodocunque (id est, in quacunque figurâ, item sive universaliter sive particulariter procedendo); adeoque exhibebunt duas praemissas veras, seu Antecedens syllogismi verum; Consequens tamen necessario erit falsum. Cum enim in Consequente tantum reperiuntur duae extremitates, atque hae sunt convertibiles inter se, non poterunt cohaerere inter se negative, adeoque necessario exhibebunt Consequens falsum, adeoque absoluta erit Impudentia, Antecedens verum et Consequens falsum.

Secunda Regula: Syllogismus debet esse Uniformis. Haec regula quodammodo duas complectitur, sc. ne sit Difformis, et ne sit Deformis.

Si enim esset Difformis, necessario poneretur Impudentia in tribus terminis convertibilibus inter se (v. g. *Homo*, *Rationale*, et *Risibile*). Extremitates enim cohaererent cum medio affirmative quomodocunque, eadem vero non poterunt quadrare in Consequens negativum, cum

sint etiam convertibiles inter se, adeoque in istis terminis erit necessario Antecedens verum et Conf. falsum.

Syllogismus non potest esse Deformis; et hoc etiam quodammodo duas regulas involvit, sc. Non potest habere utramque praemissam negativam conclusione affirmativâ, et Non potest habere alteram praemissam aff. alteram negativam conclusione affirmativâ. Quantum ad priorem partem, si Syllogismus esset Deformis cum utrâque praemissâ negativâ, necessario poneretur Impudentia in tribus terminis omnibus inter se repugnantibus (v. g. *Homo*, *Lapis*, *Lignum*). Quantum ad posteriorem partem, si Syll. esset Deformis cum unâ tantum praemissâ negativâ, poneretur Impudentia capiendo duas extremitates, quarum altera repugnet, altera convertatur cum medio (v. g. extremitates sint *Bos* et *Homo*, medium vero *Rationale*); adeoque exhibebunt Antecedens Syllogismi verum, Consequens autem necessario falsum erit, nam erit affirmativum (utpote Conf. argumenti Deformis), et recipiet inter se duos terminos repugnantes (nam quod repugnat uni convertibilium, etiam repugnat alteri, cum convertibiles quodammodo eidem sint); qui non possunt quadrare in affirmationem veram quomodocunque.

Tertia Regula: Medium debet distribui etc. Syllogismus est vel affirmativus vel negativus. Jam enim demonstratum est, ipsum non posse esse biforem. In Affirmativo medium distribui debet, quia alias ponetur Impudentia in duabus extremitatibus repugnantibus inter se et subalternantibus medio (v. g. sint hoc extremitates: *Mus*, *Bos*, et hoc medium: *Bestia*); hae enim extr. cohaerebunt affirmative cum medio particulariter sumpto quomodocunque, adeoque exhibebunt praemissas affirmativas veras; eadem in conclusionem affirmativam (quandoquidem inter se repugnant) quadrare non poterunt, adeoque exhibebunt conclusionem falsam.

Si vero Syllogismus Negativus fuerit, tunc tamen una praemissâ ejus erit affirmativa (ut demonstratum pag. 337 n. 5.), adeoque ponetur Impudentia in duabus extremitatibus convertibilibus inter se et subalternatis medio (v. g. sint hae extrem.: *Animal*, *Sentiens*, et hoc medium: *Vivens*), nam utraque extremitas cohaerebit affirmative cum medio partic. sumpto, sive ex parte subjecti sive ex parte praedicati; altera vero seu restans extr. cohaerebit negative cum medio

posito ex parte subjecti et partic. sumpto (medium enim eo casu non poterit poni loco praedicati, quia sic distribueretur, adeoque suppositum everteretur). Eaedem extremitates, utpote convertibiles inter se, quadrare non poterunt in conclusionem negativam, adeoque exhibebunt Antecedens verum et Consequens falsum; q. e. d.

---









# Date Due

W(LKEU)			
3245678			
8/24/07			
2 of 3			
Demco 293-5			

3 5282 00153 5635



CLOSED

B3903  
1891  
vol.1

2

v.1

~~11~~

Seminar III



